

UTL AT DOWNSVIEW



D RANGE BAY SHLF POS ITEM C
39 10 11 05 06 004 1

DR
440
A33

Ahmet Mithat
Ka'ināt

v.1
pt.15
v.2
pt.1

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

I. Kusmri, 15 uld
II, , 1 4

Ahmet Mithat, 1844-1912
Kā'ināt

کائنات

کتابخانه تاریخ

« برنجی قسم »

اولان اورو پانک اون بشنجی جلدی

« وایکنجی قسم »

اولان آسیانک برنجی جلدی

DR

440

A.33

دولت عثمانیه

v. 1

pt. 15

v. 2

pt. 1

محرری

احمد مدحت

« ترجمان حقیقته » تفرقه اولهرق درج و نشر
اولندوقن صکره آیر یجه کتاب اولهرق طبع اولغشدر

استانبول

۱۲۹۸

OCT 19 1965

UNIVERSITY OF TORONTO

1015451

عثمانی تاریخی

هرهانیکی مؤلف مکمل بر عثمانلی تاریخی تنظیمه
 موفق اولور ایسه مدنیت عمومیء عالمک مکمل بر تا -
 ریخی تنظیم ایش اولور . زیرا تاریخ عثمانییه جوا -
 زیت مناسبتیه نوعا تعلق اولان اولکار شویله طور -
 سون بلکه تاریخ عثمانینک طوغریدن طوغرییه حکم
 سوردیکی اولکارک هیئت عمومیء حدودینه بر نظر
 ایدیه جک اولور ایسه مدنیت عمومیء عالمه ابتدادن تا
 شوا عصر اخیریه کلنجهیه قدر موقع صدور وجولا -
 نگاه اولمش اولان یرلرک کافه سی تاریخ عثمانینک حدود
 شامله سی داخلنده کوریلور . بونک خارجنده بولنان
 محللر ایسه واقعا بو کونکی کونده پک مترقی و متمدن
 بر حالده بولنیور لر ایسه ده ایتالیا واسپانیا و ایراندن
 ماعداسنی ایچون بو حال عادتا حادث برشی عد اولنسه
 بیلور . اوچ بش عصر اولنسه کلنجهیه قدر عادتا

ممالك وحشیه دن بولسان یرلر مدنیت نوع بشر کی
ابتدای حصول تاریخک اطلاعی خارجنده بولنان و مجهو-
لیت تاریخیه ظلمتی ایچنه طوغری استغراق ایدوب
کیدن بر قدمه نسبتله بحثه شایانمی کوریلور؟

اگر اغلب مورخینک کتمش اولدقلری یوله
کیدوب ده شجره آل عثمانی برید شوکت و شان اولمق
اوزره سکود ناحیه سسنده یشرتمکدن باشلایه جق
اولسه ق تاریخ عثمانی ایچون هنوز قارئلر یوزه عرض
ایتمه رک عظمتی حالا ذهمنزه بیودیکه بیومکده بولنان
شمول واحاطه کوچولدیکه کوچوله رک پک سهل
الاجرا بر صورت پیدا ایده ییلورایدی. لکن «کائنات»
سرلوحه سیله یازمقده اولدیغمز شو جلدلرده دول
حاضره نك ابتدای ظهور لرندن بدأ ایله تاریخلرینی
قله آکیوب جلدلر یزک غایت الغایه اختصار یله برابر
هر اولکا حقنده تاریخک ایلاک اطلاعی حاصل اولدیغی
زماندن بدأ ایله بوزمانه قدر واقع اولان انقلاباتی خلاصه
واختصار ایتمکده اولدیغمز نظرأ برده تاریخ عثمانی
حدودینه تعمیم نظر تفتیش ایدیلور ایسه فتح کلامزده
«هرهانی مؤلف مکمل بر عثمانلی تاریخنه موفق

اولورایسه مدنیت عمومیء عالمک مکمل برتار یخنی تنظیم
ایتمش اولور « دیه سویلدیکمز برسوزک اهمیت
لایقه سی میدانه چیقار » .

تاریخ عثمانینک حدود شامله سنه بر کوز کز دیرلم:
بابل و آثور و میدیا و فلسطین و مصر قدیم و فنیکه
مثلو نوع بشرک ایلک محل انتشاری و مدنیت بشر -
یهنک ایلک کهواره سی اولان اولکالری بوحود دا -
خلنده بولمهی یز؟ فرس قدیمک اسکندر کبیرک روما
دولت جهانه کیرینک پیدر پی جولانکاهی اولان
قطعه بوقطعه دکلیدر؟ بوقطعه اوزرنده اوروپا
جهتجه بوسنه قره طاغ ارناودلق خرواستان بلغا -
رستان صر بستان روم ایلی افلاق بغدادن قریم مجا -
رستان و آسیا جهتجه قفقاس کورجستان ارمنستان
کردستان عربستان اناتولی سوریه فلسطین حجاز
یمن و افریقا قطعه سنجه مصر بر بریه جزایر مثللو
بر طاقم اولکالر تقسیماتی کورورزکه کائناتمزی تألیفه
دامن درمیان غیرت اولان محرر عاجز کبی دول مو -
جوده تاریخی دکل اولکالر تاریخی یازان بر محرر
تقسیمات مذکورهنک هر بری ایچون آیری آیری بر
جلد یازمق وظیفه سیله دخی موظف اولور .

بوجود داخلندہ تقسیمات یونان قدیم مثلویک
اسکی بر زماندن صرف نظر ایدیله جک اولور و فرس
ومصر قدیم ویونان و روما استیلاری کبی وقایع فوق-
العاده دخی بر طرفه بر اقلورده یالکز حدود مذکورہ
داخلندہ متشکل واستعداد طبیعیری قدر دوامله بعده
منقرض اولمش اولان دولتری و حکومتلری آراشد-
یره جق اولور ایسه ک بونلرک دخی بابل و آثورومیدیا
وارمنستان و کورجستان و بنی اسرائیل حکومتلری
کبی القدیملرندن قطع نظر از جله ظهور اسلامدن
و حکومت خلفای راشدین و بنی امیه و بنی عباس
وسلاجقه و فاطمیه و ایوبیه و چرا کسه و شرق امیرا-
طورلغی و طبرزون امپراطورلغی و سلانیک قراالغی
وانقاض سلجوقیه دن متشکل حکومتات عشره ترکیه
و فروع سلاجقه مثلویک نیجه طوائف ملوک حکومتلری
کوریلور که « مکمل » دیه توصیف ایلدیکمز بر تاریخ
عثمانیه بونلرک هر بری ایچون ابواب و فصول تعینی
ضرورت حکمنی آلور .

عجبا بز شو مختصرده عهده عاجزانه مزه ترتب
ایلیان بو وظیفه بی تمامیه ایفا ایدیه جکمی یز ؟

بوکا اولاً بضاعه سز لکمز مانع اولدیغی کبی ثانیاً
 کائناتک هر حالده ملتزم اولان مجملیتی مانع اولوب مع
 هذا تقسیمات ارضیه و ملیه و تاریخیه یی مبین اولان
 اسامیء سالفه نك هیچ بریسنی مسکوت عنہا براقه مانع
 دخی مجبوریتز درکاردر . بناء علی ذلک کائناتمزك هر
 جلدی عالم اولدقلری او لکالر تاریخی ایچون غایتی
 ایضا حلیجه برر فهرست اولدقلری کبی اشبو تاریخ
 عثمانیزكده او وادیدن آریله مامسی ضروری اولوب
 هر جلدده تصادف اولنه جق نیجه خطیئات و نواقص
 حقنده قارئلر یزدن دیله مکده بولندیغمز عفو و صفحی
 بالخاصه بوجلد ایچون دیله مک مجبوریتنی اقرار
 و اعتراف ایلرز .

(دولت عثمانیه نك اجمال احوال جغرافیه سی)

بروجه آتی اجمال ایتکده بولندیغمز احوال
 جغرافیه نك حدود ممالک و جغرافیای طبیعیجه بوندن
 بش التی سنه اولکی صورتی پک ده کلیت اوزره
 دکشمامشدر . زیرا ملکمز دن طوغریدن طوغریه

آیریلان یرلر نائل استقلال تام اولان قره طاغ و صربستان
 و افلاق و بغداد و دوبریجه ایله برده یونانه ترک اولنان
 محال اولوب دیکر یرلر ایسه هر بری برر شرطله برر
 استیلای عسکری الشنه کیرمش و حکماً حالا ممالک
 عثمانیه دن معدود بولمشدر . مع هذا بوتحول دها
 دونکی تحول اولوب معلومات تاریخیه یی حسن تلقیه
 مدار اوله جق بر اجمال احوال جغرافییه امرنده
 بوتحولک قاله بیه انما سی لازمہ دندر . غایتی تحولات
 مذکورہ تاریخمزک صولک بانبک صولک فصلی اولان
 احوال اخیرہ قسمندہ ویریله جک معلومات ایله کوریله .
 بیلور .

ایمدی بو حالده دولت علیه عثمانیه اورو یاقطعه .
 سندہ بولنان ممالک جنوب جهتیجه نزد جغرافیونده
 صو کنجی و آسیا قطعه سندہ بولنان ممالک مراتبجه
 برنجی دولت اولوب بو دولتی جغرافیا مؤلفلری
 « دنیانک واسع اولان دولترلندن بریسیدر »
 دیه توصیف ایدر لکه حقیری ده واردر . چین و روسیه
 اولکارندن صکره الواسع اولکابو دولت علیه عثمانیه
 اولکاسیدر . طبعاً اوروپای عثمانی و آسیای عثمانی و افریقای

عثمانی دیه اوچ قطعہ یہ منقسم اولوب اوروپا و آسیا
قطعہ سنجہ شمال طرفندن روسیہ و بحر سیاه و شمال
و غرب طرفلرندن اوستریا و آدریاتیک یعنی ونڈیک دگری
ویونانستان و آق دکز و فاس و افریقا و آسیاجہ جنوب
طرفندن صحرای کبیر و عمان دگری و بصرہ کورفزی
و آسیاجہ شرق طرفندن ایران و روسیہ نک کورجستان
ایالتیلہ محاط و محدوددر . شواولیکا اون اوچ درجہ
عرض شمالیدن قرق التی و قرق یدی درجہ عرض
شمالی یہ قدر متمد اولدیغی جهتلہ ممالک محترقه نک صیحا
قلزینہ متقابل کاه بیلہ جک صبحاق یرلری ده و اقطار
منجمده نک برودتنہ متقابل عد اولنہ بیلہ جک صغوق
یرلری ده حاوی اولدیغندن کرک حیوانات و کرک نباتات
و معدنیاتجہ دنیانک هر طرفنده موجود اولان شیرک کافہ
سی بوقطعه ده یا موجود و یا خود وجودی قابلدر .
بونی بویله قطعی اوله رق حکم ایتیوبده مفرداته
کریشیلہ جک اولور ایسه نه قدر اختصار ایدیلور
ایسه ایدلسون بونک ایچون بابلر و صحیفه لر طولدیر مق
لازم کلوب نتیجہ ایسه ینه بو حکم قطعی یہ منجر او -
لور . بوسبیه منیدر که جغرافیون بو قطعہ مبارکه یی

مستقل برعالم و باشلی باشنه برجهان عد ایتک درجه -
سنده اهمیتله تلقی ایتشلدردر .

ممالک مذکورہ نک سواحلی ثلثہ نسبتہ ثلثان در -
جہ سندہ دکز ل احاطہ ایتشدر کہ بونلرک اغلی قرہ دکز
مرمرہ جزایر یونان آدریاتیک بحر اخر بصرہ کور -
فزی کبی بحار داخلہ دن اولہرق کرک مراسلات
عسکریہ و کرک مراسلات تجاریہ ایچون الک قولای
وامین یولر دیملرلر . یالکراصل اق دکزک سواحل
افریقہ سی ایلہ عمان دکز ی بحار واسعہ دن معدود او -
لوب انجق کرک بونلرک و کرک بحار داخلہ نک سوا -
حلندہ او قدر کوزل لیمانلر موجوددر کہ جہانک ہیچ
بر طرف نہ مقیس دکلدر دینلسہ مبالغہ یہ جل اولنہ من -
بولیمانلر میانندہ سلانیک از میر اسکندریہ بصرہ و بانجا -
صدہ استانبول لیمانلری جدأ روی عالمده امشالی نادر
لیمانلردر .

بحار مذکورہ دن ماعددا برطاقم انہار جسمہ بو
قطعہ مبارکہ نک ایچرولرندن کلہرک دکز لہ منصب
اولور کہ بونلرک اغلی سیر سفاینہ قابل اولدقلرندن
ہرری داخل ممالک ایلہ واسطہ مخبرہ و مراسلہ اولوق

امرنده الك كوزل شهر اهلر يرينه قائم اولورلر . انهار
 مذكوره مياننده طونه و صاوا و مريچ و قزل ايرماق
 و فرات و دجله و نيل نهرلري برنجيلردن اولوب بونلر-
 دن ماعدا كرك انهار مذكوره يه و كرك دكزلرد منصب
 اولان يوزلرجه ايكنجى اوچنجى درجه ده نهرلردن
 برطاقى قايقلر سير و حر كتنه قابل اولمق و همان كافه-
 سى سقى و ارواى اراضى ايله زراعتنه خدمت ايتك
 صورتلريله مستقلا برر نعمت الله عد اولمغه شاياندر .
 اشبو ملك واسعك هيچ بر طرفنده افر يقاى
 وسطى و آسيائى وسطى چو للرى كجى چوللر يوقدر كه
 زراعتنه قابل اولسون : هر بر طرفى منبت و محصولدار
 اولوب عقللره حيرت و ير ن وسعت عظيمه سييله برابر
 يكيپاره بر چفتلك يكيپاره بر باغارم اولمغه صالحدر .
 انجق وسعت ارضيه يه نسبتله نفوس اهاليلى پك
 آزا ولد يغندن زراعتجه ترقى ايتمش يرلرى دنى آزا اولوب
 بر چوق يرلرى پك اعلا قابل زراعت اولدقلى حالده
 اهاليدن خالى بولمق حسييله زراعتدن دنى
 محرومدرلر .

ممالك عثمانيه اهاليلىنى اوروپا جغرافيونى اوتوز

التي میلیون اولمق اوزره تخمین ایدرک بونک اون بش
 میلیون اورو یا قطعه سنده و یکرمی بر میلیون دخی
 آسیا و افریقای عثمانیده بولندیغنی روایت ایدرلر .
 اورو پای عثمانیده بولنان نفوس میانه قره طاع و صر-
 بستان و افلاق و بغداد کی امارتلر نفوسی دخی داخل
 اولوب بونلر تحریر اولمش نفوسدن بولندقلری کی
 طوغریدن طوغریه اداره عثمانیه تابع اولان
 ولایاتک نفوسی دخی ممکن مرتبه معلوم اولدیغندن
 بوقطعه حصه سنه تفریق اولنان اون بش میلیون
 ایچون اولدجه طوغری بر تخمین نظریه باقه بیلور
 ایسه کده آسیای عثمانی و افریقای عثمانی نفوسی تحریر
 ایدلماش بولندیغنی کی اورو یا استاتیسقلری طرفندن
 ایدیلان تخمین دخی پک ناقص بولورز . بونلر یالکز
 ترک اولان نفوسی اون ایکی میلیون اولمق اوزره
 تخمین و حکم ایدیورلر . بوحالده اقوام سائر عثمانیه
 حصه سنه طقوز میلیون قالیورکه یالکز تحریر ایدلماش
 بولنان خطه مصریه نفوسی بش میلیون اولدیغنه کوره
 باقی درت میلیون تونس و طرابلس و عربستان و کر-
 دستان و لازستان و سائر مثالو اقالیم ایچون پک آز

دوشه جکی بداهت کبی بر صورتله تسلیم اولنور .
 بناء علیه بز یالکز اسیا و افریقای عثمانی نفوسنی اوتوز
 بش میلیونن اشاغی تخمین ایده میر که بر العرب اوزرنده
 کشت و کذار ایلیمان عشایری کورمش اولانلر تخمینمزی
 استکشار ایتد کدن ماعد ابلکه از بیله کورر لر .

نفوس مذ کوره ملیت و قومیت واحده یه منسوب
 اولدیغی کبی دیانت واحده ایله متدین دخی دکدر لر .
 هیئت متحده عثمانیه ترک عرب کرد لاز بوشناق یوماق
 چتاق چرکس تاتار نوغای ارناود کورجی اولمق اوزره
 باشلیجه اون ایکی مسلمان قومدن متشکل اولوب بوندن
 ماعد اکنلاک عرب کورجی روم ارمنی بلغار ارناود
 اولاح اولمق اوزره باشلیجه یدی قوم دخی خرستیان
 واردر . بونلردن ده ماعد اقوام عثمانیه میاننده
 یهودی و چنگانه قوملری دخی داخل اولوب بو حسابجه
 قومیت و دیانت فرقلری یکر می یه قدر بالغ اولمقده و همان
 اول مقدارده لسان تکلم ایدلمکده در . انجق بونلر
 میاننده عن اصل السنه ترکیه دن معدود اولان عثمانلی
 لسانی بر لسان عمومی اولدیغی کبی اسلامیت و او میا -
 نده مذهب جلیل خنقی اکثریت اوزره حکمی جاری
 اولان دیانت و مذهبدر .

ممالك محروسه شاهانه میانده تروا و بعلبک و نینوا
 مثلوه قدیم الزمانده اشهر شهرتله مشهور مملکتلر اولدیغی
 کبی الحاله هذه معمور اولان شهرلر میانده پایتخت
 بولنان استانبولدن صکره سرای بوسنه سلانیک صوفیه
 ادرنه بروسه از میر طربزون قونیه دیار بکر حلب شام
 اسکندریه قاهره بغداد تونس طرابلس شهرلری برنجی
 درجه ده بیوک شهرلر اولوب اغلی بر بیوک دولته
 پایتخت دخی اولمشلدر. هله مکّه مکرّمه ایله مدینه منوره
 مهد جلیل اسلامیت اولق و قبله کاه امت محمدبولنق حسبیله
 بلدتین مقدستین اولدقلری کبی دیانت سماویه اربابنک
 قبله قدیمه سی اولان قدس شریفک دخی بزده اولسی
 یاخاصه غبطه عالمیانی بزم اوزرمزه تحریک ایلان برماده
 در. پایتخت سلطنت سنیه و مقر خلافت جلیله اولان شهر
 استانبولک بتون حکومت دنیویه تاج مفروضی اوزرنده
 الکیزیده لمعان اولان برجوه هر یکتا اولسی عموماً مسلدر.
 بو پایتخت جلیله فرمانفرما اولان ذات شو کتسمات
 عموم عثمانیلرک پادشاهی و سلطانی اولدیغی کبی خلافت
 و امامت جلیله حسبیله بتون دنیا یوزنده بولنان ایکی یوز
 میلیون قدر اهل اسلامک دخی مرجع مقدسیدر.

(عثمانلی تاریخینک تقسیمات اساسیه سی)

کائناتمزلک بوجلدینی اساساً درت بیولک بابه تقسیم
ایدیورز . باب اول تاریخ عثمانینک حدود حکمی
داخلنده بولنسان محللرجه تاریخک ایلك حصول
اطلاعندن یعنی عاداتا ابتدای انتشار نوع بشردن باشلا-
یهرق ظهور اسلامه قدر کله جکدر که درت بش بیك
سنه لك بر خلاصه دیمك اولان اشبو باب اول میلادك
۶۲۲ سنه سنده ختام بولمش اوله جقدر .

ایکینجی باب ظهور اسلامدن ظهور عثمانیانه قدر
مرور ایدن التی یوز بو قدر سنه لك وقوعاتى جامع
اوله جق و بو حالده ۱۲۹۹ سنه میلادیه سنه قدر
کله جکدر . اوچینجی بابمزل اصل تاریخ عثمانینک قسم
اولی اولمق اوزره دور استیلای عثمانیانی حاوی اوله -
جقدر که بوده ۱۲۹۹ سنه میلادیه سنندن ۱۵۷۴
سنه میلادیه سنه قدر کله جکدر . نهایت در دنجی بابمزل
دخی دور انحطاط عثمانیانی حاوی اولهرق سالف الذ-
کر ۱۵۷۴ سنه میلادیه سنندن بدأ ایله زمانمزه قدر
دوام ایله جکدر .

برنجی با بمزی فصله تقسیم خصوصاً صنده شمیدی به
 قدر چیقان جلدلر یزک فصولنه قیاس ایدیله جک
 اولسه بر قاج یوز فصل کشاد ایتک لازم کلوب
 حالبو که بوراده بزباب مذ کوری یالکز او چ بیوک
 فصله تقسیم ایلیه جکز که فصل اول ابتدادن بنی اسرا
 یلک اسارتنه قدر بر مخلصه تاریخیه بی جامع اوله جق
 و میلاد عیسادن ۶۰۶ سنه مقدمه قدر کله جقدر ۰
 ایکنجی فصل ذکر اولنان ۶۰۶ سنه سندن بدأ ایله
 میلاددن او توز سنه صکره بعثت حضرت عیسایه
 قدر کنران ایلان وقوعاتی جامع اوله جقدر ۰ او چنجی
 فصل ایه عن ۳۰ الی ۶۲۲ بعثت عیسادن هجرت
 نبی آخر زمانه قدر اولان احوال تاریخیه بی مجمل
 بولنه جقدر ۰

ایکنجی با بمز بش بیوک فصله منقسم اولوب
 فصل اول رسالتیناه افندمزک عصر سعادت لردن
 خلفای اربعه افندیلمز حضرتاتک ختام خلافتلرینه
 یعنی حکومت بن امیه نک ظهورینه قدر اولان وقوعا
 تی جامع بولنه جق و بحالده ۶۲۲ سنه میلادی سندن
 ۶۶۱ سنه میلادی سنه قدر کنران ایلان زمانی احتوا

ایلیه جکدر • ایکنجی فصل عن ۶۶۱ الی ۷۴۹
 بنی امیه نك مدت حکومتلرینی حاوی اولوب اوچنجی
 فصلده ایسه عن ۷۴۹ الی ۱۲۵۸ بنی عباسك
 مدت خلافتلری وقوعاتی اجمال اولنه جقدر • دردنجی
 فصل تاریخ آل سلجوق ديمك اولوب ۱۲۹۴ سنه
 میلادی سنه قدر کله جك ایسه ده آل سلجوقك ظهوری
 خلافت عباسیه نك انقراضندن يك چوق مقدم اولد-
 یغی جهتله اوچنجی فصلك قسم اخیری دردنجی
 فصلك قسم اولنه تداخل ایده جك یعنی بودردنجی
 فصل ۱۰۷۲ سنه میلادی سنندن باشلا یوب سالف-
 الذکر ۱۲۹۴ سنه میلادی سنه قدر دوام ایلیه جکدر •
 بشنجی فصلده ایسه انقراض خلافت عباسیه دن یعنی
 ۱۲۵۸ سنه میلادی سنندن بدأ ایله ۱۲۹۹ سنه سنه
 قدر کذران ایلیان احوال تاریخیه اجمال قلنه جقدر •
 اوچنجی باب درت فصله تقسیم اولنه رق بونك
 برنجی فصلنده عثمانلیرك منشائی بیان اولنه جقدر که
 بومنشأ حضرت عثمان غازیك اعلان استقلالندن
 اول اولدیغی جهتله فصلك تاریخ ابتداسی تعیین اولنه •
 میهرق تاریخ ظهور آل عثمان اولان ۱۲۹۹ سنه سنه قدر

كلنه جقدر . ايكنجی فصلده تیمور بلیه سنك وقوعنه
 قدر ابتدای دور استیلا حكایه قلنه جقدر كه عن ۱۴۹۹
 الی ۱۵۰۲ كذران ایلان سنه لر وقوعاتی دیمكدر .
 اوچنجی فصلده استانبولك فتحنه قدر احوال تاریخیه
 جمع اولنده جقدر كه بوده عن ۱۵۰۲ الی ۱۵۵۳ كذران
 ایلان سنه لر وقوعاتیدر . دردنجی فصلده ایسه عن
 ۱۵۵۳ الی ۱۵۷۴ دور استیلانك غایتی حكایه
 قلنه جقدر .

دردنجی بابمز دخی كذاك درت فصله منقسم او -
 لوب فصل اولنده دور وقوفز بولنان عن ۱۱۵۷۴ الی
 ۱۶۹۱ سنه لری وقوعاتی اجمال قلنه جقدر . ايكنجی
 فصلمز عن ۱۶۹۱ الی ۱۷۸۹ دور صحیح انحطاطمز او -
 لوب اوچنجی فصلمز ایسه عن ۱۷۸۹ الی ۱۸۷۶ دور
 تجدد و تنظیماتمز وقوعاتنی اجمال ایلیه جقدر . درد -
 نجی فصلمز ده دخی ۱۸۷۶ دن بوزمانه قدر كذران
 ایلان وقوعات مندرج بولنه حق وهر جلدده اولدیغی
 کبی بو جلدده دخی برافاده عمومیه جلدك خاتمه سی
 مقامنی طوته جقدر .

فصللر میاننده بعض وقوعات بر مبحث مخصوص

و مستقل صور تده یازلق لازم کلور ایسه سائر جلد
لر یمزده مراجعت انکس اولدیغمز بند مخصوصا اصولی
بو جلد ایچون دخی موجود و مرعی اولق طبیعیدر .

رققامزدن اولان بعض تاریخنویسلر تاریخ عمو
میده بیله غرب مورخلر ینک قویدقلى تاریخ میلادییه
تبعیت ایتمه رک هجرت نبویه دن مقدم اولان وقوعاتی
بیله مقدم هجرت حسابیله هب سنین قریه اوزرینه
تورنخ ایتمکده ایسه لرده بز علوم و فنون دنیلان شیئی
ملتزدن و یا خود ادیاندن بر یسنه منسوبدر دیه اعتقاد
ایتموب بلکه بین الملل عمومی و مستقل برشی اولق اوزره
تلقی ایلدیگمز دن هر ملتک خارجنه چیقماق ایچون
علوم و فنونده اهنک عمومییه تبعیت جهتنی ترجیح
ایتمکده یز . بناء علیه کائناتمز کسائر جلدلرنده هب تاریخ
میلاده تطبیقاً وقوعاتی تورنخ ایلدیگمز کبی بو جلدده
دخی او اهنکه تطبیق حرکت ایده جکمز . مع هذا و قو-
عاتک ایجابنه کوره تاریخ هجریلرینی ده مسکوت عنه
براقیه جغز . تاریخ هجریلر ذکر اولندقدیه بالفاظ و یا-
خود بر « ه » اشارتی وضعاً انلری ده اخطار
ایده جکمز .

* برنجی باب *

ابتدادن ظهور اسلامه قدر

عن ۰۰۰ الی ۶۲۲

(برنجی فصل)

ابتدادن بنی اسرائیلک اسارتنه قدر

عن ۰۰۰ الی ۶۰۶ مقدم میلاد

تفصیل - ابوالبشر حضرت آدم علیه السلامک

هبوطندن اب ثانی حضرت نوح علیه السلامک طو -

فانه قدر گذران ایلان سنه لر وقوعاتی حقهده یالکز

تورانه بر بنده جک معلومات بولسوب معلومات مذ -

کوره دخی هاییل وقایل وقعه سیله اولاد آدمدن برایکی

نبی ذیشانه دأر اولوب انجق مورخلر اکثریت اوزره

تاریخ مقدسک شایان اهمیت اولان وقوعاتی حضرت

نوحک بعد الطوفان انتشار ایلان اولادندن بدأیدرلر

سفینه نوح آرات سلسله جبالندن جودی نام طاغ

اوزرنده طورمش واب ثانی بنی آدم ذکر اولسان

طاغدن اطراف عالمه انتشار ایلشدرکه بو خبر تورانه

بولسیدیگی کبی مورخینک تدقیقات اخیرمسی دخی

بونی اثبات ایلشدر . حالبوکه جبل جودی دیار بکر

جهت‌رنده یعنی ممالک عثمانیه داخلنده بولنديغندن بنی
آدمک ایلک نقطه انتشاری ملکیز ایچنده بولمق تاریخ
عثمانیزک ایلک اعظم وقوعاتى عدد اولمق بیسادر .
تورات اشبو طوفاناک وقوعى خلقت عالم وانتشار بنی
آدمدن ۱۶۵۶ سنه مرورنده اولق اوزره خبرویروب
مورخلر ایسه میلاد عیسادن ۳۳۰۸ سنه مقدم
وقوعبولق اوزره قید ایدرلر . یالکز اوسه ریوس نام
مورخ میلاددن ۳۳۶۸ سنه مقدم واقع اولدیغنی
تخمین ایلور .

حضرت نوحک سام وحام ویافت نامنده اوج
اوغلی بولنوب بونسلرکدخی اولاد واحفادی تکثر
ایتمکله بیوزدن حاصل اولان فرقلر نهر کنارلری
ودکز ساحلاری وطاغ سلسله‌لری کبی برر بعده طو -
غری خط‌سیر وحرکت تعیین ایده یله جک اولان
طبیعی دلیلره تبعیت ایدرک ایلک نقطه اجتماعدن
اوزا قانمغه باشلامشدر . تورات دیرکه اولاد نوح اشبو
ایلک انتشارندن مقدم کرک کندیلرندن بر یادکار قلمق
وکرک برطوفان ثانی وقوعه کلور ایسه اوزرینه
چیقوب جان قور تارمق ایچون غایت مرتفع برقله انشاسنه

قرار ویرمشر و بوقله یی کو که قدر یو کسلتک عزمنه
 دو شمشلر ایدی . جناب حق ایسه بونلری شو تشبث مجنونلر
 نه دن منع ایچون اولاد نوحک لسانلرینه بر تفرقه عارض
 ایدرک یکدیگریک سویلدیکی کلاهی اکلایه مز اولدیلر .
 مورخلر ملت و امترک السنه سنده اولان تخالف
 و تنوع حقنده توراتک شور وایتنی تمامیه قبول ایده مز لر
 ایسه ده عموم لسانلرک اصللری وایلك منشألری تحری
 ایدیله ایدیله مبدأ انتشار بنی نوحه طوغری رجعت
 اولندیغی زمان حقیقه لسانلرک دخی انسانلر مثللوکله
 کله آسیانک قسم جنوب غربیسنده بر نقطه ده لسان
 واحده رجوع ایلدکری کورلکده در .

برده توراتک ایلک جمعیت بشریه اولسق اوزره
 شو صورتده خبر ویردیکی بابل نقطه سنک حقیقه
 ایلک جمعیت مدینه یه مجمع اولدیغنی مورخلر دخی
 قبول ایدرلر .

بابل دیه مؤخرأ تاریخ قدیمده اهمیتنی آرتدیرمش
 اولان یرالیم عراق عربی دنیلان بغداد ولایتی دیمک
 اولوب حدودی فرات نهرینه دو کیلان حابون نهرندن
 بصره کورفینه قدر تمتد اولور . و جنوباً بر العرب

چولاری و شمالا دخی ارمنستان ایله محدود بولنور ایدی .
 بابل لفظی تور اتده یالکز معهود قله یه علم اولق کبی
 بر صورتده استعمال اولنوب بوقطعه یه ایسه « سنار »
 نامی ویرلشدر . صکره یونان و روما مورخلری قطعه
 مذکور دی « کلدانیه » دیه تسمیه ایتشدر که بورالده
 ساکن اولدقلری خبر ویریلان کلدان قومی بنی اسرا-
 ئیلک خلفی اولوب بنی اسرائیلک پدر عومیمی عد
 اولسان حضرت ابراهیم علیه السلام اشبو کلدان
 قومندن ظهور ایتشدر .

بابلک غرب شمالیسند « آشور » دیه برقطعه ده
 قدیم شهرت بولشدر که تمام شمیدیکی موصل ولایتک
 بولندیخی یردر . فقط صکره لری مورخلر بوقطعه یی
 دخی بابل الکاسی داخلنده عد ایتشدر .

تورات شریفده خبر ویرلدیکی کبی مؤخرأ انکلیز
 مشاهیر مدقیقیندن راولنسونک خط کونیه وی اوزرینه
 اجرا ایلدیکی تدقیقات جدیده سی دخی تأییداً اثبات
 ایدیور که اشبو بابل و آشور قطعه سی مدنیت نوع
 بشرک ایلک منشائدر . خط کونیه وی دنیلان شی
 برطاقم جسیم وپشکین طوغله لر اوزرینه بر قالب ایله

باصدیرلش کبی کوریلان نقوش اولوب ازجمله موصل شهرى قارشوسنده اجرا اولنان حفريات مثللو حفريات اثناسندهیدی سکزوحتى اون متر و عمق و عرضده ظهور ایدیورلر و بناء علیه ارباب تدقیق بو طوغله لرك تابابل و اثورک معموریتی زماندن قالمه اولدیغنه اصلا شبهه ایتیورلر . حتی بنی نوحك طو پراقدن طوغله کسوب زفتی دخی کرچ و خرج مثابه سنده استعمال ایلدکاری حقنده کی روایت تور ایه دخی کشفیات اخیره اثناسنده اشبو طوغله لرك فی الحقیقه ارالرنده زفت کورلمسیله ثابت اولمشدر .

خطوط مذ کوره نك مدنیت بشریه الك اول بو محللردن نشأت ایلدیکنی اثبات ایتسی یالکز اورالرده معموریت و حکومت بولندیغنی کوسترسی صورتندن عبارت دکلدلر . علم هیئت و سائر بعض فنون قدیمه نك ایلک مایه سی دخی بورالرده ساکن اولان کلدانیلر میا . نده حصوله کلدیکی خطوط مذ کوره نك مطالعه . سندن استفهام ایلورلر . هله برطاق صنایع مهمه نك اوزمان موجود اولدیغنی نفیس مرمرلردن مطروش اثار قدیمه سیله مستدل اولوب بو اثار میانده باشی انسان

باشی و جودی بوغا صورتند کور یلان هینکلر او
زمانک دیانت باطله سننه دأر انسانه بر فکر مخصوص
و یر یورلر .

دنیاده ایلک حکومت اولمق اوزره قبول ایلدیلان
شو حکومت تار یخ حضرت عیدمانک میلادندن ۲۶۴۰
مقدم اولمق اوزره بر قدم و یر مکده ایسه ده ارباب تدقیق
بو تخمینک خطاسنه ذاهب اولیورلر . زیرا نفس
بابل قیود تار یخیه سی اولمق اوزره مؤخرأ موقع تدقیقه
واصل اولان قیود بابلیه نکر وایتنه کوره اوراده سکسان
التی نفر حکمدار یتشدیران بر خاندان قدیمدن صکره
بر یسندن سکز و دیگرندن اون بر نفر حکمدار کلک
اوزره ایکی مدیالی خاندان و قرق سکز نفر حکمدار یتشد .
یرمک اوزره برده کلدانی خاندان کلوب بونلردن ده ماعدا
عربان قدیمه طائفه سی بابل اوزرینه هجوم ایلد کده
انلردن دخی طقوز نفر حکمدار صره سیله اجرای حکو-
مت ایلد کدن صکره سمیرامیس نامیه تار یخ قدیمده اک
زیاده شهر تشعار اولان قرا ایچه کلش که تار یخ بو سمیرا-
میسک درجه قدیمی بحثنده یا ایکی یسک و یا خود یسک
ایکیوز سننه مقدم اولمق اوزره بر اختلافده بولنیور .

حالبو که بابل حکومتک تاریخ تأسسی اولان ۲۶۴۰ سنه سیله اشبوا یکی بیك و یاخود بیك ایکی یوز سنه مقدمه سی ارمه سنده اولان فرق میانده بو قدر حکمدارک صره سیله مقام حکومته کله بیلسی استبعاد اولنه رق بوندن دخی بابل دولتنک دهاسکی اولدیغی استدلال قلیور .

الحاصل بابل الله آثور علم تاریخک دنیاده الکی اولق اوزره طسانیدیغی برلر اولوب بواره لق بابل ایله آثوره آیری آیری ایکی دولت وار ایکن صکره انقلاب زمان بونلری شکل واحده منقلب ایش و بودولتک مدیا و بنی اسرائیل و مصر ایله مؤخرأ برچوق مناسبت حر بیله لری وقوعه کلمشدر . بو بابده تفصیلاته کیریشه جک اولسه ق مجبوراً اختیار ایذیه جک تطویل کلام درجه سنده بر منفعت مهمه تاریخیه استحصال ایده میه جکه زدن بوراده ذکر اولسان برلرک مؤخرأ فرس قدیم دولتنک مصره قدر استیلای جهان فکیرانه یه قیام ایلدیکی زمان دولت مذکوره استیلای سنه کیردیکنی اخطار ایله اکتفا ایلر و یهودیلرک بونلر طرفدن تحت اسارتیه النمی قهره سنی دخی اشاغیده بنی اسرائیل بحنده تذکار ایلر .

ایشته اولاد نوحك ايلك موقع انتشاری اولان
 بابل واثور طرفلری حقنده بو قدر جق حاصل اولان
 بر فکر و معلومات بزم ایچون مهاجرت قدیمه نوع بشرک
 مبدئی ده بوراسی اولدیغی حقنده جغرافیون ايله ارباب
 تاریخ ارسنده موجود اولان بر مسئله مهمه بی حسن
 تلقیه خدمت ایلر . بابل واثور طرفلرندن حقیقه رق
 دائمی شرقه طوغری کیده کیده منتهای چینیه قدر وار .
 مش اولان انسانلر ايله بزم ارمزده اسیانك عظیم
 وجسیم چوللری مؤخرأ مانع مراسله و مخابره اولد .
 یغی کبی شمال شرقیه طوغری کیدرك بحر حرز ویا .
 خود قره دکر ساحلیله شمدیکی روسیه چوللری ایچنه
 کیرمش وبعده اوروپایه طوغری اوزانوب کیتش
 اولان انسانلرک دخی جغرافیا و تاریخ نظرنده ایزلری
 غائب اولمش ایسه ده شمال و شمال غربی و باخصوص
 غرب طرفلرینه طوغری انتشار ایدن قسم اولاد بشر
 ذاتاً ایچنده یشاد یغمز جمعیت مدنیته نك واضع اساسی
 ویا خود موسعی اولد قلرندن بونلر کرک جغرافیا و کرک
 تاریخ نظرندن تباعد ایده مامش و بامکه تاریخ و جغرافیا
 دخی مدنیت بشریه نك سائر محصولات برکزیده سی
 جمله سندن اوله رق بونلر میانده حصوله کاشدر .

ایمدی اقوام مذکوره دن نزد تاریخده ال آاز معلوم
اولان جبال قفقاس اهالیسی اولوب بونلردن کرچی
دنیلان نوعک پک قدیم زمانلرده دخی قرالری اولدیغی
قیود تاریخیه دندر . هله ارمنیلر تاریخک کرچیلردن
پک چوق زیاده مکمل اوله رق طانیدیغی بر قوم قدیم
اولوب بونلر بریاندن بابل وآثوو ودیکر طرفدن انا-
طولی و قفقاس و ایران اره سنده تمکن ایتشلردر . حتی
ارمنیلر میانده ال اول بر حکومت قدیمه نک واضع
بنیانی اولان هایغ نام کسنه نک بابل وآثورده کذلک
بر حکومت اساسی وضع ایلش بولنان واسمی کتب
بنی اسرائیلده دخی مذکور اولان نمرود ایلله جنک
ایلدیکی و بعضی غلباته ده مظهر اولدیغی جمله معلوم-
مات تاریخیه دندر . لکن صکره لری بابل وآثوردولتنک
تحت رعیتنه کیرمش اولدقلری کبی فرس قدیمک دور
جهانگیرانه سنده دخی اکا رعیه اولمش والحاصل ها-
نکی ملت جهانگیرا که قاتشدیسه ارمنیلر انلرک رعیه-
لری اولق مسکنت و مغلوبیتندن همان هیچ بر زمان
قوریتله مامشدر . بعضی ارمنی مورخلرینک کمال دبدبه
و عظمتله یاد ایلدکاری قرالرک دخی اغلی متغلینه

خارجگذار اوله رق لفظی مراد استقلال لرینی ده انلره مدارا
ایله محافظه ایله یله و لر لر ایلی .

یونانستان تاریخچه ده خی ذکر اولندیخی وجهله
موره شبه جزیره سی اوزرنده وانک شمال طرفنده واقع
محلارده ظهور ایسن پلاستر و سائر اقوام یونانیه نکه ده
هب منشأ اولاد نوح اولان اشبو بابل و آثور طرفلرینه
انتشار ایلدگارینه شبهه یوق ایسه ده صورت مهاجر -
تلی حتنده معلومات مو ضحه مفقود در . فقط اق
دکز ساحلی ایله ارمنستان و سوریه ارسنده یعنی شمدی
بزم اناطولی تعبیر ایلدیکمز قطعه اوزرنده ملیت یونانیه -
یه منسوب اوله رق بر طاقم خلق نائل استقلال اولمش
ایلی که تاریخ بونلر میاننده یونیا و ثمولیا و قاریا
ولیسیا و بتینی و پون و میسیا و پسیدی و لایترنده کی
حکومتلی الزیاده وسعت و اهمیت اولان حکومت
قدیمه دن اولق اوزره یادایلر . یونان تاریخچه بونلره
دائر معلومات ویرلمش اولوب فرس قدیم ایله یونان
قدیم ارسنده جریان ایلیان مناسبات حربیه هب بو
ولایتردن طولایی میدانده چیقمش شیلدر .
سوریه قطعه سی بابل و آثور یعنی کلدانیه

ممالکندن غربه طوغری هجرت ایلیان اولاد نوحك
 گذرکاهی اولوب يك قدیم زمانلرده بوراسی ده مسکون
 و معهور اولش و برارلق حکومات مستقله اداره سنده
 دخی کچمش ایسده اکریتله آثور قرالرینك بنی
 اسرائیل ایله اولان محاربات واقعه سنده محاربلك
 جولانکاهی اولمشر . فقط سوریه ایله اق دکر
 ارسنده واقع فیکه قطعه سی مدنیت بشریه یی توسعه
 الک زیاده خدمت ایدر برخلقه مسکن اولغله اهمیت
 واقعه سی مصر قدیم درجه سنده عد اولنسه
 بجادر .

بوقطعه اوزرنده تیر یعنی صور و صیدا و بریت
 یعنی بیروت و بیبلوس و تریپولیس یعنی طرابلس
 شام و آقو یعنی عکاپك اسکی زمانلرده معهور اولش
 يرلر اولوب تاریخك ظننه کوره بونلرک جله سی جسم
 واحد صورتنده دکل برر مستقل حکمدارک زیر
 اداره سنده اوله رق کمچیلکده عصرلرینک انکلیز
 لری عد اولنق مرتبه سنده ترقی ایشلردر . برطرفدن
 افریقاه مهاجرلر کوندروب قار تار هیئت مهاجرة
 سنی تشکیل ایلدک لری کبی دیگر طرفدن اسپانیاه

ویونانستانه قدر کیدن فنیکه لیلرک اورالری ده معمور
ایتمکه خدمت ایلدکلری بوندن اولکی جلدلرمزده
بیان اولمشیدی . اشبو فنیکه نك شو صورتله شهرتشار
اولسی میلاد عیسادن ایکی بیک سنه قدر مقدم برشی
اولوب فنیکه لیلر می-لاددن بیک اوچیوز سنه مقدمه
قدر کال شوکت و شانله دوام ایتشلر واندن صکره فرس
قدیمک دور جهانگیرانه سنده انک مغلوبی اولشلردر .
اولاد نوحدن برفرقه دخی جنوب طرفلرینه طو-
غری هجرت ایدرک بونلر حوالی حجازیه ویمانیه ده
قوم نجیب عربی وجوده کتور مشلدر که مؤخر اعر-
بلرک بابل اوزرینه هجوم و ضبط ایدرک برچوق عرب
حکمدارلرینک اوراده حکومت س-وردکلری مقیدات
تاریخیه دن اولدیغنه باقیلور ایسه اصل عربلرک دخی
یک قدیم برملت اولدقلری اکلاشیلور .

ایشته بویله اطراف واکناف عالمه انتشار ایللیان
نوع بشرک هر فرقه سی کندی استعدادلرینه کوره بر
صورتله ترقی ایدرک مثلا اوروپا قطعه سنه طوغری
آقینلر ایدن اقوام عظیمه جنکاور لکده واق دکز سوا-
حلنه اینلری تجارت و بعض علوم طبیعیه و فلکیه

وریا ضیه ده ترقی ایتمش اواندقلری کبی حضرت آدم دن
 حضرت نوحه قدر پیغمبران ذیشانی تزین ایلان نور
 نبوت دخی حضرت ابراهیم علیه السلامک اولادی
 اولان بنی اسرائیله انتقال ایلیرک بونلر دخی دیانت
 سماویه احکامجه هیچ برملته مخصوص اوله میان بر
 نعمت ترقی به مظهر اولمشلردر . شو حالده بنی اسرائیلک
 اصلی کلدانی اولدیغنه یعنی آثورا هالیسندن بولندیغنه
 اصلا شبه اولوب تورات شریفده حضرت ابراهیمک
 کلدانیسه دن نصل چیقدیغی و بنی اسرائیلک ارض
 فلسطینده نصل منتشر اولدیغی و مؤخرأ حضرت
 یوسفک مصرده نصل شوکت و شان صاحبی برآمر
 اولوب بنی اسرائیل مصرده نه صورتله تلیق ایلدیکی
 و بعده فراعنه مصریه نلک بونلری نصل قصه اندیغی
 موضحاً مندرج اولوب حتی بو مناسبتله تورات
 شریفدن مصر حقنده دخی ایلک معلومات تاریخیه بی
 المقده یز .

کرک اشبو معلومات تورایه دن و کرک مدققین اهل
 تاریخک نیجه آثار قدیمه بی تدقیق ایله صورت استنباطلرندن
 ا کلا شلدیغنه کوره قطعه مصریه دخی دنیاده الک

اول اسکان اهالی ایلہ اکتساب معہوریت ایش اولان
 برلردن اولوب حتی بورایہ اهالی و معہوریتک وادی
 نیل ایلہ بحر احر ساحلنک ایچرولردن طوغری کلدیکی
 دخی اکلانشیلور . بو حالده قدمای مصر یہ نک باب
 المندب طریقیلہ بحر آھنددن و یا خود بحر احر طریقیلہ
 برالعر بدن کلش اولملری صورتہ احتمال و یریلہ رک
 ہلہ طوغریدن طوغری یہ کلدانیہ و سور یہ وارض
 فلسطیندن کیتامش اولدقلر ینہ دخی بونلردہ دیانت
 سماویہ دن اثر بولنامسی قضیہ سی برھان اتخاذقلنور .
 اکر مصر قدیم اھالیسی آثور یعنی کلدانیہ و سور یہ
 و فلسطین طرفلردن کلش اولسدلرایدی بنی اسرائیلده
 اولان واندن اول دخی حضرت ابراھیم علیہ السلامہ
 قدر پیغمبران دیشان حضرتانہ احسان پیورلمش بولنان
 دیانت سماویہ دن خبردار اولملری لازم کلوب حالبوکہ
 مصر یلردخی همان ہر ملت قدیمہ دہ اولدینگی کی برطاقم
 مخیل معبودلرہ عرض پرستشدن عبارت دیانت باطلہ دہ
 بولنورلرایدی .

مصر قدیمک ابتدای ترقیاتی همان اول محلہ
 مخصوص برترقیدن عبارت اولوب بونلر صکرہ لری

فلسطین و سوریه طرفلرینه طوغری تجاوز ایدرک
اقوام متجاورہک دخی تقلید مدیتلریله جدی برترقی
موفق اولمشلر در . فقط بنی اسرائیلک من عند اللہ نائل اولد
قلری نعمت دیانتی غنیمت عدایده میہرک بالعکس یہودی لری
تحقیر ایلد کارندن مصر یلرک اذالرینہ طیانہ میان بنی
اسرائیل دخی حضرت موسیٰ علیہ السلامک دلائلہ
تبعیتلہ تورانده روایت ایلد کی اوزرہ بحر احری
کچہرک ارض فلسطینہ کیر مشلر وایشته اصل حکومت
اسرائیلیہ بی بوہجرتدن صکرہ عرض فلسطینده کمال
شوکت واجلال ایلہ پارلا تمشلر در .

حضرت داود و حضرت سلیمان بنی اسرائیلدن
کلان پیغمبران و حکمداراننک الشانلیلرندن اولوب
بونلر زمانده یہودی لری حقیقہ برنجی درجه ده عد اولنورلو
ایدی . فقط صکرہ لری ارہلرینہ شقاق و نفاق کیرہرک
برقاچ حکومتہ منقسم اولد قلری کبی آثور دولتنک نظر
طمع و حرصنه دخی دوچار اولد قلرندن بر طرفدن کندی
ارہلرنده و دیگر طرفدن دخی آثور یلرہ قارشو اوزون
اوزادی یه جنک ایتکہ مجبور اولمشلر در .

محررات مذکورہ بی بوراده ایضاح و تفصیلہ دکل

حتی اجماله بیله بواثرده التزام الیلکده بولندیغمز
 اختصارک مساعده سی یوقدر • ذاتاً بومحار به لر فیس
 قدیمک آثور استیلا سندن دها مهم اولان دور استیلای
 جهانگیرانه سندن اول اولوب مسئله نک ال بیوک
 اهمیت ایسه بنی اسرائیلک پیدر پی آثور یلره مغلو یتتی
 ونهایت آثور حکمدار لرندن بخت النصر یدیله اسیراً
 بر چوغنک آثور طرفلرینه سوق ونقلی اوزرینه شریعت
 موسوییه دخی خلل کلش بولنمی قضیه سی اولد-
 یغندن اسارت یهودیه نک اشبو برنجی فصلمه نقطه
 انقطاع عد اولنمی دخی محضابوندن نشأت الیشدر •
 بو اسارتک میلاد عیسادن ۶۰۶ سنه مقدم وقوعه کلدیکی
 توار یخده مندر ج اولوب واقعا اشاغیکی فصلده ذکر
 اولنه جغی اوزره فرس قدیم دولتنک یالکز بابل و آثور
 اوزرینه دکل بتون اناطولی ومصره و یونانه قدر
 وار ان حکم غالبیتی اشاسنده یهودیلر اسارتدن قورتلوب
 شریعت قدیمه لری اوزرینه تکرار تشکیل بنای ملیته
 چاشمشلر ایسه ده ارتق بر کره شیرازه سندن چیقمش
 اولان انتظامی تکرار اعاده یه امکان بولنه مامشدر •
 بو حکمه مبنی حضرت عیسی علیه السلامک بعثت

نبویه سی وقوعه کلمش ایسه ده یهودیلر ا ارتق اصلاح قبول ائیمه جک درجه یه کلمش اولان بطلان فکرلری حضرت یسوعی دخی طایملمرینی انتاج ائیش اولدیغی آئیده کور یله جکدر .

(ایکنجی فصل)

بعثت حضرت عیسیاه قدر

عن ۶۰۶ مقدم الی ۳۰ مؤخر

تفصیل - فنون دن و باخصوص آلهیات و حکمیاته دائر حقایق دن ال چوغنک مبدائی کلدانیه ممالکی اوله رق بعده انبیای بنی اسرائیل بعض فنون ایله برابر باخاصه آلهیاتی زیاده سیله ایلرویه کتور مشر ایسه ده قوم یهود اره سنه دوشمش اولان تفرقه و مخالفت باخاصه کندیلرینک آثور دولتی یدنده اسارتنه قدر منجر اولدیغی مناسبتیله انبیای مشر اار الیم حضرتاتک همم جلیله سی ثمرات جدیه و حقیقیه سنی کماله ایردیره - میوب قالمشدر . بناء علیه یهودیلر کوندن کونه دوچار تدنی و استحقار اولغه مقابل باخاصه بو فصلک حاوی اولدیغی عصرلر و سنه لر ایچنده ترقیات یونانیه بوندن مقدم یونانه مخصوص اولان جلد مزده کوسترلدیکی

وجمله بالتدریج مرتبه کائنه واصل اولغه باشلا یوب
 قوم مذکور عن اصل احجار و اشجار مقوله سی
 برطاقم بتره عرض پرستش ایدن مقوله دن ایکن محققین
 حکماءک تحقیقات فکریه لری نتایجندن اوله رق طبیعت
 و فطرته دخی فاطر و خالق بولنان حق جل و علی
 حضرتلرینی بیاغی تعقل ایتمه و ارمشله و بناء علیه
 حکم سامیمی حکم اادن یکه چوغنه شامل اوله رق
 بالخاصه فلاطون حقنده « فلاطون برنبی ایدی قومی
 انی بیله مدیلر » دیه برعالی سوز سولنمه قدر یول
 آچشلردر . بوسوزک حدیث شریف و یاخود کلام
 کبار اولدیغی بزجه معلوم دکلدردر . حکمای یونانیه
 میاننده نبی بولنوب بولمدیغنه دائر دخی کتب سماوییه ده
 برقید صریح بولمغه مقتدر اوله میورز . نبوت و ولایتلرنده
 اهل تحقیقک اختلاف ایتدکاری لقمان ایله ذوالقرنین
 اکر یونانیلردن ایشه لر اکادیه جکمز یوقدر . مع هذا
 حکمای یونانیه میاننده آلهیونک حقیقه وحدانیت
 ربانییه بی بولمش اولدقلری اثرلر یله مثبت اولوب
 بو موققتیک و حتی ایله می یوقسه فکر ایله می حصوله
 کلدیکی یکه ده منازعات عمیقیه یه یول آچه من .

الحاصل یونانیلر معارف و حکیمیه سائده ترقی ایدمه
 طورسونلر دیگر طرفده یهودیلرک اسارت آتور یه دن
 رهاری دخی کند ی بازوی سعی و همتلری ثمره سیله
 وقوعه کلیوب بیلکه بابلدن مصره قدر ممالکک معمریت
 و ثرتی فرس قدیمک نظر حرص و طمعنی آچه رق عجملر
 بابل و آتور وارمنستان و بتون اناطولی و سوریه
 و فلسطین و مصری استیلا ایلدکاری زمان بنی اسرائیل
 دخی شوقار غشه لق اره سنده زنجیر اسارتدن قورتیلوب
 هر حالده بر مسکننت یهودیانه ایله وطنلرینه طوغری
 پراکنده و پریشان اولمشلردر .

یونانیلر ایله عجملر میاننده وقوعنی بوندن اولکی
 تاریخ یونانی جلد مزده خبر و برمش اولدیغیمز مذبق
 محارباتی ایشته بوزمانک وقوعات مهمه سندندر که
 محاربات مذکوره یه میلاد عیسادن ۴۹۰ سنه مقدم
 بدأ اولندیغنی مقیددر . محاربات مذکوره ده ایرانیلر
 ایله یونانیلر اره سنده وقوعه کلان غالبیت و مغلوبیت
 هر حالده عجملرک یونانستاننی استیلا مقصدندن و از
 یکملریله نهایته ایردکدن صدکره کذلک یونان تار یخنده
 بسط و بیان قلندیغنی وجهله ما کدونیا قرالی فلیک

یونانستان ایلہ ما کدونیاہی ادارہ واحدہ التندہ
توحیدی ثمرہ سہیلہ اسکندر کبیر دخی بتون آسیاہی
فتح واستیلاہی قاتشمشدر کہ بو حال الیوم تاریخ عثمانی
حدودی داخلندہ بولندیغنی خبر ویردیکمز ممالک
کافہ سی ملک اسکندر اولق صورتہ تحول ایتسی
موجب اولمشدر .

مع هذا بو تحول یالکز اسکندرک واوسایہدہ
یونانیلرک شہنشاہلغی طائفسندن عبارت بر تحول
اولوب یوقسہ ممالک مذکورہدہ امور ادارہ لرنجہ
نوعا مستقل بر طاق حکمدارلرینہ موجود ایدیلر کہ
بونلر اسکندر طرفندن منصوب برروالی دیمک ایدیلر .
میلاددن دردنچی عصر مقدم اواخرندہ اسکندر
کبیرک وقوع وفاتی اوزرینہ الک مشہور جنراللری
جہانگیر مشار الیہک ملکنی کندی بینلرنہ تقسیم
ایتمش بولنق حسبیلہ بوندن ممالک مذکورہ اوزرنده
بر طاق حکومت جدیدہ جسمیہ وجودہ کلشدر کہ
شواثر عاجزانہک فوق الحد اختصاریلہ برابر حکو -
مات مذکورہیہ بر نظر اجمال عطفی ایچون مؤلفدہ
بر مجبویت الویرمشدر .

اسکندر کبیرک حین وفاتندہ عجم شاہی دارانک
 قزی اولوب استفراش ایلش بولندیغی روقساندن ینہ
 اسکندر نامندہ براوغلی تولد ایلش ایدیسهده جمہا-
 نکیرک وفاتی اوزرینہ ملکنی تقسیم ایتکی قورمش او-
 لان جنراللری میانده قاساندر کرک چوجغی کرک وا-
 لده سی روقسانی وحتی اسکندر کبیرک والده سی
 بولنان اولیمیایی اعدام ایدرک جمہانکیرک ہمیشردسی
 اولان وسلانیک شہری کندی نامنہ بنا ایلمش بولنان
 تہ سالونیس ایله بالازدواج کندیسنی اسکندرک یرینہ
 قرال اولمق اوزرہ اعلان ایلدی ایسہده رفقای سائرہ-
 سی میانده ازجہلہ آنتیغون ایله سلوکوس مرقومک
 قرالغنی قبول ایتامش ایدیلر . زیرا بولردن آنتیغون
 الیوم موجود اولان انطاکیہ شہرینک بانسی واونامہ
 منسوب اولان دولتک مؤسس اولوب اسکندرک وواف-
 تندہ اناطولی قطعہ سندن پامفیلی ولیسی ایله یوقارو
 فریژی یی تحت اداره سندنہ ضبط ایلش وسلوکوس
 ایسہ اسکندر زمانندہ ہم عموم سواری قوماندانی و ہم
 دہ بابل ومدیا والیسی اولہرق اورالده اعلان استقلال
 ایلش ایدی .

بونلردن ماعدا ینه اسکندرک جنراللری میاننده
 او من نام جنرال دخی پافالاغونیا وقاپادوس طرفلرنده
 اعلان استقلال ایدوب بطلیوس نام جنرال دخی مصری
 تحت اداره مستقله سنده الیدیگی کی لیریماق دخی
 ماکدونیا و تراس ولایتلرنده بر حکومت قورمشیدی .
 ایدی قاساندر اول امرده عموم قراللق عنوانی المی
 ایچون کندیسینی اورتیه آتدیغی حالنده سلوکوس
 بو عنوانی مؤخرأ اصل کندیسینی المی اوزره موقه
 و رای پرده احتیاطده کیرلنمکی مناسب کوردیکندن
 اول امرده آنتیغون ایله اتفاق ایدوب ایکنجی درجه ده
 جنراللردن ایکن برقطعه ارضیه ده اعلان استقلال
 ایلین پردیقاس و او من کی رقبه اوزرینه هجوم و غلبه
 ایله تکمیل بابلی و پافالاغونیا وقاپادوسی دخی ضبط
 ایشیدی . آنتیغون بویه کندی اتفاق سایه سنده همان
 بتون اناطولی یی سلوکوسک ضبط ایلدیکنی و کندیسینی
 ایسه همان غلبات واقعه سندن هیچ برشی قازانه مد
 یغنی کورنجه سلاح مقاومتی برارهلل سلوکوس اوزر
 ینه چویرمش و مرقومی مصره قدر قاچیروب بتون
 مالکنی المش ایدی . انجق سلوکوس مصره واردقده

بطلمیوسی قان دیروب انکله بالاتفاق آنتیغون اوزرینه
یورومش و غزه نام محله میلادک ۳۱۲ سنه مقدمده
آنتیغونه غلبه ایله تکرار بابل و مدیانه کیرمش ایدی.

دیگر طرفده قاساندر ایله آنتیغون یکدیگریله قراللق
عنوانی ایچون رقابت ایده طور سونلر سلوکوس
شمیکی بغداد شهری جوارنده و دجله نهری اوزرنده
مؤخرأ بین العربان «مداین» دیه شهرت الان سلوسیا
شهرینی قوروب کندیسنه پای تخت اتخا ذیله عجملر
اوزرینه دخی صالدره رق بتون ایرانی و اناطولی
ضبط ایلشیدی. نهایت آنتیغونک وجودی قاساندر دن
زیاده کنسیدی جانی صقید یغندن قاساندر و بطلمیوس
ولیر یماق ارسنده آنتیغون علیهنه عقد اولنان اتقاقه
سلوکوس دخی داخل اولدی.

متفکرک آنتیغون ایله بودفعه ایتدک لری محاربه
مشهور ایسوس محاربه سیدر که میلادک ۳۰۱ سنه
مقدمه سنده وقوعه کله رک اول امرده آنتیغون و اوغلی
دمتریوس اعدای متفقه بی بوز مشلرایسه ده دمتریوس
قاچان دشمنی تعقیب ایده یم دیر ایکن اردودن براز
زیاده جه اوزا قلاشوب بعده متفکر تکرار آنتیغونی

صقشدير مقله هر نه قدر آنتيغون فدای جان ايدنجه يه
 دكين چالشدي ايسه ده بر چوق يرندن مجروحاً فدای جان
 ايلديكي زمان اردوسي بالکليه پریشان اوله رق ارتق
 دمتر يوس دخی بو پریشان عسکر ايله دشمنه هيچ
 برشی يايه مدي .

بو غلبه ده سلو کوس بتون سوریه و مزاپوتاميا
 ايله اناطولینک هنوز کندی اداره سنه چکماش اولان
 ير لر بنی دخی ضبط واستیلا ایلش و عموم آسیا قرالی
 عنوانی المشر . واقعا سلو کوسک بودر جله ره قدر
 شان وشوکتی آرتمسی کرک بطلمیوسی و کرک لیر یمای
 دوچار حسد ایلدیسه ده سلو کوس جنگاور اولدیغی
 قدر دیلوماتلقده دخی ماهر بر آدم اولوب بود دفعه دخی
 رقیب مقتولی آنتیغونک اوغلی دمتر یوس ايله اتفاق
 ایلش اولدیغندن بو اتفاق سایه سنده یکی خصم لرینه غلبه
 چالیدی و عقیب غلبه سنده دمتر یوسه ده یوز چویروب
 بیچاره نك قز یله بالازدواج دامادی اولمش بولندیغی
 حالده ینه قیداسره المقدن چکنمه رک نهایت لیر یمای
 بالکليه پریشان ایتک ایچون اورو پا قطعه سنه دخی
 چکدی وفي الواقع ۲۸۲ سنه مقدمه سنده انی ده محو

و پریشان ایلدهرك « غالبر غالبی و فاتحمر فاتحی »
 عنوانيله ماكدونیا و تراس و آسیا قرالی عنوانینی
 الدی .

ایشته بوقدر غلبات اوزرینه ملك اسكندر حقیقته
 یالكز ایکی جنرال میانده منقسم قالمش اولدی كه بونك
 بریبی مصرده بطلیوس و دیگرى آسیاده سلوکوس
 اولوب بطلیوسك قوردیغی دولت مصریه « دولت
 بطالمه » و سلووکوسك قوردیغی حكومت دخی
 « سلوسید دولتی » دیه برچوق زمانلر پایدار اولمشدر .
 واقعا بونلر دخی یكدیكر یله محاربه دن خالی قالمیلر .
 حتی ملوك بطالمه برقاج دفعه سلوسیدلره غلبه دخی
 ایدرك سوریه یی اله کچیرمشلردر . بوندن ماعداصكره
 كلان سلوسید حكمدارلرینك كوشكلكی سیئه سیله
 اناتولی و ایران جهتلرنده برطاقم طوائف ملوك نائل
 استقلال اولمشلر ایدی . مع هذا سلوسید دولتی یه
 بر دولت معظمه عد اولمقدن دوشمیوب بابل و سوریه
 طرفلرنده بو دولت دخی بطالمه مصریه کبی تاروما
 استیلای جهانگیرانه سنه قدر دوام ایده کیمشدر .
 آسیا و آفریقا قطعهلرنده شو اجمال ایلدیكمز

انقلابات عظیمہ وقوعہ کلیدی صرہ قفقاس و قریم
 و افلاق و بغداد و بلخارستان و بوسنہ و ارنائو دلفی
 تشکیل ایلان ممالک و اسعہدہ اوزمانلر نہ کبی انقلابات
 ظہورہ کلیدی حقندہ تاریخک پک از معلوماتی وارد ر.
 بابل و اناطولی و سوریه و مصر و یونانستان طرفلر ینک
 معموریت و مدنیت دائرہ سنہ کیرملرندن پک چوق
 صکرہ کی زمانلرہ قدر اورویا جہتی عادتا ممالک ججهولہ.
 دن عد اولمق مرتبہ لردہ اہالی و معموریت و مدنیتدن
 خالی قالمشدر . صکرہ لری ینہ آسیا طرفلرندن یکمیش
 اولہرق اورالردہ بر طاقم اقوام تورہ مش ایسہدہ
 اقوام مذکورہ نک مهاجرتلری شمیدی آمریقا مہا.
 جرتلری مشالو اویلہ بر قایج آی ظرفندہ وقوعہ کلیوب
 بونلر مرکز انتشار بنی آدمدن بر کرہ تباعدہ باشلاد.
 قدن صکرہ نرہ کیدہ جہکاری پلکدہ محقق و معین
 اولہرق معلوملری اولقمسزین سنہ لرجہ مدت اورویای
 وسطی و شمالی چوللرنندہ طاغلرنندہ اورمانلرنندہ کشت
 و کنار ایلدکدن و بناء علیہ اصل وطنلرندن حرکت
 ایدنلر وفاتلہ اولاد و اخفادلری ایلک مایہ مدنیتی دخی
 غیب ایدوب حتی یکیدن یکی یہ کوردکلری شیرہ

بر اسم تسمیہ ایتک و چار پشدقلمی بعض اقوامدن
یکی لقردیلم او کریمک صورتیله لسانلری بیله دکشد -
کدن صکره طونه وادیلمینه اینشر بولملمدن ناشی
بواقوام بونانستان جهتمنده کی خلق ایچون بالکلیه
بار بار عد اولمشدر .

اگر اقوام مذکورہ بویله بالکلیه بار بار وممالک
شمالیہ دخی بالکلیه غیر معمور اولمیوبده انا طولی
کبی بولنسه ایدی قدیم یونانلرک شماله طوغری توسیع
حدودایتلمی لازم کلورایدی . انجق شماله طوغری توسیع
حدود ممکن اوله مدیغی ایچون یونانلر سیاحت بحریه
مشاقنی کوزه الهرق ایتالیا فرانسه و تاسپانیایه طوغری
کیتمشرودائرہ مدینتلمینی بوسورتله توسیع ایتمشدر .
حتی اسکندر کبیرک ممالک شمالیہ طوغری فتوحاته
کیتمیوبده کندی قومیتیه هیچ مناسبتی اولیان ممالک
ہندیہ قدر اوزامسی دخی شمال طرفلرینک عدم
معموریتی حسیلہ حرکات عسکریہ مساعدا اولمدیغی
کبی اورالرجہ قازانیله جق ثروت ومعموریت دخی
بولملمدن نشأت ایلش اولسی واردخاطر اوله بیلور .
ممالک شمالیہ یعنی شمیدیکی افلاق وبغدان (رومانیا)

وصر بستانه طوغری استیلای ممالکه کیدن قوم
رومالیر اولمشدرکه ذاتاً مصر وانا طولی و سائر هی دخی
اداره جهانگیرانه لری التنه الانده بونلر اولدیله
رومالیرک نه صورتده توره یوب و مدیت و قدر تلی یی
نصل آرتدیروب یونانستان قارتازی مصری انا طولی یی
نه یولده تحت استیلایه المش بولند قلی بوندن اول
ایتالیا تار یخنده ایضاح قلمش اولدیغی جهته بوراده
ایضاحات مذکوره یی تکرار ایتکه حاجت یوقدر
اسکندر واسلافی ایله رومالیرک شو تار یخ عثمانی حدودی
داخلنده ایقاع ایلد کیری اشبو انقلابات مهمه حقنده
حاصل ایتش بولند یغیز فکر اجمالییه ضمیمه بوراده
قارلر مزه عرض و اخطار ایلیه جک برشی قلمش ایسه
اودخی ذکر اولنان انقلابات مهمه سیاسییه و عسکرییه
اثناسنده اصل جوهر مدیتی محافظه ایلکده بولنان
انقلابات دینییه قضیه سی اوله جقدر

یهودیله آتور حکمدار لری یدیه قیداسره دوچار
اولد قلدن صکره فرس قدیمک ایلک حرکت جهانگیرا -
نه سی اوزرینه بواسارتدن رهاری وقوعنده وطن
اصلی و قدیملرینه طوغری پراکنده و پریشان اولد -

قلمی اولجه عرض ایتشیدک • بو حالده دخی یهودیلر
 کندی قومیتلرینک استقلالنی استردادوا حیایه برارهلق
 هوسلنمشلر ایشه ده موفق اوله مامشلردر • ذاتاً موفق
 اوله میه جقمق طبیعی دکلیدر مصر و سوریه ده هر زمان
 وجودی خالی اولیان ایکی دولت معظمه نك جولانکاهی
 ارض فلسطین اولدیغی حالده اوراده یهودیلر کبی ارتق
 شیرازه انتظاملری بوزلمش واسکی خصائل عسکریه -
 لرینی ده غیب ایتش اولان برملتک بالکلیه محو و نابید
 اولماش بولنسی بیله استغرابه شایان کوریلور • انجق
 هر نه قدر اولسه بولنر کتب سماویه یی و هیچ اولمز ایشه
 کتب حقیقه سماویه دن باقی قاله بیلن مقداری حامل
 اولوب جناب حق ایشه نعمت دیانت کبی قوللرینه
 لطف محض آلهیسی اولان بر عاطفی ینه بوقوم یهود
 طریقیله اتمام بیورمغی تجلی و تقدیر ایلش اولدیغندن
 ایشه بو حکمت ربانیه یه مبنی یهودیلر بالکلیه محو و نابید
 اولماشلر و فقط اللرنده بولنان شریعت موسویه احکا -
 میله عامل اولمق شویله طورسون بلکه ده بوا حکامی
 تمامیه عالم بیله اولمه رق احکام کتب یالکز خا خاملرک
 معلومی اولمق صورتیه قوم یهود بر جهل مدعش ایچنده
 قالمشلر ایمه •

اگر یهودیلر احکام دینیہ لرینہ واقف واحکام
 مذکورہ ایلہ عامل اولسہ لرایدی مؤخرأظهور حضرت
 عیسی روح الہمدہ نبی ذیشان مشارالیه حضرتلرینہ
 او قدر مخالفتہ بولملمی ایدیلر ؟ ایمدی قوم یہودک
 بویلہ شریعت قدیمہ احکامندن بالکلیہ خارجہ چیقمش
 ووادی جہل ونادانیدہ یولنی شاشیرمش بولنسی حسمیلہ
 ذاتاً ازلدہ کی تقدیر ربانینک دخی جہلہ مقتضیاتندن
 اولہ رق حضرت یسوع افندہ مز مہد شہودی تشریف
 بیور مشلردر کہ اہل تاریخ میلاد عیسی علیہ السلامک
 خلقت حضرت آدمدن ۴۰۰۴ سنہ صکرہ کانون ثانی
 ماہنک یکر می بشنجی کونی وقوعبولدیغنی تخمین
 ایتمشلردر . مؤخرأ تصحیح توریح اصولی اوزرہ
 ایدیلان حسابدہ میلاد مذکورک حضرت آدمدن
 ۴۹۶۳ سنہ صکرہ وقوعبولمش اولسی صحتہ دہاقریب
 اولدیغنی تین ایشدر . ہلہ رومانک تأسدمندن ۷۵۳
 سنہ صکرہ اولدیغنی اک طوغری بر حساب عداو لنور
 حضرت عیسی دنیای تشریف بیوردیغی زمان
 مصر وفلسطین واناطولی ویونانستان وسوریہ کاملا
 روما دولتنک تحت استیلای جہانگیرانہ سنہ کیرمش

و بناء عليه فلسطينه بررومالی والی حکومت ایتامکده
بولنش ایدی . مع هذا رومالیرك عادتلى تحت مغلو-
بیتلرینه الدقلى قوملك كندی قوملرینه مخصوص
اولان استقلاله تعرض ایتامك اولدیغندن واوزمان
یهودیلك مقام ریاستنده بولنان هرود ایسه حضرت
عیسانك كتب توراتده ورودی خبر ویریلان مسیح
اولدیغنی اكلادیغندن كندی بطلان عقاید حادته لری
میدانه چیقماق و جمعیتلری ده ا زیاده پریشان اولماق
ایچون حضرت یسوعی اولدورمك قصدینه دوشدی
بو حالد و والده سی حضرت مریم اول طفلی الوب
مصره قاچدی و تاهرودك وفاتندن صكره انجق ارض
فلسطینه كه یلیدی . حضرت عیسی علیه السلامك
اعلان نبوتی اوتوز یاشنده وقوعه كمش ایسه ده ا
اون ایکی یاشنده ایكن علمای یهود ایله بحث و مكالمه
كیریشه رك اوزمانه كوره یهودیلرك اصل دین حق
موسادن نه قدر تباعد ایلش بولندقلرینی كوسترد
و كندی طرفندن بیان ایلدیكى ملاحظات محقه ایله یهو-
دیلك عقللرینی باشلندن الور ایدی . بناء عليه ذلك
دها نبوتی علانیتیه چیقمسزین یهودیلر مشار الیهك

مسیحیتنی اکلا دقلری کبی اعلان نبوته باشلار باشلامز
دخی علیهنده عظیم برفرقه تشککل ایدرک جاننه قصد
ایتمکه قدر پورومکدن چکنا مشلردر .

(اوچنجی فصل)

ظهور عیسادن هجرت نبی آخر زمانه قدر

عن ۳۰ الی ۶۲۲

تفصیل - غریبدرکه حضرت مسیح دین ابرا-
هیم و شریعت موسایی تجدید و احیایه کادیکی حالدہ
نصرانیت یهودیلر میاننده انتشار ایدهمیرک اوزمانه
قدر بت پرستلک مثللو بطلان کلیدن عبارت بردینه
تابع بولمان رومالیلر میاننده دهها قولای منتشر اولمشدر .
قاتولیک کلیسا سنک مورخلری عادتابالافتاق خرسستی-
نلغک ابتدای انتشارنده رومالیلرک خرسستیانلری قتل
عادلر و تضییق و اجبارلر ایله محوه چالشدقلرینی و فقط
دین حقلک هر تضییقه تحمل ایله ینه غلبه و تفوق
ایلدیکنی یازارلر . لکن " پرسیه کوسیون " دیدکلری
مظالمک هر دفعه ووقوعنده قاچر آدم قتل اولندیغنی
دخی خبر ویرمش اولدقلرندن بونلرک مقدارینه و حرکات
واقعه لرینی صورت تجسس و کیفیت محاکمه لرینه

باقی پور سه خرسیتیانلر حقنده اجرا ایدیلان مظالمک دین
حق حضرت عیسی علیه‌السلام بر خصوص متدن نشأت
ایش اولسندن زیاده مجرد روما دیانت و مدنیت
قدیمه سی اورته سندن خرسیتیانلر خلقی دینه دعوت
ایچون ایتدکری غیرتدن ملکا و سیاست بر فالق
چقده جفی ملایسه سیله ایشته اوفتالقدن طولای
بعض خرسیتیانلر پولتیقه مظنونیتی ایله دوچار قضا
اولشلردر .

بوندن اول کائناتلرک بر جلدنده ینه بو وادیده
بیان ملاحظه ایتش اولدیغیز حالده محرر عاجز حقنده
غیاباً توجهی بولسان بر عالم نصرانینک شو یولده کی
افاداتمزه بیان استغراب ایلدیکی و بونی نوعاً تعصب
اسلامیزه جل ایتدیکی احبابمزدن و علمادن بر ذات
طرفندن تبلیغ اولمش ایدی . اوذاته جواباً سویلدیگیز
وجهله بوراده دخی تکرار ایدرز که بزه شو یولده
افاده کلام ایتدیرن شی کتب اسلامیه دن النمش معلو
مات اولیوب ینه کلیسا تاریخلرینک غایت بیطرفانه اوله
رق محاکمه سی اوزر ینه بوفکری حاصل ایتشردر .
ذکر اولسان تاریخلرده بر چوق تناقضلر نظر

میطرفانده محاکمه چکیلور ایسه شو حقیقت
 میدانه چیقار . از جله شایان دقتدر که حضرت
 مسیح حقنده کی اذا و جفا خصوصنده بیله فلسطین
 والیسی مجرد یهودقرالغنی احیایه ساعی بر آدم اولق
 صفتیله حضرت مسیح افندمزه اذایی تجویز ایدوب
 یوقسه نبوتلری حسبیله بوکستاخلقده بولنماشدر .
 بوندن ماعدا روماده کی خرستیانلر بر قایچ یوزسنه مدت
 خفیاً اجرای آیین ایدرک هله نشریات دینه لرنده دخی
 بر درجه یه قدر ال التندن مساعیده بولندقلری حالده
 روما حکومتک بوندن خبردار اولماسی قابل اولمه.
 جفندن شو یولده کندیلرینه و یریلان مساعده روما .
 لیلرک خرستیانلق علیه او یله کلیسا تار یخنک بالمبالغه
 التزام ایتدکلی درجده خصوصت دینه لری اولد .
 یعنی اثباته کافیدر . بز حقایق تار یخیه نک تغییرینی
 بر غیرت دینه ایله بیله تجویز ایلیانلری تحسین ایده میر .
 براز دها تعمیقات تار یخیه کیر یشه جک اولور
 ایسه که نه رومالیلرک ونه ده اقوام وحشیئ شمالیه نک
 خرستیانلغی محسوه هیچ بر جرأتی کورلمدیکنی وحتی

کلیسا مورخلری دیانت نصرانیه نك قلیج قوتیله وضع اولندیغنه دائر برتقاخریهودهده بولندقلری حالده بالعکس شارلمان زماننده و اندن اول و صکره و ازجمله تنونق شیوالیهلری ججهتی مثلوهیئات دینه عسکر-یه نك قلیج قوتیله نشر دینه سعی ایلدکلرینی میدانه چبقاره بیلورز . فقط بوراده مرادمن اهل کتاب اولدقلرندن طولایی نوعمار فیکلریمز صاییلان نصرانیلر ایله مباحثه و مجاهده اولمیوب عادتاً بر مورخ صفتیله تحریک خامه ایتکده بولندیغمزدن دیانت نصرانیه نك رومالیر میانده انتشارینی بزدها حریت پرستانه برطور ایله تلقی ایتکده یز .

الحاصل روماده دیانت عیسوییه بالنسبه قولاً - یلقه منتشر اولمش و شو قدر وارکه دیانت نصرانیه نی قبول ایدن اهالی دیانت باطله قدیمه لری قواعدندن برچوغنی ترك ایدهمیه رك ازجمله قارناوال مراسمی و کلیساره صورتلر و پتله تعلیق مثلوه برچوق شیلرده هب بت پرستلک مذهب باطلنی تقلیدده دوام ایده کیشلردر .

اره دن زمانلر کچد کجه شویولده کی بدعتلر قوتلری

آرتدیرمش اولدقلری کبی چونکه حضرت مسیح من
 قبل الرحمن کندیسنه نازل اولان انجیل شریفی تزییر
 و تحریر بیوره میهرق یالکز بعض آیات انجیلیه یی
 حواریونه نقل و قرائت ایله انلر طرفدن ضبط ایدلمش
 بولندیغندن مؤخرأ حواریون وانلرک تابعینی دخی
 ترجمه احوال مسیحیه یی اشبو آیتلر ایله مزج ایدرک
 بش التی قدر انجیل یازمشلر ایدی . بوانجیللر چوغاله
 چوغاله درت بش یوزه واردیغی کبی اغلی
 و بلکه کافه سنه بت پرستلک زمانک عاداتندن اولان
 بدعتلر دخی قاریشه رق خرستیانلق ذات حضرت
 مسیحک وضع بیورمش اولدقلری صورتدن بالکلیه
 چیقمش و بسبتون بشقه بر دین صورتنی المش ایدی .
 بر حقیقت بو صورته تغیر ایدنجه اونقطه اوزرنده کی
 افکار و عقایدک دخی تخالفی طبیعی بولندیغندن آریوس
 اسمنده بر پاپس ایله روماقاتولیک کلیسای ارمهنده
 وسائر بعض بیوک پاپسلر میاننده قواعد دینییه و مذ-
 هبیه جه عظیم شقاقلر منازعه لر مجادله لر ظهوره کلمش
 و خرستیانلق پارچه پارچه آیرلمش ایدی .
 اشبو منازعات عظیمه یی کو یا قسطنطنین نام ایمپرا-

طور خرسیتیانلغی بالقبول نیسه یعنی مرمره دگری
 اوزرنده و خداوندکار ولایتندده واقع ازنیق شهرنده
 عقد ایلدیکی برقونسیل یعنی مجلس عمومی ره‌ایین
 استشاره‌سیله قرار و یروب برطرف ایلش ایسه‌ده ویر-
 یلان قراحقایق نصرانیه‌یه موافق اولمیوب بالکلیه
 مغایر و مخالف بولندیغدن اختلاف افکار اولکی قدر
 صریح وجدی اوله‌رق دکل ایسه‌ده هر حالده دوام
 ایده کتمشد که مؤخرأ پروتستانلغک ظهوری ایشته
 اوزماندن قالمه امراض اختلافک تشنجندن عبارت
 بولندیغی قویاً ظن اولنور .

حقایق نصرانیه بوقدر اختلافات و خیمه ایچنده
 غائب اولوب کتیدیکی مثللو شریعت موسویه دخی
 عربستان جهتلرنده میلاد عیسی هنکاملرنده کی تغیرندن
 زیاده متغیر اولوب کتدیکندن اصل دین حق
 ابراهیمک ظنون منضمه باطله دن تفریق و تطهیری آیه
 ترقیات عصریه‌یه متناسب احکام جدیده‌نک دخی ناسه
 تبلیغی ایچون پیغمبر آخر زمان علیه الصلوٰة والسلام
 افندمز حضرترلرینک بعثت سینه‌لری حقنده کی حکمت
 ازلیه و ابدیه کندی حکمنی جسدأ و حقیقه میدانه
 قویمش ایدی .

حضرت عیسانک میلادی ایله حضرت محمد
 علیه السلام هجرتلری ارمسند ۶۲۲ سنه کذران
 ایلش اولوب انجق میلاددن اوتوزنجی سنه یه قدر
 حضرت عیسی علیه السلام اعلان نبوت بیورمدقلری
 کبی نبی ذیشان افندمز دخی هجرتلرندن اون سنه مقدم
 اعلان نبوت بیورمش اولدقلرندن ایکی نبوتک اعلانی
 ارمسندن ۵۸۲ سنه کذران ایلش دیمک اولورکه شر-
 یعت موسویه بالنسبه دهاپک چوقی زمان زیاده بلا
 تغیر دوام ایلش اولدیغی حالده خریستیانلغک اندن پک
 آز مدت بلاتغیر دوام ایلسی دخی مجرد دیانت مذکو-
 وهنک من القدیم کتب الهیه اصحابی میاننده انتشار
 ایتموبده من القدیم بت پرستلکه الشمس وحتی آنک
 برچوق قواعدینی محافظه ایلش بولنان اقوام میاننده
 انتشار ایلش بولنمسندن نشأت ایلدیکی وارد خاطر
 اولنور .

میلادایله هجرت ارمسند کذران ایلیان شومدت
 ظرفنده ممالک متمدنه وتمدینه جه وقوعه کلان انقلابات
 مهمه سیاسیه کلنجه : بومدت روما ایمراطورلغی
 زمانه وانک دخی بالخاصه ایکنجی واونجی ودردنجی

و بشنجی دورلرینه مصداف اوله رق بودورلرک
خلاصه تاریخی ایسه بوندن اول ایتالیا تاریخنده
اجال ایدلمش اولدیغندن بوراده تکرارینه حاجت
کوریه من ایسه ده بوجلدده دخی شو قدر جق براخطار
ایدهلم که :

روما دولتی عادتاً ممالک مسکونه و تمدنه نك کافه.
سنی استیلا ایدرک اداره امور جهورجه دقت و اهمتا.
مده بولندیغی جهته بتون دنیا یوزنده بر آسایش کامل حکم
سورمش ایسه ده صکره لری اعظمک کافه سی کند.
یسنی مقام حکومتی ایمپراطور انتخاب ایتدیرمک ایچون
عسکری غجقلامغه باشلایه رق بناء علیه عسکر ارتق
انتظامات عسکریه سنی کاملاً غیب ایلدکن صکره
مطمح نظری اولان ایمپراطور لغه یول بولانلر ده هیچ
بریسی راحت و سلامت کوره میهرک رق باسنک یدغد.
ریله قتل اولمغه باشلامسی اوزرینه روما ممالکنک
هر طرفنده آسایش و استراحت بوزولمش و برچوق
والیر استقلال داعیه سنه قیام ایلدکری کبی برچوق
قوملر دخی اوزمانه قدر روما تابعیتی بر نعمت عظمی
عدایدلرلر ایکن ارتق کندی قومیتلرینک رها و استقلالی

چاره لرینی دوشونمکه وفرصت بولدقجه قیام ایتکه
باشلامش ایدیلر .

هله روما دولتی هنوز قسم شرقی وقسم غربی دیه
ایکی قسمه آیرلمسزین برچوق زمانلر بریمی استانبولده
ودیکری روماده اوله رق ایکی ایمپراطور حکم سورمکه
باشلاینجیه رومانک شیرازه انتظامی برقاده ها مختل
اولسیله اوروپا جهتمندن برطاقم بار بار قوملر بودولت
جسمیه یی ازعاجه باشلادقلری کبی آسیا جهتمندن دخی
عجملر میدان فرصتی آچیق بوله رق رومالیردن اسکی
مغلوبیتلری آجیسنی چیقارمغه باشلامشلر وحتی برقاج
دفعه بیوک بیوک غلبه لره دخی نائل اولمشلردر ایمدی
ملل واقوام متجاورهنک بوصورتله روما ایمپراطورلغی
علیه نه ازعاجاته باشلاملری رومانک قسم شرقی و غربی
دیه ایکی قسمه انقسامندن صکره قسم غربینک ۴۷۶
سنه میلادیه سنده باربارلر النده بالکلیه انقراضیه ملل
ودول جدیدهنک تأسس وتشکله باشلاملرینه یول
آچدیغی الیوم تاریخ عثمانینک حدودی داخلنده بولنان
رومای شرقی یاخود بیرانس یعنی استانبول ایمپراطور
لغنک دخی بالکلیه رومادن آیرلمسنی منج اولمشلردر

استانبول امپراطور لغتک تاریخ یونان دن زیاده عثمانی
تاریخنه درجه مناسبتی فقط برچوق مورخلر بودولتی
دخی یونانیلکه نسبت ایلدکاری ایچون هر حالده خلاصه
تاریخیه سنی یونانه مخصوص اولان جلدده مزج ایتکه
مجبور اولدیغیزی بوندن اولکی یونان تاریخنه بیان
ایتمش و دولت مذکور هکروما انقراضندن تاستیلای
عثمانییه قدر نوعما جان سورومکدن عبارت بولنان
صورت دوامنه دائر دخی معلومات لازمه یی و یرمش
ایدک . بو معلوماتدن مستبان اولمش بولنه جفته کوره
ذکر اولنان شرق دولتی رومادن حین مفارقتنده شمیدیکی
تاریخ عثمانینک حدود شامله سی ایچنده بولنان ممالکک
اغلبنی جامع بر دولت عظیمه و جسیه اولدیغی حالده
مجرد رومالیردن منتقل اولان کوشکک و اعتنامزلق
واخلاقمزلق سیئه سیله اورویا قطعده سندن برچوق
باربار قوملر دولت مذکوره یی مغلوب ایده ایده حدو-
دینی تاادرنه و استانبول جوارلرینه قدر تضییق ایلد-
کاری و کندی اساس حکومت قومیه لرینی وضع و تاء-
سیسه چالشدقاری کبی آسیا جهتندن دخی یری اقوام
و بالخاصه عجملر دولت مذکوره یی تضییقندن هیچ بر

زمان خالی قالمیه رق بناء عليه عثمانی لیرك استیلاسی زما
 ننه قدر اولان دوامنی کر چکدن بر جان سورومک
 صورتنه افراغ ایشلر و هر طرفده کوچک کوچک
 حکومتلر و یا خود امور اداره سنده عادتا مستقل والیر
 میدان المشردر .

ایشته جهان یالکز دیاتجه دکل حکومت و سیا-
 سیاتجه دخی بویله براختلال عظیم ایچنده قالمش اولد-
 یغی بر زمانده ذات حضرت رسالت پناهینک بعثت
 سنیه لری حقنده کی تجلی ازی وابدی ربانی یرینی
 بولشدر . بعض خرستیان مورخلری نبی آخر زمان
 افندمن حضرتلرینک مجرد نصرانیت علیهنه قیام
 ونظهور ایلدیکنی ظن وقید ایدرلرایسه ده بو خطا لرینک
 اثباتی ایچون الده قرآن عظیم الشاندن بیولک دلیل اوله -
 میه جنغی کبی بر چوق مدقق و محق مورخلرک بولدقلری
 حقیقت دخی کاملا بونک خلافسه در . ابتدای بعثت
 سنیه اثناالرنده بر العرب اوزرنده الزیاده حکمی جاری
 اولان دیانت هر حالده مصر و یونان و روما کبی قدیم
 ملتلردن منقل بر بت پرستلک اولوب حتی بتلر دخی
 عربک هنوز ترقیات صناعیه یه مظهر اوله ماملری

ملا بسده سیله پک قبا صبا شیردن عبارت ایدیلر . بت
پرستلکدن صکره صابئی دینلان و آی و کونش ویلدیزلر
کبی اجرام سماویه یه عرض پرستشدن عبارت بولنان
بر دین دخی زیاده سیله منتشر اولوب حتی بودینک
خارجدن کیرمیدرک ینه عربستانده تشکل ایلدیکی دخی
مظنوندر . زیرا اجرام سماویه یه دقت ایدرک بونلرک
دور و حرکتلری حقنده ایلک معلومات فلکیه نک
حصولی عربستانده اولدیغی کبی فی الحقیقه عقلره
حیرت ویرن حرکات اجرام سماویه یه کلدانی و عرب
مثلو اهای محلیه نک کندی کندیلکلرندن اوله رق عرض
پرستشه باشلاملی استبعاد اولنه مز .

اشبو ایکی دیندن صکره بر العربده براز یهودی
ایله انلردن دها آز دخی خرستیان بولندیغی معلوم
اولدیغندن و حالبوکه قرآن عظیم الشانده ال بیوک
تذیرلر بت پرستلر و صابئیلر مثلو کفر محض ار بابی
علیهنه اولوب یهودیلره و خرستیانلره ایسه اهل کتاب
اولملری نظریله باقلش بولندیغندن ایشته بو حال اثبات
ایدرکه نبی ذیشان افندمز حضرتلری محض خرستیان
نلق علیهنه کلش اولیوب بووهمی ینه خرستیانلره

ترك ايلد كدن صكره حقيقت محضه اوله رق شو و تحقق
ايدر كه بعثت سنيه كفر محض ار بانه ذات احديتي
طائفه برابر يهود و نصارانك تغيير ايلد كلري دين ابرا-
هيمي بر طاقم عقايد حادثه دن تطهير مقصد عاليه
وقوعه كلسدر . نصل كه كيفيت باب آتیده دخی ایضاح
اولنه جقدر .

✽ ایکنجی باب ✽

ظهور اسلام دن ظهور عثمانیه قدر

عن ۶۲۲ الی ۱۲۹۹

(برنجی فصل)

عصر سعادت دن ختام خلافت ار بعده قدر

عن ۶۲۲ الی ۶۶۱

تفصیل - نبی دیشان افندمن حضرت قری مکة
مکر مده قدم نهاده مهد شهود اوله رق کندیلری محلتك
الشرفلی بر فامیلیاسنه منسوب بولند قری حاله قبل
النبوة کسب و تجارتیه رغبتله از جمله زوجه مکرمه لری
خدیجة الکبر احضر تلرینک سرمایه منی حامله سوریه
طرفلرینه کار بان ران عزیمت اولد قری و اوراده بر
خرستیان پایاسی ایله بحث و مکالمه ده دخی بولند قری
کتب سیرده مسطور و مندر جدر .

ذات حضرت سعادتپناهی قرق یاشنه وصول ایله
 مکملیت بشریه یی احراز یوردقلری زمان ظهور
 وحی الهی ایله اعلان دین حقه دامن در میان همت اوله رق
 انجق رؤسای مکّه علوم دینیّه ده بهره لری ایله تقریق
 حق و ناحقه اقتدار لرندن طولانی دکل محضاً مکابره
 و معاند لرندن طولانی رسالت پناه افندمن حضرت تدرینه
 اعلان عدوانه باشلا مشلوردر . بر درجه یه قدر که اء اول
 دیانت جلیله یی قبول ایدن اصحاب کرام مکّه مکرمه ده
 بارینه میهرق رخصت سنیه جناب پیغمبر ایله بلاد حبشه
 طوغری هجرته مجبور اولدقلری کبی بالاخره بوجبور
 یت ذات حضرت نبوت پناهی یه دخی کلشدر . حال بو که
 مدینه اهالیسی شرف اسلامیتی اهل مکّه دن زیاده تقدیره
 موفق اوله رق ذات حضرت پیغمبری یی کندی بلده لرینه
 نقل مکانه تشویقدن خالی قالمالری مناسبتیه سرور
 کائنات افندمن حضرت لری دخی مکملرک اذا وجقا سندن
 قور تلق ایچون تشویقات واقعه یی قبول یور مشلوردر .
 اشبو هجرت سنیه میلاد عیسایک ۶۲۲ نجی سنه سنه
 مصادف اوله رق اهل اسلام ایچون دخی بر مبدأ تاریخ
 اتخاذ اولمشدر .

مدینه به هجرتدن صکره عدد اصحاب کرام کیتد.
 بکه آرتغنه باشلا یوب باخصوص حضرت عمر و
 حضرت علی و حضرت جزه مثللو نامدار قهرمانلرک
 جرأت عظیمه لری سائر اصحاب کرامی دخی تشویقه
 مدار اولمغله اوزمانه قدر اهل اسلامی از عاجدن خالی
 قالمیان کفار اوزرینه جهادی حاوی آیات قرآنی نازل
 اوله رق بعدما جهاد فی سبیل الله میدان آچیلشدر .
 عصر سعادتده ایدیلان محاریات ایکی صورتله وقوعه
 کلوب بونلردن بریمی نبی ذیشان افندمز حضرت ترینک
 بالذات حاضر و قوماندان اولدقلری محاربه لدرکه
 انلره « غزوه » و بر قسمی دخی پیغمبر افندمزک بالذات
 تشریف بیورمیه رق اصحابدن بر ذاتک قوماندانده سیله
 سوق ایلدکلری فرقه لدرکه انلره دخی « سریه »
 تعبیر اولنور .

مؤلفین نصارا دیانت جلیله اسلامیته نک محضا
 قلیح قوتیله تأسیس و تأیید اولنلدیغنی دعوی ایدرک
 بودعوالرینک اثباتی ضمننده دخی اشبو غزوات و سر-
 یاتی برهان مقامنده ایراد ایدرلر ایسه ده کتب سیر
 تتبع ایدیله جک اولور ایسه کور یلورکه محاربات

مذکورہ نك حادثا كافه سسی یا عربان كافره نك تعدی
و تعرضلرندن مدافعه و یاخود انلرك تعدیاتنه مقابله
بالمثل اوله رق وقوعه ككش اولوب شرف اسلامی
قبول ایلان قبائل و عشایر ایسه محضاً انوار نبوتله
تنویر بصیرت ایللری اوزرینه بوشرف اسلامیه
جناب پیغمبردن استدما و استرحام صورتیه نائل
اولمشلردر .

مؤلفین نصارانك بزی مقام تعیینده مؤاخذه ایچون
ایان ایلدكاری مقدمات نصل طوغری اوله بیلوركه
ذات رسالتپناهی نیجه آیات قرآنیده تعبیرات مسا-
عده کارانه ایله مظهر خطاب اولان یهود و نصارا
و باخصوص یهود ایله حسن مناسبتلرینی اصلاً تغییر
ایتمه رك بعض حرکات عسکریه و تدابیر حربیه ده
یهودیلك اتفاقنی دخی قبول بیورمشلردر . بناء علیه
اسلامیتك سرعت تعمم و انتشارینه هر شیدن زیاده
سبب اولان شی بودین جلیلك دشمنلر عندنده بیله
بوگونکی کونده دخی منکر اوله میان حقانیتی اولدیغنه
شبهه ابدیله من .

پیغمبر ذیشان افندمن حضرتلرینك حال حیاتلر .

نده کی محار باتک الک اهمیتیلیسی فتح مکہ مکرمه یی
منتج اولان موفقیت عظمی در که هجرت سنیہ نك
سکزی نجی سنه سنده یعنی ۶۳۰ سنه سنده میسر اولمشدر .
بفتح عظیمده قریش معندلری محو کلی یه دوچار اولملریله
حوالی عجزایه صرف امت محمددن عبارت بر ملت
نجیبه النده قالمش واندن صکره اسفار و فتوحات بعیده
ایچون اول محل مبارک بر مرکز مهم اولوب قالمشدر .
فتح مکه دن صکره رسول اکرم افندمن حضر-
تلی بش سنه دها معمر اوله رق بومدت ظرفنده دخی
هر طرفه غزوه لر و سریه لر وقوعه کلش و بفضل الله
تعالی عسکر اسلام هر حر کتنده موفق باخیر اولمشدر .
بر درجه یه قدر که هجرتک اوننجی سنه سنده (۶۳۲)
رسول اکرم افندمن حضر تلی دنیادن اخرته تشر-
یف بیوردقلری زمان مکہ مکرمه و مدینه منوره ممالک
اسلامیه نك ایکی رکنی ایکی پای تختی اولمق اوزره
حدودی دخی شرقاً نجد و غرباً بحراجر و جنوباً
یمن و شمالاً سوریه و لایترینه واصل اولمشیدی .
بوحدود داخلنده بولنان محملرک نفوسنی تخمین لازم
کلور ایسه نبی ذیشان افندمنک آخر وقتلنده شام

طرفلرینه کوندریلان بر اردونک مقداری اوتوز بیک
 نفره بالغ اولدیغنه وصول ججری بولنان حجة الوداعده
 حجاجک مقداری یوز بیک راده سنه واردیغنه دقت
 اولنه رق بو حالدده نقوس مسئله نک مقداری بر میلیوندن
 اقل اولق اوزره تخمین ایدیلهمیه جکی درکاردر .
 ارتحال حضرت پیغمبردن صکره کویا دین اسلام
 مک مدتی ختاده ایرمش ظن ایدن بر طاقم ضعف ایمان
 اربانک تلاشلی ارمه سنده دینک دین الله اولدیغنی
 و کتاب اللهک تمسک ایچون کافی ایدوکنی ناسه
 مع التهید تفهیم ایلان حضرت عمرا کبروارشدا صحاب
 اولان حضرت ابو بکر الصدیقه بیعت ایتمکه مشار
 الیه حضرتلری ایکی سنه و چندماه دوام ایلان مدت
 خلافتلرنده دیندن ارتداد ایلانلر و یا خود بر نبوت
 کاذبه ایله سبک مغزانی باشلرینه طوپلایانلر علیهنه
 فرقلر سوق ایتمکه جمله سنک جمعیتلرینی پریشان
 ایلدیکی و جمعیت اسلامیه بی الحق یکیدن تأسیسه
 موفق اولدیغنی کبی حضرت خالدی بغداد طرفلرینه
 و عمرو ابن العاص و یزید بن ابی سفیان کبی سردارلری
 دخی سوریه طرفلرینه برار دو ایله سوق ایتدی که

سوریه جبهه کیدن اردونک اوتوز بیک نفر موجودی
 بیرمول نام محله روم شرقینک یوز یکرهی بیک قسدر
 عسکردن مرکب براردوسیله چار پشهرق اوچ بیک
 شهید و یردیگی حالده دشمندن حده حسابیه صیغمر
 تلفات ایقاعیله برچوق یرلری قتح واستیلا ایلشدر .
 ایمدی حضرت ابو بکر اس الاساس ملیتمزی
 بوصورتله تأید ایلد کدن صکره حضرت عمر مقام
 خلافته کلد کیری زمان ارتق جمعیت جدیده و جلیله
 اسلامیه نک شخص واحد کی متحد اولان قوتیه شرق
 وغربه و شمال وجنوبه اردولر سوق ایدرک شمالا شام
 اوزرینه یورون عمر و ابن العاص و خالد دمشق الشاحی
 قتح واستیلادن ماعدا بعلبک و حا و حص طرفلرینه ده
 برآقین ایلد کیری کی شرقاً عراق جهتملرینه سوق
 اولنان ابو عبید بن مسعود دخی زاب نهری جوارنده
 عجم دولتنک عظیم براردوسنی منهزم و پریشان ایتمک
 اوزره ایکن عجملرک کتورمش اولد قلری بر جسیم فیل
 عربلرک اتلرینی اورکوتمکله سردار مشارالیه بالنفس
 فیل اوزرینه صالدره رق خرطومنی کسیدیکی زمان
 فیل کندیسنی الت ایتمکله شهید اولدیغندن بواردو

تلفات و فیرہ ایلہ رجعتہ مجبور اولمشدر • انجق بوحال
 اهل اسلامه اصلا فتور کتورمدی • برسندہ صکرہ
 کبار صحابه دن سعد ابن ابی وقاص او توز بیک کشیک
 براردو ایلہ تکرار عجملرک اوزرینه صالديره رق رستم
 نام سردارک قومانداسی التندہ بولنسان الی بیک
 کشیک براردوی تار و مار ایلدیکی و درفش کاویان
 دیه تواریخ قدیمه ایرانیه ده مشهور اولان و عن اصل
 کاوه نام بر تیمور جینک اوکنه طوتدیغی دریدن عبارت
 ایکن ضحاک ماری اوزرینه وقوعبولان قیامده بیراق
 اتحاد اولنده رق مؤخرأ انواع جواهر ایلہ ترصیع
 و تزین قلنمش بولنسان بیراق بو غلبه ده اهل اسلامک
 النہ کدیکی کبی حضرت سعاد بن ابی وقاص دشمنک
 ارقه سنی بر اقیه رق دولت اکاسره ایرانیه نک اصل
 پای تختی بولنسان مداین شهرینی ده محاصره ایچون
 دجله پی ده کجدی و تمام یدی ای محاصره و محاربه دن
 صکره کسرالرک صوک حکمداری بولنسان یزد جردی
 قاجیروب طاق کسری و یاخود قصر ایض نامیله مشهور
 بولنسان سراینه تکبیر لرایله کیردی که بوسرایک خرا -
 بدسی حالا بغداد جوارنده مشاهده اولنمقده در •

مداینده و خزائن اکاسره ده اول قدر مال چیقدی که
 تخمین و تعداددن بیروندر . حضرت پیغمبر افندمن
 اولاد اکاسره یه سیف اسلام ایله خاتمه چکیله جکنی
 اولدن تبشیر بیوروب اورادن انه جق اموال غنیمتک
 بین الاسلام صورت تقسیمی دخی وصیت بیورمش
 اولدقلرندن وصیت حضرت رسول الله حرفی حرفه
 اجرا اولندی .

حالبو که شرق جهتهنده سعد ابن ابی وقاص شهید
 معظم ابو عبید بن مسعود حضرتلرینک باشلامش او -
 لدیغی سفری بو صورتله حسن ختامه ایصال ایلدیکی
 کبی شمال جهتهندن سرعسکرلک عهده استیالارینه
 توجیه بیوریلان ابو عبیده ابن الجراح حضرتلری دخی
 سوریه نك هر طرفی استیلادن صکره قبله یهود
 ونصارا و برزمانه قدر اهل اسلامک دخی قبله سی اولان
 قدس شریفی ده تحت محاصره یه المشیدی . اوزمانلر
 قدس شریف روم شرقی دولتی طرفندن ارسال اولنان
 بروالی و قوماندانک تحت محافظه و اداره سنده بولمغله
 بونلر قبله کاهلرینی ایادی اسلامه تسلیم ایتماک ایچون
 صوک درجه یه قدر مقاومت ممکن اوله میه جغنی اکلا.

پنجه ذاتاً کندیلری کویا اهل اسلامک نصاریه
 دشمن اولدقلری واورایه کلکدن مقصد دیانت نصاری
 محو ایلکدن عبارت بولندیغی فکر باطلنده بولند -
 قلرندن سر عسکر اهل اسلامه خبر کوندره رک
 حضرت عمرک بالذات کلمسنى و کلیساره و پایا -
 سلره و نصرانیت ار بانه تعرض اولماق شرائطنک
 قبول اولمسنی و اگر بو شرائط قبول اولنور ایسه
 قدس شریفی تسلیمه رضا کوستره جکارینی بیلدیر -
 دیلر • حالبوکه اهل اسلامدن ایدیلان بویولده کی
 برخوفه ذاتاً محل اولماغله ایستدکلری شرائط بافرمان
 خلافتپناهی قبول و امنیت لازمه اعطا اولنهرق
 قدس شریفکده فتحی میسر اولدی که هجرتک اون
 التنجی (۶۳۸) سنه سی ایدی •

فتح قدسه قدر روم شرقی عساکری ایله عساکر
 مسلمین اره سنده وقوعه کلان محارباتدن عالم نصرانیت
 واقعا مکّه طرفلرنده یکی بر دینک ظهوره کلدیکنی
 اکلامشیر ایدیه ده بودینک ار بانه دائر بر فکر پیدا
 ایدیه مامشیر ایدی • قدس فتح اولندقدن صکره ایسه
 یالکز استانبوله قدر دکل روما و اورو پانک خرستیبا -

نلغی قبول ایلش بولنان ممالکنه قدر دخی ولوله
اسلام جهانی چالغایوب هله قدس شریفده مؤسسات
نصرانیه نلغی یئنه اصلا قیام ایلماسی و بالعکس
نصارانک مالنه اسلامک کنیدی مالی و عرضنه کنیدی
عرضی کبی رعایت اولنمی بتونار باب عقولک انظار
حیرتنی آچش ایدی .

ایمدی شوق و حاحات جلیله اهل اسلامک غیرتنی
آرتدیر مقله طرف اشرف حضرت فاروق قیدن کوندر -
یلان تعلیمات جدیده اوزرینه شرق سرداری حضرت
سعد ایران ایچنه و کردستان طرفلرینه مفروزه لرسوق
ایلمدی . کوفه و بصره شهرلری طرف اسلامدن
مجدداً بنا اولند قلی کبی موصلمدن اهوازده قدر ممالک
فتح اولنمش و آذربایجانده قدر ولایتلر ایسه خواجه
کسایش ایدی . شومو قیتر اونی دنجی سنه هجریه -
نک موقیتلری اولدیغی کبی یئنه بوسنه هجریه ده
سوریه و فلسطین و تامصر حدودینه طوغری ولایتلرک
هنوز حکومت اسلامییه تنه کیر مامش اولان یرلری
دخی کاملاً فتح اولنده رق اورالده اسلام تأیید
قلمشدر .

بوحالده دولت جدیدہ اسلامیہ ایچون حاصل
 اولان وسعت عادتاً بر دولت معظمہ وسعتی اولوب
 بودولتک امورینی تنظیم و بیاغی یورغون بولسان
 اردولری تسریح ایچون برسنه قدر حرکات جسمیہ
 عسکریہ تعطیل اولندی . اورویا مورخلرندن
 بعضلری عن جهل و برطاقلری عن قصد هر نه دیرلر
 ایسه دیسونلر اشبو فتوحات محضاً خلقی قلیج قوتیه
 اسلامه کتورمک مقصدینه مبتنی اولیوب بلکه
 عبادالهی حکومات قدیمه مستبده نك مظالمندن قورتا .
 روب عدالت اسلامیہ نعمتیه منعم ایتک ایچون سل
 سیف ایدلمش اولدیغی آثار فعلیه سیله مستدل و مبرهندر .
 زیرا حکومت سنیه اسلامیہ نك شعار مخصوصی تابعیت
 اسلامیہ ی قبول ایدنلره امان و یرمک اولوب بناء علیه
 عسکر اسلام هر نزهیه وار رایسه بو عدالت محضه ی
 کورن اهالی همان سردارلرک ایاقلرینه قپانه رق
 تابعیت اسلامیہ بی منت جان عدایدرلر و بعدما حکو .
 مت اسلامیہ یه ازجان و دل مطیع و منقاد قالوب بویله
 شرفلی بردیانتله تشرفه دخیک چوقلری جان آتارلر
 ایدی . یوقسه اهل اسلام کبی استیلای عالم حرکاتی

از جمله اسکندر کبیر ده دخی کورلمش اولدیغی حالدده
تیجه سنک عقیم چیمسی مثللو بر حالک استیلای اسلام
ایچون دخی واقع اولسی لازم کلوب عدم و قوعی ایسه
بزم دعوا مزك محق اولدیغی اثباته کافیدر .

عهد جناب فاروقده و اون طقوزنجی سنه هجریه ده
سرآمدان اصحاب کرامدن عمرو ابن العاص وزیر ابن-
العوام سرعسکر نصب اولنده رق مصر و اسکندریه
طرفلرینک فتح و استیلا سنه مباشرت اولندی . بر هیئت
عسکریه یه بویله ایکی سرعسکر نصب اولنمسی
قواعد عسکریه یه مغایر کوره جک اولنلره اخطار
ایلرکه اوزمانلر بومثللو اسفار بعیده ده اسباب مخابره
شمدیکی کی مکمل اولمقدن فضله سرعسکر لر لزومنه
کوره بالذات و بالنفس دخی جنکه کیرشد کلرندن شاید
ایچلرندن بریسی شهید اولور ایسه ابو عبیده بن مسعودک
زاب نهری کنارنده کی شهادتی اوزرینه اردوی اسلامه
کلان پریشانلق کی تهلیکه لره محل قالماق ایچون
اردونک حین حرکتده برنجی سرعسکر و ایکنجی
سرعسکر طرف خلافتدن نصب اولندقلری کی انلرک
شهادت و یا خود وفاتلری حالنده یرلرینه کیملرک کچه .
جکلری یله تعیین اولنورایدی .

روم شرقی دولتک سوریه اوزرنده هیچ بر
ایلیشکی قالمغه مقابل مصرده کی بقاسنی تأمین ایچون
اولانجه قوتی عموم مصرک کلیدی مثابه سنده بولنان
اسکندریه شهرنده اجتماع ایلیش اولمغه اردوی اسلام
حرکات عسکریه سنک اغلبنده بالسهوله مظهر غلبه
اولدیغی حالده اسکندریه شهرنده عظیم برنمانعته
دوچار اولمشدر . مع هذا مقاومت نه قدر شدتلی
ایسه اردو دخی تضییق و هجومده او قدر ثبات و متا-
نت کو ستره رک بغایتہ تعالی اوراسی ده فتح اولمشدر .
بوفتح عظیم بتون مصرک ممالک اسلامیہ انضمام
منی انتاج ایتشیدی . زیر اسکندریه شهری خطه مصریه
ایله استانبول ارسنده کی مراسله نک مرکزی اولوب
اوراسی اله یجد کدن صکره بتون مصرک روم شرقی
ایله ارتباطی کسملش دیمک ایدی . بناء علیه بوفتح عظیم
روملرک او قدر حدتلینه طوقمشدر که نمونه عدالتی
قدس شریفده کورلمش اولان اهل اسلامه اسکندریه
کتبخانه مشهورنده واقع در تیوز بیک جلد کتابی
حاجم کلخانلرنده یاقه رقی التی آی مدت اسکندریه
حاجملرینک بو کتابلر ایله قزیرلدیغی طرزنده باشلی

قولاً قلی بر یالان بر افترایی کوزه الدیرمغه قدر کند -
 یلرینی مجبور ایلشدر . حالبوکه اسکندریه کتبخانه
 مشهور ینک تابطالنه زماننده یعنی فتح اسلامدن بش
 التی یوز سنه اول یاقیش اولدیغی شئونات مشهوره
 تاریخیه میاننده مواد معلومه دندر .

فتح مصر اون طقوزنجی سنه هجریه پی نه قدر
 پارلاتمش ایسه یکر منجی ویکرمی برنجی سنه هجریه ده
 وقوعه کلان شرق سفرلری دخیذ کر اولنان سنه لری
 او قدر پارلاتمشدر . شویله که:

حوالی عراقیه دن ایچرولره طوغری سوریلان
 عجملرله نهاونده واصلهان طرفلرنده برروایته کوره
 یوز الی بیک و دیگر روایته کوره درتیوز بیک عسکر
 جمع ایلدکلی تحقیق اولمغله یتش بیک قدر شجعان
 اهل ایماندن مرکب براردویه نعمان بن مقرر سرعسکر
 نصب اولنهرق کوندرلشیدی . محاربات جزویه ایله
 اردوی مذکور نهاوند قر بنه واصل اولدقه عجمک
 قوه عظیمه سیله تلاقی واقع اولهرق غایت شدتلی بر
 محاربه یه طوتوشلدی . حتی حضرت نعمان شهید
 دوشمکه حذیفه ابن الیمانی حضرتلری سرعسکرلک

سبحاغنی اله الهرق اردوی اسلام اصلاً حرکاتنه خلل
کتور مکسزین محار به نره دوام اولندی • حقیقه
مقداری درجات کلیه واران تلفات ایکی طرفی دخی
آل قانلره بویادقدن صکره باحسانه تعالی نتیجه غالبیت
اهل اسلامده قالمغله نهاوندواندن صکره متعاقباً همدمان
واصفهان و دینور و لایترلی دخی فتح اولمشدر •

بوندن صکره شرق و غرب اردولرینک اوکنده
ممانعته مقتدر اوله جق قوت تصور ایدیه بیلورمی؟
بر شرق اردوسی عجملرک بقیه السیوفنی اوکنه قاته رق
هرات و ترکستانه قدر آسیای و سطی بی کاملاً استیلا
ایتمش و عجملر تاجین ایمپراطور لغندن استمداد ایلد کیری
حالده بو استمداد لرندن دخی بر منفعت حاصل اوله مینجه
مرحمت و عدالت اسلامیه یه دخالتدن بشقه چاره
بوله مامشدر • غرب اردوسی ایسه مصر دن طرابلس
و تونس کبی بلاد بر بر یه یه کیره رک بتون ممالکی فتح
ایتمش و هر طرفه مستحفظلر براقه رق دها ایلروسی ایچون
دخی تدارکات عسکر یه سنده استعجاله باشلامشدر •
انجق بو اثناده یعنی هجرتک یکر می دردنجی (۶۴۷)
سنه سنده حضرت عمرک وقوع ارتحالیه حضرت

عثمانك مقام خلافته ورودی اوزرینه بین الاسلام ظهوره
کلیکه باشلایان نفاق و شقاق استیلای جهانگیرانه نك
بودرجه سرعتنی براز تعدیله سبب اولمشدر .

حضرت عثمانك انتخابی امرنده کی نفاق و شقاق
بنی امیه طرفگیرانی ایله انصار و هاشم اره سنده
وقوعه کلوب بنی امیه طرفگیرانی حضرت ذی النور-
ینك انتخابنی ترویج ایلدکلی کی دیگرلری دخی حضرت
علینك انتخابنی ارزو ایدرلر ایدی . خلافت ذی-
النورینك ایلک سنده لرنده بو نفاقك اول قدر سوء
تأثیری کورلیهرك مصر و ایران جهتلرنده عصیان
ایلان بعض یرلیلر تنکیل قلندقلری کی آزر بیجان
و شایور و اسطخر و طبرستان و خراسان و بلخ طرفلر
نده برخیلی یرلر دخی مجدداً فتح اولمش و شام و الیسی
بولنان معاوییه نك سوقیله بحر سفیده دونما تدارك
اولنه رق قبریس و ردوس جزیره لرینه اقیینلر ایلدیکی
کی معاوییه نك عظیم بر سواری فرقه سی تا استانبوله
قدر کلهرك اطرافه ولوله و یرمش ایدی . انجق
بوفتوحات جهانك مال غنایمنی مکة مکرمه و مدینه
منوره یه جلب و جمع ایلدیکی حالد دخی حضرت عثمانك

انتخابندن خوشلانمیان طرف بر درلو تسکین حرارت
ایده مدکرندن قننه داخلیه ایچین ایچین یا تمقده دوام
ایدر ایدی .

حضرت ذی النور ینک خصمای سیاسیه سی
طرفندن عزو اولنان شیردن بر چوغنک صحتی حقنده
مور خلر شبهه لی اولوب بر چوغنی دخی بو عزوده بولنانلره
حق قازاندیرمه حق ادا لردن عبارت کورلمکده در .
از جمله بیوک مأمور یتلری هب کندی اقر باو تعلقاتنه
و یردیکندن و طبعی حسدیس اولدیغی ایچون کیمسه یه
احسان ایتیوب مال جمع ایلدیکندن بمشله مؤاخذه سنه
قیام ایدر لر ایدی . نهایت فساد یو یه رک حضرت
عثمان ولایات والیرینی جلب و جمع ایله گفت و کولره
بر نهایت ویرلمسی اسبابانی مشورت ایلدیسده
بر چاره بولنه مدیغی کبی دیگر جهتدن مخالفین دخی خلع
خلیفه یی مذاکره قویولمشلر ایدی . براره لق حضرت
علی مخالفین ایله حضرت عثمانک آره سنی بولور کبی
اولدیسده تمام مخالفلر و لایتلرینه عودت اوزره ایکن
حضرت عثمانک بر کوله سی اوزرنده بر طاقم اوراق ظهور
ایدرک بونلرک مضمونی ایسه مخالفلر و طنلرینه وارد قلری

آنده قتل اولغلی ایچون والی و حاکمه امر دن عبارت
اولغله ایشته بونک اوزرینه مخالف طاق طاق کلدیلر
وعصیان علنی ایله جناب خلیفه یه عصیان ایدرک
شهادته قدر متجاسر اولدیلر .

شهادت ذی النورین هجرتک اوتوز بشنجی (۶۵۸)
سنه سنده وقوعه کدرک فقط بو شهادتله دخی غلیانک
بر طرف اوله مامسی جای تأسفر . زیراً مخالفین اره -
سنده دخی خلافت جدیده ایچون اختلاف بولنوب
مصر لیلر حضرت علینک و کوفه لیلر حضرت زبیرک
وبصره لیلر حضرت طلحه نک خلیفه اولسی دعوا سنده
بولندقلری کبی اهل اسلام دن بریوک فرقه دخی حضرت
عثمان مظلومک خون ناحقنی دعوا یه قیام ایتش لرایدی
ایمدی بو صورتله وقوعه کلان محاربات ارتق فتح
بلاد کبی همم جیله یی محاربات داخله کبی بر فاحه
عظیمه یه تحویل ایلشدرکه مورخینک و یردکلی
خبر لره کوره محاربات واقعه داخله ده قریلان اهل
اسلامک مقداری طقسان بیکه وار مشدر .

بونفاقک الک مدهش جهتی ولایات بعیده والیلر -
ینک بیاغی استقلال تام داعیه لرینه قیام ایلری قضیه -

سی اولمشدر . کوفه و بصره طرفلرنده بولنان طلحه
 وزیر عادتاً خلافتیه قدر کوز دیکمیش اولدقلری کی
 بنی امیه دن شامیه والی بولنان معاویه بتون سوریه یی
 کندی اداره مستقیمه سی التمه المش ومصرده کی عمرو
 ابن العاص دخی باشلی باشنه مصر حکمداری اولمشیدی .
 حضرت علی بونلری عزل ایتمه قیام ایلدی ایسه ده
 موفق اوله مدی . و البیر و باطیه معاویه ازواج
 مطهرات دن حضرت عایشه یی دخی حضرت علی
 علیه تشویق ایلدرک و قعه جل دیه شهرت بولان
 محاربه ده دو کولن قانلر حد معروفی ده آشدی . بو قعه
 ده حضرت طلحه مقتولا وفات ایدرک حضرت علی
 طرفدارلرندن بریسنک دخی حضرت زبیری قتل
 ایتسی اوزرینه میدانده یکدیگرینه رقابت ایدن بر
 حضرت علی و بر معاویه و برده عمرو ابن العاص
 قالدیغندن اسلامی شو مناقشه دن قورتارمق ایچون
 اوچ فدایی بو اوچ رقیبی ده اعدامه قرار ویردیلر . انجق
 شامه کیدن سوء قصدجی معاویه نك انه دوشدیکی
 کی مصره کیدن دخی تمام قرارینی موقع اجرایه قو-
 یه جفی صباح بالتصادف عمرو ابن العاص خسته لنه رق

جامعه چیقیمیوب عمرودر ظنیه بشقه برادمی اولدور-
 مش ویالکز حضرت علی به قصد ایچون کیدن ابن ملجم
 قرار فاجعنی ایقاع ایده بیلش ایدی . بوفاجعه قر-
 قنجی سنه هجریه ده وقوعه کلهرک اندن صکره میدان
 حکومت بنی امیه به آچیق قالمغله بروجه آتی ایکنجی
 فصلزک کشادی لازم کلشدر .

✽ ایکنجی فصل ✽

- امویه دولتی -

عن ۶۶۱ الی ۷۴۹

تفصیل - بنی امیه دن کلش اولان ایلک اوچ
 پادشاهه یعنی معاویه و اوغلی یزید ایله انک دخی اوغلی
 بولنان ایکنجی معاویه به « سفیانیه » دیرلر که بونلر
 اصل سفیانیه او غلری صابیلورلر .

حضرت عثمان و حضرت علی زمانلرنده معاویه -
 نک شامده والیلک صورتیه قازاندیغی استقلال بنی امیه -
 نک اصل استقلال تامی عد اولغیوب حتی مورخین
 مسلمله حضرت علینک شهادتی عقبنده معاویه نک
 استقلال تامی ده معتبر طوتمیه ر ق شهادت علیدن بر
 سنه قدر صکره بیوک مخدومی حضرت حسنک بر

مقدار مخصوصات مقننه مقابلنده حق حکومتی معاوییه ترک و فراغت ایلمسندن اعتباراً بنی امیه بی مستقل تام
عد ایدر لر .

حضرت علی ایله حسنین افسدیلر من حضراتنه
محب اولنر بالطبع معاوییه دن خوشلانر ايسه ده حد
ذاتنده معاوییه نك بر چوق من یته مالک بر بیولك ذات
اولدیغی دخی انکار اولنه من . غایت ماقل و فطین و سخنی
ولطیف اولوب هر کیم حضور ینه چیقار ايسه احسانی
والتفاتی ایله کندیسنه اسیر ایدر ایدی . اکر کند -
یسندن صکره اوغلی یزید نجه ملعنتر ایله خاندان
اموی بی رسوای ایتامش اولسه ایدی معاوییه دخی
بالاخره او قدر نفرته دوچار اولمز ایدی .

یکی مشکل اولان ملت اسلامیه بی حال بدویتدن
حال تمکن و ترقیه تحویل خصوصنده معاوییه نك پك
بیولك خدمتلی کورلش اولدیغی کبی حضرت حسن
ایله اولان معامله ائتلافکار یسی دخی هیچ بروجمله
یزیدك حضرت حسین شهیده اولان معامله سنده قیاس
قبول ایده من . معاوییه حضرت حسنی ارضا ایدرک
حقوقی صلاتون المش و یزید ايسه حضرت حسین

حقننده بر صاحب خروج معامله سی ایدرک خون مبارک
کنی اسالیه قدر وار مشدر .

بوندن ماعدا معاویه بتون ولایاته یکیدن والیلر
و شدتلی امرلر کونشروب نیجه زماندنبری اهل اسلام
اره سنده حکم سورن نفاق و شقاق بر طرف ایتکله برابر
اهل اسلامی یکیدن غزا و جهاد ایله تسخیر بلاد سوق
ایلیه رک آفریقاجه بلاد سودانه و آسیاجه تافغانستانه
قدر اردولر سوق ایدوب کشورلر کشاد ایتش و هجره
تک ۴۸ سنه سنده ابا ایوب انصاری حضرتلری دخی
برلکده اولدیغی حالدده استانبوله قدر اردو سوق ایدرک
استانبولی تحت محاصره یه الدير مشدر که حضرت ایوب
او زمان رحلت ایتکله شمدیکی مدفن مبارک رینه دفن
ایدلشدر . اسلامده ابتدا صنایع بحریه یه میل ایدن
پادشاه دخی معاویه اولوب سوریه سواحلینده تدارک
ایلدیکی دونما ایله جزایر بحر سفیده اسفار بحریه
اجرا ایتشدر که عربلرک بعده ایتالیا و فرانسه و اسپانیا
سواحانه و قوعبولان اسفار بحریه لرینک مقدمه سی
بو اولمش دیمکدر .

سکسان ایکی یاشنده اولدیغی حالدده ۶۰ سنه

هجریه سنده وفات ایدن معاویه دن صکره یرینه کلان
 اوغلی یزید شراب ایچر هر درلو فسق و فجوری
 ارتکاب ایدر بریزید اولوب حضرت حسین بوملغونه
 بیعت ایتدیکندن طولای و قهقهه فاجعه کر بلا وقوعه
 نکش و بوفلاکت اوزرینه مکه و مدینه اهاالیسی ملعون
 مرقومک اطاعتندن چیقوب لغت او قومغه باشلاد -
 قلنده اولامدینه ثانیاً مکه اوزرینه اردو سوق
 ایدرک مدینه ده یالکر کبار قریش و مهاجرین و انصار -
 دن یدی یوز و آحاد ناسدن اون بیک آدم اولدوردیکی
 و شهری اوچ کون یغما ایدرک بیک قدر باکر قزلرک
 مکرینی عسکرینه ازاله و نیجه عرضلری هتک ایتدیر -
 دیککی کبی مکه بی حین محاصره ده بیت الله اوزرینه
 مانجینق ایله آتش آتوب یاقغه قدر جرأت کوستر -
 مشدر .

بوسره ده مرقوم کبر مکه قلوب مؤمنینه برفرح
 کلشدر . یرینه پادشاه اولان ایکنجی معاویه ایسه
 غایت ناموسلی متدین اولمغله باباسنک بوملغتری اوز -
 رینه بتون اهل اسلامک امویه دن متقر اولملری مشار
 الیهی دخی متقر ایدرک « بن پادشاهلغی یاپه میه جفم »

بریمه هر کیمی ایسترایسه کز انتخاب ایدکز « دیه
حکومتدن استعفا واختیار انزوا بیوه شلردر .

بنی امیه نك سفیانیه قسمی اشبو ایکنجی معاویه ده
ختمبوله رق اندن صکره امیه خاندانه عمزاده لك صو-
رتیه منسوب اولان مروان پادشاه اولمغله امیه نك بوندن
صکره کی پادشاهلرینه « مروانیه » دنیلشدر .

فقط مروان هیچ منتظر اولمدیغی حالد نائل اولد-
یغی نعمت حکومتدن اصلا متمنع اوله مامشدر . زیرا
ایکنجی معاویه نك استعفا سی اوزرینه حجازو یمن
وعراق وخراسان ولایتلی اصحاب کرامدن عبدالله
بن الزبیر حضرتلرینه اطاعت ایلد کیری کبی شامده
دخی بر بیوک فرقه مروانی ایستزلر و بوندن ماعددا
حضرت حسینك انتقامی دعواسیله کوفه ده خروج
ایتمش اولان مختار بن عبدالله ایله ابن الزبیر دخی مصالحه
ایده میدرك مقاتله خونریزانه دن قورتیه مزله ایدی .
بین الاسلام مقاتله نك شو صورتله تجدیدی ائناسنده

مروان دخی زیدك زوجہ سی اولوب بعده نکاح ایتمش
اولدیغی ام خالدیدیه هجرتك ۶۵ سنه سنده اخناق اولنه-
رق یرینه اوغلی عبدالملك پادشاه اولدی . عبدالملك

طالعی اقتضاسندن اولمیدر که حضرت حسینک اصل
قاتلی امو یلرایکن مختاریت بدلاسی ابن الز بیر ایله مقاتله
ایدرك بالاخره ز بیر یلردخی بونجه مقاتلاتدن ز بون
دوشملری اوزرینه عبدالملك احسانلر ایله کوفیلری
کندیسنه جلب ایدرك بعده عظیم براردو سوق ایلد کده
ز بیر یلری پریشان ایتش و بتون حوالی عراقیه یی
دولت امو یهیه ر بط ایلشدر .

عراق بو صورتله اله کچد کدن صکره ابرتسی سنه
یعنی ۷۲ سنه هجریه سنده حجاج ظالمی عظیم براردو
ایله حجاز طرفلرینه کوندروب حجاجک نیجه بی ادبانه
شدلرندن قطع نظر فقط حجاز و یمن طرفلری ز بیریلر-
دن قورتار یلوب امو یه دولتنه ر بط اولمشدر .

ایشته اهل اسلام بونجه منازعات داخلیه ایله
مشغول ایکن شرق ایمپراطور لغی ممالک اسلامیه یه
تعرضه باشلایه رق حتی برارهلق امو یلری عاجز بر اقوب
تضمینات حریمه صورتیه هفته بهفته بیک التون ویر-
مکه دولت امو یه یی ارضا ایده بیلش ایدیسه ده ولا-
یات اسلامیه کافه دولت امو یهیه ربط اولنه رق قوه
عمومیه اسلامیه جمع ایلد کدن صکره عبدالملك اناتولی

ایچینه براردو سوقیده شرق ایمپراطورلغی اردولرینی
طرف طرف مغلوب انتمش و دولت اسلامیه یی شو خراج
کذارلق بلیه سندن قوروتارمشلدن . بوروقعه شجرتک
۷۷ سنه سنده وقوعه کلشیدی .

عبدالمکک بن مروانک حجاج یدیله اجرا ایتدیرد .
یکی بعضی بی ادبانه شدت لردن قطع نظر ایدیلورسه امو-
یه ایچنده الک یوک پادشاهلردن بریسی اولمق اوزره
مشار الیهی عد ایتک حقیقه لایقندر . زیر اولایات
اسلامیه یی شام مرکزینه ر بطوقوه عمومیه اسلام-
یه یی جمع ایلد کدن صکره روم شرقی اوزرینه و آسیای
وسطی طرفلرینه دفعاتنه اردولر سوق ایلیرن برچوق
بلادی فتح ایتد کدن ماعدا بلاد بربریه وفلس طر-
فلرینه دخی مصر والیه یی موسی بن نصیری وانک
معیتمده طارق ابن زیادی مأمور ایلیرنک تاجحراطلس
ساحلنه قدر ممالکی فتح و استیلا ایلک و بعده اسپانیا
تار یخنده ذکراولندیغی اوزره سبته بوغازینی بالامرار
اندلس قطعه سنده اردولر صوقق مقدماتی ثلومو-
فقیات و مظفریات عظیمه مشار الیهک زماننده میسر
اولشدن .

عبدالملك ۸۶ سنه هجریه سنه وقوع وفاتیه
 بر بنه پادشاه اولان ولیدك اون سنه ممتد اولان مدت
 حكومتی اسلامك دور استیلایك الك شعله لی واک
 پارلاق بر زمانی ایدی . شرق جهتمدن آسیا اردولری
 حدود چینہ قدر جولان ایلدک لری کی شمال طرفدن
 خلیج استانبوله قدر عرب پیشدارلری ایلرولش وغرب
 طرفدن ایسه اندلس فتوحات عظیمه سی بتون اورو .
 پای لوزناك ایتشد . فرانسه ایچنه طوغری وقو .
 عبولان استیلای اسلام فرانسه و اسپانیا تاریخلرنده
 بواړك مقیاسنجه درجه کافیه ده ایضاح ایلدش اولد .
 یغندن بوراده تکراره حاجت یوقدر .

ولیددن صکره عن ۹۶ الی ۹۹ اوچ سنه حکو .
 مت سورن قرنداشی سلیمان واندن صکره عن ۹۹ الی
 ۱۰۱ پادشاه اولان یکنی عمر بن عبدالعزیز و بعده عن
 ۱۰۱ الی ۱۰۵ پادشاه اولان یزید بن عبدالملك زما .
 نلری دولت امویه نك دور و قوفی دیمك اولوب داخل
 ممالکک ظهور ایدن بعض شورشلرک منع و تنکیلی
 موقیعاتدن عد اولنور ایسه بونلردن ماعنا اولیه
 فتوحات جسمیه دن عد اولنه جق برشی کورلماشدر .

هجرتك ۱۰۵ سنه سنده مقام حكومتہ كلوب ۱۲۵
 سنه سنه قدر دوام ايليان هشام زمانده چين وروم
 شرقى طرفلرینه برچوق اسفار بریه و فرانسه و ایتالیا
 سواحله دخی برچوق اسفار بحریه و قوعی و لوب
 غزواتی دلرده داستان اولان بطل غازی ایشه بو
 زمانك رجالند ندر كه منحصراً شرق ایمپراطور لغی علیه
 حرکات عسکریه اجرا ایتشد.

قط عن ۱۲۵ الی ۱۳۲ مقام حكومتہ كلش اولان
 ولید و یزید و ابراهیم و مروان عیش و نوشه و زنا
 و لو اطهیه مصرأ منهمك ادملر اولوب بونكه برابر ظلم
 و ملعنتری دخی عالمی بیرار ایتكه ذاتاً شهادت حسین
 و قعد سنی او نوته میهرق فرصت بولرجه عصیانه
 مستعد اولان علویلر کوفه و عراق طرفلرینی لرزمی
 و جهله بالتشویق ابو مسلم عبدالرحمن الخراسانی دخی
 هر کسی آل عباسدن سفاحه بیعت ایتدیرمکه باشلا.
 مغله امویلرک بیاض بایراقلری ایله عباسیلرک سیاه بایرا.
 قلری غایت خونریزانه معرکه لرده تموج ایلیه رك نهایت
 امویلر مغلوب دوشمش و اندلسه قدر قاچهرق دولت
 امویه یی اوراده احیا ایلان عبدالرحمن ماعدا

خاندان امویدن همان جان قورتلی-وب جله سی اله
 پکورلدکجه قتل ایدلدیکی کبی اوجه وفات ایتمش او-
 لانرک دخی مزارلرندن کیمکاری چیقاریلوب یاقیله رق
 کولری هوایه صاورولمشدر .

ایشته بوانقلاب تاریخ میلادک ۷۴۹ سنه سنه
 مصادف اولغله اندن صکره اولاد عباسک مدت خلا-
 فتلری بوجه آتی اوچنجی فصلده ذکر ایدیله جکدر
 (اوچنجی فصل)

- بنی عباسک مدت خلافتلری -

تفصیل - آل عباسک ابتدای ظهوری یعنی ابو
 العباس سفاحه بیعت وقوعی هجرتک ۱۳۲ سنه سنه
 اولوب بش سنه قدر مدت خلافتنده سفاح یالکز
 امویلرک خلع بنیایله اشتغال ایلدیکی کبی بعدوفاته
 یرینه یکن منصور دخی یکر می درت سنه مدت حکومتی
 یالکز ولایات عاصیه یی تأدیب وبو داخلی قاریشقلقر-
 دن فرصت بوله رق ممالک اسلامییه هجوم ایلان
 شرق ایمپراطورلغی اردولرینه مقاومتله امرار ایشدر .
 منصورک اک مشهور اثری بغداد شهرینک بناسیله مقام
 خلافت اتخاذا ایتسیدر . آل عباسک اوچنجیسی اولان

مهدی شرق امپراطور لغنه غلبه ایچون کندی اوغلی
 هارون الرشیدی عظیم اردو ایله استانبوله قدر سوق ایدرک
 برچوق ممالکی فتح ایتدیرمش و شرقی امپراطور لغنی
 آمانه دوشورمش اولدیغنی کبی بحراً دخی هنده کو-
 ندر دیکی دونما پک چوق بلادی فتح ایلشدر .
 مهیدین صکره هادی یالکز برسنه قدر (۱۷۰هـ)
 خلافت ایدرک وفات ایتمکله هارون الرشید مقام حکو-
 مته کلدکده آل عباسدن بکله نیلان ترقیات مدینه کند-
 یسنی کوستر مکه باشلادی . هارون الرشید حقیقه بیو-
 کلک صفات مظهر برپادشاه اولوب اوریا مورخلری
 نزدنده دخی شهرتی بیو کدر . میلاد حسابیه ۷۸۶دن
 ۸۰۰ سنه سنه قدر دوام ایمان مدت حکومتنده یالکز
 سکر دفعه بالذات قوماندان ایتک و برچوق دفعه لردخی
 سردار لرک قوماندانینه تودیع ایتک صورتیه دوام
 ایلدیکی اسفارده روم شرقی امپراطور لغنی آمانه
 دوشوره رک هندستان و قفقاسیه و آسیای
 وسطی طرفلرنده پک چوق بلادی یکیدن ممالک اسلا-
 میه ربط و الحاق ایلشدر . او زمانلر اهل اسلام
 نزدنده علوم و فنون و صنایع بر درجه لرده ترقی

ایلشدر که هارون الرشید یکی مناسبت پیدا ایتک ایستد.
 یکی فرانسه ایمپراطوری مشهور شارلمان نزدینه گو-
 ناردینی هیئت سفارت ایله بغدادده ایجاد اولمش
 یکی بر ساعت دخی ارسال و اهدا ایلشیدی . اوزمانئر
 فرانسهده بو مثالو اختراعات مهمه حقننده هیچ بر
 کیمسهده تصور بیله اولدیغندن هر کس بوساعتنه
 حیران اولمش قابلسدر .

برامکه دنیلان خاندان وزارت هارون الرشیدک
 یتشدرمش اولدیغی بر خاندان اولوب هارون محار-
 باته کیتدکجه بر مکیلردن وزیر اولئر خلیفه یه قائم مقام
 دخی اولورلر ایدی . بو خانداندن کلان ذات غایت
 عالم وعافل اوله رق هله خلقه انعام واحسانلری مبذول
 اولغله جله بی کندی احسانلرینه منتدار ایلشرایدی .
 برامکه دن جعفر نام وزیر هارون کندی همشیره سنی
 دخی تزویج ایدرک فقط مؤخرأ بر مکیلرک علویر ایله
 مناسبتلری آرتدیغنی هارون کورمکه شاید علویلری
 مقام حکومت کتور مکه سبب اولورلر و یا خود
 همشیره سندن بر چوجق طوغار ایسه انی برارهلر
 مقام خلافت کتور مکه عباسیه نلک زوالنه خدمت

ایتش بولنور لر ملاحظه سی هارون الرشیدی بتون برامکه
ایله طرفدارانی قتله قدر سوق ایلشدر .

اواخر عمر نه هارون الرشید بتون ملکینی امین
و مأمون و معتصم نام اوچ نفر اوغلری میانده تقسیم
ایلشیدی که بو تقسیم کویا کندیسندن صکره اوغلرینی
ملک منازعه سندن قور تارقی ملاحظه سنه مبنی اولد-
یغی حالده تأثیرات معکوسه کوستر مشدر . شویله که:
اوچ قرنداشدن امین ایله معتصم بغدادده بولندرق
مأمون ایسه آسیای وسطیده اولغله امین حد ذاتنه
عیاش و سفیه برآدم اولدیغی حالده قرنداشی مأمون کی
غایت عالم و ادیب و شجاع برآدمی قایدیره رق بتون نما-
لکه پادشاه اولق هوسنه دوشمش ایدی . معتصم
هر نه قدر جاهل برآدم ایدیه ده مأمونک اقتدار
فوق العاده سی تسلیم ایدرک شاید امینه غلبه ایدر ایسه
کندیسنی دخی ازماسی ایچون هیچ صویه صابونه
طوقنماغی التزام ایلدی .

فضل ابن السهل مأمونک وزیری اولوب مأمون
همان کیتلو برترکن اردوسیه بغداد اوزرینه یورومک
وامینه کندی علیه نه کی ترتیباتی حکمسز برابق

ایستد کده فضل «ا کر براز جبر ایدر ایسه کر قر -
 نداشکر که نه مجنون اولدیغنی هر کس کوروب ا کلا -
 یه رق بغدادی استیلا ایلدی ککر زمان هیچ بر کیسه
 سزه غاصب دیمکدن فضاه الیق و احق بر پادشاهه
 نائل اولمش بولند قلرینی ا کلا یه رق متشکر اولور لر »
 دیه نصیحت و یرمیشیدی . واقعاً بو نصیحتی ایلدی ککندن
 طولای ضررلی چیقمیدی . زیرا هر کس امینک
 عشرت و سفاهتندن بیر ار قاله رق بناء علیه مأمون
 براردو ایله غالب کلسوبده امین دخی شو منازعه اده -
 سنده مقتول او لنجه هر کس مأمونه ازجان و دل
 بیعت و مطاوعت کوسر دیلر .

شو حالده ا عقلی طور انان معتصم اولمش
 اولدی . زیرا صحت و سکوت کوشه سنده استراحت
 ایلر ایدی .

مأمون بالاستقلال پادشاه اولدقده بتون ار باب
 تألیف و ترجمه یی حایه مخصوصه سی التمه الوب
 لسان یونانیده نه قدر نافع کتاب وار ایسه جمله سنی
 عربی یه ترجمه ایتدیردی کی بو ترقیات علیه اده سنده
 عربدن دخی یتشمش اولان مؤلفین کتبخانه عربی

ثروت علیه ایله طولیدر مشیر ایدی . اوزمان بغداد
 و شام و مصر و اسکندریه شهرلرنده کی مدارس عظیمه
 ایتالیا و اوروپانک سائر طرفلرندن برچوق طلبه
 کاهرک علوم و فنونی مسلمان مدرسلردن اخذ و تلقی
 ایلاکری کبی کندی مملکتلرینه عودتلی زمانده
 طرز اسلامده مکتبلر آچهرق نشر معارف ایدرلر
 ایدی . ایشته بوسببه مبنیدر که عربلر اوروپالیرک
 معلم اولرلی اولشلردر .

مأمون خلیفه نک ترقیات عسکریه ده دخی خدمتی
 از دکادر . رأ و بحراً سوق ایلدیکی قوای حربیه روم
 شرقی امپراطورلغی ایله ایتالیا سواحلی هرج و مرج
 ایتشلردر . هله مهمام سیاسیه ده کی ید طولاسی شایان
 حیرت ایدی . ارتق امویه غائله سی بر طرف اولدیغی
 حالده علویلرک عباسیلری استر قابلری کیتد کجه اهمیتنی
 ارتدیر غله علویلرک یشیل رنگری بر زمانکی امویلرک
 بیاض رنگری کبی عباسیلرک سیاه رنگرینه قارشو
 عظیم معرکه لر تشکیل ایدرلر ایدی . مأمون خلیفه
 بویه بین الاسلام اساله خون ایتکدن ایسه علویلری
 فوق الحد نظر التفاته الهرق حتی عسکرک بریوک

قسمنه دخی یشیل رنک آئیدیر مکه انلرک خصوصتیرینی
عظیم بریمونیتنه قلب ایلشدر.

هجرتک ۲۱۸ سنه سننده مأمونک وقوع وفاتی
اوزرینه ارتق میدان سلطنتده رقیبسر قالمش اولان
معتصم هم جاهل هم قورقاق بر آدم ایدیسنده قوجه
دولت عباسیه حاضر قورولمش بر دوزن اولدیغندن
ارباب فنون و اصحاب سیفی التفاتدن دوشورمامک
صورتیه مأمونی تقلیده پک اعلا موفق اولمشدر .
بنا علیه معتصم زمانده دولت عباسیه تدنی کورمد
کدن فضله کلی ترقی - خی ایش اولدیغی کبی ۲۲۷
سنه هجریه سننده وقوع وفاتیه واثق خلیفه اولدقده
اودخی ترقیات جدیدیه حسن محافظه به مقتدر اوله
بیش ایلده واثقندن صکره متوکل خلیفه فنااخلاقلی
بر آدم چیقهرق ازجمله هیچ بر کیمسه به حبه احسان
ویرمد کدن بشقه تبعه سندن مالدار اولنلری اولدیروب
مالیرینی مصادره ایتک مثلاً مظالمه دخی یول اچد -
یغندن وزنا و عشرته انهمساکی ایسه جملیه بیزار
ایلدیکندن ارتق صبر و تحملی تو کیش اولان وزرا
وبندکانی بر کیمه افندیلرینک اوزرینه هجوم ایدرک
قتل ایلشدر.

بر کره مشهور و رفته و رفته کلان خروج علی
 السلطان قضیده سی ارتق عباسیه شیرازه انتظامی
 بالکلیه بوزنه قدر و ارشد در . زیرا مأمون خلیفه
 ترک ترک عسکر لکه اولان یارار لانی آسیای وسطیده
 کور درک بغداد کانی ترک عسکری کتور مش اولد
 یغی کبی بولورک امراسی مؤخرأ نفوذ لینی آرتدیر مش
 اولد یغندن طرف طرف حکومت زمام لری امرای
 ترکیه الرینه یکمکده و اصل عرب اولان لریو اش
 یو اش دوچار عجز و یأس اولمیشده ایدیلر . بناء علی
 ذلک متوکلک اعدامیندن صکره اوغلی منتصر الی
 آی قدر حکومت سوره بیلوب امراسی طرفندن بر
 زهرلی نیشترا یله اعدام ایدیلدی کبی (عن ۲۴۸ الی
 ۲۵۲ هـ) حکومت سورن قرداشی مستعین اصدقای
 بند کانه امنیت ایده میهرک هر کسی امنیت لک ایل
 مایوس ایتدی کندن ینه امراسی طرفندن خلع و ویرینه
 قرداشی معز نصب اولمشدر . حالو که معز دخی
 اوچ سنه قدر سلطنت سوروب امرای اترک انک
 دخی علیه قیام ایلد اشکنجه و اعدام ایتشدر وانک
 پرینه خلیفه اولان مهدی بر و انسی بر سنه حکو
 متدن صکره شهید ایتشدر .

پسند معتمد بن قریب مقام حکومت کلد کده هجر -
 ۲۵۶ سنه سندن ۲۷۹ سنه سنه قدر ایلجه اوزون
 برست صندالی خلافتده پایدار اوله بیلش ایسه ده بو
 خلافت یالکز برنامدن عبارت اولوب اصل زمام
 حکومت ایسه ولا ترجه اعلان استقلال ایلان والیر
 النده قالدیری کی شر خلافت اولان بغدادجه دخی
 امرای عسکریه ینده قالدیر . حتی بوندن صکره
 ممالک اسلامیته نگر طرفنده ظهوره کلان کوچک
 کوچک طوائف ملوکک اصل منشائی دخی ایشته بو
 ولایت والیرینک اعلان استقلال ایتلری قضیه سی
 اولشدیر .

بویله بر زمانده روم شرقی دولتی یوزبیک کشیدن
 عبارت براردوسو قیله طرسوسه طوغری ممالک
 اسلامیته تجاوز کوسرد کده فترت داخلیدن طولانی
 اعدایه مقاومت اصلا امید اولنه من ای دیسه ده نصیسه
 جناب حق بر موفیت فرقی العاده احسان ایلیرک
 ذکر اولنان اردو ایادی اسلامده اوله بر صورتله
 محو و پریشان اولشدیر که بوندن همان دل قور تلامش
 دنیلسه بجادره

معمد دن صکره مقام خلافته کلان معتضد ۲۹
 سنه هجریه سندن ۲۸۹ سنه سنه قدر اون
 حکومت سوروب برآرهلق امرای عسکر یه نك ار
 بر امتیاز مخصوص صورتنی المش بولنان تسلط
 نهایت و یرمك ایچون ایچیه بر همت کوستره
 ایستمش ایسه ده موفق اوله مامشدر • زیرا اوزم
 قدر سر عسکر بولنان آدم ینه طرف خلافتدن نص
 اولندیغی حالده « امیر الامرا » نامنی الهرق کیرو
 امورده کی استقلالی ایسه هر پادشاهده بیله بولنده
 جق درجه لرده اولسیله اصل امر ونهی صا
 اولسی لازم کلان خلیفه هر طرفدن محاصره الت
 ایدی • والیر ایسه ارتق کنیدی استقلالر ینه کر
 کبی قوت و یرمش اولدقلرندن بونلر خلیفه حض
 تلینه هدیه مقامنده هر نه کوندرلر ایسه خلافت
 وارداتی دخی اکا منحصر قالمش ایدی •

حالبوکه معتضد دن صکره شان خلافتی بوقد
 جق دخی محافظه ایده بیله جک خلیفه کلامشدر
 (عن ۲۸۹ الی ۲۹۵ هـ) خلافت ایدن مکتفی
 بر بوستان قورقولغی حکمنده قالوب (عن ۲۹۵

۳۲ هـ) حکومت سورن مقتدر دخی اون اوچ
 اشونده بر صبی اولغله بر قاچ دفعه خلع و نصب اولمق
 و خلع و نصب اره سنده مقام حکومتیه کتور یلان
 عبداللہ بن معتز یالکز بر کونجکز خلافت ایدوب امرا
 سنده قتل اولمق وینه بویله اره لقدمه مقام خلافتیه
 کتور یلان محمد القاهر دخی ایکی کونجکز خلافتدن
 صکره زندانه آتلق و نهایت بو عزل و نصب لره دوچار
 و لان مقتدر دخی قتل ایدملک کبی احوال رذیلانه
 یچنده شان خلافت بتون بتون محو اولوب کتمشدر .
 مع هذا خلفای عباسیه کندی معیشت خصوص .
 صیه لر نجه دخی ملت زندنه هیچ بر طرفدار بوله میه جق
 قدر سفاهته میدان آچش لر ایدی . از جمله مکرراً
 خلع و نصب بلیاتنه او غرایان اشبو مقتدر عیش و نوشه
 و هوسات باهییه اول قدر منهمک ایدی که حرمنده
 یکرجه جاریه دن ماعدا اون ییک قدرده طواشی
 غلاملری بولسوب بتون امر و نهی اشبو قاریلر ایلله
 او غلاملر یندنه بولمق کبی بر مغلوبیتدن کندیسنی
 نور تاره مز ایدی .

بوهرج و مرج زماننده عسکری طائفه سی دخی

ایکی یہ منقسم اولوب «مضافیہ» دینلان پیادہ عسکری
اغلبیتلہ اصل اولاد عربدن متشکل اولدیغی جهتله
گویا مقام خلافتک صادق عسکری اولوق دعواسنده
ایسده دیکر صنوف عساکری تشکیل ایلان ترکاره
نسبتله بونلرک تربیه سزلکی حددن اشمش اولدیغندن
یتون اهالی انلرک مظالمندن فریاد ایدرایدی . امرای
اتراک مقام خلافتله قارشو اطاعت سزلکده یلک ایلرویه
وارمش ایکن مجرد عموم ملتک توجهنی قزاق وکنندی
امتیاز واستقباللرینی اوصورتله محافظه ایلک ایچون
فقرا ی اهالی یی حایت وصیانتده بونلورلر ایدی .
نهایت برکون برچوق مضافیه عسکری خلق یاغمايه
قویولغله امرای اتراک بونلر اوزرینه بالهجوم عساکر
مذکورہ یی بغداددن طیشارو چیقاروب بعدہ ہرنرہ نہ
برنفرینی کوررلر ایسہ قتل ایلہ وجودلرینی رفع
ایلشدر در .

امرای عسکریہ دن مونس اسمنده بریسی معیتندہ -
کی اردوایلہ مقتدرک علیہ نہ قیام ایلدکده برطاقم
مداہن ومغورران عاصی مرقومی شویله اورمق بویله
قرمق دعواسیلہ بیچارہ خلیفہ یی مقابلہ یه تحریک ایلد -

کرنده مونسك اردوسيله قارشولشور تارشولشور
زوالمی ادمجکز بقیه بی الویروب قتل اولمشدر . بو حالده
مقتدرک یرینه زنداندن چیقاریلوب تکرار مقام خلافته
کتوریلان قاهر یالکیز عشرت و شهوت پرستلک ایله
امرار اوقات ایدرک امور دولته قطعاً مداخله ایتماکنده
ایکن امرای عاصیه یه بیچاره یی راحت بر اقیه رق
۳۲۲ سنه هجریه سنده کوزلرینه قزغین تیمور صوقه رق
اعمی ایدوب آخر عمرینه قدر بیچاره یی جامع قبولرنده
دیلندیر مشلردر .

ارتق اندن صکره (عن ۳۲۲ الی ۳۲۹ هـ) راضی
بالله مقام خلافته نه قدر حکم سورمش اولدیغنی
تفصیله حاجت قالمز . امرای عسکریه دن ابن رائق
کویا خلیفه نك حامیسی صفتیله وسر عسکر و امیر
الامرا نامیله کندی اسمنی دخی خطبه ده خلیفه نك
اسمنه تشریک ایلش ایدی .

عباسیه تاریخنك بوندن صکره کی قسمی طوغری -
یدن طوغری یه امیر الامرالك تاریخی دیمك اولوب
بو حالده ابن رائق عصرک حکمران صاحبقرانی
اولش دیمکدر . زیرا بتون حوالی عراقیه یی یدقهر

و حکومتش المقدس ماعداسوریه طرفلرینی دخی یئیدن
فتح ایدر کی بر صورتده فتح ایلش و کندیس سوریه ده
ایکن بغدادده باش قاللدران و راضی بالله خلیفه دن
صکره خلیفه متقی تحت جایه سمنه الان یحکم نام
امیرایله رقابته باشلامش ایدی .

ابن رائق یحکم بر باد ایده جکی محقق ایکن یحکم
بر چو حغک ضریه انتقامی ایلله مقتول اولدیغندن بغداد
امیر الامر الغی اتر اکن کورتکی بکک یدینه کچهرک
ابن رائق بعدما انکله رقابته مجبور اولدی . فقط ابن
رائقه مقابل عسکر چکمک اوارهلق کیمسه نک حدی
اولدیغندن مر قورمک اردوس بغداده کلور کلز کور-
تکین اخذ و عیس اولدی .

بوندن صکره ابن یزیدی نامنده دیکر برزور با کویا
یحکمدن اخذتار ایچون بغداده یورود کده امیر الامر-
لق مقامنده ابن رائقی کورنجه انکله محاربه یه باشلا-
دی . فقط بغدادده یحکم و کورتکین طرفداری اولان
عسکر دخی ابن یزیدی ایلله برلشد کلرندن بو حالده ابن
رائق غلبه ایده میهرک تحت جایه سمنه بولنان متقی
خلیفه ایلله برابر موصل طرفنه فرار ایلدیلر .

تخفدر که اوزمان ناصر الدوله موصلده بروالی
ایکن کرک خلیفه و کرک امیرالامرا کندی والیرینک
جایته استدا ایلدکری حالده ناصر الدوله یالکز
خلیفه بی جایه ایدرک ابن رائق قفاسنی کسمشدر.
بو حالده خلیفه متقی امیرالامرا الق دینلان ودرجه
اهمیتی یادشاهلقدن بیوک اولان منصبی ناصرالدوله
توجیه ایتزده نه یاپار ذاتاً ناصر کندینی دخی اعدام
ایده جک اولسه کیم ارار کیم صورار؟

فقط ناصرالدوله ایله برابر خلیفه بغداده کلدکده
بو کره دخی امرای اتراکدن توزون بک تغلب ایلدیرک
متقی بی تحت جایه سنه المعه قالمشغله متقی تکرار موصله
قاچوب ناصرالدوله دن استحما ایتش و حالبوکه اوراده
ناصرک غنیمتدن قورقدیغی کبی بنو حیدان قبیله سنه
دخالت ایلدیکی حالده قبیله مذکور دخی توزون
بکدن قورقه رق بیچاره بی استتقال ایلدیکنندن قوجه
خلیفه کندی امیرالامرا سنندز استدعای عفو و مرجه
مجبور اوله رق نائل عفو اولدقدن صکره بغداده کلوب
جناح جایه سی التنه صغمشدر. بونکله برابر توزون
ملعوز خلیفه نک کوزلرینه میل چکدیره رک نورشمسدن
محروم ایدرسه نه دینیلور؟

مقییدن صکره (عن ۳۳۳ الی ۳۳۴) خلافت
 ایدن مستکفی یالکز شرف امامتله اکتفا ایش واوز -
 مانه قدر خلفانک برده وزیری بولنور ایکن بعدما بو
 وزیره دخی احتیاج کورلیدرک خلیفه لک قوناقلرنده
 وکیلخر جلق خدمتی کورمک ایچون «کاتب» عنوانا
 نیله بر مأمور نصب اولمشدر . فقط خلیفه ده ایستد -
 یکی کاتبی استخدام صلاحیتی دخی یوق ایدی .
 معیتنده کی خدمه نك كافه سنی امیرالامرا نصب ایدر
 ایدی .

بو اره لقی امیر توزون وفات ایتسکله اهواز طر -
 فلرنده بولن ان معزالدوله امیرالامرا لقی مقامنی ضبط
 ایچون معیتنده کی اردو ایله بغداد اوزرینه یورووش
 ایدی . حالبوکه خلیفه مستکفی ابن شیرزاد نامنده
 دیگر بر سر عسکری امیرالامرا نصب ایش بولند -
 یغندن معزالدوله انی پریشان ایدنجه کرک خلیفه
 وکرک ابن شیرزاد بغداد ایچنده بریره کیرلنمک مجبور -
 یقنی حس ایشلردر . نهایت معزالدوله خطبه لرده
 کندی اسمی یاد او لندقدن فضله مسکوکات اوزرینه
 دخی اسمنک ضرب اولمشنه مساعده ایلر ایسه خلیفه -

بی عفوایده جکئی در میان ایدوب بو سوز کیرلندیکی
 یرده خلیفه نك مسموعی اولنجہ بو کاذہ موافقت ایلیہ رک
 میدانہ چیقمش و معزالدولہ یہ اوامتیازی دخی رسماً
 و یرمش ایسده خائن مرقوم بیچاره نك یرینه اوغلی
 مطیع نصب ایدرک مستکفینک کوزلرینه میل چکدیر -
 • مشدر •

مطیع (عن ۳۳۴ الی ۳۶۳ هـ) مقام خلافت مو هو -
 مدهده بولنمشدر • بومدت ظرفنده ایسه عباسیه تاریخنہ
 عائد اولمقدن زیاده امیر الامرالر تاریخنہ عائد اولمق
 اوزره وقوعبولان احوال شونلردر :

بر زماندنبرو موصلده فرصت کوزتمکده اولان
 ناصرالدولہ معزالدولہ نك ابن شیرزاد ایله اوغراشوب
 یورغون بر حالده امیر الامرالق مقامنه کلش بولنمش
 فرصت اتخاذیلہ بغدادی صقشدیرمغه باشلامش و بیچاره
 ره مطیع مرقومک الہ دوشدرک تکریت شهرینه نقل
 ایدلمش ایدی که بغداد ایله موصل ارسنده هنوز بر
 کوی صورتیله باقیدر • مؤخرأ معزالدولہ کندیسینی
 طو پلایه رق ناصری رجعتہ مجبور ایدوب خلیفه بی
 تکریتدن الہرق تکرار بغدادہ کتورمش ایسدهده
 ناصرک تضییقندن ینہ امین اوله مامشدر •

ممالک اسلامیة شوهرج و مرج حالنده ایکن شرق
ایمپراطور لغی اردواری دخی حدود اسلامیة بی تضییقه
باشلایه رق نره یه کیرر لر ایسه اهالیء مسلمة سنی کاملاً
قلجیدن پچورر لر و بلا مقاومت بونلره تسلیم اولان برلر.
ده ایسه کنج قادینلری و دلی قانلیلری اسیر ایلیم
اختیارلری طرد ایدر لر ایدی که بونلر دخی چو ولرده
اجلقدن و صوسزلقدن هلاک اولور لر ایدی.

شرق ایمراتلر لر لغنهک بو صورتله مهاجراتی کله
کله سوریه و دیار بکر طرفلرینه قدر کلوب کردستان
جهتندن دخی همان حدود عراقیه یه یاقلاشدیغندن بغداد
اهالیسی بونلر احوالدن اصلاً مسؤل اولماسی لازم
کلان بشارت حلیفه مطیع تعجیزه باشلادیلر. مطیع
کنندی النده هیچ بر قوت بولمیدیغنی درمیان ایتدی
ایسده یه مفید اولدی. نهایت خلافتدن بالاستعفا
مقامی اوغلی طایعه ترک ایلدی.

اشو طایع (عن ۳۶۳ الی ۳۸۱ هـ) مقام خلافتده
بولمیشدر. بومدت طرفنده شرق ایمپراطور لغنه مقاومت
بدل امرای اتراکدن الب تسکین و بختیار و عضد الدوله
و عبدالعزیز و سائرلری یکدیگری ایله منازعه و محاربه.

ده بولندقلرندن بتون میدان شرق اردولرینه اچلمش
ایدی . بین الامرا بومنازعه یه دخی بهاءالدوله نامنده بر
امیرك خلیفه طایعی ده خلع ایتمسینه نهایت ویرلدی .
بولندن صکره خلفای عباسیه نك بر ریاست روحا-
نیه دن عبارت قالان حکمرینه مقابل امرای اتراك
ترقیرلی نه درجه یه واردیغنی ا کلامق ایچون ارتق
امیرالامرالنق نامنی دخی آز کوردرك «سلطان زمان»
عنواننی المش بولندقلرینه دقت ایتملیدرکه احوالده
بغداد سلطان زمانی کندی معیتنده بر قاق دانه دخی
امیرالامرا بولندیرر ایدی .

ایش بودرجه یی بولدقدن صکره خلفای عباسیه .
یی بتون بتون محو ایدرک خلافت نامنی دخی سلطان
زمانلرك اخذ ایتمسینه هیچ بر مانع یوق ایدیسده اوزمانلر
حضرت علی طرفداری اولان علویلر مصر و حجاز
طرفلرنده بر چوق تشویقاتده بولنهرق حتی مصرده
برده دولت علویه تشکیل ایتمش اولدقلرندن اکر
خاندان عباسیدن یالکز بر نام ایله خلیفه اولانلر بتون
بتون اورته دن قالدیریه جق اولورلر ایسه صکره بو
نام علویله انتقال ایلیرك امرای اتراكده هیچ برشی

قالیه جغی ملاحظه سی بیچاره عباس میرک مقام امامت
 دیمک اولان خلافتده بقالرینی تأمین ایلر ایدی .
 (عن ۳۸۱ الی ۴۲۳) مقام خلافتده بولنان قادرك
 شو مدت طویله خلافتی زمانده ممالك اسلامیه ده
 طرف طرف ظهور ایدن صاحب خروج لری کندیله .
 نیک دخی هر بری برر صاحب خروج دیمک اولان
 امرای اتراکک ضرب و تکیه لرندن بشقه بروقه مهمه
 کورلما مشدر . (عن ۴۲۴ الی ۴۶۷) مقام خلافتده بولنان
 قائم بالله زمانده امرای اتراکدن ارسلان بک مقدا
 ولایتلر والی لری ایکن بو صرهلرده طوائف ملوک
 حالنی المش بولنان ار باب استقلالی برر برر اورارق
 بغدادی دخی اخافه ایتسیله خلیفه قائم ینه امرای
 اتراکدن سلجوقی طغرل بکه استمدادی حاوی خبر
 کوندر مکه موهی الیه طغرل بک علی جناح الا .
 استعجال بغداده یوریمش ایسه ده ارسلان بک آندن
 دها اول طوران هرق خلیفه بی محبوساً عانه قصیده سنه
 کوندر مش ایدی .

طغرل بک دخی عانه اوزرینه یو رویه رک
 خلیفه بی خلاص ایش ایسه ده قائمک قزی سیده ایله

نکاهی اجرا اولندقدده سیده نك كمال تعظمندن ناشی
 طغرل بکه قیام ایتماسی و یوزینه بیه باقامسی
 سلجوقلری دوچار حیرت ایتمش ایدی .

بوارهلوق قادرك وقوع وفاتیه مقتدی مقام خلافته
 كلكده ۴۸۷ سنه هجریه سنه قدر دوام ایلمش ایسه ده
 اتراك سلجوقیه كندیلرندن اولکی امرایه دخی برر
 برر غلبه ایدرك الله رینه کچوردکری یرلرده آرتق عبا -
 سیه نامنه خطبه دخی او قوتماغه باشلا دقلرندن شو حال
 عباسیه ایچون قطعی بر اضمحلال دیمك اولمشیدی .
 ملكشاه سلجوقی بغدادده کلدیکی زمان « بر پوستده
 ایکی پادشاه اوله مز پادشاه بنم سن زریه ایسترسه
 کیت » دیه مقتدی بی بغداددن اخراجسه قالمش
 و مقتدی دخی یالکز اون کون ایچون مساعده المشیدی .
 نصلسه اون کون ظرفنده ملکشاه وفات ایتمکله عبا -
 سیلرینه یرلرنده قالمشدر .

ال سلجوقك بر یاندن تزیید شوکت ایتمسه مقابل
 آل عباسك بقیه خلافتی دخی اونسبتده زائل اولمده
 بولندیغندن (عن ۴۸۷ الی ۵۱۲) نام خلافتی طاشیان
 مستظمرایله (عن ۵۱۲ الی ۵۲۹) بو مقامده بولنان

مستتر شد وجود وعدم وجود لری مساوی عدد اولنه.
 جق بر حکمزلک ایچنده امرای اتراکک بر اسمی
 هدیه واصل اسمی صدقه اوله رق و بردکاری جزوی
 بر پاره ایله یشامشدر .

(عن ۵۲۹ الی ۵۳۰) مقام خلافتده راشد بو.
 لندیغی ائنهاده مسعود سلجوقی بغداده تقرب ایتمسینه
 بیچاره خلیفه موصله فرار ایدرک بعده آسیای وسطی یه
 قدر وارمشر و اوراده بعض او شاققرینی تکدیر اتمسی
 اوزرینه انلر یندنه قتل اولمشدر . مسعود سلجوقی
 طرفندن مقام خلافتنه نصب اولنان مقتضی ۵۵۵ سنه
 هجریه سنه قدر دوام ایدرک عالم و عاقل بر آدم اولمسینه
 مسعود برارهلق کندیسینه کوجنده راکموالی مصادره
 ایتدیردیکی حالده مؤخرأ فضلنه حرمة ینه اعاده ایتدیر.
 مشیدی . آوان خلافتنده امرای اتراکک نفاق و شقا
 قندن عاجز قالان بغداد اهالیسی مقتضینک درایت
 و شجاعتنی کوره راک حکومت عباسیه یی بو ذاتک
 ریاستی ائنده احیا ایچون خلیفه یی بالتشویق برخیلی
 کوکلی عسکر یازمشرو مقتضینک امر و نهینه اطاعت
 کامله ایله حکومت مالکیه و عسکر یه یی یاغی یولنه

قویمشیر ایسه ده بواره لوق خلیفه نك وفاتی وقوعه
کلیکله و (عن ۵۵۵ الی ۵۶۶) مقام خلافته کلان
مستجد ایسه خانه سی امورندن عاجز بر بیچاره بولمغله
عباسیه ایچون بوتجدد امیدلری هیچ بر نتیجه کوستره -
مامشدر .

مستضی ایچمه جر بزه لی بر آدم اولدیغندن (عن
۵۶۶ الی ۵۷۵) مقام حکومته بولندیغی مدت بغداد
اهالیسینده اولکی غیرت ینه او یانمش ایسه ده امرای
اترا کدن قیمانه وقتیش بغداد، حکم ایدرک حتی
خلیفه نك قوناغنی محاصره یه قدر وارد قلرندن بغداد
لیلرک بو غیرتندن برشی امید اولنه مز ایدی . مستضی
اوشاقلر ینه امرایله شو ایکی محاصردهن بر یسنی
اولدورتمش و دیکرینی قاچر مش ایسه ده کندی
خانه سنی مدافعه دن عبارت بولنان شو یرار لوق امور
ملکیه جه بر منفعت کوستره مامشدر .

خلیفه ناصر زماننده بغداد لیلرک غیرت استقلالجو -
یانه لری بسبتون انطفا حالنده بولنه رق بناء علیه (عن
۵۷۵ الی ۶۲۲) ناصرک مدت مدیده خلافتنده بغداد
یالکز تر کلرک دکل یکی تورمه مکه باشلایان جنکیر

تاتارلرینک دخی تهیداته دوچار اولمق بلیه سنی
 کورمشدر • ناصرك اوغلی طاهر یالکز برسنه قدر
 باباسنک پوستنده اوتوره بیلشدر • (عن ۶۲۳ الی ۶۴۰)
 خلافت ایدن مستنصر ایسه علوه مت و اقتدارینی هیچ
 اولمز ایسه ترقیات علیه جهتنده کوسترمک ایچون روقت
 جهانک مکتب عرفانی ایکن مؤخرأ مستولیلرک اتلرینه
 آخور اولمق درجه لرینی بولان مکاتب و مدارس ایا
 یولنده اولانجه ده لکنی صرف ایتیکه باشلامشیدی •
 بغدادلیلر مشار الیه ک همتمی کوره رک خلیفه مقتضی
 زماننده کی غیرت لرینی تجدید ایله بغدادی خارجی
 مستولیلردن مدافعه یه همت ایشلر و ایچیه عسکر
 یازوب حکومت ملکیده بی دخی ید خلیفه یه تودیع
 ایلیه رک جنکیر تاتارلردن بفرقه سی بغداد اوزرینه
 یورودیکی زمان مقاومه مسارعتله غلبه دخی ایشلر
 ایدی •

شونخم تحده برنشوونما ویرمک ایچون عشار
 عربانه دخی سبرلر کوندره رک بودفعه کی امید اولکندن
 زیاده قوت بولمش اولدینگی حالده چه فائده که مستنصرک
 وفاتیه اوغلی مستعصم مقام حکومه کلدکده کنیدی

ذاتاً قورقاق بر آدم اولدیغی کبی ابن علقمی کبی برده
خائن وزیره دوچار اوله رق بیچاره نك (عن ۶۴۰ الی
۶۵۶) مدت حکومتی عباسیه تاریخی ایچون برخاتمه
ایده اولمشدر . شویله که :

مر قوم ابن علقمی مذهبه شیعه و بنا علیه پولتیقه .
چه علوی اولوب مستنصر زمانده بغدادده عباسیلرک
تجدده باشلایان شو کتلی علویلرک امیدلرینی تأخیر
ایده چکی کبی براره لق بغدادده سنیلر ایله شیعیلر ارسنده
برمنازعه چیته رق بتون شیعیلری قتل عام ایچون طرف
خلیفه دن صادر اولان برامری کپرویه چورمکه دخی ابن
علقمی مقتدر اوله مدیغندن برچوق مذهبداشلرینک قتلی
مر قومک کینه برقاند . بویورمش ایسی . حالبوکه
دیگر جهتدن تاتارلرک بغدادده اولان قصدینی بیلدیکی
کبی بفرقه تاتار عسکرینک مستنصر خلیفه یدنده
مقتول اولسی دخی تاتارلرک فکر انتقامنی تحریک ایلش
اولدیغی خبر الدیغندن سردار تاتاران بولنان هلاکو
ایله بالمخاره بغداد جوارینه جرادیلا آسما تاتارلر نزول
ایلدکده خلیفه یه بونلره مقاومت ممکن اوله میه جغنی
بالتأمین هلاکونک قزینی خلیفه نك اوغلنه نکاح ایتمک

صورتیله بر باریش کوروش ایق لازم کله جکنه
 ایناندر مشایدی . بیچاره مستعصم بوکا ایناندریغی
 کبی بتون بغداد دخی قاهره ق خارج سورده ترتیب
 اولنان ضیافت عزمیده کلان بغداد اهالیسی همان
 قتل اولمغه باشلادقاری کبی مؤخرأ تاتارلر شهری دخی
 استیصال ایدرک بر روایت کوره بر میلیون نفوسی قتل
 و خلیفه ایله اعضای خاندانی دخی قلیبدن کچورمشدر .
 ایشته بووقعه میلادک ۱۲۵۸ سنه سنه مصادف
 اولهرق بوناک اوزرینه بغدادده خلافت عباسیه ارتق
 بر نامدن دخی عبارت قلیوب کلیأ و قطعاً منعدم اولمش
 و مصره نقل مکان ایدن عباسیلر ایسه مدرسه نشین
 کبی بر حالده اولهرق تامصرک طرف عثمانیانندن قتح
 واستیلاسنه قدر دوام ایشدر .

(در دنجی فصل)

- آل سلچوق -

عن ۱۰۷۴ الی ۱۲۹۴

تفصیل - کائناتمزدن بو جلدک تقسیمات تاریخیه
 سی بیان اولندیغی صوره اشبور دنجی فصلک ابتدا
 لری کچن اوچنجی فصلک صوکلریله یعنی سلچوقیه

تاریخک قسم اولی عباسیه تاریخک قسم اخیر
ایله تداخل ایلدیکنی عرض ایشیدک . بوتداخلک
اواخر خلافتلرنده آل عباسک شوکت و حکومتدن
دشملرینه مقابل آل سلچوقک هر طرفی استیلایه باشلا .
ملرندن نشأت ایلدیکی عباسیره دائر یوقاروکی فصلده
و برمش او لدیغمز ایضا حاندن اکلاشلشدر . سلچو-
قیلره کلنجه :

سلچوقیلر عن اصل آسیای وسطی تر کلرندن اولوب
خاندان سلچوقینک المعروف اولان ایلک بانیسی بقاق
اصمنده بر ذاتدرکه اترال مذکور ه هنوز بت پرست ایکن
بر چوق عشایر و قبائل اشبو بقاقک امر و نهینه تابع
ایدیلر . « سلچوق » ایسه ایشته بو بقاقک اوغلی
اولوب مؤخرأ خاندانه کندی اسمنی بر نام ابدی اوله-
رق و یرمشدر .

قبائل اترال میاننده ظهوره کلان بر محاربه
اوزرینه سلچوق بک معیتنده کی خلق ایله ممالک اسلا-
میه یه یعنی ایران جهته طوغری مهاجرتله برابر
دین اسلامی دخی قبول ایشلشدرکه هجرتک ۳۵۰ سنه سنه
مصادف اولان بومهاجرت و قبول اسلامیت قضیه سی

مؤرخین عرب نزدنده سلاچقه نك ابتدای ظهوری
 عد اولنور . انجق سلچوق بکک یوزسنه قدر دوام
 ایلان مدت عمری ایله ارسلان و میکائیل و موسی نامنده
 اوچ اوغلارینك سوق و دلاتیله سلاچقه نك ایران
 و بخارا طرفلرنده کی جولانلری و میکائیل بکک طغرل
 و محمد و داود نام اوچ اوغلارینك بعض محاربایله
 امرای سلاچقه دن الب ارسلانك محیر عقول اولان فتو-
 حانی و الحاصل آل سلچوقك آسیای وسطی و ایران
 و کرجهستان و عراق طرفلرینه استیلاسی هب ایران
 تاریخنه تعلقی زیاده اولان وقوعاتدن اولدیغی ایچون
 وقایع مذکوریه یی بوندن صکره ایرانه مخصوص اولان
 جلدده و « سلچوقیه اصفهانیه » فصلنده ذکر ایتک
 مناسب کورلمشدر .

بوراده یالکز شو قدر ایضا احاطت و یرملیدر که
 بغدادده خلافت عباسیه یی دوچار ضعف ایدن سلچو-
 قیلر دکلدرد . سلچوقیه دن ماعدا و انلردن اول سائر
 برچوق افراد و امرای اتراک عسکرلک خدمتیه
 بغدادده کله رک سرعسکرلک و امیرالامراق ناملریله
 تحکم و تسلطلرینی آرتیردقلری کی آسیای وسطی

وایران طرفلرنده بر طاقم ولایتلر والیرلرینک اعلان
استقلال ایتلری عباسیه نك شوکتی محو ایشدر •
سلجوقیلر ایسه احتمال که اسلامیتلرینک یکیلکندن
طولایی خلافت عباسیه نامنه پک بیوک بر حرمت کوستره
رک حتی طغرل بک بغدادده کرک خلیفه دن و کرک
تحت نکاحنه الدیغی قزی سیده دن هیچ بر کیمسه نك
تحمل ایده یه جکی حقارتلره دوچار او لمش بولندیغی
حالده مجرد خاندان خلافتنه حرمت ورعایتندن ناشی
اصلاً اثار غضب بیله کوستر میوب نهایت قهرندن
هلاک او لشد • انجق مؤخرأ البارسلان دولت
اصفهانیه نك حدودینی توسیع ایلدیکی صرده
بغدادی دخی بالطبع حدود مذکوره داخلنه المش
ومع هذا خلفای بغداددن چیقار میهرق حاصلی
اضمحلال خلافت وقعده سی سلجوقیلر انده وقوعه
کلامشدر •

اصفهانده کی دولت عظیمه سلجوقیه ایلروده فقره
مخصوصه سنده خبر ویر یله جکی اوزره بر طاقم شهزاد
کانک رقابتلری و یکدیگری علیهنده کی محاربه لری
نتیجه سی اولهرق بر طاقم فرقه لره آیرلش وازجه لره

سلچوقیه کرمان مثللو بیوجاک شعبه لر دخی وجوده
 کلش اولدیغی مثللو بغدادک بر و طرفلرنده یعنی اولیکای
 سلچوقینک غرب جهته نده کرک سلچوق امراسنندن
 و کرک عرب صاحب خروجرندن بر طاقم کسسه لر
 طوائف ملوک صورتیه له برچوق حکومتلر وجوده
 کتور مشلرایدی . ازجمله شمدی بررقضالقیر اولان
 مار دین و جزره و حصن کین کبی کوچو حاکم یئر
 دخی بر مستقل دولت اولوب هاه موصل و حلب
 و شام کبی یئر کنیدیلرینی دول معظمه دن عدایدن بر
 مستقل امیرک اداره سنه تابع اولشرایدی .

ا کر بو طوائف ملوک حقننده برر بر ایضا حاکمات
 و تفصیلات و یرمکه قالقشله جق اولورسه صوکی
 کلز تطویلاته کیریشلک لازم کلوب حالبوک . بونلرک
 اوقدر تطویلاته دگری اوله جق برکونه اهمیت
 تار یخیه لری دخی یوقدر . طوائف مذکوره میاننده
 اک مهمی « سلچوقیه شام » دیه شهرت بولان
 حکومت اولوب البارسلانک اوغلی تاج الدوله
 تکیش بک طرفندن تأسیس ایدلشدر . البارسلانن
 صکره سلچوقیه اصفهانیه تختنه جلوس ایدن ملک شاه

مومی ایسه تکیش بکی حلب و شام طرفلرینی فتحه
 مأمور ایلشیدی . اوارهلق ملکشاھک وفاتی وقوعه
 کلدیکی کبی ذاتاً فتح ایلدیکی ممالکی طوغریدن طوغری
 یه کندی اداره مستقلسنه تابع ایلاک ایشدن بيله
 اولدیغنی تکیش بک کورنجه کنديسنی مستقل بر -
 پادشاه اولق اوزره اعلان ایتشدیر .

مؤخرأ شرق طرفنه حواله سیف غالبیت ایدرک
 حتی برارهلق بغدادی ده ضبطله خطبه یی کندی نامه
 اوقوتدیر مشدر ۶۹۱ سنه هجریه سنده وفاتی ووقعه
 کلکله اوغلی رضوان بک یرینه پادشاه اولدقده اوزمانلر
 بتون اورو پانک روی عالمدن کویا اهل اسلامی قلدر بق
 ایچون محاربہ صلیبییه یی آچش اولدیغنی زمان اولمسيله
 براهل صلیب اردوسی دخی انطاکیه اوزرینه یوریه -
 یکنندن ورضوان بک طرفندن اوراده والی بولسان
 یاغی سنان هر نه قدر جسور بر آدم ایسه ده صلیب
 بر کیجه وهاله برجلر اوزرینه چیقارق بورر چالد -
 یر مسيله شعورینه خلل کلدیکنندن انطاکیه شه هری
 صلیبیلره تسلیم اولمشیدی . رضوان بک عظیم براردو
 ایله انطاکیه یی استرداده یورودیکی صروده صلیبیلرک

دخی اندای یتش-دیکندن استرداد ممکن اوله مامش
ایدی *

۵۰۷ سنه هجریه سنده سلجوقیه شامک اوچنجی
پادشاهی اولمق اوزره الب ارسلان نامنده بر پرنس مقام
حکومت کلد کده اهل صلیبدن اخذ انتقام ایچ-ون بر بیوک
عزمه دوچار اولمش ای دیسه ده مسلمان پرنس لر ینک بویله
طوائف ملوک صور تنده یکدیگر بویله منازعات مدیده-
سی و بناء علیه بتون اهالی یی از عاجلری اثنا سنده
« باطنیه » نامیله توره یوب « شیخ الجبل » دنیلان
رئیس لر ینک قومانداسی التسنده خنچر غدرلری ایله
هر طرفی تهدید ایلیان بر جمعیت خفیه سیاسییه نک
خنچر غدری ملک شاهی ده شهید ایش و بو حالده حاکم سر
قالان سوریه قطعه سی ماردین حاکمی بولنان ایل غازی
نام امیره عرض دخالت ایلمشدر *

باطنیه دنیلان بوفرقه یه فرنک تاریخنده « آساده ن »
دنیلور که بولفظ فرقه مذکور نک دیگر برنامی اولان
« حشیشیان » لفظندن غلط اولمق کرکدر * فقط
حشیشیلر کیرلی سوء قصد ایله آدم اولدورمک
خصوصنده پک زیاده ایل رویه واره رقجهانی بونکله

تهدید ایلش اولدقلرندن مؤخرأفرنك لساننده «آساسدن»
 لفظی «سوء قصد حی قاتل» معناسنی المش وحتی بولفظ
 افعال فرنکیه کبی تصریف دخی ایدیلرک «آساسینه»
 لفظنه «سوء قصدله برآدمی اولدورمک» معناسی
 ویرلمشدر . فرقه مرقومه شرقی تاریخننده جداً
 وحقیقه یك مهم بر فصل تشکیل ایده جک درجه ده
 اهمیت المش اولدیغندن بولره دائر بوجه آتی بر بند
 مخصوص تشکیلی مناسب کورلمشدر .

• بند مخصوص •

« باطنیه جمعیت خفیه سی »

باطنیه یاخود حشیشیان دنیلان بوجعیه برطاقم
 مورخلر خیریه وملاحده واسماعیلیه والموتیه ناملرینی
 دخی ویرلمشدر . بو طائفه نك مؤسسسی اولان
 حسن بن صباح ۴۸۳ سنه هجریه سنه طوغری شهرت

بولش بر آدم اولوب علوم شتاده متبخر اولدیغی کبی
وزرای سلجوقیه دن بغدادده عظیم بر مدرسه سی اولقله
ناهی باقی اولان نظام الملک ایله دخی رفاقتی و ارایدی .

حسن بن صباحک مذهبی اولاشیعه مذهبنه
یقین برشی ایکن یواش یواش بالکلیه دوچار ضلال
اوله رق باطنیه مذهبنی تشکیل ایتشدرکه اولور اولمز
کفر دن اشنع بو لنان بو مسله که مذهب اطلاق بیله
جائز اوله مز .

ابتدای خروجی مصر دن عربستان و ایران جهتلر -
ینه عودتی اولوب که و یا علو یلردن مستنصر نام
ذاتک خلافتی ایچون خلق تشویق ایتمه مأمور
ایدیسه ده بو مأموریت کندیسینه بر وسیله سیر
وسیاحت اولوب اصل خدمتی ایسه خلق کندی
طریق باطلنه تشویق و ادخال ایتک ایدی . آلموت
قلعه سی جوارنده بولنان و جهالتلری وحشت درجه -
سنه واران اهالی مر قوم حسن بن صباحه ده قولا ی
قاندیغندن بونلری کندیسینه جلب ایدرک شاهنلرک
بیله کوچ واصل اوله بیله جکی آلموت قلعه سی
نصایسه اله پکوره بیلش واندن صکره ارتق شقاوتنی
اعلانن دخی چکنماشدر .

اوزمان نظام الملك سلاطین سلجوقیه طرفندن بغداد-
 ده وزارت ایلدیکندن قلعه الموت اوزرینه بر عظیم
 اردو سوق ایتک تدارکنه قیام ایلینجه حسن بن صباح
 کندیسنه علی العمیا مطیع و منقاد اولان ادمردن بر
 فدایی کوندره رک بیچاره نظام الملکی قتل ایتدیرمشدر.
 حسن بن صباح کندی ادمرینی او قدر قاندیرمش
 ایدی که انک امریه برایش کورمکه کیدن فدایی شاید
 اوله جک اولور ایسه طوغری جنته کیدوب حو-
 ر یئرله ذوق و صفاده بولنه جغنی و شیخ ایسترایسه کند-
 یسنی تکرار دیرلتمکه مقتدر بولندیغنی جداً اعتقاد
 ایدر و بناء علیه اولومدن فلانن قورقیه رق اجراسنه
 مأمور اولدیغنی ایشی مطلقا ایفا ایلریدی.

کندیسنه شیخ عنوانی و یرن مرقوم حسن
 حقیقه جریده علمیه صاحبی برادم اولوب حاشا
 «قرأنک معنای ظاهریسی مراد دکلدر معنای باطنیسی
 مراددر» دیه درلو درلو تاویلات مفسطه کارانه
 ایله فرائض شرعیه یی قالدیرمش و نه قدر محرمان وار
 ایسه هپسنک اباحه سنه فتوا و یرمش ایدی. حتی جنت
 وجهنمه دخی کندیسی مالک اولوق ادماسنده بولنوب

شمديك دنيايه مخصوص بر جنت اولق اوزره وجو-
 ده كتوردیكى غایت کوزل بر باغچه دروننه الكوزل
 قزلی ط- ولدیرمش واسرار اشرا یله صیر دیردیغی
 ادملری بوباغچه یه صوقوب حریف اوراده او یانه رق
 حوریلرله بش اون کون عیش وعشرت ایلدکن
 صکره یه مست لایعقل ایکن طیشاری چیقارلدیغی
 زمان شیخن صدقت و اطاعت یولنده جان فدا ایدر
 ایسهك بعدالوفات یه او جنهته کیررسك سوزینی
 ایشیدنجه کمال صدق ایله اینامقده بولمش ایدی .
 مرقومك براسمی دخی داعی کبیر اولوب خد-
 مت وزارتنده بولسان حریفه دخی «بزرک» عنوانی
 ویرمش ایدی . اشوبزرکن صکره «فدایی» عنوان-
 نه مظهر اولان رؤسای بندکان بولنوب بونلر مجلس
 مشورتی تشکیل ایدرلر ایدی . انلردن صکره دخی
 «داعی» نامیله بر طاقم یوک مأمورلری اطراف ولایته
 سوق ایدر ایدی که بونلر قلعه آلموتدن هر نه درلوا می
 ونهی الورلر ایسه حرفی حرفنه اجرا ایدرلر ایدی .
 داعیلرک دخی کندی ایشلرنده استخدام ایچون قاندر-
 دقملری بر طاقم افراد بولنوب بونلرله برابر بالتهدید

یلدیر دقلری اهالی قراوقصبات اوزرلرنده علی الاطلاق
اجرای حکومت ایدرلر ایدی .

ابتدای تأسیسلرنده اشوباطنیلر ابران ایستاد واقع
جبال متسلسله تپه لرند برطاقم متین و سبک
سیله تحصن ایتمشلر و اورادن اطراف باندی
بولمشلر ایسه ده مؤحرراً تسلط و تحکیمی بر
وارمش ایدی که برطاقم امر اووزراو حتی ملوک
بیله بوخیشلرک شرنندن اور که رک تملق و مدارایه مجبور
یت کورمشلر ایدی . زیرا انلر طرفندن اولومه حکوم
اولوبده خنچر غدرلرندن قورتلقی حقیقه ممکن دکل
ایدی .

بعضی کره بونلر اوزرینه کلیتلی عسکر چکلبی
واقع ایسه ده عساکر مرقومه ایچنده بولنان باطیلر
اردونک سرعسکرینی و حتی اردو صاحبی بولنان
حکمداری بیله تهدید ایدرک اردونک حرکتی منع
هققدر اولمشلردر . برکیاروق سلچوقینک برچسوق
سردارلری بویولده قتل ایدلشدر . ملکشاه سلچوفی
بونلرله مجاهده ده بالا صرار قلعه شاهدی فتح ایله اورا
ده احسن بن صباحک خواجه زاده سی اجدی طوته رقه

دیری ایکن در یسنی یوزدیک حالد ملعونک سسنی بیله
چیقار مامش اولسی بو نلرک درجه تعنیدنی موازنه یه
مدار اولور.

سلچوقیلر بونلرله پک چوق اوغرا شه رق سلطان
محمد و سلطان سنجر همسان اوجاقلرینی سوندر مک
درجه لرینه ککش ایکن باطنیلر از جمله سنجرک یتاغی
پاننه بر خنچر صاپلیه رق « ایشته بو خنچری یتاغکزک
باشنه صاپلایان کو کسکزه دخی صاپلیه ییلور . بزدن
ال چکمز ایسه کز بر کون اوده اولور . سزک سیننه -
کز او خنچرک صاپلانیدیغی یردن ده اقاتی دکدر »
دیه تهدید ایتد کمرندن هیچ بر یسی باطنیلر علیه موفق
اوله مامشدر .

۱۸۵۰ سنه هجریه سنده حسن بن صباح کبر دکده
کیا بزک امین اشبو باطنیه فرقه سنه رئیس اولمش ایدی .
ایک ملعتی باطنیلر اوزرینه اردو سوق ایدن وزیر
سلاجقه ابونصری بر قاچ فدایی ارسالیله خنچر لتمک
اولمشدر . سلطان سلچوق کندی وزیرینک انتقامی
ایچون باطنیلر اوزرینه عظیم عسکر چکهرک اون پیک
قدرینک ققاسنی کسدرمش وشامده دخی التی پیک

قدری کبرمش ایسه ده ینه کوکری کسلماشدر .
 کبابزرك امیندن صکره ۵۴۲ سنه هجریه سنده
 اوغلی کیا محمد وانان صکره ۵۵۷ سنه سنده اوغلی
 خواند حسن رئیس اولدیله . بونلرک ملعتی اسلافه
 دخی فائق اولوب خلقی قهرا وجبرا کندیلرینه تابع
 ایدرلرایدی . اشبو خواند حسن بنی دابویه طائفه سنندن
 ینه حسن نامنده برقاتلک یدیه کبردکده برینه کلان
 اوغلی خواند محمد قاتل مرقومی اولادو عیالیه کاملاً
 اعدام لاشدر . ۵۶۲ سنه سنده مرقومک دخی اسفل
 سافلین جهنمه کتمی اوزرینه اوغلی خواند جلال الدین
 داعی کبر و شیخ الجبل اولوب فقط بو آدم حسب -
 الانصاف منسوب اولدیغی طریقک بطلانی اکلایه رق
 اکر تحت اداره سنده بولنان مملکتله کندیسى والی
 نصب اولون ایسا مذهب اهل سنتی قبول ایلیه جکنى
 ناصر خلیفه یه عرض ایلش ایدی . خلیفه بوکا
 مساعده ایلدکده مرقوم دخی تعهدینی ایفا اتمکله
 حسن بن صباحک تألیف کرده سی اولان کتابلر یاقبله -
 رق شقاوت اوجاغی سوندیرلش ایسه ده خواند جلال
 الدیندن صکره اوغلی خواند علاء الدین داعی کبر

اولدقده اجدادنن اشنع برکافر دین چیقوب باطنیه
 مذهبنی اولیکیدن اشنع بر درجه ده تجدید ایلشدر •
 او توز بش سنه اجرای ملعنیدن صکره برید انتقام ایله
 قتل اولندقده یرینه چکن اوغلی رکن الدوله دخی هلاکو
 معیتنده بولان تاتارلرک شرینه اوغرایه رق قلاع
 و بقاعلری تاتارلر النده تارومار اولمشدر • واقعا شامده
 وحلبده ویمنده اشبو اسماعیلیه جمعیت کریمه سنک
 بر طاقم فروعی ظهور ایلش ایسه ده انلر آلوتیه اشقیاسی
 قدر حکم و اهمیت پیدا ایده مامشملردر •

(انتهای بند مخصوص)

سلاجقه دن کرمان و شام و سائر طرفلرده اعلان
 استقلال ایلان طوائف ملوک ایله سائر امرای حکمدا •
 ران اشبو باطنیه اشقیاسنک ایادی غدرنده پک بیوک
 تهدیدلره دوچار اولدقلری حالد سلاجقه نك قونیه
 طرفلرند تشکیل ایلدکلری بر حکومت اصل دولت
 صحیحه و مستمره سلجوقیه اولقی اوزره ترعین بنیانه
 موفق اولمشدر •

« سلجوقیه روم » عرب مورخلری قونیه دولت
 سلجوقیه سنه « سلجوقیه روم » نامی ویرلر • زیرا

انلر اناطولی قطعه سنه دخی « بلادروم » تسمیه ایدرلر .
 طغرل والپ ارسلان ایران و عراق و آسیای وسطی
 طرفلرینه طوغری توسیع حدود ایدن اصفهان دولت
 سلجوقیه سنی تشکیل ایتکده بولندقلری صهره ده طغرلک
 برادر زاده سی قتلش بک نام سردار دخی کرجستان
 و اناطولی طرفلرینی استیلایه مأمور اولمش و عادت
 سلجوقیه دن اولدیغی اوزره فتح و استیلا ایلدیکی
 محارره والی تعیین قلمش ایدی . مؤخرأ سلاجقه پرنساری
 یکدیگریله منازعه و محاربه یه قیام ایلدکارنده اشبو
 قتلش بک دخی الپ ارسلان ایله محاربه یه قالقشهرق
 مقبول دوشمکله الپ ارسلان ینه کندلی خاطرری ایچون
 قونیه و الیلکنی قتلش بک اوغلی سلیمان بکک توجیه
 ایشیدیدی . قونیه شهرینی روم شرقی ایمپراطور لغندن
 اخذ و پای تخت الیخاذا ایدن موخی الیه سلیمان بک
 اولقله قونیه دولت سلجوقیه سنک اصل باتیسی کند .
 یسی عد او انور . ذاتاً انک زمان حکومتنده اصفهان
 دولت سلجوقیه سی ینه سلاجقه دن بر طاقم پرنسار
 النده منقسم کبی برحاله کله رک هر طرفده طوائف ملوک
 تورهمش اولدیغندن قونیه نک استقلال تامنی استحصال

ایله اصفهانین بالکلیه قطع رشتۀ تابعیت این دخی
سلیمان بك اولمشدر *

اوزمانلر قسدم شریف طرفلر نده اهل صلیک
براشوب قللری مسلمان بر نسلری ایچون بحق بر شیت
عده اولنده من ایلمیسه ده سلیمان بك غایت وقور بر قات
اولدیغیندن اراضی متمدنیه صلییلردن قور
تارمت ایچون وارنی غایت خور یزانه بر محاصره و محط
ربه ایله انطاکیه شهرینی بونلردن نزع و اخذ ایلدی *

قطینسه اوارماق سلاچقه دن تکیش بك حایه
شهرینی واردین حکومتک بد ضبطلندن قور تارمته
کلوب بوندن طولایی سلیمان بك ایله دخی محاربه یه گیر
شد کده سلیمان بك مغلوب اولسی نفسنه کوچ کله راک
بیچاره سلیمان کنندی کندیسنی اوروب اولدرمشدر *

بونا جمعه ۷۶۹ سنه میلادیه سنده وقوعه کله راک
بعدونش اوغلاری داود شاه و قلیچ ارسلان ملک غوث
سنه قیام ایلدیلر . بونلر فرات و دجله ارسندنه کاشی
مزو پوتامیا چوللر نده بر چوق زمانلر یکدیگرینی قوال
مق ایله دونوب طولاشه رق تا ۵۱۰ سنه سنده قلیچ
ارسلان بر محاربه ده مغلوباً فرار ایدر و خابون نهرینی

یکر ایکن غرق اولمسيله قونیه ده بولنان ارکان دولت
هنوز حبس بولنان رکن الدین مسعوده بیعت ایلدیلر .
رکن الدین مسعود سن رشده واصل اولدیغی زمان
نایت حلیم و حکیم بر ذات فلاطون سمات چیتیه رق
دائما صلحی حربیه ترجیح ایدن ومدافعه حیدوده
حقوق ایچون مجبور اولورسه محاربیه ایدوب تعرض
ایچون محاربیه دن دائما بالتوقی اولانجه قوتنی اصلاحات
داخلیه صرف ایلر ایدی . هنوز کوجیه بولنان
عشاردن بر چوغنی یکیدن تأسیس وانشا ایلدیکی
کویله قصبه لریرلشدره لرک عراق مملکتنده برچوق
مکتب و مدرسه لر کشادیه ترقیات معارفه کلی خدمت
الکندر .

۵۵۱ سنه سننده رکن الدین مسعود دخی وفات
ایتمکله اوغلی عزالدین قلیچ ارسلان پادشاه اولمشیدی .
بر ذات حقیقه جسور و عاقل بر آدم ایدیه ده برارهلق
یوقضیلتنی دولتک ترقیاته صرف ایده جکنه مصر
حاکمی صلاح الدین یوسف کبی اهل صلیبه قارشو
مدافعه و مقاومتده اسلام پر نسلرینک کافه سنه تفوق
ایتمش اولان بر ذات عالی قدرایله اوغراشمق کبی موجب

تأسف اوله جق بر یولده صرف ایلشدر • شویله که :
 قلیج ارسلان ارضروم امراسندن بر یسنک
 قزینی نکاحلایه رق کلین کلور ایکن دانشمند امراسندن
 یاغی ارسلان بک کلینی قایمش و فسخ نکاح ایچون قزه
 بر کلمه کفر سویلته رک بعده برادرزاده سنه نکاح دخی
 ایتش اولدیغندن قلیج ارسلانک بوکا جانی صیقیلهرق
 یاغی ارسلان بک اوزرینه اردو چکمش ایدی •
 بو هجومده مغلوب اولسی عزالدین قلیج ارسلانک
 دها زیاده حدتی موجب اولغله روم شرقی ایمپراطور
 لغی کبی اسلامک خصم طبیعیسی اولان بردولتدن
 بالاسمده دها بیوک براردوایله دانشمند بک اوزرینه
 یورود کده بوزوب برچوق یرلرینی ضبط ایلدیکی کبی
 کلین غوغاسی مؤخرأ ملک طمعنه مبدل اوله رق حصن
 کیف حکمداری نورالدین اوزرینه دخی صالدره رق
 همان بتون ملکینی النیدن المش و نورالدینی بتون بتون
 کندیسنه بند ایچون کندی کریمه سی سلچوقه یی
 نورالدینه تزویج ایلش ایدی • حالبوکه مؤخرأ
 نورالدین پرنسس سلچوقه نک اوزرینه برچنکی قزینی
 سووب استنکاح ایتسمیله قلیج ارسلان تکرار نورالدین

اوزرینه اردوچکنجه اودخی قورقوب مصره صلاح
الدین یوسف زدینه قرار ایلدیکندن صلاح الدین هر
نه قدر داماد ایله قاین پدرک ارمسنى بولق ایچون ایلیملر
کوندرمش ایسه ده قلیج ارسلان بر درلو یوله کلیوب
نهایت قوجه صلاح الدین یوسف اهل صلیبه مقاومت
کبی بر خدمت مفروضه بی موقه ترک و قونیه اوزرینه
مجبوراً براردو سوق ایلشدر .

بوایکی دولت اسلامیه نک قلیج قلیجه کلری اصل
دشمن اولان اهل صلیبی ممنون ایده جکی بعض عقل
زدنده نظر دقته اندرق بر سنه قدر مخابر و مذا کره ایله
او غراش لمدقن صکره آخر کار نور الدینک معهود
چنکی قزینی تطلیق و طرد ایتسیله قلیج ارسلان و صلاح
الدینک دخی محار به دن و از چکلرینه قرار و یرلش
و شو حال عموماً باعث ممتونیت اولشدر . ایشته بو
وقعه دن قطع نظر اول نور ایسه قلیج ارسلانک ۵۸۹
سنه هجریه سنه قدر دوام ایدن مدت حکومتنده
برارهلق دانشمندیه علیهنه اتفاق ایلدیکی روم شرقی
ایمپراطورلغنه نصل شایان تحسین کورلمسون که قونیه
دولت سلجوقیه سنی کرک ملکا کرک مالیه مرتبه کالنه

ایصال ایدن شی بو ذاتک موفیتی اولوب کندیسندن
صکره اوغلی رکن الدین سلیمان شاه یالکز صلح ایله
وترقیات داخلیه خدمت اوزرنده امرار اوقاته موفق
اوله بیلشدر . اون برسنه قدر پادشاهلق ایتدکن
صکره وقوع وفاتیه یرینه اوغلی ایکنجی عزالدین قلیچ
ارسلان پادشاه اولمش ایسه ده هم غایت ایاقسز و هم ده
هیچ برکسه ده امنیت بر اقیه حق قدر حویسز و ظالم
چیقدیغندن برسنه قدر حکومتدن صکره خلع اولنده رق
هر کس عوجه سی غیاث الدین کینسروه بیعت
ایلشدر .

کینسرو حقیقه جسور و حرکات واقعه سننده
یلدیرم قدر شدید بر پرنس اولوب انطالیه و اطنه طرف
فلری یعنی قوزان طاغی جهتری اوزمانه قدر هیچ بر
طرفه تابع اولیه رق بر وحشت ایچنده ایکن اورالره
عسکر سوقیله قونیه نك حدودینی بحر سفیده قدر ایصال
ایلشدر . بو ذاتک وفاتی محاربه اوزرنده وقوعه کله
رکاکر صاغ قالسه ایدی قونیه دولتی دهاز یاده توسیع
ایده جکنه شبهه یوق ایدی .

غیاث الدینک وفاتندن صکره اعیان دولت قرنداشی

بولنان کیکاوسه بیعت ایلد کلدن ایتی قرانداشی علاء الدینه مخالفه قیام ایلش و کندیسنه برچوق طرفدارلر بولهرق بیاغی قونیه یی عاجز بر اقق درجه لورینه وارمش ایسه ده قونیه وزراسی موئی الیهک متفق لورینه مخالفت بالاخره دولتی خراب ایده جـکنی ا کلاته رق برر برر کندیسندن آرمغه موفق اولر یله انجام کار علاء الدین دخی نفسی کیکاوسه بالتسلیم یالکز قتل اولنماسی شر طیله ابدیاً محبوس قالمغه رضا کوستر مشدر .

کیکوس دخی جداً کارشناس بر پادشاه اولوب برادرینک مخالفندن طولای خلی پذیر اولمش بولنان امور دولته یکیدن نظام ویرد کدن صکره چونکه بو وقتلر روم شرقی دولتنه تابع اولان ولایتلرک دخی والیرلی « تکفور » نامیله مستقل بالاداره والیرلر اولدیغی زمانه مصادف اولدیغندن کیکاوس سینوب ولایت رومیه سنک قونیه دولت اسلامیه سنه موقعاً پک زیاده لازم اولدیغنی در پیش ایدرک سینوب تکفور رینی آوه چیقمش اولدیغنی بر زمانده اولاتوب اله پگیر . مکه ملک کنی کاملاً ضبط ایلشیدی .

هجرتک ۶۱۶ سنه سنده کیکاوسک وقوع وفاتی

اوزرینه ارکان دولت محبوس بولن ان علاءالدین
 محبوسدن چیقاروب بیعت ایلدیلر . علاءالدین دخی
 کارش ناسلقد کیکوسدن اشاغی قالدی . بردولت
 سلجوقیه نك پای تختی قونیه اولنجہ ارتق قره دکر
 و مرمره واق دکره قدر بتون اناطولی اوزرن دن روم
 شرقی ایمپراطور لغنک النی کسمک لازم کلدیکنی حکم
 ایلہ ایشہ اول بول هنوز ایمپراطور لغنہ تابع بولن ان
 کماح وارزنج ان طرفلرینی فتح واستیلادن مباشرت
 ایلدی . بو ائشاده تاتارلر جهانی تار و مار ایتیکده
 بولنسیله اناطولی اوزرینه سوق عسکره مأمور اولان
 قاتار سرداری علاءالدینہ بر فرمان و بر ایلچی کوندره رک
 جنکیریلر ناعنه اطاعت ایتسنی طلب ایلدیکده اکر
 علاءالدین تکبر و تعظم ایلہ جواب و برسه ایدی
 اناطولی دخی سائر بلادکی تاتارلرک پامال خیولی
 اوله جغنه شبهه یوق ایدی . انجق علاءالدین مهارت
 عسکریه سی قدر مهارت سیاسیه دخی مالک بر پادشاه
 اولغله در حال اطاعتی مشعر بر جواب ارسالیله بو
 بلیه دن ملکینی قور تار مشدر .

۶۵۴ سنه هجریه سنده علاءالدینک دخی وقوع

وفاتیلہ اوغلی غیاث الدین کینخسرو پادشاه اولمشیدی .
 کندیسسی کینج و طبعی خرچین اولقلہ برابر سعدالدین
 کوپک نامندہ بر کوپک اوغلی کوپکک وزارت صورتیلہ
 نصایحنہ قاپیلہ رق برارہلق پکچوق ظلمردہ بولمش
 ایسہدہ صکرہ عقلنی باشنہ الہرق مرقومی بر تیمور
 قفس درونندہ ایت کبی کبرتمشدر . بعدہ بابا اسحق
 نامندہ بر تورودی پیغمبرلک دعواسیلہ قیام ایدرک
 حقہ بازلق نوعندن بعض معرفتلیرنی هرکس جهالت
 حالری حسدیلہ معجزہ صاندیغندن باشنہ پک کلیتی
 آدم طوپلایوب اماسیہ و توقات طرفلرنده بیانی اعلان
 استقلال ایشیدی . کینخسرو درحال مرقومک
 اوزرینہ کلیتی عسکر سوقیلہ کرک اسحق و کرک
 اصحاب و تابعیننی کاملاً آصوب کبرتمشدر .

کینخسروک حال و طورى پدرینک تاتارلر ایلہ
 عقد ایلدیکی معاهدہ یه عدم رعایتنی اشراب ایتکلہ
 برالای تاتار سواریسى ارضرومہ هجوم و اہالیسنی
 قتل عام ایلدکده کینخسرو تحمل ایدہ میہرک اولانجه
 قوتیلہ تاتارلر اوزرینہ یورو مش ایسہدہ بو حرکتی بجا
 اولماشدر . زیرا تاتار عسکرینک صایبسی اولیوب

بالاخره بونلریدنده کلیاً مغلوب اولمشدر . ایشته
 قونیه دولت سلچوقیه سنک رهین انقراض اولمسنه
 بومغلوبیت ایلک سبب اولمشدر . زیرا اندن صکره
 تاتارلر توقات و قیصریه طرفلرینه دخی یورویره رک پک
 چوق ضرر ایراث ایلدکری کبی اطراف بلاد بونلرک
 شرندن قورتلق ایچون خرجکذارلقلرینی قبوله دخی
 مجبور اولمشلرایدی . هله ارمنیلر ذاتاً بویله برقارغه .
 شهلای زماننک ورودینه منتظر بونلر یله عادتاً قونیه
 دولت سلچوقیه سنی بالکلیه منقرض اولمش عدایدرک
 هیچده طایمانغه باشلادیلر .

۶۴۴ سنه هجریه سنده کینیسروک وفاتی ایشته
 بویله برقاریشق زمانه مصادف اولوب یرینه کلان
 عزالدین کیکلوس ارمنی یوزسزلرینه پک کوزل مرام
 ا کلانه بیلش ایسه ده سائر ولایتلر والیرلی دخی اطاعت
 کامله دائره سندن چیقمش اولدقلری کبی حتی نفس
 قونیه ده ارکان وو کلای دولت دخی نفاق و شقاقه دوچار
 اوله رق بعضلری عزالدینک دیکر برادرلری اولان
 رکن الدینی و بعضلری علاءالدین اسمنده دیکر برادرینی
 پادشاه ایتک داعیه سنه قیام ایتیشلرایدی .

بو مخالفت دولت سلجوقیه نك همان او آنده انقراض
 کلیسی اتمام ایده جك قدر مدھش بر حال ایدی .
 برار هلق عزالدین جلایه غلبه ایده بیلش ایسه ده بعده
 غالبیت رکن الدین طرفنه توجه ایدرک عزالدین انطالیه
 طرفلرینه قاچش ایدی . بر یاندن دخی تاتارلرک آرتمقده
 بولنان استیلارینه مقابل رکن الدین دولتی قور تارهمیه .
 جغنی اکلایه رق تاتار سرداری بولنان نوین خانه دخالت
 ایلش و بود خالتی اوزرینه تاحضور هلاکوده سورو .
 نمک درجه لرینه قدر واروب نهایت قونیه والیلکی کبی
 بر صورتده اولمق اوزره هلاک و طرفندن مأمور آقونیه یه
 کلشدر .

انجق تاتارلرک کندی حقنیده کی حایه سی بر طرف
 اولد قدن صکره رکن الدینی قونیه ده ارکان دولت
 طایماغه باشلادق لری کبی انطالیه طرفلرینه قاچان
 عزالدین دخی بر طرفدن کلیتی بر خزینه تدارکیله
 تنظیم ایلدی کی اردو بی تکرار قونیه اوزرینه سوقه
 باشلانجه تجدد ایده جك اولان محاربه داخلیه نك ذاتاً
 خراب اولان ملیکی بالکلیه تخریب ایده جکی اکلا .
 شیلهرق بتون ارکان دولت بر آره یه کلوب سیواس

نهرينك غرب طرفي عزالدینه وشرق طرفي ركن الدینه
ویرمك اوزره ایکی قرن داشك اره سنی بولمشدر .

اشبو صورت مصالحه هلا کویه دخی تصدیق
ایتدیرلسی اوزرینه هر کس راحت و حضور بولدق دیه
سو ینش ایدیسه ده براز زمان صکره روم شرقی دولتنگ
انتر یقه لری ایکی قرن داشی بتکرار بوغاز بوغازه کتورنجه
بوغو غایه ' عزالدینک سبب اولدیغی اکلاشیله رق
اوزمانلر قریمه بولن ان تاتار خانی بتون اناطولی یه
نظر اارت ایلکده اولدیغنه دن عزالدین اورایه جلب
وحبسه القا اولمش و اون سکره سنه محبوس قالدق دن
صکره وفات ایدوب قورتلشدر .

عزالدین رقابتی برطرف اولدق دن صکره باشلی
باشنه قالان ركن الدینه کلنجه : تاتارلر یدنده محکوماً
سوردیکی حکومتدن هیچ برلذت المامش اولدیغنه
شبهه اولمیوب حتی نهایت وفاتی دخی تاتارلر یدنده
مقتولاً و قوعبولشیدی .

ایشته بوهرج و مرج دولت سلجوقیه بی انقراضه
طوغری تسریع ایلدیکی کبی ركن الدین دن صکره
هنوز ایکی یچق یاشنده ایکن ۶۶۴ سنه هجریه سنده

اوغلی غیاث الدین کینخسروک مقام حکومتی کلی
 احوالک بالکلیه یمان اولسنی مؤدی اولمشدر. زیرا
 ذاتاً موری مختل و اعیانی غیر متفق اولان بویله بر دولته
 عاقل ورشید بر پادشاه کاسه بیلک انتظامات اولیده سن
 اعاده پک کوچ اوله جغی در کار ایکن بویله ایکی بچ
 یاشنده بر چو جغتک النده او یونجاق اولسون دیه و یریلان
 عصای حکومتدن هیچ بر قوته انتظار ای دیله میهرک بناء
 علیه هر ولایتک والیسی تاتار لره بدل التزام صورتیله
 و یردکاری بر از اچمه یه مقابل استقلال اغواسنه
 قیام ایلد کدن ماعدا بابا اسحقندن اورنک المش بولنان
 بر چوق یالانجی پیغمبر لر دخی اختلال مملکتی آر تدر -
 مش و بر یاندن دخی مصرده کی دولت فاطمیله اناطولی
 ایچنه طوغری سوق عسکره باشلامش ایدی .

کینخسرو بو بلیه ایچنده ایچمه بر مدت پادشاهلق
 نامیله تاتار اسارتی ایتد کدن صکره وفاتی وقوعه کهرک
 تاتار لر بونک اوغلی دیگر غیاث الدینی قونییه پادشاه
 نصب ایلدکاری حالدیه چو نکه اوزمانلر کرک والیلاک
 و کرک پادشاهلق تاتار لر دن بر بدل التزام مقابله
 صاتون النور برشی اولمغله ینه سلاچمه دن علاء الدین

کیقباد بن فرامرز دها ز یاده یاره و یر مکله غیاث الدین
 دخی عزل اولنده رق یرینه مومی الیه قونیه پادشاهی نصب
 ایدلشد. هجرتک ۶۶۹ سنه سنه قدر علاء الدین بومامو -
 ریتده قالدقدن صکره سلفی غیاث الدینک بدل التزامی
 ضم ایتسی اوزرینه عزل ایدیلوب قونیه یه غیاث الدین
 کلش وایشته قوجه دولت معظمه سلچوقیه بومنزله یه
 تنزل ایلدیکی بر زمانده هیئت عثمانیه ظهوره باشلا -
 مقله بالنسبه یک آز بر زمانده اورته لغت اشو شورشنه
 ختام و یرهرک اسایش عالمی تأمینه موفق اولمشدر .

❀ اوچنجی باب ❀

« دور استیلای عثمانیان »

عن ۱۲۹۹ الی ۱۵۷۴

تفصیل - ترک ملتی مورخین نزدنده بر اسم عمومی
 ایله یاد اولنان تاتار ملت عظیمه سنک شعبات ثلثه سندن
 اکمهم بر شعبه اولوب عن اصل آسیای وسطینک آلتای
 نام جبال جسیه متسلله سی ایچنده ساکن ایکن جیحون
 ایله ارال دکزی و روسیه نک سیریا ایالتی میاننده بولنان
 صحراده پیدر پی یایلشدر ایدی . مؤخرأمالک مذ کوره
 بوملتک اسمنه نسبتله « ترکستان » تسمیه قلمشدر .

ایرانلر قطعه مذ کوره یه « توران زمین » نامنی و یررلر .
 ترکر کندی نو عیتلری دائره سنده اوله رق برچوق
 اقوام و قبائله متقسم بوانوب کرک بونلرک یکدیگریله
 خصوصیات و محارباتی و کرک تاتار جنسینک سائر فروعی
 طرفدن کوستریلان تضییقاتی حسبیلله قبیله قبیله بر طرفه
 بالتوجه وارد قلمری یرلری استیلا ایشلردر که ترکر
 نزدنده « یاقوت » تسمیه اولنان سیر یا ایالتنه وانک
 غرب جهتهنده واقع اورال طاغری نه و دیگر جهتهدن
 ایران ممالکینه و اناتولی یه طوغری ایدیلان اقینلر
 بوصورتله وقوع بولدیخی کبی بعض فرقه لری مجار -
 ستان و المانیا ایچرولرینه قدر ایلرولشلردر .

ایمدی مؤخرأ عثمانلی نام مالینسی احراز ایش
 اولان فرقه ترکیه ایشته عن اصل بوقوم عظیمدن اولوب
 شوقدر که عثمانلیر ترکارک الک صکره اناتولی طرفلرینه
 یکمیش اولان فرقه سیدر . زیرا انلردن اول برطاقم
 اقوام ترکیه و باخصوص فرقه سلجوقیه آسیای
 وسطیدن برو طرفلره یا یله رق عراق و سوریه و اناتو -
 لی بی و ایرانک دخی بر پیوک قسمنی کاملاً تحت استیلا یه
 المشرایدی .

اصل خاندان شوکت عنوان عثمانی خراسان
 طرفلر ينك المعتبر خاندانندن اولان « قايي » فاملياسنه
 منسوب اولوب بونلردن قيا الي اسمنده بر ذات نزد
 مورخينده قطعياً معروف واندن اولكي پرنسler بر درجه يه
 قدر مشكوك ددرلر . قيا اليك اوغلي سليمان شاه كندى
 قومك مقام حكومت پدرانده سنه كلديكى زمان جنكيز
 خانك خوارزم دولتي ز يروز بر ايدر ك بتون جهاني
 استيلايه باشلاديغي وقتده مصادف اولمسيكه وقرال
 جنكيزك انكيوك خصوصتى ايسه بالخاصه تركر عليهنه
 واقع بولمسيكه اقوام وعشاير اتر اكدن هر برى بر
 طرفه چكيلوب كتمد كاري كبي سليمان شاه دخي كندى
 معيتمده كى خلق ايله « ماهان » نام يوردندن قالمش
 وارمنستانه طوغرى كلش ايدى .

بوزات غايت نجيب وعالى جناب اولوب هيچ
 بر كيمسه يي اينجتمك شانندن اولمامسيكه ارزنجان
 واخلاط طرفلرينه مواسستله ينى سنه قدر زمان سرور
 ايلديكى حالده شيخ بر طرفه سارتمد يلقى ايتيه رك
 صحيفه تاريخنى پاك و باض محافظه انلشدر .
 جنكيزك وفاتندن صكره تكرار مملكتنه عودت

ایچون جبر قلعہ سی یانندن نہر فراتی قبیلہ سیلہ برابر
 حرور ایدر ایکن اتندن نہرہ دوشہ رک سلیمان شاه غریق
 رجت اولدقدہ قبیلہ سنہ دخی بر پریشانلق ککش ایدی •
 مشار الیہک سونقور تکین وکون طوغدی و دوندار
 وار طغرل نام درت نقر اولادی بولنوب قبیلہ خلغنندن
 برر مقداری بولنردن هر برینه تبعیت کوسه ترد کلرندن
 سونقور تکین ایلہ کون طوغدی کندیلرینه تابع اولان
 برر مقدار خلق ایلہ ینه ترکستانہ دونمشلر و دوندار
 ایلہ ارطغرلک معیتندہ یالکیز درت یوز قدر چادر خلق
 قالوب ارضرومده سورمہ لی حقوره کلشلر ایدی •
 بعض مورخلر ترکستانہ عودت ایلیمان خلقلک
 دخی موخرأ عثمانلیلرک قوت وشوکت پیدا ایتسی اوزر-
 ینه بتکرار برو طرفہ کلدکلرینی فقط عثمانلیلردن
 روی قبول کورمدکلری جهتله اناطولی وسوریہ طر-
 فلرینه یاییلہ رق بورالرده شمیدی کورلمکده بولنان کو-
 چبه ناک حالنه کیر دکلرینی یازارلر ایسه ده بوروایت
 صحیح اولہ میوب شمیدی کوریلان اویماقلرک ینه عثما-
 نلیلغہ مناسبتی اولان اقوام ترکیه دن اولدقلری کیند-
 یلر نبرد منفردت برزوایتدن اکلاشلماقہ برابر هر حالده

مؤخرأً کوچیه لشمش عثمانلی او یماقلری اولسی ظننده
اغلب مورخین متفقدرلر .

دونداروارطغرل طاقی سورمه لی چقور طر-
فلرنده کندیلرینی بارندیره میه جقلرینی کورنجه بوراده
دخی جماعت میانه برتفرقه عارض اولدی . ارطغرل
بك قونیه یه کیدوب سلچوقیه دولتندن کندی قبيله-
سی ایچون بریورد طلب ایتک قرارنده اولوب دوندار
ورؤسای سائر ايسه بو قراری بکنیه رك نهر فرائك
منبعی اولان باسن اووایی طرفلرینه کیتشلر ایدی .
انجق براز صکره تکمیل جماعت اوراده بالا جماع
دولت سلچوقیه دن استمداد قرارنده اتفاق ایتلریله
قونیه یه کاسورلر ایکن اثنای راهده یکدیگریله جنك
ایدر ایکی فرقه عسکر کوردیلرکه برفرقه سی آزلق
وبنا علیه مغلوبیت حالنده بولنوب مروت مردانه
حسیله برفرقه مغلوبه یه معاونتی ترجیح ایلدیلر .
ایکی فرقه لردن هانکیسی هانکی طرفه منسوب اولد
یعنی بیلدکاری حالده طرف مغلوبی ترجیحلری حقیقه
مردلک شاننه موافق اولوب حالبوکه بالتصادف معا
ونت ایلدکاری فرقه نك سلچوقیه پادشاهی سلطان

علاءالدین عسکری و دیگر فرقه نك دخی آل سلجوقی
تحت تحکمه آلان تاتارلر اولدیغی تبین ایلدکده بومعا.
ونت مقصد و مصلحتہ دخی توافق ایلدی. زیراسلطان
علاءالدین ارطغرل بکک اشبو معاونتنه مکافاة طومانج
وارمنی طاغیرینی یایلاق و سکود ناحیه سنی دخی
قشلاق اولق اوزره بالتعین جماعت مرقومه بی پرو.
سه طرفلرنده یرلشدیردی.

سلطان علاءالدینک بوجاعته بروسه طرفلرنده
یرو یرمکدن اصل مقصدی بویله جنکجی وجسور
برقومه حدود شمالیه سنی بککدیرمک قضیه سی اولدیغنه
شبهه ایدیلهمز. زیرادولت سلجوقیه تاتارلر النده
زبون اولدیغندن روم شرقی ایمپراطورلغی دخی بو حال
عجزاشمالدن بالاستفاده قونیه دولتنی لاینقطع تعجیر.
ایتمکده ایدی.

ارطغرل بکک بروسه طرفلرنه بوضورتله یرلشد.
یرلمسی یدننجی عصر هجری نك اواسطندنه وقوعه
کیشدر. روملر سکود ناحیه سنه بویله برجسور قو.
مک اقامه سندن مقصدنه اولدیغنی اکلایه رق کندیلرینی
بالتعجیر اورادن پوشکورتمک قیامله قره جه حصار

و بیله جك تكفورلری اتفاق و هجوملره دخی سار -
 عت ایلدیلر ایسه ده ارطغرل بك بونلرك حقندن كلد -
 یكى كبی براز صكره دو ملرایله تاتارلردن هر كب اوله -
 رق علاءالدین عسكری اوزرینه شجوع ایدن بر فرقه
 دشمنی دخی بروسه ایلله یكیشهر اراسنده كائن صحرا ده
 تارومار ایلدیكندن بو خدمت و موقیت دخی علاءالدینی
 منتدار ایلیرك اسكیشهر ك ناعنی « سلطان اوکی »
 نامه بالتحویل سراجیق ناحیه سیله برابر مالكانه
 اوله رق ارطغرل بكه هدیه و تمليك ایلدی .

بومو فیتلر عشیرت ترکیه یی اطراف و جوار
 اهالیسی نزدنده غایت مهم کوسه تروب اندن صكره
 دخی مصادمات و موقیات متابعه اهمیت مذ کوره یی
 ارتدیر دچه آرتدیر شد .

سكود قصبه سنده ارطغرل بكك اوج اوغلی
 دنیایه كلدی كه الشیهو کی نام نامیسی کمال افتخار ایلله
 عنوان ملی اتخاذا یتش اولدیغمز * عثمان * بك و دیگر
 لری کوندوز الپ ایلله صارو یاتی صاو یچی بکلردر
 ارتق ارطغرل بك ضعف و عجز پیرییه دوچار اولغله
 قبیله سنه حکمرانلق وظیفه سی عثمان بكه احاله ایلدی .

میر عثمانک قونیه دولت سلجوقیه سنی انقراض کلیدن
 برازدها تاخیره کافی بیوک بیرک خدمتلی کورلمشدر .
 بو یولده کی محارباتک ائمهی ارمنی در بندنده رو -
 ملرک قورمش اولدقلى بر پوصویه فرقه عثمانیه نك
 اوغرامسيله صارو یاتی صاو ییجی بکک اوغلی بای
 خواجه نك شهادتنه منجر اولان وقعه در . بو وقعه ده ،
 فرقه عثمانیه پک بیوک برزجت حکمش ایدی . فقط
 انی متعاقب ارمنی طاغی اتکننده واقع قولاجه قصبه سی
 قتم اولمغله محاربه نك نتیجه منفعتی ینه عثمانلیلر ده
 قالمش اولدی . بو وقعه ۶۸۴ سنه هجریه سننده وقعه
 کلدرک ۶۸۷ سنه هجریه سننده دخی انزالوقه محافظ
 قره جه حصار تکفوری ایله بالاتفاق عثمانلیلر اوزرینه
 هجروم ایلدکده کرچه صارو یاتی صاو ییجی بکک
 شهادتی پک بیوک ضایعاتدن معدود اولدی ایسه ده
 غلبه تامه عثمانلیلر طرفند تالوب سلب پاك عثمان غاز -
 یدن حضرت اورخانک ولادتیه ده بوسنده مصادف
 اولسيله شو حال موجب تسلیت اولدی .

۶۸۸ سنه هجریه سننده ارطغرل بک وفات ایتکله
 علاءالدین سلجوقی یالکز بوندن طولای عثمان بکی

تسلیمیت و تعزیت ایچون دکل بلیکه خدمات قهرما -
 نانه سنه بر مکافاة لایقه اولق ایچون میر عثمانه علامت
 استقلال اوله رق طبل و علم ارسالیله امارت مستقله
 عنوانی توجیه ایلدی . فقط بواسطه استقلال عثمانلیلرک استقلال
 تامی عد اولنه من . حضرت عثمان دولت سلجوقیه یی
 کندیسنه ولی نعمت بیله رک اول قدر حرمت و رعایتده
 بولنور ایدی که سلطان علاءالدینک کوندر دیک طبل
 نوبت سلطانی صورتنده چالند قجه بو علامت دولت
 سلجوقیه نک علامت شان و شوکتی اولق اوزره تلقی
 اولنه رق اول غازی قردان کمال تعظیم و تکریم ایله
 ایاغه قالقار ایدی . حتی نوبت مهتر خانه سی چالند قجه
 بالذات پادشاهلرک دولت سلجوقیه یه حرمة قیاملری
 فاتح زمانه قدر دوام ایلمش اولدیغی مرویدر . بناء علیه
 میر عثمان دولت سلجوقیه بالکلیه منقرض اولنجیه قدر
 بر حس تقدیس نعمتله کندی امارتی مستقل عدا یموب
 دولت سلجوقیه نک بر سرداری اولق شرفیله افتخار ایدر
 ایدی .

انجق (۶۹۹) سنه مسعوده سنده دولت سلجوق -

قیه بالکلیه محو و منقرض اولنجیه بودولتک منقسم اولد -

یعنی قره‌سی و صارو خان و آیدین و منشاشا و تکه و حید
 و قره‌مان و کرمان و قسطنطنیه و ولایت‌ری اعلان استقلال
 ایلدک‌ری کبی عثمان‌غازی حضرت‌تری دخی ذات‌اطیل و علم
 علامت استقلال‌لیله ممتاز بولنان کندی ولایتی داخلنده
 اعلان استقلال ایتشد.

ایشته ملتزک تخم اساسی ارطغرل‌بک طرفندن
 زمین و مته زرع اولنه‌رق بونک ثمره برکزیده‌سی
 بولنان استقلال تام دخی میر عثمان‌غازی نیک‌همت مشکوره
 سیمیه اقتطاف ایدیلرک اشبو ۶۹۹ سنه جلیله‌سندن
 صکره دولت‌علیه عثمانیه تماماً مستقل بر دولت‌عد
 اولمغله منشاشا عثمانیان بوفصله ختام و یردرل‌اشبو
 او چنجی بابزک ایکنجی فصلنی کشاد ایلک لازم
 کلشدر.

(ایکنجی فصل)

- ابتدای استقلالدن بلیه تیموره قدر -

عن ۱۲۹۹ الی ۱۲۴۲

تفصیل - عثمان‌غازی حضرت‌تری عقیب استقلال
 لده اول‌باول اصلاحات اساسیه دن اولمق اوزره ملکنی
 سنجاق‌له تقسیم ایلیرک هر سنجاغنه بررقاضی و یرر

قوماندان نصب ایتشدر • بوصورتله وقوعه کلان
 سنجاقلر مخدوم نجابت موسوملری اورخان بکه توجیه
 اولنان قرهجه حصار و کوندوز الیه توجیه اولنان
 اسکیشهر و آیغود الیه توجیه اولنان این اوکی و طور •
 غودالیه توجیه اولنان آینه کول سنجاقلریدر • بو
 سنجاقلرده کی قوماندانلر یالکز عسکری قوماندانلغی
 وظیفه سیله موظف اولوب بر زمانه پرو سلچوقیه
 والیرنده کورلش اولدیغی وجهله احقاق حق مثالو
 رجال شرعیه عالمبولنان مواده اصلا قارشمز لرایدی که
 عثمانلیلرک تأسس و تحکیمه الزیاده یاردم ایدن حال
 دخی بو اولمشدر • زیرا بر ولایت والیسی احقاق حق
 دخی مأذون اولور ایسه امراض بشریه نفسانیه سی
 قانون مقامنه قائم اوله رق بیچارکان اهالی حقارنده هر
 درلو ظلم و تعدی وقوعه کله یلور • قانون عدالت
 اولان شریعت غرا ایسه بو او یغونسزلقره میدان
 ویرمیه جکندن امنیت عامه دخی انکله حصول بولور •
 ممالک عثمانیه ده بو حکمت در حال و فعلا کندیسی
 اورته یه قویمشدر • زیرا سائر بلاد ترکیه ده جور
 وجفا مرعی الاجرا ایکن ممالک عثمانیه ده کی عدالت

وامنیت عمومیہ حسیبلہ اہالی متجاورہ پیدرپی جناح
عثمانیہ صغنےہ کیشلردر .

غازی عثمان حضر تلرینک ینہ اصلاحات ملکیہ سی
جمله سندن اولمق اوزره مقر حکومت مجدداً تعمیر و بنا
اولنان یکیشهره نقل اولنوب بعده فتح بلادہ تشمیر ساق
اهتمام ایدلش و کویری حصاری و دمسوز و قیون
حصاری و مرمره کبی یرلر فتح ایله حدود مملکت توسیع
قلمشدر .

حکومت عثمانیہ نک اشبو تأسسی روم شرقی یی
لر زناک ایدرک کویا ترقیات عثمانیہ یی منع ایچون سوق
ایدیلان اردو ۷۰۱ سنہ ہجریہ سنده قیون حصاری
طرفلرندہ پریشان ایدلمسیلہ بو غلبہ عثمان غازی حضر-
تلرینک نظرینی سقاریا نہری بوینہ تحویل ایلشدر .
سقاریا نہری بر طرفدن قسطنطنیہ اعلان استقلال
ایلیان علی امور بکک و بر طرفدن عثمانلی حکومتک
ودیکر طرفدن دخی شرق ایمپراطور لغنک فصل مشترک
حدودی اولوب حالہ و کہ استانبول ایمپراطور لغی
وقتیله بونہر بوینہ بلوقحاو زلر انشاسیلہ اسباب مدا-
فعہ یی اکمال ایلش ایکن صکرہ لری بونلر دہ بولنان

عساکرک زعامت صورتیله مخصوص اولان وارداتی
 کسبیلکله برابر نهر دخی مجراسنی بالتبدیل بلوقحاو زلر
 ممکن الضبط برحاله کلد کلرندن اگرچه علی امور بک
 اول طاورانوب اورالری ضبط ایتیکه قالقشمش ایسه ده
 عثمان غازی حضر تلی ده اول طاورانهرق قلاع
 مذ کوره یی باشدن باشه ضبط ایلش وشوقدر که بو
 فتوحات کوندوز الپک اوغلی آی طوغدی بکک شهادتی
 بهائنه قزانمشدر .

ازنیق قصبه سی بر ارهلق صلیبیلرک استانبولی
 ضبطلری اوزرینه شرق ایمپراطور لغنه پای تخت اولش
 بریر اولدیغی کبی اوزمانه کوره موقعجه اهمیت حریره
 سی دخی فوق العاده کورلدیکندن عثمان غازی
 حضر تلی بوراسنی ده ضبطه لزوم کوردی ایسه ده
 قولایقله ضبط اولنور لرلر دن اولدیغی جهتله اطرافنه
 قلعه لرا نشا اولنهرق محاصره دائمه التنه انمشدر .
 مؤخرأ بو محاصره دائمه اصولی بروسه شهرینه دخی
 تطبیق قلمشدر .

۷۰۷ سنه هجریه سنده مادنوس واورانوس
 وکستیل وکتهروم تکفورلری عثمانلیلر علیهنه بالاتفاق

شدتلی بر هجوم کوستردیلر • بومحاربه دخی قیون حصا-
ری پیشگاهنده وقوعه گلش ایدی • بش ساعت محار-
به دن صکره غالبیت طرف عثمانیانه قالمغله حین تعقیبه
کستل تکفوری قتل اولندیغی کی تکه تکه تکفوری دخی
بالاخذ صلب ایله ملکری ضبط اولندی •

استانبول ایمپراطورلغی یکی توره یان شو عثمانیلره
مرام ا کلاته میه جغنی ا کلایه رق اوزمان تاتار خانلر-
ینک الک معظمی بولنان خدا بنده خانه کندی همشیره سی
مار یایی بالتقدیم خدا بنده طرفندن میر عثمانه تهدید آمیر •
بر مکتوب یازدیر مش ایسه ده غازی عثمان بو تهدید لره قارشو
پاپوش براقیه جغنی کوسترمک ایچون برفرقه عسکر
ایله تاستانبول جوارنده واقع استاوروز قریه سنی
اورمش و اورادن قره د کزه قدر یرلری چکنیوب قوجه
حصار بلبلیحی نسکه آق حصار بکجه و کیوه قلعه
وقصبه لرندن بعضیلرینی هجوم و بعضیلرینی استیمان
ایله ضبط و ملکنه الحاق ایشدر •

بیله جک تکفوری ایکن قبول اسلام ایله نزد عثمانیا-
نده ال بیوک بر سردار اولان کوسه میخال بکک شرف
اسلامی ۷۱۲ سنه هجریه سنده وقوعه کلوب مومی الیه

دلالتیله تکفور بکاری واونده ونفجه حصار و قره جه
حصار ضبط اولند قتری کبی بوصرده کرمیان حدو -
دندن چاودار اوغلی اسمنده بر تاتار سرداری عسا کر
کلیه ایله شدتلی بر هجوم کوستر دکده میر اورخان بعض
سردار ایله بر لکده در حال مقاومتنه قوشوب تاتاری
تاروما را یلد کدن ماعدا چاودار اوغلی زنجیر بند
اوله رق پدر ینک حضور ینه کتور مش ایدی .
حضرت اورخانک شو یرار لغی عموم سردار لری ممنون
ایلدی . زیرا غازی عثمان آرتق ضعف پیری یه دوجار
اولد یغندن دولت جدیدہ عثمانیه ایچون بویله برخیر -
الخاغه نائل اولمق حقیقه جلہ بی امیدوار ایلیه جگ بر
کیفیت ایدی . بناء علیہ بعد ما سر عسکر لک خدمتی میر
اورخانہ حواله اولنوب عثمان غازی حضرت لری
اسکیشهرده فرش بساط استراحت بیوردیلر .
کنج اورخان بو توجیه وجیهک شوقیله عبد -
الرحمن غازی واقچه قوچه کبی قهرمان سردار لری
معیتنه الهرق سقاریا ایله قره دکز اره سنده کی ممالک
الدیروب قره چیش و آیا صوی والپ صوفی ناحیه -
لرینی ضبط ایلدی .

عثمانلیرك كندكجه ارتان نام و شانلری حسدیه
 اناطولینك ایچرولرینه طوغری ممالکده بولنان ترکلر.
 دن برچوق کنجلر تفیض امیدیه خدمت عثمانیه
 جان اهرق بناء علیه پکارلرک مقداری جو غالمش ایدی.
 بو کنجلری تزویج ایله تکثیر تناسله دخی خدمت ایچون
 اوارهلق ضبط اولنان بعض محللرک نصرانی نسوانی
 بولره تزویج اولمشدرکه بو محللر دخی طوز پازاری
 و قره تکیه و کیلیکی و قیوجق و کرسته حی کبی برلدر.
 ۷۱۷ سنه هجریه سنده تحت محاصره یه النان
 بروسه شهری اون سنه قدر تضییق ایدلد کدن صکره
 جله سردارلردن مرتب بر دیوان حر بک قرار یه عمومی
 بر هجوم اولنهرق غزاة عثمانیان پکار باشی نام محله قدر
 یورویه بیلشرایدی. واقعا شو هجوم ایله بروسه نك
 ضبطی ممکن اوله مدی ایسه ده اهالی دخی ایکنجی بر
 هجومه مقاومت ممکن اوله میه جغنی ا کلایه رق او توز
 بیک التون فدیة مقابلنده چیقماق و قالمق ایستیانلرک
 ماللرینه و جانلرینه تعرض اولنماق شرطیه عرض
 تسلیمیت ایتدیلر. بوفتح عظیم ۷۲۶ سنه سنده عیسی
 اولوب عثمان غازی حضرتلری ایسه اثنای فتحده

واصل رحمت رحان اولغله نعلش مغفرت نقشی یکی
فتح اولنان بروسه ده مناسرت کنبیدی نام قبه التنه دفن
اولمشدر .

جناب عثمان غازی قهرمانجه شان وشو کته غایتله
حریص ومال و پاره خصوصنده غایت طوق کوزلو
وهرسوزی سند اتخاذا اولنه حق قدر طوغری و صاغلم
برارسلان ایدی .

غازی اورخان حضرتلری پدر عالیترینک وفاتنی
متعاقب ملک موروثی قرنداشی علاءالدین پاشایله تقسیم
ایتمک ایستمش ایسه ده حضرت علاءالدین غایت عاقل
و حکیم برذات اولوب بویله تقسیمه قونیلان ملکک
بالاخره پریشان اولدیغنی قرنداشنه بالاخطار خصوص -
صات عسکر یه یه اورخان غازی نک وامور ملک یه
دخی وزارت صفتیله کندیسنک باقسی ترقیات سر یعه
عظیمه یی تأمین ایلیه جکنی اخطار ایلدی . بوا یسه بتون
سردارلری ممنون و منتدار ایتمکله اکا کوره حرکت
قرار و یرلدی .

ایلك سنه جلوسده پای تخت بروسه یه نقل ایدیلوب
ایرتسی سنه سردارلر ازمید کور فزی وبوسفور وقره

دکز ایله محاط اولان شبه جزیره صالح دیرل دیر .
 قوکرالپ سقاریانهری ساحل لری ایله آق یازی و آق اووه
 و مؤخرأ کندی اسمنه تسمیه اولنان قوکرپه طرفلرینی
 جولانله روم شرقی النده قالان یرلری ضبط و اچقه قوجه
 دخی ارمنی یازاری و قاندیری فتح ایلیه رک بعده ایکیمی
 برلشوب ایدوس و صماندره اوزرینه یورودیلر که شو
 حالد عثمانلی قلیچلری استانبول اوزرینه طوغری لمعه
 پاش اولمش ایدی . حالوکه ایمپراطورلق دخی اولانجه
 قوتنی بوایکی محله یغمه ایراث مشکلات ایلدی . نهایت
 صماندره محافظنک اوغلی وفات ایلیه رک جنازه لای
 قلعه دن چیقار ایکن عثمانلیلر بونی فرصت اتخا ذیله شمشک
 کبی باله هجوم قلعه بی الدیلر . ایدوس ده دخی محافظنک
 قزی غازی عبدالرحمنه عاشق اولدیغدن قلعه نک سهولت
 ضبطنی بالارائه اوده و صورتله اله چکورلشدر .

۷۲۸ سنه هجری سنه قره مرسل غازی ازمد

کور فزی ساحلنده بولنه رق کندی اسمیه یاد اولنان
 یرلری فتح ایتکه او سو احک محافظه سی ده کندینه
 حواله ایدلش و بو خدمت ایچون ینه قره مرسل دینیلور
 قایقلا ايجاد اولنه رق بناء علیه عثمانلیلقد هاک اول بحریه

ناظری عنوانه کسب لیاقت ایلشدیر .

اشبو فتوحات جلیله نك اهمیتی منکر دکل ایسه ده

حکمت تاریخیه جه اصل اهمیت ویریه جك شی ۷۲۹

سنه هجریه سنده وضع اولنان قوانین اساسیه عثمانیه در .

بوقانونلر غازی اورخان وعلاءالدین پاشا ایله ینه اقریای

آل عثماندن ومشاهیر علمادن قره خلیل وسائر عقلا

وسرداران ایله بالمشاوره وضع وتأسيس قلمشدر .

قوانین مذ کوره دن بریسی مسکوکات متداوله نك نام

نامی عثمانی به ضرب اولتمسینه وایکنجیسی کسوه

وقیافت عثمانیه وه اوچنجیسی تنسیقات عسکریه به

داردر . کسوه وقیافت عثمانیه خصوصنده یالکز

باشه کیلان شیلره اهمیت ویریلوب اوزمان اطرافی

صرمه لی فس کیمکده بولنان روملر ایله قرمز یچکده دن

معمول کلاه کیان اترک سائرده دن عثمانیلری تفریق

ایچون تبعه عثمانیه وبالخاصه عسکر طاقی بیاض کچکده دن

معمول کلاه ایله ممتاز قلندیلر . اثنای محاربه دهر کسک

بو کلاهده دن کیمی مجبوری اولوب وقت صلحه ده

مجبوریت مذ کوره یالکز عسکر ایله برده خدمت

مخصوصه پادشاهیده بولنانلره منحصر ایدی . ایام

معدوده ده شهزاده لر ایله بیولک سردار لر بو کلاه اوزرینه
آخابانیدن صاریق صارار ویا لکز حضرت پادشاه
قرمزی رنگده صاریق استعمال ایدر ایدی .

بعض اورو پامورخلری ال اول موظف و منتظم عسکر
ایجادینی فرانسه قرالی برنجی شارله اسناد ایدرلو
ایسه ده شارلدن یوز سنه قدر اقدم بونی عثمانلیلر ایجاد
ایشدرلر . اوزمانه قدر عسکر دینی لان شی بر طاقم
کوکلی آقچیلردن عبارت اولوب دائماً سلاح التند
بولنزلر ایدی . قانون جدید ایجابجه تشکیل اولسان
یکی عسکر هر اون نفره بر اونباشی و هر اون طاقه
بر بوز باشی و هر اون بلوکه دخی بر بیکباشی نصیبی
صورتیله وجوده کتورلدی که بو بیکباشی ال بیون
قوماندان اولوب میرالایلق صورتیله اجرای احکام
ایلر ایدی . نظامات ایسه اول قدر شدتلی وضع اولندی که
بیک نفر عسکر مستقلاً میرالایک اختیار و قومانده سنه
تابع اولوب هیچ بر کیمسه ایچون اطاعت سزلاک ممکن
دکل ایدی . عساکر مذکوریه الیوم مجیدیله ایچه
حسابیله التمش پاره دن زیاده بر قیمت کسن ایچه لردن
یومی برر ایچه معاش تعیین اولندی . اوزمان ایسه

بو معاش پک مستوفی کورلدیکنندن ال بنام قهرمانر
 بو صنفه یازلمشدر ایدی . حالبوکه معاشک بودرجه لرده
 چوققلغی و افرادک بویله بفربری برر ضابط اولمغه
 لیاقتی مؤخرأً محل انتظام کورلدیکنندن قوانین جدیده
 ایله تعدیلات دخی اجرا ایدلمشدر .

پیاده دن ماعدا عذب عسکری نامایله بر صنف عسکر
 دها تشکیل ایدیلوب کو پریجیلک و استحکام جمیل خلقده
 متنده قولانلمشدر . سواری یه کنبجه بر صنفی منتظم
 و دیگر صنفی غیر منتظم اوله رق ایکی صنف سواری
 تشکیل اولنوب منتظم سواری التیشریوز موجودلی
 اولمق اوزره درت آلائی اوزرینه ترتیب اولندی و بو
 الایلرک برنجیسنه سپاهی ایکنجیسنه سلحدار اوچنجیسنه
 علوفه جی و دردنجیسنه دخی غربا ناملری ویرلدی .
 غیر منتظم سواری یه میمک ضمی سینک فتحی لامک
 فتحه مشده سی ایله « مسلمان » فرقه سی دینیلوب بونلر
 ویرکو و سائر دن معاف ایدیلر . مؤخرأً بونلره آقجی
 دینلدی که اعلان حرب اولندیغی زمان دشمن ممالکنه
 پراکنده و پریشان بر صورتله ال اول بونلر یایله رق
 هر جومرجه قویولورلر ایدی .

استبوتسیقات جدیدہ اوزرینہ ترتیب اولنان عسکر
ایله ۷۳۱ سنهٴ ہجریہ سمنده وقوعه کلان مالتپہ محامہ
ربہ سی او عصرک الہ مهم محار باتندن معدوددر
شرق ایمپراطور لغی استانبول وادر نہ جوار لری ایله
سار کافہٴ ممالکندن تدارک ایدہ بیلدیکی اون بش بیک
عسکری مالتپہ جوارینہ جمع و تحشید ایتمش و ایمپراطور
اندرو نیکوس دخی بالذات اورایہ کلش ایدی . اورخان
غازینک دخی سکر بیک عسکری بولنہ رق فقط بویله
انصف نسبتندہ بر قوتله غلبہ ایدہ بیک انجق بر خدعهٴ
حر بیہ و وابستہ اولندیغندن درت بیک عسکری مالتپہ
بایر لرینک کیر و سنہ کیرلمش و دیگر درت بیک ایله هجوم
کوسترمش ایدی . بوکا مقابل دشمنک اولانجه قوتنی
غوغا میراننہ تعبیه ایلدیکنی کورنجه بوخطا کنندی
غلبہ سنی تأمین ایلیمہ جکنی حکم ایله اورخان غازی
منسون اولدی . اورخان غازی برارہلق بیک نفر دن
عبارت بر طابورہ هجوم قوماندہ سی ویر مسیلہ آندرو
نیکوس بو هجومی تکمیل قوتیلہ دفعہ قالشنجہ شو
تدبیر سزلک عثمانلیرک امیدینی بتون بتون ارتدیرمش
ایدی . جنک اوزانوب ایکی طرف دخی کمالیہ یورو .

لدقین صکره عثمانلیلر بر جعلی فرار کو ستر دیلر . بو حر کتله
 دشمنی بایلر ار قه سنده کی تازه عسکرک مواجهده سنده
 کتوروب ایشته بو عسکرک ییلدیرم کبی بر هجومی تأمین
 غالبیته کفایت ایلدی . دشمن چادرلرینی قالدیرمغه بیله
 موفق اوله میهرق بوزولدی . ایمدی ازنیق موقع متینک
 فتحی دخی بو غلبه نتیجه سنده میسر اولدی . بو غالبیت
 قلوب عثمانیانه نه قدر فرح و یردی ایسه اوارهلق
 خلول اجلیله علاءالدین پاشانک وفاتی دخی اودرجه .
 لرده موجب محزونیت اولدی وعلاءالدین بدن صکره
 خدمت وزارت ازنیق والیلکنک دخی انضمامیله شهزاده
 سلیمان پاشایه توجیه اولندی .

شهزاده سلیمان پاشا ایلاک مأموریتی سنده سی اولان
 ۷۳۲ سنه هجریه سنده طراقلی و کونینک قصبه لر یله
 مودرنینک شمال طرفلرینی اله کچورمکله استانبول
 ایمپراطورلغی عثمانلیله قارشو معانده و مکابره بی بالکایه
 موجب اضمحلالی کوره رک ۷۳۳ سنه سنده حضرت
 اورخانه صلح و اتفاق تسکلیف ایلش وهنوز یقینه
 وقوعبولان محاربات و فتوحات جسمیه بی هضم ایله برابر
 اصلاحات و انتظامات داخلیه یه صرف همت ایچون

صلحہ طرف عثمانیاندہ دخی لزوم کور لنگہ عقد مصالحہ
 قلمشدر • یکر می سنہ قدر دوام ایدن بو صلحی ابتداءلرده
 قره سی امارتی ایچون امیرزاده لری بولن ان طور سون
 بک ایله دیکر برادری اره سنده وقوعبولان منازعه یه
 اورخان غازینک بالطبع اشتراکی بر درجه یه قدر اخلال
 ایلش ایدی • شو یله که : طور سون بک در شو کتمقر
 عثمانیاندہ تربیه کورمک ایچون و قتیله پدیری طرفندن
 کوندلرش بر ذات اولوب پدیرینک وفاتندن صکره ملک
 پدیره وارث اولق ایچون قره سی یه کتد کده دیکر قرداشی
 بو بیچاره بی اعدام یتمکه غازی اورخان واروب قاتل
 مر قومی اخذ و بروسه یه نفی ایله قره سی اهل لیسینک
 وقوعبولان استدعاسی اوزرینه اول ممالکی دخی ممالک
 عثمانیه یه الحاق و حاجی ایل بکی ایله اورنوس و آجه بکری
 اورالک اداره ملکیه و عسکریه سنه مأمور ایلشدر •

یکر می سنه قدر مدت قلیجه ال صونلیدیغی حالده
 استانبول خاندان ایمپراطور یسنجه وقوعبولان بر مناز -
 عه نک کوستردیکی فرصت اوزرینه شهزاده سلیمان پاشا
 روم ایلی طرفنه تجاوز ایچون مأمور اولوب فاضل و اور -
 نوس و حاجی ایل بکی دخی معیت شهزاده ده بولند قلمری

حالد قیوطاغی شه جزیره منمن صالتر ترتیب اولنه رق
 ۷۵۸ سنده سنده قورشو به چکلمش و اوله کلیبولی
 قلعه سی فتح اولن برق بعده ادرنه و غلبه طرفلینه
 طوغری آقینلر دخی ایدلمشدر . بو فتوحات روم
 ایمراطور لغنی زیاده سیه دلگیر ایدرک بر مقدار تضمینات
 حربیه مقابلنده عثمانلیلرک کلیبولیدن چکلمسنی استدعا یه
 باشلامش ایسه ده قبول اولنیه رق کلیبولی و بولایر
 و خیره بولی و معلقه و ایصالحه و تکفوره طاغی کاملاً فتح
 اولنوب اورالرده اسباب تمکن و تقرر استکمال
 قلمشدر .

۷۶۰ سنه شجریه سنده سلیمان پاشا قضاء آدن دوشهرک
 وفات اتمکله بتون عثمانلیلر دخن اولوب حتی پدر عالی
 کهرلری سلطان اورخان دخی فرطاً سغندن بر سنه صکره
 وفات ایلشدر . سلطان اورخان غایت عاقل و حکیم
 و مرجتلی و حلیم بر پادشاه جسور اولدیغی کبی سلیمان
 پاشا دخی اشبو او صاف پدره تمامیه مالک اولمغه یکد .
 یکرینی تعقیب ایلیمان بو ایکی ضایعات عثمانلیلره قان
 آغلا تمشدر .

سلیمان پاشانک باشلامش اولدیغی روم ایلی فتوحاتی

شہزادہ لکھری زماندن برو مراد خداوند کار حاضر تلو۔
 ینک الہ زیادہ بکنوب تحسین ایتدیکی برشی اولمغله اودخی
 بوفتوحاتی ایلرویه کتورمک املنده ایکن قره مان امارتی
 سائر ترک امارتو ینک الک مہمی و عثمانلیلرک دخی الک بیوک
 رقبی اولدیغندن ترقیات عثمانیہ بی منع ایچون انقره
 حوالیسینده « اخی » دیه یاد اولنان اصحاب املاکی
 عثمانلیلر علیهنه قشقر تمقله غازی خداوند کار اول باول
 یعنی جلو سی سنه سنده یکرمی بش ینک کشیلک برارد وایله
 کیدوب اخیلری تأدیب و انقره و جوارینی ضبط ایلش
 ایدی .

بعده ۷۶۳ سنه سنده سردار لری طرف طرف روم
 ایللی یه صال دیروب ذات شاهانہ لری چورلی و مزہلی
 ولولہ برغوس طرفلر ینہ بالتوجه او چ قول اردوی
 دیمتوقہ ده برلشدیردی و اوچی بردن ادر نہ اوزر ینہ
 حرکت ایلدی .

بایتخت ثانی عثمانی اولان ادر نہ شہری یالکز بر محاربہ
 ایلہ فتح اولنوب دلاوران عثمانیان اسکی و یکی زغرہ
 وقلبہ و اہتمان و صماقو طرفلر ینہ طوغری خطوات
 استیلایی آتدق لری کبی اورنوس بک قوماندہ سنده

بولنان قول اردو دخی سلانیکه قدر اطراف چالقادی .
عثمانلیلرک اورو پاقطعه سنجه بوقتو حات سر یعه .
سی عالم نصرانیتک چشم دهشتنی آچهرق پاپاشنجی
اور بن بالقان شبه جزیره سنده بولنان خرستیان حکو-
مترینی تشویق ایله عثمانلیلر علیهنه ایلك اهل صلیب
اردوسنی سوق ایلدی . بونلر ادرنه جوارنده عثمانلیلر
ایله بالتلاقی حاجی ایل بکینک مهارت عسکر یه سی
سایه سنده بر بوزلش بوزلدیلر که بو محاربه حملک اسمی
« صرب صندیغی » قالشدر . بو غلبه دن صکره یعنی
۷۶۸ سنه سنده عثمانلی فرقه لری چرمن ویانبولی و آیدوس
و قرین آباد و قرق کلیسا و پکار حصاری و ویزه
و سوزه بولی طرفلرینی جولان ایله ممالک عثمانیه ر بط
ایلدیلر . صرب صندیغی غلبه سنک بر ثمره سی اولق
اوزره ایلك دفعه اوله رق دو برو و ندیک جمهوریتی
دولت علیه یه عرض اتفاق ایلیوب حایه عثمانیه یی
دخی قبول ایلدی .

حدود دولت بیودیکه قوانین موجوده نک دخی
اصلاح و توسیعی لازم کله رک قاضی عسکر ایکن رتبه
وزارتہ نائل اولان قره خلیل خیر الدین پاشا و قاضی عسکر

لکه تعیین بیوریلان قره رستم و سائر ار باب علم و اقتدار
قوانین عثمانیه بی بالندا کره اصلاح و توسیع ایلدیلر که
بونک نتیجه سی قوه عسکریه نک بر قاتلدها آرتمنده منجر
اولدی .

۷۷۱ ده کوستندیل پر نسی دولت عثمانیه یه عرض
تابعیت ایدرک ۷۷۲ ده تاسستانبول سورینه قدر آقین
ایدلدی . ۷۷۳ ده لاشاهین پاشا صماقو جوارنده
صرب قرالنک براردوسنی بوزهرق حدودی دخی توسیع
ایتدی . بومغلو بیتک انتقامی ایچون صرب قرالی
بلغار قرالی ایله بالاتفاق حدود عثمانیه یه تعرض کوستر .
نجه قره خلیل خیرالدین پاشا اورنوس بکی دخی معیتنه
آلهرق او یله بر مقاومت کوستردی که بولا یروا سکه و مارولا
یعنی عورت حضاری و قواله و قره فریه و سیروز قصبه .
لری استرداد او مجدداً استیلا قلوب بر بغداد و ویووده سی
و براسلا و پر نسی دخی اسپر ایدلدی . اندن صکره نوبت
تعرض عثمانیلره کلدیکندن صرب قرالی لازار ایله بلغار
قرالی سیسمان اوزرینه عزم همایون و قوعیله نیش
قلعه سی یکر می بش کون محاصره دن صکره آنددی
و سیسمان طونه بوینده صقشدریلوب آمانه دوشه رک

قزینی حرم همایونه تقدیم صورتیله مظهر عفو
اوله بیلدی .

بوفتو حانك ايجاب ایلدیکی صلح و اسایش الی سنه
قدر دوام ایدوب بومدت ظرفنده دخی تنظیمات ملکیه
وعسکریه و ترتیب و اصلاح تیاری و زمامته صرف
همم اصلاحکاری ایدیلرک کر میان امیرینک قزی دولت
شاه سلطان شهزاده ییلدیرم بایزیدخانه تزویج ایدیلرکه
جهاز اوله رق کوتاهیه و کموش واکری کوز و طاو .
شانلی و سماو قضالری ملک عثمانییه ضم قلندی .

۷۸۳ ده حضرت خداوندکار ممالکی دوره
چیقه رق حید امارتنه کلدکده حید اوغلی توحش
ایتمسینه غازی خداوندکار کندیسنی تأمین و ملکنی اقچه
ایله فروخت ایتکه ارضا ایلش و بک شهری و سیدی
شهری و آق شهر ایله اسپارته سنجاقلری بو صورتله ضمیمه
ممالک قلنشدر . دیگر جهتدن تیمور طاش پاشا اسلاو
پرنس لری اوزرینه هجوم ایدرک ارناودلغه قدر مناستر
طرفلرینی هرج و مرج ایلدیکی کبی نهایت صوفیه
اوزرینه هجوم اولنهرق اوراسی ده اله کچورلش
ایلی .

بوزمانه قدر خاندان عثمانی اعضای میانده هیچ
بر اتفاق مزلق کورلمدیکی حالدده ۷۸۷ سنه سنده شهزاده
صاویجی بك استانبول پرنسسلرندن اندرونیکوس ایلده
بالاتفاق خروج ایلدیکندن حضرت خداوند کارك
بوکا پك زیاده جانی صیقیلوب صاویجی بکی دیمتو -
قده اخذ وازاله ایتیش و اندرونیکوسی برای مجازات
استانبوله پدری نزدینه کوندروب انکده کوزلرینه
قزغین سرکه دوکلشدر .

ایشته بو ترقیات عثمانیه اوروپانك کوزینی یلدر -
مغله ۷۹۰ سنه سنده صرب و بوشناق و بلغار قرالاری
بالاتفاق حرکت وانلره مقابل دخی وزیر علی پاشا
او توز بیک عسکر ایلده مقاومت ایلوب هزار غراد و طر -
نویده شدتلی محاربه لرایدلش و بلغار قرالی سیسمان نیکبو -
لیده دوچار اسارت اولمشدر . قوصوه محاربه مشهو -
ره سی ایشته بو مقدمه نك نتیجه سی اولمشدر . یعنی
ارناود و هرسك و افلاق و مجمار حکمدار لری دخی
اولکیلره التحاق ایلدرک عموم نك اوچ یوز بیکه
واران قوه حربیه سی قوصوه صحراسنده عادتامغلوب
ایدلش ایکن دشمن طرفندن کویا عرض دخالته کلان

بر سوء قصدی حضرت خداوند کاری خنجر غدر ایله
شهید ایلشدر . غایت جسور و قوانین و نظامات غایت
رعایتکار بر پادشاه فاروق شعار ایدی .

۷۹۱ سنه هجریه سنه قوصوه صحراسنده

ییلدیرم بایزیدخان غازی نیک بیعت عومیه ایله پادشاه
اولسنی متعاقب بوسنه و مجارستان طرفلرینه طوغری
فرار ایدن اهل صلیبک ارقه سندن یکیت بک و فیروز بک
تعقیبه صالدر یلوب صرب قرالی استفان ایسه همشیره .
سنی حرم همایونه تقدیم و سنوی بر مقدار ویرکودن
ماعداد حین حاجتده خدمت پادشاهیده بوانده جفنی
دخی تأمین ایله تحت جایه عثمانیده کیره رک یقه سنی
قورتاره ییلدی .

کلیسولی بوغازنده سفن همایونه نظارت ایدن
و بناء علیه قره مرسلدن صکره و بالطه اوغلندن اول
قپودان دریا عداو لنق لازم کلان صار یجه پاشا بوغازدن
یکن بر سفینه ایچنده استانبوله کلیس کیدر بر فرنگ پر نسبی
اولدیفنی کوره رک سفینه بی صید و پر نسبی حرم
همایونه ارسال ایلشدر . بووقه ۷۹۴ سنه هجریه .
شنده وقوع و لوبینه بوسنه ایدی که آیدین ولایتنک

امیری بولسان آیدین اوغلی عثمانلی پادشاهی طور رایکن
 کندی نامنه خطبه او قوتوب سکه کسیر مکدن حیا
 ایدرک ایاثلوغ قضا سنی خا کپای شاهانه یه بالتقدیم جایه
 عثمانیه بی قبول ایلدیکی کبی صاروخان و منتشار نسلری
 دخی آیدین اوغلنه تبعیه مملکتلری نی کندی رضایله
 ییلدیرم بایزید خانه ترک و تقدیم ایلش و فقط کندیلری
 قسطنطنی و سینوب طرفلرنده اجرای حکومت ایدن
 اسفندیار اوغلی کوتورم بایزید نزدینه کیتیشلردر .
 قره مان اوغلاری هر شیده عثمانلیلرک رقیبی اولدقلری جهتله
 بوکادخی حسد ایلدیه رک ممالک متروکه بی ضبط ایچون
 بیوک براردو ایله یورو مش ایسه لرده مقابله در حال
 عزیمت همایون وقوعه کله رک قونیه محاصره یه النمش
 و بونک اوزرینه چهارشنبه نهرینک رو طرفی کاملاً
 دولت علیه یه ترک اولنق شرطیله عقد مصالحه ایدلشدر .
 ایدین و قره سی ترکلری مهارت حربیه صاحبی
 آدمیر اولوب بونلر واسطه سیله تشکیل اولنان ایلک
 عثمانلی دوئلما سی ۷۹۵ سنه هجریه سنده ساقز طرفلر
 ننه اقین ایلش ایدی . ننه سنه مرقومه ده اولاحه و بوسنه
 و حجار ایچلرینه طوغری اقینلر ترتیب ایدلدکده اولاح

پرنسی مرچہ نیکیبولیدہ حضور حضرت پادشاهی به
 حقیقہ رق استدعای حمایت ایلشدر . حالبوکہ مجارلو
 اردوی همایوندن بر فرقه ییشدارک بر رجعتنی فرصت
 اتخاذ ایلیدرک تا بلغارستان ایچلرینه طوغری تعقیبنه
 شتاب ایلدکری کبی هر زمان فرصت دشمنی اولان
 قره مانلیلر بو حالی دخی دولت علیه ایچون بر پریشانلق
 صانه رق تاروسه حوالیسنه قدر کلوب تیمور پاشایی ده
 اسیر ایتلر یله یلیدیرم بایزید خان حضرتلری مجار
 ایشنی در حال تسویه ایلدکدن صکره یلیدیرم کبی
 بر سر عتله قره مان اوغلارینک اوزرلرینه صالدره رق
 آق چای جوارنده اردوسنی پریشان و قره مان اوغلنی
 بالذات اسیر ایلش ایدی . ایستدیککی کبی انتقام المق
 ایچون خائن مرقوم تیمور پاشایه تسلیم اولندقدہ
 صلب ایلہ انتقام ایلشدر . بو وقعه قره مان ممالکینک
 کاملاً ممالک عثمانیه اتحاقنی موجب اولدی .

برارهلق قیصریه و سیواس طرفلرینه عطف نظر
 اهمیت ایلدکده اورالک امیری بولنان برهان الدین
 قورقوسندن طاغله قاجه رق هلاک اولغله ممالکی
 اخذ اولندیغی کبی قسطنونی وجانیک و اماسیه و عثما .

نجق و سینوب سنجاقلارنده حکومت ایدن کوتورم بایزیده
دخی او اثناده شرق طرفلرنجه جهانگیرلک ایتکده
بولنان تیمورلنلکک یاننه قاچیریلهرق ممالک موجوده سی
الندن آلمشدر.

بو وقایعک کافه سی ۷۹۵ ده قوعه کلوب
قوصوه مغلوبیتندنبرو دیش بیلهمکده بولنان مجار
قرالی سیرشموندو اولاحیرنسی هرچه و صرب و بلغار
و بوشناق حکمدارلری فرانسه و المانیادن دخی بالاستمداد
سکسان بیکدن متجاوز عسکرله هجوم ایشلر ایدی.
بونلر و دین و راحوه بی اوره رق و عرض تسلیمیت ایدن
اهالی مسلمه بی کاملاً قتل عام ایدرک نیکبولییه قدر
ایغریله اوارهلوق استانبول فتحی تدارکنده بولنان
ییلدیرم بایزید خان تدارکات مذکوریهی اشیو دشمن
اوزرینه سوق ایلدی. بوضورتله ۷۹۷ سنه سنده
نیکبولیده وقوعه کلان محاربه عصرک الک یوک
بروقعه حریبه سی اولوب اعدای متفقه اويله برپوزولش
پوزولدی که ولوله سی المان و فرانسه فراریلرینک
اغزیه تا اوروپا ایچلرینه قدر واردی. بو محاربه ده
برچوق یئرلرک فتحندن ماعدایالکزاون الی بیک اسیرالتمشدر.

اندن صکره اورو پا طرفلرنده کی جولانلردن ماعدا
آته نك ضبطی وانا طولی جهندن دخی حدود عثمانیه نك
فرات نهرینه ایصالی اکر چه فوقیات عظیمه دن معدود
ایسه لرده دهشت افزای وقوع اولان تیمور بلیه سی
اغزلرک طادینی قاجیر مشدرشو یله که :

تیمور مقهور آسیایی هر ج و مرج ایلدیکی صروده
اورو پایه قارشو مجاهدات ایلله بر خدمت دینیه ده
بولنان دولت علیه یه ایلش میوب بالعکس تأمینات دوستانه
اعطاسی ایچون سفیرلرو نامه لردخی کوندرمش ایدی .
انجق حایه عثمانیه التنده بولنان ترک و عرب و کرد
امیرلرندن بعضیلرینی تیمورلنک قهر و تنکیل ایلدیکی
کبی دولت علیه پیچه سندن قاجش بولنان بر طاق امرای
اترا که دخی یوز و یردیکندن و یلدرم بایز یدخان ایسه
ضایت حدت طبعنه مغلوب بر ذات اولدیغندن تیمورک
موالاتی قبول اولمقدن ماعدا بایز یدخان دخی مرقومک
حایه سی التنده بولنان ارزنجان حاکمی طاهرالدینی
اورمش و ملکینی الندن المش ایدی .

بو وقعه ۸۰۳ سنه سننده ظهوره کلوب برسنده

صکره تیموردخی سیواسه هجوم ایلله شهزاده ارطغرل

یکی شهید ایتسیله حضرت ییلدیرم بایزید خان غازی
 بر قوه عظیمه ایله تیمورلنک اوزرینه حرکت ایلدی.
 انقره جوارنده تلاقئ صفین واقع اوله رق مجموع قوه
 عثمانیه اکرچه یوز یکریمی بیک نفری کچمکده ایدیمده
 تیمورلنکک باشنده کی حشراتیدی یوز بیکی آشمقده
 اولوب بوندن ماعدا اردوی همایونده بولنان صارو.
 خان و منتشا و آیدین و قره مانلی افراد عسا کردخی اسکی
 متبوعلرینی تاتار اردوسنده کورنجه او طرفه قاچلرندن
 ناشی اردوی همایون بتون بتون ضعیف قالمش ایدی.
 هر حالده روم ایلی و صربو بلغار افرادی میدان ثباتده
 یک بیولر اریق کوستر دیلر ایدیمده غلبه ارتق امکانک
 خار جنده قالمغله اول غازی جهانبگیر موسی چلبی نام
 شهزاده سیله برابرید تیموره اسیر دوشدی.

بو وقعه هائله ۸۰۴ سنه سنده وقوعه اولوب بر طاقم
 مورخلرک اختلافندن قطع نظر تیمورلنک ذات حضرت
 پادشاهی به رعایتده قصور ایتماش ایدیمده اول شهنشا
 اعظم فلاکت واقعدهن بالتأثر ۸۰۵ سنه سنده رحلت
 پور مشلردر. جسد شریفی بروسیه یه نقل و دفن
 ایلندی. غایت عالی همت و قوروسرعتلی پادشاه ایدی.

اشبور تیمور بلیه سی تاریخ عثمانینک ایلاک دورینه
ختم و یرمش اولدیغندن اشبور ایکنجی فصلیز بوراده
کسیله ریک بروجه آتی اوچنجی فصلیزک کشادی لازم
کشدیر .

(اوچنجی فصل)

— استانبولک فتحنه قدر —

عن ۱۴۰۲ الی ۱۴۵۳

تفصیل — تیمور و قه سی عثمان غازی اور خان غازی
بایزید غازی حضراتی کبی اولی العزم درت پادشاهک مراد
غازی ثمره مجاهدات متتابعه سیله وجوده کلان بردوات
معظمه یی اون بر سنه مدت اوله بر فترته دوچار ایتش
ایدی که معاذالله تعالی دولت جدیده عثمانیه نیک همان
ظهور یله انقراض کایسنه رمق قاشش ایدی . زیر تیمور
عساکری اناطولی یی عادتاً جامع لره حیوان باغلاق
درجه سنده هرج و مرج ایلمدیکی کبی روم ایلی طرفلر
نجه فرصت کوزتمکدن ذاتاً خالی قالیان نصیر ادخی
طرف طرف طابور لرینی دکشدرمش و بوندن ماعدا
شهرادکان حضراتی دخی یکدیگر یله محاربه یه قویو
لمش ایدی .

بویله آجیقلی برزمن احوالنی بوجه آتی براز
ایضا حلیجه یازمغه لزوم کورمکده یز :

یلدیرم بایز یدخان حضر تلرینک الی نفر شهزا-
دکانندن ارطغرل بک اماسیده شهید اولوب مصطفی
چلبی محاربه کورلتیسی میانده غیوبت ایتیش و موسی
چلبی ایسه یدریله برابر دوچار اسارت اولمش ایدی .
بوحالده سلیمان بک برارالق بروسه طرفنه رجعت
ایلده کده تاتارلرک تعقیندن ناشی اوراده قرار قیله میوب
زوم ایلی طرفنه چکلیمش و محمد چلبی آماسیده تحصن
ایندوب عیسی چلبی ایسه بروسه حوالیسندنه اختفایه
مجبور اولمشیدی .

صدر اعظم و یکچیری اغاسی و سائر هیئت ارکان
دولت سلیمان بکک یاننده بولنمسیله برارالق اصل سلطنت
ادر نه شهرینک پای تحت اتحادی صورتیله سلیمان بکه
انتقال ایلش ظن اولندیسه ده چلبی سلطان محمد اوزمان
هنوز اون بش باشنده بر شهزاده ایکن صوفی بایز یدپاشا
کبی عصرینک فلاطونی عد اولمغه شایان بر ذاتک
تدبیر یله تیمورک کنه دیسنی تعقیبه کوندردیکی امفندیار
اوغلی و سائر تاتار مرزالر عساکرینی بریشان ایلیره رک

اماسیه یه وارد قدّه اطراف دن ظهور ایلان اعدانک دخی
 طوپنه غلبه چالیش و بناء علیه تیموری بیله مدارایه
 مجبور ایلیمه رک اصل سلطنت عثمانیه نك كافه شان
 وشو کتبله کندیسنه انتقالی دها بدایت موقیاتنده عالمه
 اثبات ایلش ایدی .

تیمورک ملعنتی یالکز یغما و تخریب بلاددن عبارت
 اولسه ایدی برنوع آفت سماوی یه شبیه اوله رق اعاده
 عمران اوقدر کو چ اولمز ایدی . انجق تیمور قره مان
 وقسطمونی و کر میان وحید و صارو خان و آیدین و منتشا
 و تنکه طرفلرنده کی ترک امارت لرینی یه اسکی خاندانلرینه
 اعاده ورد ایلدیکندن دولت عثمانیه بی تیموردن اولسکی
 حاله ارجاع ایچون یکیدن فتوحات جهانسکیرانه یه
 قویولمق لازم کلشیدی . ایشته بوفاتخ ثانی دخی چلبی
 سلطان محمد حضرتلری اولمشدر . زیراتیمور مقهور
 و مندفع اولدقدن صکره چلبی سلطان محمد صوفی بایزید
 پاشانک تدبیر و ترتیب آصفانه سیله الاول سیواسده
 اعلان استقلال ایلش اولان مزید بکک اوزرینه واروب
 مغلوب ایلدکده مزید بک « کل جانم قیمه ! سکا صادقانه
 خدمت ایدرم ! » دیمش و واقعامؤخر ابو مزید پاشانک

دولت علیه یه پک بیوک خدمتلی کورلشدر • بوسیواس
 فتحی چلبی سلطان محمدک قوتنی تأیید ایلدیکی کی
 قسطنیونینک یکی پرئسنی ایکی دفعه ده مغلوب ایتسی
 دخی تزییدشاننه بیوک خدمت ایلشدر •

حالبوکه چلبی سلطان محمدک الدن کیدن ممالکی
 بویه برر برر استرداده همت ایلسنه مقابل سلیمان بک
 برطاقم ممالکی استانبول ایمپراطورلغنه ترک ایتک شرطیه
 ایمپراطورک حایه سی التنه کیرد کدن صکره ادرنه ده
 بزم عیش ونوشی قورمش وارثق جهانی امور ایتماک
 وادیلرینه صامیش ایدی • بروسه حوالیسنده اختفا
 ایلان عیسی چلبی دخی تاتارلرک اندفاعی اوزرینه میدان
 بوله رق برارهلق بروسه یی ضبط ایتش ایسه ده چلبی
 سلطان محمد حضر تلی پای تختی فترتن قور تارمق
 ایچون هجوم ایدرک عیسی چلبی یی طومانج طاغلرنده
 مغلوب وبروسه یی استرداد ایلشدر • بونک اوزرینه
 عیسی چلبی استانبوله وبعده ادرنه یه کیدرک سنیان
 بکدن بالاسممداد تکرار اناطولی یه کچدیکی وتمام چلبی
 سلطان محمد بالیکسری طرفلرنده اعلان استقلال ایلان
 آینه بکی اضاعنه کتوردیکی صره ده عیسی چلبی دخی

هجوم کو سردی . حق بوکرده هیچ بر شیشه موفق
اوله میهرق مغلوباً قسطنطونی امارتنه قاچمشدر . راز
صکرده ینه بو عیسی چلبی قسطنطونی امیر یله برلکده
انقره جهتندن بر هجوم دها کو سرد میشیدی . چلبی
سلطان محمد حضر تلینک پنجه غالبانه لرنده ینه زبون
قالمغله امیره قاچهرق واوزاده آیدین و صارو خان
و منتشا وتکه پرنس لری بر اداری سلطان محمد حضر
تلی اوزرینه اتفاقه تشویق ایلهرک جله سی یکر می
بشیک عسکرله بر شدتلی هجوم دها ایلدیلر . چلبی
سلطان محمدک اون ییک عسکری اوته دنبری نظام
کورمش عساکر صادقده دن اولغله بونلری بوزمغه
کفایت ایلدی . و نتیجه غالبیت اولق اوزره صارو
خان پرنسی حضر شاهک بیونی اوریلوب ملکی
الندن النغله دیکر پرنس لردخی امانه دوشدیلر . عیسی
چلبی ایسه بودفعه دخی آیدین اوغللرینک یانه قاچوب
فقط ردها سدس صداسی چیمیه رق نابید اولدی
کیتدی .

بووقعه لر ۸۰۷ سنه هجریه سنه قدر وقوعه
کلدیلر . عیسی چلبینک حرکات واقعه سنی بر جیتلی

عثمانلی نظر تأسفله کورمک طبیعیدر . زیرا کندیسنده
اولان اقتداری دولتنک تجدیداً احیاسنه صرف اتمک
یولی واریکن تیمورک بلیه سنی تعقیباً دولتی بالکلیه
محوه چالشمق مقتضای حیت کوریله مز . حالبوکه بو
قصور یالکز عیسی چلبیده کورلماشدر . بالخاصه
ادر نه ده سلیمان بک چلبی سلطان محمدک اشبو مظفریاتنه
حسد ایلیه رکینه سلیمان بک طرفندن از میره والی
نصب اولندیغی حانده عصیان ایلش اولان جنید صواب
باشی بی ده تربیه و تأدیب وسیله سیمله براردوی معینه الهرق
اناطولی یه کچمش ایدی . حالبوکه بو جنیدک تربیه سی
مسئله سی مجرد چلبی سلطان محمدی اغفال ایچون
اتخاذ ایدمش بر وسیله اولمیدر که اناطولی یه کچر کچمز
جنید صوباشی روی اطاعت کوستردیکی کبی بروسه
اهالیسی دخی شهری سلیمان بکه تسلیم ایدی ویر مشر
ای . بو حالده عموم ممالک عثمانیه سلیمان بکه تابع
اولش حکمنی الهرق اورنوس زاده بی قره مانلیلر
ووزیر علی پاشایی ده چلبی سلطان محمدلیلر
اوزرینه صالدره رق فترت موجوده ده یه
نهایت ویرمک عزمه دو شمش ایدی . دیگر شهزاده

يعقوب چلبی سلطان محمد حضرتلرینه تابع اولوب
انقرده محافظ بولنديغندن وزير علی پاشایله
مقاومت شديده کوستردیکی کبی چلبی سلطان محمد
دخی امدادینه يتشمک اوزره بولنديغندن بحثله زنهار
تسلیم اولماسنی یازمش ایدی . انجق وزیر علی پاشا
اومکتوبی اله کچوروب عکسی مألده قلمه الدیغی دیگر
مکتوبی یعقوب بکه کوند رکله اوده الدانه رق بانقره .
یی تسلیم ایلش ایدی . بونک اوزرینه چلبی سلطان
محمد رقیبنه غلبه نك ا کسديرمه یولی بروسه اوزرینه
هجومدن عبارت بولنديغنی صوفی یازید پاشانک ارا .
ئه سیله کوردیکندن اولانجه قوتيله بروسه اوزرینه
هجومه باشلامش ایدی . وزیر علی پاشانک برطاق حميله
وخده لر ی چلبینک بو ایلاک هجومی دخی ثمره سر
براقدی ایسه ده حميله مقابل حميله اولق اوزره چلبی
دخی قره مان حکومتی ایله اتفاق ایلدیکندن بحثله
برجعلی اعلان ایلوب افلاق وو یوده سیله اسفندیار
اوغلی دخی اوارهلق محمد چلبینک یاننده بولنان موسی
چلبی بی روم ایلی طرفلرینی سلیمان بکدن نزع دعوت
ایلرندن ناشی تمام موسی چلبی برفرقه اولاح و صرب

عسکر یله روم ایلی یه ولوله ویرنجه سلیمان بک ارتق
اناطولی طرفنی سلطان محمد ترک وروم ایلی یه مرور
ایتمکه مجبور اولمشدر .

استانبول جوارنده موسی ایله سلیمان اره سنده
وقوعبولان محاربه ده صرپلیلموسی چلبی بی ترک
وسلیمان بکه اطاعت ایتمکه موسی چلبی مغلوباً افلاق
طرفلرینه فرار ایلدی و سلیمان بک دخی موسایه معا
وتلرندن طولایی صرب و افلاق پرنسسلرینی تأدیپ
ایچون مملکتلرینه بالهجوم ۸۱۰ و ۸۱۱ سنه هجر
یه لرنده فی الواقع فتوحات کلیه یه مظهر اولدی .
لیکن بوه وقتیلر کندیسنی صوک درجه یه قدر مغرور
ایلیدرک ادرنه یه کلدکده هیچ کیمسه بی طانیماق وهر
شیئی یوزی اوزرینه براقوب یالکز عشرتله مشغول
اولمق کبی بر فنا بوله سلو کندن ناشی موسی چلبی باشنه
طو پلادیغی دیگر برارد وایله تأدرنه یه قدر کلدیکی
حالده سلیمان بک خیار غفلتدن کوز آچه مامش و میخال
اوغلاری واورنوس ویکچیری اغاسی حسن اغا کبی اک
نفوذلی سردار لر کندیسنی غیر تلندیر مک ایستد کلری
حالده « سز چلدیر دیکزمی ؟ بنم اوزریمه کلمک موسانک

حدینه می دوشمش؟» دیه رد و حسن اغانک قلیچ ایله
صقالنی کسمک درجه سنده حقارتله جرأت ایلد -
یکنندن جمله سی موسی چلبی یه دونمشلر و سلیمان بک
استانبوله فرار اوزره ایکن یولده برطاقم ترکنر بیلیه رک
کندیسنی اعدام ایشلردر .

بووقعه ۸۱۳ سنه سنده و قوعه کلوب ارتق
روم ایلی طرفلرنده موسی چلبی پادشاه اولمش ایسه ده
کندیسی غایت حدید برآدم او لدیغندن امراسنی سلیمان
بکدن زیاده تحقیر ایدر ایدی . بناء علیه هر نه قدر
صرب و سلاویک طرفلرینی غارتده بر بیوک رارلق
کوسترمش ایسه ده وزیر علی پاشانک اواره لقی و فاتیه
مخدومی ابراهیم پاشا خراج اخذی ایچون استانبوله
کلد کده ذاتاً ادرنه هیئت ارکان دولتی طرفندن
ابراهیم پاشایه تودیع اولنان مأموریت خفیه مقتضا -
سنجه طوغریجه بر وسه یه کیدوب چلبی سلطان
محمدی ادرنه دعوت ایش ایدی . بوخبر موسی
چلبی یه واصل اولدقده در حال استانبولی قوشاتوب
چلبی سلطان محمدک پیشدارلرینی دخی ایکی دفعه
مغلوب ایش ایسه ده غلبه کیده دن قطع امید اینجه

از میر والیسی جنید صو باشی بی وانقره والیسی
 یعقوب بکی عیصانه تحریک ایلیمه رک بو صورتله
 محمد چلبی بی اناطولی یه احاده یه موفق اوله بیلش
 ایدی . فقط ۸۱۵ سنه هجریه سنده چلبی سلطان
 محمد جنیدی ده یعقوب بی ده بالتادیب تکرار موسی چلبی
 اوزرینه یورو نیجه ذاتاً متفق بولنان رؤسا و سردار لر
 چلبی سلطان محمد ده دخالت ایلد کلرندن موسی
 چلبینک یاننده طو پی یسی سکزیبک نفر دن عبارت
 قالان اردو صوفیه طرفلرنده بالسه هول مغلوب ایلدش
 و موسی بک قولندن یاره لی اولدیغی حالده افلاق
 طرفلرینه فرار ایدر ایکن تعقیبنه کیدن سوار بلر
 کندیسنی بر دره ایچنده میت اوله رق بولمشدر .
 بو وقعه دخی ۸۱۶ سنه هجریه سنده وقوعه کله رک
 ایشته اونبر سنه لك مدت فترت بو صورتله ختامه ایرمش
 و عموم ممالک عثمانیه بتکرار ید واحد اداره یه کیر -
 مشدر .

چلبی سلطان محمد حضرتلرینک فترته نهایت
 ویره رک بالاستقلال امور دولتی ید اقتدار لرینه المری
 بتون عثمانلیلری منسون ایلدیکی کبی بو فترت بعض

حکومات متجاورہ بی دخی صدمات واقعہ سیلہ صار شمش
اولدیغندن اندفاعی انلرجه دخی موجب ممنونیت اولمش
وبناء علیہ استانبول ایمپراطوریلہ صرب وافلاق
ویانیہ وموره وارناودلق ورا کوزہ ووندیک حکو -
مترلندن سفیر لر کله رک عرض روابطایله تجدید الاتہ
مسارعت قلمشدر .

معهود جنید صوباشی فترت سابقہ بی تجدید ایچون
تکرار باش قالدر دینگی کبی قرمان طرفندن دخی برفرقہ
عصات بروسه اوزرینہ هجوم ایلش ایسده حضرت
پادشاه ۸۱۷ سنہ ہجریہ سندہ سریعا یتیشہ رک کماخ
وقجاجق و تیمائونی برر برر اوردقدن وجنیدی دخی
امانہ دوشورد کدن صکرہ مرقومک جانی چولغنه
چوجغنه باغشلا یوب قرمانہ کیر مش واق شہر ویکیشہر
وسیدی شہر عاصیلری تأدیبا ولندرق ذات شاہانہ
جانیک طرفرینی اصلاحہ کیدر کن قرمان امیر ینک
تکرار عصیان و قوعبولہرق غریبدر کہ بردفعہ دہا
غفو شاہانہ یہ مظهر اولدقدن صکرہ ینہ عصیان ایتش
وینہ غفو اولمشدر .

نقشہ واندروسی و یاروسی و ملکی اطہلری

وندیک جمهورینه تابع بولندیغی حالده بواطه لرده اقا -
 مت ایلان سنور لر جمهور مذکورله دولت علیه
 ارمننده کی معاهده صلحیه بی طانییه رق بعض عثمانلی
 کیلرینه صارقندیلق ایتدکلرندن اوتوز قدر سفن هما -
 یوندن مرکب بردونما چالی بک قومانداسیله سوق
 اولمش ایدی . بونلر کلیسولی جوارنده عظیم برونیک
 دونماسنه تصادف ایدرک مغلوب اولغله ۸۱۹ سنه
 هجریه سنده دشمن بوغاز قلعه لرینه قدر صوقولوب
 طویطه طوتش ایدی انجق بو محاربه نیک خلاف عهد
 اولغله عهدک لزوم محافظه سی ایکی طرفجه دخی
 تصدیق اولنه رق ۸۲۰ ده مصالحه تجدید اتمشدر .

بر یاندن شومسئله بحر به جریان ایدرک دیگر
 طرفدن ایسه افلاق پر نسی دان ایله قرنداشی مرچه
 ارمننده وقوع بولان منازعه بی محار دولتی بر روسیه
 مداخله انخاز ایلد یکنندن و کوند ریکی عسکر
 مرچه بی بوزوب امانه دوشور دیکندن ذات شاهانه
 سریعا بر اردو سوقیله مملکتینده عثمانلو نفوذینی
 اعلا و یرکوی قلعه منی بنا ایله ایساقچی طرفلرینه
 استحکامات جمیع یاپیش و محارستان ایچینه براقین

ایدیلوب راد کسبورغ و طمشوار و سائر قلاع و قصبهات
بالمحاصره تالمانیا ایچلرندن امداده کلان شوالیه لرله
دخی محاربه یه طوتوشلش و غالبیت و مغلوبیت ایکی
طرف ارمسندده مشترک قالمش ایدی . نهایت اردوی هما
یون رجعت ایدرکن مجارلور خفیهً تعقیب ایلیدرک
نیش و نیکبولی ارمسندده بغتهً هجوم کوسترملریله
طرف عثمانیه انده مغلوبیت امره لری کوریلرک عقد
متارکه یه دخی مجبوریت حاصل اولمشدر .

زیرا اناطولیده قره یوسفک بردنبره تکشیر قوتله
ارزنجانلی ضبط ایلله اورایه بر والی نصب ایتسی و قره
حصاری صیقشدیروب جانیک طرفلینه ده عسکر
یایمسی و اسفندیار اوغلنک خدمت پادشاهیده بولنان
بیوک اوغلی قاسم بکه رغماً و رضای همایونه مخالفاً
ملکنی کوچک اوغلی رضا بکه ترک ایتسی اس شوکت
عثمانیه اولان اناطولی بی مخاطره لی برحاله دوچار ایش
ایدی . بناء علی ذلک مجارله عقد متارکه ایلدکن صکره
حضرت پادشاه سریعاً اناطولی یه یکه رک قسطنیونی
اوزرینه هجوم و طوسییه و کنغری ایلله جوارنده واقع

باقرطاغی طرفلرینی استیلا ایلدکده اسفندیار اوغلو
 بونلری قاسمه و یرمیوب طوغریدن طوغرییه شماليک
 عثمانیه ره ربط ایدرسه ذات شاهانه نك بولطفنه منتدار
 قاله رق کندیسسی یالکیز سینوب ایله قسطنیونی ده حکو -
 مت سورمکه راضی اوله جغنی ییلدیردی و صورت حال
 موافق کور یلوب قبول اولندی . اندن صکره موکب
 همایون قره یوسف اوزرینه بور ییوب صامسون
 وجانیک اهالیسی ذاتادولت علیه یه میال اولغله بالسپونه
 ضبط اولته رق موقفاً یان تخت سلطنته عودت ایدادی .
 اناطولیجه بووقعه لردن ماعدابرده سیم اوغلو
 بدرالدین اسمنده برمدعینک بوکوردلیجه مصطفی
 و طور لاق کمال نام طرفدارلر یله باشنه برطاق درویشلر
 طوپلایه رق صاروخان طرفلرنده خروج ایتمسی مسئله سی
 وارایدی . ۸۲۳ سنه شجریه سنده صاروخان والیسی
 التی بیک کشیله مرقومک اوزرینه وارد قدغه فنا حالده
 مغلوب و اندن صکره علی بک اسمنده بر سردارک قومانده -
 سیله سوق اولنان اوغلو دخی مغلو بارجعت ایدنجه
 اشقیا بسبتون یوزه چیقدیغندن نهایت شهزاده مراد
 بک برقوه کلیه ایله وارمش و محارب بات شدیدیه ایله

بو کورد لیجه مصطفی بی ایاتلو غده و طور لاق کالی
 مغنیه ساده بوزوب اعدام ایشدر . اصل سیم او غلو
 بدرالدین نصیه روم ایلی طرفلرینه قیچارق یکیدن
 بر طاقم درویشلر طوپلایوب تکرار خروج ایش ایه ده
 مراد بک روم ایلی ده کچوب مر قومی بوزمش و فلبه ده
 صلب ایله اعدام ایشدر .

بو کبی احوال هب تیمور فترتک بقایای بلیاتی
 اولوب ینه بو قیلدن اولمق اوزره تورودینک بر یسی
 کویا انقره محاربه سنده غیبو بت ایلیان شهرزاده مصطفی
 بک اولمق اوزره میدان چیمش و مؤخرأ طونه طرفلری
 صو باشیلغنی یقالیان معهود جنید واسطه سیله افلاق
 پر نسینده اله آله رقی بونلرک معاونتیه عظیم براردوبالتدارک
 سلانیکه طوغری یوریش ایدی . بو صاحب خروج
 تاریخ عثمانیده « دوزمه مصطفی » دیه مشهور اولوب
 سلطان محمد حضرتلری یلدرم کبی بر سر عتله یتیشه رک
 اردوسنی بوزمغله مصطفی ایله جنید استانبول ایمپرا
 طور ینه التجا ایشلر سله سلطانیان محمدک اصراری
 اوزرینه ایمپراطور بونلری لمنی اطه سنده نفی و حبس ایش ایدی .
 افلاق پر نسی مرچه اشبو دوزمه مصطفی به یاردم

ایتدیکنه . دن طولایی غضب پادشاهی یه اوغرایوب
 افلاق ممالکی الت اوست ایدلمشدر . اثنای عودتده
 استانبولده ایمپراطور طرفندن عظیم ضیافتلر کشیده
 اولمش ایدی . اناطولیجه بعض مصالح تسویه سی
 ضمننده اناطولی یه تشریف شاهمانه وقوعیله بعده
 تکرار روم ایلی یه چکلمش وادرنه شهرینه کیرر ایکن
 ات اوزرنده نزول اصابتیله اول پادشاه غیور برقاج
 ساعت ظرفنده ارتحال ایتشددر .

بوفلا کت ۸۲۶ سنه هجریه سنده وقوعبولوب
 ولی عهد سلطنت مراد بک اماسیه والیسی اولمغله
 کندیسنه خبر کیدرک اعلان جلوس ایدیلنجیه قدر
 یکپچری طائفه سی لاجل الاغفال برطرفه سوق ایدلمک
 ایستلش ایدی . عسکر « سوکیلی پادشاهمزی
 بردفعه دها کورهلمده او یله کیدهلم » استداسنه قیام
 ایدنجه برآدم نعلش پادشاهینک ارقه سنه کیره رک
 قوللرینی باشنی قلدا تمق صورتیله تسکین قتنه یه چاره
 بولمشدر .

چلبی سلطان محمد حقیقه بانی ثانی دولت

بر پادشاه شجاع ایدی .

دوزمه مصطفی و جنیدك لمنیده حبس و توقیفی
 دولت عثمانیه نامنه دكل يالکز چلبی سلطان محمد نامنه
 بر معامله ایملش کبی سلطان مشارالیهك و فاتیله برابر
 استانبول امپراطوری مرقومری لمنیدن صالیو یردی .
 حالبوکه سلطان مراد حین جلو سنده هنوز اون سکر
 یاشنده برنوجوان اولمسیله بر طاقم والیر و صو باشیر
 شهزاده مصطفی کبی بر پادشاه رشید و ارایکن سلطان
 مراد کبی بر چو جغه تابع اولمق موافق اولمیه جغی
 و سینه سینه فساد چیتارمغه ذاتاً مستعد بولند قلرندن
 دوزمه مصطفی ایله جنید سیروز طرفلرینه کلد کده پک
 چوق اشقیا بونلرک باشنه طو پلانمش ایدی . پیر حکمت
 ضمیر صوفی بایزید پاشا اشقیای مرقومه اوزرینه
 حرکت ایلد کده مغلوب و جنید لعینک امر یله شهید
 ایدیلنجه عصیانک اهمیتتی بالکلیه آرتمش و همان
 بتون روم ایلی دوزمه مصطفانک سلطنتنی قبول ایملش
 ایدی .

بوندن صکره دوزمه مصطفی اناتولی بی دخی
 ید مراد ثانیدن نزع و اخذ ایتک جرأتیه تدارکات
 کلیه یه باشلا یوب نقلیات بحریه ایچون اوزمانلر

بحر سفید و سیاهده واقع اولان جنويز بندر کاهلرنده کی
 سفینه لری استیجاره قالدقشد قده منافع تجاریه سندن بشقه
 هیچ براملده بولمیان جنويز جمهوریتی غالبیتک هر-
 حالده مراد ثانی جانبنده قالد جغنی کسدیروب او حالده
 برچوق امتیازات تجاریه ده نائل اولق امکائی
 دوشونجه دوزمه مصطفانک تکلیف لینه قبول یوزی
 کوسه ترمیه رک مراد ثانی حضرتلرینه عرض خدمت
 ایلدی . بونک اوزرینه حضرت پادشاه روم ایلییه
 چکوب عاصیلری تریه تدارکنده ایکن دوزمه مصطفی
 حضرت پادشاهه میدان و یرماک ایچون سریعا
 کلیبولیدن لابسکییه مرور ایتش و اردوی همایونی
 اولو باد نهری مقابلنده قارشولش ایدی . انجق برکیجه
 میخال زاده لر صوکنارینه اینوب اوتهدن بروکندی
 قومانده لرینه الشمش بولنان و شمعی دوزمه مصطفانک
 اردوسنده اولان اقینجیلره ندا ایله اصل پادشاه جهان
 مطاعه عرض خدمت ایچون دعوت ایلینجه جله سی
 سلطان مراد طرفه کچدیلر . بوندن ماعدا جنیدک
 ترتیب ایلدیکی کیجه باصقنندن اولجه مراد ثانی اردو-
 سی خبردار اوله رق ایکی بیک نفر یکی چری دلاورلری

پوصوقیه وضع ایدملکه باصقیمیله دیل قورتاره مامق
درجه سنده پریشان ایدلدی .

بو غالبیت هر نه قدر بر مظفریت قطعیه عد
اولنه من ایدیسه ده جنیدک امیدینی ضعفه تبدیل
ایلدیکی کبی مرقوم انجق کندی اقبالنه خدمت ایدر
برآلجق اولدیغندن طرف مراد ثانیدن از میر امارت
مستقله سی کنایسینه توجیه اولنه جفی حقنده بروعد
ویریلجه در حال دوزمه مصطفادن یوزچو یردی و فی -
الواقع امارت مستقله ایله از میره کوندردی . بونک
اوزرینه دوزمه مصطفی بالکلیه عاجز قاله رق کلیولی -
یه جان آتمش ایدسه ده مراد ثانی دخی جنویر قایقوری ایله
چکوب مرقومی بوزمش و دوزمه مصطفی ادرنه طریقیله
افلاقه قاچغه چالیشور ایکن بالتعقیب طوتوب صلب
ایتمشد .

بوموفقییت قطعیه ۸۲۶ سنه هجریه سنده میسر
اولوب ایکی سنه دن زیاده بر زمان دوزمه مصطفانک
مراد ثانی بی اورسه له دیکنی کوره رک حضرت سلطان
مراده تملق یوزی کوستر مامکده بولنان استانبول ایمپرا -
طوری دوزمه مصطفانک انعدامنی کورنجه در حال

سفیر لر ارسال ایدرک تجدید رابطه دوستانه به مسارعت
ایتمش ایسه ده مراد ثانی بو الحقیقه تملقی قبول ایتیوب
برقوه کلیه ایله استانبول اوزرینه یوریمش و اول
قدر تضییق المیش ایدی که برازدها صقشدیر یله جق
اولسه ایدی فتح قسطنطنیه شرفی دخی کندیلرینه
نصیب اوله جق ایدی . انجق ایمپراطور قوتله غلبه
ایده میه جکنی اکلا دیغی سلطان مراده خدعه ایله
غلبه می ترجیح ایلیه رک کوچک برادری مصطفی چلبی
ایله قره مان اوغلارینی بالاغفال ایاقلدیرمش و بونلره
ازنیق ضبط و بروسه می محاصره ایتدیرمش اولدیغندن
اردوی همایون دخی استانبول محاصره سنی ترکله
ازنیقه یکمش ایدی . بو حرکت همایوندن مصطفی
چلبی اورکوب فرار ایدر ایکن تعقیبه قوشان اقبیجیلر
النده شهید اولمشدر .

دولت علیه نک اشبو غوائلی اشناسنده افلاق وارنا
ودلق و موره طرفلری دخی دولت علیه یه اثار خصومت
کوستر مکه باشلا دقلرندن مصطفی چلبی غائله سی دخی
برطرف ایدلدکن صکره اردوی همایون اوچ قوله
ایر یله رق بریمی افلاقی هرج و مرج و بریسی ارنا-

ودلغی وموره بی التاوست ایتمش وحضرت پادشا -
 هك قوماندہ سی التہندہ قالان دیکر بر قول اردودخی
 بولی وطراقلی یہ قدر ممالکی استیلا ایدن اسفندیار
 اوغلار ینک اوزر ینہ یورویہ رک بوزوب قسطمون بی
 ضبط ایدنجه اسفندیار پر نسی بر کوزل قزینی ذات شا -
 هانه یہ تزویج صورتیله نائل عفو اوله بیلش و یالکز
 سینوب سنجاغی اعاده کنیدیسنده احسان اولمشدر .

بومشغولیتلر دخی ۸۲۸ سنه سنه قدر اول پادشاه
 فاروق جاهی مشغول ایلیمه رک بومدت ظرفنده مغضوب
 پادشاهی اولان ایمراطور مانوئل وفات ایلیر ینہ یوان
 جلوس ایتدیکنندن واودخی سنوی اوچ یوز بیك دوقه
 التونی خراج ایلہ مصالحه استدعاسنده بولندیغندن استا -
 نبول محاصره سی ترک اولنسیدیغی کبی افلاق و صرب
 و مجار ایلہ دخی متار که ایدلمشدر .

اشبو غوائلک کافه سی بر طرف ایدلدکن صکره
 تأدیب نو بتی جنید صو باشی یہ کلمش ایدی . خلیل
 یخشی بک بو تأدیبه مأمور ایدلمکله جنید اول امرده
 مقابلہ عزمه دوشدی ایسه ده بجره میه جکنی اکلایه رق
 اندن صکره هب قچماق حرکاتی ترجیح ایتدیسه ده

نرمیه قاچدی ایسه قورتیلهمدی . خلیل همه حال
ارقه سندن یتیشوب نهایت یالکز کندیسنک دکل
اهوان وانصارینک دخی برر برر ققائوینی کسهرک
ادر نه ده خاکپای ملوکانه یه کوندردی .

دولت سلجوقیه نك حین انقراضنده ظهور ایتش
اولان امارات ترکیه دن منتشا پر نسی ۸۲۹ سنه هجریه -
سند و فات ایتمکله ملکی ممالک عثمانیه هر بط اولندی
وتکه پر نسی عثمان بك انطالییه قلعه سنی محاصره یه
باشلادیغندن اوزرینه عسکر سوق ایدی بلنجیه قدر
وفاتی وقوعه گلش ایدیه ده معهود قره مان اوغللری
بوفسادی دخی فرصت اتخاذا ایدرک تکه لیلرک امداد -
لرینه قوشمش اولدقلرندن اردوی مایونک طوپ
آتشی اتناسنده قره مانلیلرک امیری اور یلوب دوشدی
وعیسی و علی نامنده اولان ایکی اوغلی اسیراً حضور
همایونه کتور یلوب ذات شاهانه بونره کندی همشیره -
لرینی تزویج ایله بکام و دیگر قرنداشلی بولنان ابراهیم
بکی طرف دولت علیه دن قره مان بکی اولوق اوزره ینه
محلنه اعاده واعزام ایلدی .

۸۳۱ ده کرمان امیری یعقوب بك ذات شاهانه بی

ز یارت ایچون ادرنه یه کلدکده حضرت مرادثانی
 بوذات ممدوح الصفاتک ا کر امنده پک ایلر و یه وارهرق
 کندیسنی ممنون ایتیش اولسیله یعقوب پک مملکتنه عودت
 ایدرک برسنده صکره وفاتی تقرب ایدنجه هدیه شکرانه
 اولمق اوزره کر میان ممالیکی کاملاً مرادثانی حضرتلر
 ینه تقدیم و تملیک ایش ایدی .

وندیکیلر روملرایله بالاتفاق سلانیککی ضبط ایش
 و حالبوکه مذکور لیان و موقع پک بیوک بر اهمیتتی حازر
 بولنش اولدیغندن اوراسنک ممالک عثمانیه یه ربطی
 ایچون عسکر سوق اولنش ایدی . موقع وقلعه غایت
 متین و عسکر و مهماتی چوق اولدیغندن محاصره
 و هجوملر اوزانوب کیتیش و پک چوق تلفات و کیتلی
 مشقت ایله ۸۳۳ ده ضبط اولنه ییش ایدی . بومعلو
 بیت اوزرینه وندیکیلر انتقام ایچون کلیبولی بوغازینی
 اورمشلر ایسه ده حقسنزلقرینی و محاصمه دن برکونه
 فائده استنتاج ایدهمیه جکلرینی اکلایه رق ینه صلحه
 راضی اولمشلر در :

ارناودلق و یونانستان طرفلری برقاچ دفعه چالقا
 نش و هر دفعه سنده متانت موقعیه حسبیه پک چوق

کوجلیک کرچکلمش اولدیغی حالده ۸۳۶ و ۳۵ سنه .
 لرنده یانیه طرفلرنده حکمدار اولان پرنسک مظالم واقعه سی
 اهالی محلیه یی بیرار ایلده رک بونلر حکومت عثمانیه یه
 طوعاً تسلیم اولدقلری کبی اصل ارناود حکمداری
 بولنان یانی قستریوته دخی وفات ایدرک مرقومک ذاتاً
 سکز سنه دن برو خدمت شاهانه ده بولنان درت نفر
 اوغللری میراثلرندن واز یکورتیلرک ارناودلق دخی
 ممالک شاهانه یه ربط ایدلمش ایدی . بونی متعاقب
 ذاتاً مجار قرالی ایکن مؤخرأ المانیایه دخی ایمپراطور
 نصب ایدیلان سیرشموند ۸۳۷ سنه هجریه سنده صلحه
 راغب اولمغله مجارستان و اوستریا طرفلرنجه دوام
 ایتکده بولنان مهاجاته دخی بومصلحه ایله نهایت
 ویرلمشدر .

دولت علیه روم ایلی طرفنجه مشغول اولدیغی
 زمانلر اناطولیده کی مفسدلرک بهمه حال برفساد چیقار-
 ملری معتاد اولمغله و فساد جهتنده قره مانلیلرک سائر
 ارباب فسادده تقدم و تفوقلری معلوم بولمغله طرف
 مرادثانیدن قره مانه امیر نصب اولنان ابراهیم بک دخی
 روم ایلی طرفلرنده کی مشغولیت اوزرینه اعلان عصیان

ایلمش ایدی . بناء علیه مرقومك اوزرينه عسکر
سوق اولندقدده قونیه بتکرار ضبط اولمش ایسه ده
ذات شاهانه نك همشیره لری قرابت حسبيله ابراهيم بك
ايچون رجا ايلينجه جرمی عفو اولمشدر . اشبور قره مان
سفرنده صرب قرالنك قره مانلیلر ايله اتفایي خبر
الندیغندن انك اوزرينه دخی بر هجوم ترتیب اولنجه
قری ماری بی ذات شاهانه یه تزویج صورتیله نائل عفو
اوله یلمشدر .

هر نه زمان اناطولی طرفنده بر مشغولیت چیقار سه
روم ایلیده بولغان حکومات متجاوز نك دخی باش
قالدیرملری عادت حکمنه کیردیکندن ومهاجرات
مذکوریه نهایت ویرمك ايچون مطلقا بلغراد موقع
مهمنك اله کیرلمسی لازم کلدیکندن ۸۶۲ سنه سنده
اورنوس زاده علی بك کیتلی سوار ی ايله قره دن سوق
اولنوب ذات شاهانه دخی بحر سیاه و طونه طر یقیله
بالعزیمه بلغراد وارلدقدده قره طرفندن قلعه ل انشاسی
و طونه جهندن دخی قایق لرو ضعیله یدی آی مدت
بلغراد محاصره وتضییق ایلمش ایسه ده ظفر ممکن
اوله میوب لهستان قرالنك توسطیله محاصره مذکور .

دن بتون بتون دخی واز کچیلیمشدر. زیرا او محاصره
 اثناسنده مزید بک ترانسیلوانیا طرفلرینه برآقین ترتیب
 ایدوب انجیق جبار سرداری هونیاد مزید بکک
 بواقیننی حکمسنز بر اقوب میرمشارالیه شهید دخی
 اولنجه بلغراد محاصره سی رنک و شکنی ده دکشیدیر.
 مش ایدی.

اشبو هونیاد عثمانلیلرک رجعتی اوزرینه دخی
 سفرك ارقه سنی براقیه رق ۸۴۴ و ۴۵ و ۴۶ سنه لر.
 نده اولاح و صربییه طرفلرینی هر ج و مرج ایلدیکی صره ده
 مقابله سنه مأمور اولان شهاب الدین پاشایی ده بوزوب
 نیشه قدر اینش و بعده لهستان و بوهیمیا و تالمانیایا
 ایچلرندن طویلانوب کلان اهل صلیب کو کللولری ایله
 قوتنی بالتزید مراد ثانینک اوچ قولدن سوق ایلدیکی
 اردولری موراوه نه ری بوینده مغلوب ایتدکن ماعدا
 صولودر بند و ایزلادی در بندندن بالقانلری کچرک برو
 طرفده دیکر بر غلبه یه دها نائل اولمش ایدی.
 ارتق غائله بو قدر پیونجه قره مانلیلر ایچسون
 راحت طور مق ممکن اولور می؟ تکرار عصیان ایتد.

یلر . انلردن ماعدا ارناود قرالی متوفی یانینک خدمت
 شاهانه ده بولنسان اوغلی اسکندر بک دیگر برادر یله
 برابر ارناودلغه قاجوب اوخری واشقودره وقره
 طاغه طوغری ممالکی فتح ایله اعلان استقلال ایلش
 ایدی . بوقدر غوالله بردن مقابله ممکن اوله میه جغی
 درکار اولغله ۸۴۷ ده مجار لیلر ایله مجبوراً برمتار که
 عقد اولمش وقره مانلیلر ایچ ایل طرفلرینه پوسکور تلد .
 کدن صکره اصل تهلیکه ارناودلغده اولمسیله او طر-
 فله طوغری تدارکات کلیه یه مسارعت قلمش ایدی .
 انجق مراد ثانینک اکبر اولادی واک سو کیلیسی
 اولان شهزاده علاء الدین بوسره ده وفات ایدنجه
 او غیرتلی پادشاهه بریأس وفتور که رک زمام سلطنتی
 سلطان محمد بالتسلیم کندیزی مغنیه سده اختیار عزلت
 ایلدی .

حالبو که مجارلی هونیادک غلبات واقعیه سی
 اورو پای او قدر بیوک برامیده دوشورمش ایدی که
 ارتق عثمانلیلری قطعه مذکور هدن بالکلیه طرد
 و اخراج ایلک ایشدن بیه اولمدیغی ظنیه پاپا طرفندن
 هر طرفه تشویق نامه لر بالاسطار کلیتی بر اهل صلیب

اردوسی ینه هونیاد قومانده سیله تا وارنه یه قدر اینمش
ایدی . بو حالدده بتون هیئت ارکان دولتک رجاسیله
مراد ثانی حضرتلری تکرار اردوسنک باشنه کلوب
وارنده دشمنی قارشوله دی . بو وارنه محارب سنده
دشمنک کثرتنه نسبتله عثمانلیلرک قلاتی غلبه ایچون هیچ
برامید براقز ای دیسده مجرد دشمنک نام خدایه بنا
ایدرک عقدا یلد کیری مصالحه یی نقض و اخلال ایلرندن
طولابی غیرت و عدالت الهیه آن واحده کنیدیسنی
کوستره رک اوزمانه قدر امشالی اولماش بولنان اهل
صلیب ۸۴۸ ده او یله بر بوزولش بوزولدی که بوکا
دوستده دشمنده متحیر قالدی .

وارنه مظفریت عظیمه سندن صکره سلطان مراد
ثانی حضرتلری ینه مغنیسا عزلتکاهنه چکیلدی
ایسده سلطان محمدک هنوز کنجلیکی و عسکرک مراد
ثانی یه الیشقمنلی ایله برابر ارناودلقده اسکندر بکت
دخی غائله یی ارتدیرمی حضرت مراد ثانی یی تکرار
تحت حکمرانی یه دعوت ایلش ایدی . بودفعه اول
یونانستان یی تقسیم ایتش اولان پرنسیرک منازعاتنی برطرف
ایچون ۸۵۰ ده قورینت یعنی قوردوس باله اصره

تکمیل یونانستان دخی متعاقباً ضبط ایدلد کدن صکره
استانبول پرنس لردن قسطنطنیه اورایه والی نصب
اولنوب بعده ارناودلغه گیرلش و فقط موقع مذکور
غایت صرب اولدیغندن غالییت و مغلویت مشترک
قالش ایدی. بواره لوق دونیاد دخی یکرهی بش یک
اهل صلیب ایله تکرار قوصومه قدر اینجه مراد
ثانی ارناودلری براقوب مجارلر اوزرینه یوریمکه
مجبور اولدی. مجارلر زره کیش اولدقنلر ایلک
محاربه ده بونلره ظفر میسر اولماش ایدی. فقط او کیجه
مجارلیرک ترتیب ایلدکری بریاصقین فنا ترتیب ایدلش
بولدیغندن او یله بر بوزولش بوزولدیلرکه ایرتسی
کونی یکرهی بش یک اهل صلیبدن اون یدی پیکی
حالا زرهلری ارقه لرنده اولدیغی حالده مقتولاً
معرکه ده قالب قصور سکز بیکی کوچ حال ایله فرار
ایده ییشندر. بعده ینه اسکندر بک اوزرینه هجومه
وارلدی. دبره واق حصار کرچکدن بوغاز بوغاز
برجنگ ایله الندی. ۸۵۴ ده اسکندر بک اوزرینه دها
مکمل بر هجوم ترتیب ایدلش ایسه ده استانبول
ایمپراطوری وفات ایدرک رضای همایون خلافت

دیتمیریوس امپراطور او لنجه ذات شاهانه مرقومی
عزل ایله رینه کندی التزام کرده سی اولوب یونانستان
والیسی بولنان پرنس قسطنطینی نصب ایچون استا-
نبوله کلمش ایدی . چه فائده که ۸۵۵ ده برنزل
اصابتیله اول پادشاه فاروق جاه عازم داربقا اولمشدر .
هم نهایت درجه لرده جسور هم غایت حلیم بر پادشاه
جهان اولدیغی حالده بر خرقة ایله بر قمه یه قانع
امثال سز بر ذات ملک سمات ایدی .

پدرینک وفاتی اوز رینه سلطان محمد ثانی حاضر تلی
هر نه قدر ارتق حیاتی دائم اولدیغی مدت بالشوکت
والاجلال مربع نشین اولق اوزره تخت عالی سلطنته
جلوس بیورمش ایدیسه لرده بوندن اول ایکی دفعه
پادشاه اولدق لری حالده ینه شهزاده لک حالنه عودت
ایتمش اولملری اول پادشاه عالیجاهی بعض طرف لر نظر
نده استخفافه بادی اولمش و بناء علیه حین جلوس لر نه
یکی چریلر جلوس بخششی ایسترز دیه بر مار سزلغه
قیام ایلد ک لری کبی قره مان اوغلاری دخی عسکرک ایلک
دفعه اولق اوزره کوستر د ک لری شو انتظام سزلق دن
بیوک بیوک امیدلره دوشه رک تکرار عصیان ایشلر

ایدی . حتی استانبول ایمپراطور لغی ارتق طرف
دولت علیه دن انتخاب اولنان پرنسره توجیه بیوریلور
رشی حکمنه کیرمش اولدیغی حالدده سلطان محمد ثانی
حضر تلی کبی غضوب وجسور بر پادشاهی اوده
استخفاف ایلیه رک وقره مان ویکی چری فساد لرندن
امیدلره دوشه رک بر سبب سیاسیدن طولایی استانبولده
محفوظاً اقامته مأمور اولان اورخان بك نامنده بر شهزاده
دهنك مصارفی ایچون تخصیص بیوریلان مبالغی
استحصالدده استعجاله باشلامش واکر سر یعاً و عاجلاً
مصارف مذکور کوندرلیه جك اولور سه شهزاده بی
صالی ویره جکنی بیلدیر مشیدی . بویله هر طرفك
استخفافلری میاننده یالک زطر بزون ایمپراطور لغی عثمان
نلیه رک کوندن کونه آرتان قوت و شوکتلرینه مقابله
بقا ممکن اوله میه جغنی اکلایه رق بالاخره مغلوباً التحا
قدن ایسه طوعاً التحاقی ترجیح ایلیه رک پادشاه نوجاه
حضر تلی نه تبریک جلوس ایچون کوندردیکی سفیر لری
واسطه سیله عثمانلی خرج کذار لغنی دخی قبول
ایتمشدن .

بو طر بزون جمهوریتی اهل صلیبک بر ارهلق

استانبولی فتح ایللی اوزرینه بعض بیر انس پرنس -
 نك تشكيل ایلش اولدقلری ایمرطورلرکه کیفیت
 شکلی بوندن اولکی یونانستان تاریخنده ذکر ایدلمش
 ایدی .

ایمدی حضرت فاتح بویله ایلک پاپوش پاتردیلر نك
 هیچ بریسنه روی تلاش کوسترمیه رك اولایکیچری یه
 ر مقدار بخشیش اعطاسی واقعه ایدنلر نك تربیه سیله
 عسکرک انتظامی اعاده ایلدکن صکره قره مان اوغلار -
 نك اوزرینه واروب اول آلچقلر هر زمان اولدیغی کبی
 و دفعه دخی امانه دوشدکلرندن استغراب اولنورکه
 و دفعه دخی جرملری باغشلا نمشدر . دولت علیه نه
 مان بر مشغولیه دوچار اولورسه باش قالدیرمغی
 عتباد ایدنمش اولان بودنائت پیشه لر حقنه ده دفعاتله
 کوستر یلان آثار مرجه استغراب اولنسه سزادر .

ایمدی نو بت تأدیباستانبول ایمرطورلغنه کلش
 ایدی . انجق بوتأدیبك قره مان اوغلارینی تأدیبه
 کزه میه جکی و بلکه تافتح استانبوله قدر واره جغی
 ول باول روم ایلی حصار نك بنالیدلمسندن اکلشلمش
 ایدی . زیرا استانبولک فتحی ارتق سلاطین عظام عثمانیه

ایچون برامل اوله رق بر قاج دفعه هجوم ایدلمش ویلدیرم
 بایزید خان طرفندن اناتولی حصاری دخی مجرد بوامل
 اوزرینه یابلمش اولدیغندن حضرت فاتحک امل
 مذکوری حصوله کتور مکه ساق اهتمامی تشمیر ایده جگاری
 زمان ارتق تمامیه حلول ایلشیدی . بناء علیه ۸۵۶
 سنه هجریه سنده بوغاز مستحفظریله روملر ارسنده
 تکون ایدن برمنازعه وسیله اتخاذ اولنده رق عساکر
 عثمانیه جوش و خروشه کلان دریاکی تموجد باشلا .
 ینجه ایش دشمن طرفندن دخی کلاشیه رق اطراف
 وجوارده نه قدر روملر واریسه جله سی استانبول
 قلعه سنه قیانونوب محاربه و مقاومتیه حاضر لانشلر
 ایدی .

واقعا بالذات امپراطور جنابلری محضار امپراطور .
 لق نامی محافظه ایده ییلک ایچون هر شیئی قبول
 ایده جکندن بحکله آمانه دوشمش ایدسه ده قبول
 اولنما مشدر . مع هذا استانبولده یلک کیتلی روم غلبه لکی
 اولوب اگر مورده طرفلرندن دخی استانبول امدادینه
 قوشیله جق او اورا یسه امر تسخیر بر قاندها کوچلشه .
 جکندن اولادوره اوزرینه بر قول اردو کوندرلدی .

زیرا استانبول ایمپراطور ینک سر یعا اورو پایه ایلچیلر
 چیقار هر ق استمداد واستعانه ایلدیکی دخی خبر انمشیدی .
 اندن صکره اکیوز الی ینک قدر عسکر ایله استانبول
 اوزرینه دخی یورونه رک هر طرفدن بالمحاصره تضییقه
 و بک اوغلی طاغری اوزرینه تعبیه اولنان طو پلر ایله
 ضربه باشلاندی . تمام الی اوچ کون محاصره و مهاجده
 دوام ایدرک برقاچ هجومده عادتاً بوغاز بوغاز غوغا
 ایدلشیدی . نهایت طوپ ایله آچیلان کدکاردن بر هجوم
 کوستر یلرک انی متعاقب هر طرفدن دخی یوروش
 ایدملکه نفس استانبول سوقاقلری ایچنده دخی محاربه نک
 امتداد ایله درملر کی قانردو کولک مقابلنده پای تخت
 فتح اولمشدر .

استانبولک فتحی یالکز شو جلده اوچنجی بابمک
 اوچنجی فصلنه خاتمه چکمک ایله قالماشدر . بونجه
 عصرلق شرق ایمپراطورلغنک تاریخ موجودیتنه دخی
 خاتمه کلیه چکممشدر . شرق ایمپراطورلغنک بویه
 انقراض کلیسی ارتق اوروپا قطعه سنک جنوب شر-
 قیسنی تشکیل ایلان بر ربع مهمک عالم نصرانیتدن
 علاقه سنی کسهرک عالم اسلامیه ربط ایلمی کی بر نتیجه

عظیمہ کو سترمش اولدیغندن اور ویاچہ بوحالہ بر
نظر یأس کلی ایلہ باقلش ایسده شوکت عثمانیه
مقابلہ ایچون عموم اورو پانک قوت متفقہ و متحدہ سی
دخی کفایت ایدہ میه جکندن چار و ناچار سکووت
ایدلمشدر .

مع هذا دولت علیه عثمانیه نك عدالت و مدنیت
پرور لکده اولان شان جلیلی اصل بودفعه یارطر
فندن ده اغیار طرفندن ده کمال و ضوح ایلہ کورلمشدر .
زیر الاستانبول یالکز شرق ایمپراطور لغنک مرکزی
اولیوب بلدکه روماده بولمان پایانک عینی اولمق اوزره
شرق کلیسایی رئیس روحانیسی بولنان روم پطر
یقلکنک دخی مقامی اوله رق بومقامک الغاسی دهشت
واقعہ یی ده ازیاده ارتدیره بیلور ایکن دولت علیه
هیچ بر دین و قوم علیه نه خصوصیتی اولدیغنی و بالعکس
کافه ادیان و اقوامک حایسی اولدیغنی اوتہ دبری
اثر فعلیه سی ایلہ کوستردیکی کی بودفعه دخی شرق
پتر یقلکنی محاذکل بالعکس نیجه امتیازات جدیدہ
ایلہ احیا ایتک صورتیلہ کوسترمشدر .

چین فئحده استانبولدن چیقماق ایستیانلره رخصت

کامله ویریه رک کبار اهلیدن بر چوقلری ایتالیا و فرا-
 نسه طرفلرینه و ممالک سائریه هجرت ایتیشلر ایسه ده
 عوام ناسدن پک چوغی استانبولده قالدقلری کبی
 مؤخرأ بونلر علیهنده هیچ برکونه اثر شدت کوسستر-
 لیوب بلکه جله سی رایت عثمانیه سایه سنده کمال امن
 وآسایش ایله کچیندکلری کوریلنجه اولدن ترک وطن
 ایلان اهلینک دخی بر طاقی استانبوله عودت
 ایشدر .

ایمدی حضرت فاتحک بقیه مدت سلطنتی بوبابمزلک
 دردنجی فصلنه متعلق مواددن اولمغله بروجہ آتی
 فصل مذکور کیشاد ایلک لازم کیشدر .

(دردنجی فصل)

- دور استیلانک غایتی -

عن ۱۴۵۳ الی ۱۵۷۴

تفصیل - استانبولک فتحی اوزرینه موره طر-
 فنه هجرت ایدن بعض روم زادکانی استانبولده غیب
 ایلدکلری ایمپورلغی آتنده تشکیل ایلک سودای
 خامی ایله موره روملرینی افساده باشلادیلر ایسه ده
 طورخان بکک قومانداسی اتنده بولنان اردو بونلرک

تر بیه سنی و یرمکه کفایت ایلدی . ینه بوقتح مبین
 سنه سنده ایلدی که ممکن اولور سه استانبول امدادینه
 قدر یتشمک ایچون نیش و شهر کو بی وودین و طرنوی
 طرفلرینه قدر اینش اولان مجارلر ایله صر بلیلر اوزرینه
 براردو کوندر یلرک بونلر بوزولدقن صکره تاملرکتلر-
 ینه قدر تعقیب دخی ایدلمش لر و اله کچیر یلان بشییک
 قدر اسیر استانبول جوارینه کتور یلوب بلغراد
 قریه سی کی مجدداً کو یلر تشکیلیله اسکار ایدلمش لر در .
 بومظفریت اوزرینه صرب قرالی سنوی اوتوز بیگ
 التون و یرکو اعطاسیله حایه عثمانیه کیردیکی کی
 وندیگ جمهوری دخی دولت علیه ایله برتجارت معا-
 هده سی عقد ایدرک حتی استانبولده دائمی صورتله
 برده سفیری بولمسنه قرار و یرلدی .

ارناودلق مسئله سی هنوز ختامه ایرمامش اولد .
 یغی جهتله ۸۶۰ سنه میلادیه سنده صرب قرالی
 نقض عهد ایدرک ارناودلرله برلشمکه قیام ایدنجیه
 اردوی همایون اسکوب و قراطووه طرفلرینه توجه
 ایدرک غایت شدتلی بر محاربه و هجوم ایله نوو برادقلعه سی
 ضبط اولنش ایلدی . ونک اوزرینه ذات شاهانه

یوز الی بیك عسکر و اوچ یوز پاره طوب
و ایکوز قایق ایله قره دن و طونه دن بلغراد
قلعه سنی صاره رق تحت محاصره یه الدی و برقاچ دفعه
عسا کر عثمانیه نردبانلری او موز لایوب قلعه بدنلرینه
قدر طرماندی ایسه ده قلعه درونندن شدیداً مقاومت
اولندیغی کی مؤخرأ پایا اوچنجی قایقستک تشویق
ایله طو پلانان عظیم راهل صلیب اردوسی مجاری
هونیادک قومانداسیله امداده قوشه رق بلغراد قلعه
سنی ارتق تحقق ایدن ضبط واستیلادن قورتارمشدر .
بو محاربه ده هونیاد هم یاره لنه رک هم ده خسته لنه رک
نهایت وفات ایش ایسه ده ذات شاهانه دخی کیفیتر
لند کلرندن عودته قرار و یرلشددر .

بلغراد سفری دوام ایلدیکی مدت دونمای همایون
برقاچ دفعه اق دکره چیقوب هر نه قدر ابدالرنده
بر ایشه موفق اوله ماش ایدیسه ده دردنچی
دفعه سنده یونس پاشا قومانداسیله کوندریلان
دونما بر فورطنیه اوغرایه رق یدی کی ضایع
ایتمکله برابر فوجیه موقعی اور یله رق ایکوز
اسیرالنش و اندن صکره تاسوس و سمندرک و امپروس

اطه‌لری ضبط ایله لمنی استیمان ایتدیرلمش و ساقز جز -
 یره سی دخی سنوی اوتوز بیک التون خراجده کسلمش
 ایدی . پاپاجنابلری عثمانلیلرک اشبو ترقیات بحریه لر -
 منی هیچ چکمه مدی . زیرا دولت علیه ترقیات بحریه -
 سنی اکمال ایده جک اولورسه اق دکز سواحلنده برطاش
 طاش اوزرنده قالمه جغنی مهاجرات بریه دن قیاس
 ایله اکلامش ایدی . بناء علیه برده بحرأ براهل صلیب
 دونماسی سوقنه دول بحریه یی تشویق ایدرک واقعا
 کلیتی بر دونما کلمش و عثمانلی دونماسنه کوز آچدیر -
 مامش ایسه ده یالکز لمنی اطه‌سی تابعیت عثمانیه دن
 دونه رک سائر اطه‌لر ایسه حایه عثمانیه یی منت جان عدیله
 آیرلمق ایستما مشلر در .

بلغراددن عودنده شهرادکان حضر اتنک سور
 ختانی بالاجرا ایرتسی ۸۶۱ سنه سنده موره وارناودلق
 و صرب اوزرینه او چ قولدن عسکر سوق اولمش
 ایدی . صربیه صدر اعظم محمود پاشا موراو له رق
 راصوه و قریقو فچه و درونو و برانیس قو فچه قلعه‌لری
 ضبط ایله تلفات کلیه یه متوقف کورینان سمندره قلعه -
 سندن واز یکمیش و قیشی یکجور دکن صکره بلغراد

قلعہ سنہ کلوب جو اردہ واقع حوالہ قلعہ سنہ استناداً
 ہجوم تریتی ایلہ اس-ترویچہ ورونیک ومارژون
 وکوکر جینک قلعہ لرینی الہرق مستحفظ لر تعین ایلش
 ایدی . بوندن ماعدا صاوا و طونہ نر لرینک تشکیل
 ایلدکاری شبہ جزیرہ یدہ برآقین اجراسی محمود
 پاشانک جملہ موقعیاتندندر . بوارہلق صرب قرالی
 ژورژ وفات ایلدیک کی اوغلی لازار دخی وفات
 ایتمکله مقدا مراد ثانی حضرتلرینہ تزویج
 ایلش اولان صرب پرنسی مار یادن بشقہ وارث
 حکومت قالمش و بوحالده پرنس مار یا کنڈیسنہ
 انتقال ایدن حق وراثتی فاتح حضرتلرینہ نقل ایلش
 ایدی . اگرچہ اوزمان پالاق مقامی مار یانک شو حق
 وراثتہ اعتراض ایلہرک سلطان محمد حضرتلرینک
 حقوق جدیدہ سنی بالکلیہ انکار ایچون حکومت
 متجاوردن برطاقم اعتراضجیلر پیدا ایتش ایدیسنہ
 صدر اعظم محمود پاشا ذاتاً صربستانک اک مهم
 رلرینی الہ کچورمش اولدیغندن وادیء اعتراض
 و مخالفہ صاپان حکومت متجاوردہ دخی اوریلوب
 ۸۶۳ سنہ ہجریہ سنہ صربستان کاملاً برعثمانی

ولایتی حاله تحویل قلمشدر.

موره اوزرینه سوق اولناز اردوده حضرت
فاتح بالذات قوماندان اولوب قورنت موقعی محاصره
وبتون یونانستانی جولان ایله اتنه یی و سائر برچوق
شهر وقصباتی ضبط ایتش ویالکز وندیک جمهورینک
بندرگاه تجارتی اولان برقاچ لیمانی انلره ترک ایله طاعلق
طرفندن انصرپ بعض یرلر دخی یونان سنورلرینک
النده قالمش ایدی . کندیلری یونانستانده ایکن ارنا .
ودلغه اسکندر بک اوزرینه سوق ایلدکلی برقول
اردوگاه غالب وگاه مغلوب اولدیغی کبی برارهلق
تکرار براناطولی مسئله سی اچلدیغندن اسکندر بک
ایله بالمجبوریه متارکه عقد اولمشدر .

اناطولی مسئله سی دیدیکمزشی قره دکرده آماصره
مثلاو بعض تجارت بندرلرنده بولناز جنویزلر ایله
سینوب واق قیونلی حکومتلی و طربزونده کی روم
حکومتی میانده حاصل اولان برمنازعه اولوب منازعه
مذکوریه یی اساسندن قلع وقع ایچون برأ و بحرأ
واریله رق آماصره برمحاصره بحریه ایله انمش و سینوب
کندیلکندن عرض تسلیمیت ایدرک و قسطهونی امارتی

براً استیلا وحذف ایدیلرک امیری بولنان اسماعیل بکه
 بروسه جوارنده مالکانه لر ویرلشدیر . طربزون
 امیر اطوری ایسه آق قیونلی امیری اوزون حمله قزینی
 ویردیکی کبی ویرکوی سنوینسی دخی اکا ویرمکه
 قالدشیدیندن اولاجزه بک قوماند سیله اوزون حسن
 اوزرینه براردو چیقاریله رقر ضرومه قدر زیر ضبطنده
 بولنان ممالک التاوست ایدلدکن صکره ۸۶۶ سنه
 هجریه سنده فاتح سلطان محمد حضرتلری طربزونی
 دخی بالمحاصره ضبطالشدیر .

بواشاده افلاق طرفنده پرنس بولنان و مظالم فوق
 العاده سندن ناشی اولاجلر نزدنده « چیل پوج » یعنی
 جلاد و « دراقولا » یعنی شیطان نامیله بنام اولان
 « ولاد » نام پرنس کندی تبعه سی اوزرنده کی مظالم
 بی نهایت سندن ماعدا هر سفره یه اوتوردقجه عثمانلی اسرا
 سندن بر قاج دانه سنی شهید ایدرک انلرک موتنی تماشا
 و بعده وجودلرینی شرحه شرحه یاردیروب طوز
 اکدیررک کابلره یالاتمق کبی ملعنترلایله تمسخر ایلدیکندن
 مغایر انسانیت اولان بومثللو احواله نهایت ویردیرلمسی
 ایچون افلاقه بر هیئت سفارت کوندرلش ایدی . اشبو

هیئت سفارته باشلی آچیق اوله رق حضورینه
چیقملرینی تکلیف ایلدکده بویله شیر عثمانلی اصول
تشریفاتنده اولدیغی جوابی ویریلنجیه قاووقلرینی
باشلرینه میخلاتوب انلری ده بوصور تله شهید ایلش
ایدی . دفعه ثانیه ده سفارته کوندر یلان چاقر حزه
پاشا ایله کاتبک دخی الارینی ایاقلرینی کسد کدن صکره
قازیغه اورمغله ارتق بواحواله قارشو پادشاه مالجه
حضر تلی غیرته کله رک برأ صدر اعظم و بحر و نهر
طریقیه ده دخی ذات شاهانه افلاقه هجوم ایلش
ایدی .

ولاد شیطانلری بیله عاجز براقه جق بر سرعت
ومهارتله نیجه باصقنلر و هجوملر ترتیب ایدرک اردوی
همایونی کرکی کبی یورمش ایسه ده فاح حضر تلی
دخی نیجه تداییر ابلیسفر بیانه ایله مر قومی مجارستانه
قدر قاچیرمش ایدی . حاله و که اول ملعونی مجار لیلر
دخی قبول ایتدکلرندن بلغر اده یقاله یوب زندانه
اتمشلر و بونک اوزرینه افلاقلیلر ولادک قرنداشی رادول
نام دیگر بر پر نسی کندیلرینه وویوده نصب ایتشلردر .
۸۶۷ سنه سننده مدلولو یه سوق اولن ان بردونما

جزیره مذکورہ میں ضبط ایلاہ شوکت بحریہ میں آر تدر۔
 مق ایچون یکیدن کیلر انشاسنه وآق دکز بوغازندہ
 سد البحر وچناق قلعه لری بناسیلہ جسمیم طو پلر تعبیه۔
 سنہ مباشرت اولمش وبریاندن دخی یوز الہی بیگ
 کشیک براردو بوسنہ یہ صالدیر یلہرق قرالی قتل
 اولنسدیغی کبی امدادہ کلان مجارلیسلر دخی مغلوب
 ایدلشدز۔

ذات شاہانہ اناطولی وافلاق وبوسنہ ایشلریلہ
 مشغول ایکن مورہدہ بولنان روملرینہ اورادہ کی
 ونڈیکیلر ایلاہ بالاتفاق مورہ شیبہ جزیرہ میں استردادہ
 قلعہ شد قیلرندن اورایہ عسکر سوقیلہ برابر ونڈیک
 جہورینہ دخی اعلان حرب ایدلمش ایسہدہ اوزمانلر
 بزم ترقیات بحریہ مزہنوز ونڈیکیلر درجہ سندنہ
 اولمدیغندن بو محاربہ اون الہی سنہ قدر اوزانوب
 کتشدز۔

قرہمان امیری اولوب خاندان سلطنتلہ صہریتی
 دخی بولنان ابراہیم بک ۸۶۹ سنہ ہجریہ سندنہ وفات
 ایتکلہ قرہمان امارتی یدی نفر اولادی میمانندہ منا۔
 زعدلی قالب آق قیونلی اوزون حسن ایسہ بالاخرہ

قره‌مائی ده ضبط ایچون بویدی قرنداشی افساده
 باشلا دیغندن ذات شاهانه اناطولی یه کچه رک سلف که دن
 ماعدا بتون قره‌مان ولایتی استیلا ایلش ایدی ۸۷۰
 سنه هجریه سننده اسکندر بک اوزرینه یکیدن عسکر
 کوندریلوب کیدن عسکر اوخریده بوزملغله بالبان
 مادره اسمنده برارناود سرکرده سنک رفاقینه بر قول
 اردودها کوندریله رک اوده بر قایچ دفعه غالب و مغلوب
 اولدقدن صکره نیجه مشکلات ایله رات و ایل بصان فتح
 اولنه بیلش ایدی ۰ هله ۸۷۱ ده اسکندر بک وفات
 ایلکله اوتوز سنه قدر دوام ایلان عنادینه نهایت
 ویرلمشدر ۰

اسکندر بک وفاتی اشناسنده هر سک پر نسی دخی
 وفات ایلدیکندن حاضرالده بولنان ارناودلق اردوسی
 هر سکه سوق ایله اورالری بالسهوله ضبط اولنه -
 بیلدی ۰

اشبو ارناودلق و هر سک سفرینک خاتمه سی اولق
 اوزره بر یاندن مجارستانه اقینلر ایدیلدیکی و بر یاندن
 دخی فوچه ایله جزایر بحر سفیدی یا قنده بولنان وند -
 یکلیلر اوزرینه صدر سابق محمود پاشا بردونما ایله

کوندریلوب دشمن پوسکورتیلهرک اغریپوز جزیره سی
 یگ شدتلی بر محاربه و تلفات کلیه ایله ضبط اولندیخی
 حالده دیگر جهتمدن قره مانلی ابراهیم بک زاده قاسم بک قره مان
 امارتی نامنه قالان سلفکده اوزون حسن و طورغود
 و دارساقلیلر ایله بالاتفاق عصیان ایتمر یله بونلرک
 اوزرینه کیدن صدر اعظم اردوسی ۸۷۴ سنه سنده
 مغلوب اولدیغندن اسحق پاشا و کدیک احمد پاشا قوما
 نده لرنده ایکنجی بر اردودخی کوندرلمش ایدی . اشو
 ایکنجی اردو قاسم بکی اوزون حسنک ممالکنه قاچر
 تهرق مرقوم اوراده غائب و نابید اولمش ایسه نه
 بعض عشایر متجاورنک التحاقیه قوتنی آرتدیرمش اولان
 اوزون حسن ارضرومدن حرکتله توقات وحید طر
 فلرینه ایلرولوب تیمورلنکه تقلیداً اوزمانه قدرملکری
 ممالک عثمانیه الحاق ایدلمش بولسان ترک پرنسیرینی
 باشنه طو پلامش و بونلردخی مقدا کندیلرینه تابع
 اولان اهاالی بی ایاقلاندیره رق الحاصل اوزون حسن
 قره مانه قدر بتون ممالکه اوزانوب کیتمش ایدی .
 نهایت ۸۷۷ سنه سنده شهزاده مصطفی بک کلیتلی
 بر اردو ایله واروب بر طرفدن ذات شاهانه دخی

ارمنستانه قدر ممالکی هرج و مرج ایتکله
اوزون حسن خیلیدن خیلی صار صمغه موفق
اولمشردر . حالبوکه وندیک محاربه سی حالا
دوام ایتکده اولدیغی کبی پاپانک تشویقیله فرانسه
والمایا واسه پانیا وایتالیادخی وندیک ایله اتفاق ایلد .
کلرندن بحرأ بونلرک وبرأ دخی اوزون حسنک دولت
علیه بی صیقشدرمی قرارلشدیرلش ایدی . طرفین
متفقین ارمه سنده سفیرلر کیدوب کلهرک قراره قوت
ویرلدکن صکره اوروپا دونمائی اناطولی سواحلی
اوروب سلفیکده حسنک امدادینه قوشمش ایسه ده
اوزمانه قدر اوزون حسن شهزاده مصطفی بک ینده
کاملا پریشان اولدیغندن بودونمانک هیچ بر فائده سی
اوله مامشدر . شهزاده مصطفی بکک وفاتیه دیکر
شهزاده سلطان جم قره مان والیسی تعیین اولندقد
مشار الیه اورالری کاملا اطاعت التنه المغه موفق
اولمشدر .

اشبو آسیا محارباتی دوام ایلدیکی مدت روم ایلی
طرفنده دخی دالماسیا و خرواستان و مجارستانه آقینلر
ایدیلور ایدی که بو کردلن قلعه سی بر یاندن محاربه

ایلیورکن بنا اولمشدر . دیگر بر قول اردو دخی
 کاشقودریه قدر کیدرک قلعه بی محاصره ایتش ایسه ده
 دورونده کیتلی وندیک کوکلورلی بولندیغندن ظفر
 محکم اوله مامشدر .

۸۸۰ سنه هجریه سنه کدیک احمد پاشا اوچ یوز
 یوله تکه نه ایله قره دکره چیقهرق جنویز تجارتگاهلر -
 یکنه کافه سنی ضبط ایتدیکی کبی قریم و کفه یی دخی
 یلاستیل اولاد جنکیریه دن اوله رق کفه ده بولنان
 شکلی خانی قریمه خان نصب ایتشدر . ایرتسی سنه
 قی کرمان ضبط اوله رق اورادن مجارستانه و خروا -
 تستانه بر آقین اجراسیله طوغریجه وندیک اوزرینه
 ویرایش ایدی . وندیک بویله مرکز اداره سنه ایدیلان
 هجوم بتون ایتالیایی لوزناک ایلدیکندن ۸۸۲ سنه -
 سنه وندیکلیلر صلحه مجبور اولدیلر . شرائط صلحه
 اقتضاسیجه اشقودره و موره طرفلر نه قدر وندیک
 یترلری واریسه دولت علیه ترک اولندیغی کبی
 دفعه او توز بیک دوقه التونی مصارف حربیه النوب
 مستوی اون بیک التون دخی خراج ویرملک اوزره اون
 الی سنه لک محاربه یه ختام ویرلدی . اندن صکره

زانطه وآياماور واطه لری اورلیدیگی کبی ونیدیک مصاحف
سنک ایتالیا یه شمولی اولمیدیغندن ایتالیا سواحلنده واقع
یولیا و او طر انته دخی اوریلوب ضبط ایدلش ایدی .

جزایر بحر سفیدك حدود شوکت عثمانیه داخلنه
کیر مسیله برابر ردوسده سن ژان شیوالیه لرینك بقاسی
تجويز ایدلدیکندن ذات شاهانه ۸۸۴ ده بالذات
ردوس اوزرینه حرکت ایلش بولندیگی حالده استا
نبول جوارنده واقع ککبوزه نام محله کلدکده وفاتی
وقوعیله بالطبع بوسفرده دوام اولنده مدی .
کرچکدن فاتح جداً جهانگیر بر پادشاه سلیمان تدبیر
ایدی .

حضرت فاتحك سفر بر حالنده ایکن اول صورتله
وقوع وفاتی ایاقده بولنان قوجه اردو بی هرج و مرج
ایده جکی جهته وفات شاهانه اردودن مکتوم طوتمش
وآماسیه والیسی شهزاده اکبر بایزید ثانی حضرتلرینه
خبر کوندر یلوب فقط اوصره ده دیگر شهزاده سلطانه
جک نفوذ و اقتداری دخی بر کمال بولمغله صدر اعظم
بولنان نشانجی محمد پاشا شاید ایکی برادر اره سنده بر
نفاق وقوعه کلورده سلطان جم غلبه ایلر ایسه شمدیدق

کنندیسنه بر چیمله عرض ایدلمش اولمق ایچون اکادخی
کیونجه و بشقه جه بر خبر کوندرومش ایدی .

بو خبر لر اوزرینه ایکی شهزاده نك ایکیسی دخی
یوله چیفه رق فقط بایزید ثانی حضرتلری دها اول
یقشمکه جلوس بخشیشنی ارتق بر عارسلق اتخاذا
المش اولان یکی چری بی بخشلر ایله اسکات ایلیه رک
ثانی سلطنت اولمش و سلطان جم ایسه انجق بروسه ده
قدر کله بیله رک طرف بایزید خانیدن ایاس پاشا ایکی
یک اتلو ایله بروسه دن شهزاده جی کیرویه چویر -
مکه مأمور اولمش ایدی . بو مقابله ده ایاس پاشا مغلوب
اوله رق سلطان جم استانبول اوزرینه دخی یورومک
تدارکنده ایکن بایزید ثانی قوه کلیه و کافیه ایله داریجه
ایزیق جوارنده سلطان چک پیشدارلرینی بوزدیغی
کبی یکی شهر جوارنده اصل سلطان جم اردوسنه دخی
غلبه ایدنجه سلطان جم مجروحاً فرار ایتشیدی .

بو غلبه اوزرینه بایزید ثانی حضرتلری بروسه ده
عودت ایلدکده یکی چری طائفه سی کو یا سلطان جه
بروسه اهالیمنک اطاعت کوسر می سلطان بایزید
حضرتلری حقنده برنوع عصیان اوله جغندن اصل

مقصود لری یغما کرلک اولمق اوزره مملکتی یغما یه قویو -
 لمغله بر چوق احسانلر و التفاتلر ایله بو یغما لک ده کوچ حال
 ایله اوکی انه بیلشدر •

سلطان جم تامصره قدر فرار ایدرک اورادن حج
 شریفه عزیمتله عودتده قره مان اوغللری بقیه سندن
 قاسم بک و انقره و الیسی محمود بک کبی بر طاقم امرای
 کندیسینه اویدیر هرق ذاتایک شجیع و غیور بر شهراده
 اولمق حسه بیله بر اداری علیهنه بتکرار اعلان عصیان
 ایدنجه بودفعه دخی اوزرینه اردو کوندر یلهرک فرقه -
 سی پریشان ایدلشدر • بایزید ثانی حضر تلری یو
 مثللو قرن داش غوغالری ملکی خراب ایتکدن بشقه
 بر نتیجه انتاج ایتیه جکندن بحثله اگر کلوب طلب عقور
 و امان ایلر ایه بر قیلنه بیله خطا کتور لیه جکی حقتده
 سلطان چه خبر کوندر مش ایه ده سلطان جم بو خبره
 امنیت ایده مدیکندن اوزمانلر ردوسده حکومت
 سورن سن ژان شوالیه لری نزدینه کیدرک عرض دخالت
 ایلش ایدی • شوالیه لر ایه کندیسینی ردوسده محال
 فظه ایده میهرک رومایه کوندر وب اورو پاده بر خیل
 زمانلر سلطان جم پاپا و فرانسه نک دولت علیه قارشو

اولان پولتیقه لرنده مدارفساد و احتیال اولدقدن صکره نهایت برروایتہ کوره مسموماً وفات ایلشدیر .

سلطان جم غائله سی برطرف اولدقدن صکره یعنی ۸۸۸ سنهٴ هجریه سنده ونڈیک ورا کوزه و مجارستان حکومتلری ایله مصالحه لر بالتجدید ایرتسی سنده مولدو و طرفلرینه بر هجوم ایدلمش و بوجومده کیلی شهری ضبط اولنهرق اندن صکره ایکی سنه قدر صرف اصلاحتات داخلیه حصص همت بیورلمشدر .

بوعصر اندلس اسلامک دوچار ضعف اولدیغی عصر اولسیله اندلسلیر دولت علیه عثمانیه نك تراید شوکتی کورهرلکندیلمرینی اسپانیول استیلا سندن قورتارمق ایچون استمداد نامه لر کوندر مشلر ایسه ده اوصره ده قره مان ایالتنده رمضان اء غلاری دیدہ شهرت بولان خاندان اعضاسنک بعض نفاق و شقاقی مصرده متشکل حکومت چرا کسه نك دخی عظیم براردو ایله اناطولی ایچنه طوغری یورومسنی استلزام ایلدیکندن دولت علیه نك شویله بر مشغولیت داخلیه سی اندلس امدادینه یتشمکه مانع اولدیغی کبی اندلسک ممالک شاهانه بعدی واورو یا پولتیقه سنک بر طاقم مقتضیات

دخی اسباب مانعه دن اوله رق بیچاره اندلسیلره لزومی
 وجهله معاونت اولسه مامش ایدی . اکر اندلسک
 اشبواستمدادی مؤخر خیرالدین بار باروسلر زماننده کی
 شوکت بحریه من دورینه تصادف ایش اولسه ایدی
 هیچ شبهه یوق ایدی که عظیم بردونتمایایله قوجه
 اندلسک امدادینه قوشیله رق اسپانیا قطعه سنک بر
 اقلیم اهل اسلام اولسی حیثیتی بو کونه قدر محافظه
 ایدیله یلمور ایدی .

اناطولینک سالف الذکر هرج و مرجی اوزرینه
 قره مان والیسی قره کوز پاشا بر اردو ایله مصر یلر
 اوزرینه مأمور اولدیسده اوچ دفعه صره سیله مغلوب
 اولشیدی . مؤخرأ یعقوب پاشادخی ایکی دفعه مغلوب
 اولنجه هر سه کلی احمد پاشا کرک مصر یلری و کرک
 اناطولی عاصیلرینی تر بیهیه بر قوه عظیمه ایله مأمور
 اولمش ایسه ده اودخی مغلوب اولدقدن ماعدا اسپر
 دخی دو شمش ایدی . نهایت صدر اعظم داود پاشا
 کلیتی بر اردو ایله حرکت ایدرک الا طاعه کلدکده
 بردن بره بر یا کلتماج حرکت ایدرک اردو خلقی بیله
 صدر اعظمک توجهی مصر یلر اوزرینه ظن ایدرلر

ایکون قره‌مان اوغلی قاسم بک اوزرینه تبدیل حرکت
ایلدیسه زکر اولسان عاصیلر غافل آرنلانه رق حلبه
قدر پوسکور تلمش ایدیلر . دیکراییکی قول اردو دخی
چرا کسه اوزرینه صالدیر یله رق بونلر دخی بوزیلنجه
ارتق هر سکلای احمد پاشانک سبیلی تخلیه قلمش ومصلا
لحه استدعاسیه ایلچیلر کلش ایدی . صدر اعظم بو
ایلچیلرک استدعالرینی قبول ایتیه رک محار به ده دوام
ایلدی . خادم علی پاشا کرک چرا کسه نک و کرک
قره‌مان اوغلارینک ضبط ایش اولدقلمی ممالکی
برر برر حرباً استرداد ایلیه رک هر طرفدن روی
غالبیت بزه توجه ایلدی . واقعا مصر لیلر دخی شام
وحلب و طرابلس و رمله و صیدا طرفلرندن یکیدن
عظیم براردو ترتیبیه هجومی تجدد ایلدیلر بواردو
طرسوس پیشکاهنده اغاچایری نام محله داود پاشا
اردوسیه تلاق ایلد کده ناطولی عسکری قره‌مان زاده لر
ایله آنلرک متفقلمی طرفندن بالاغفال دشمن طرفنه
بوز چویرمش وروم ایلی عسکری هر نه قدر صوک
درجه لرده ثبات و متانت کوسترمش ایسه ده نهایت
بوز یلوب اطنه یه قدر ممالکینه مصر یلر انه
دوشمشدر .

بومغلو بیت ۸۹۴ سنه سنده وقوعه کله رک ایرتسی
 سنه اہمیتلی بر حرکت عسکر یه اولدیغی جہتله مصر -
 لیلر تاقیصر یه یه قدر ایلر ولمش لر ایدی . بناء علیہ
 ارتق ذات شاہانہ نک موکب ہمایون ایلہ حرکتی لازم
 کلدیکندن موکب ہمایون اسکدارہ یکوب تمام یولہ
 دوزلہ کدہ مصر لیلر اور کله رک تونس حاکمی عثمان
 ابن حفصینک وساطتیلہ وچہ وراوودہ کائن اوج
 مملکت نہ عثمانلی یه ونہ مصرلی یه تابع اولیہ رق ارہ
 یردہ حدفاصل اولمق اوزرہ مستقل و مختار قالمق شرطیلہ
 ۸۹۶ سنہ سنده عقد مصالحہ یه طرفینجہ رضا کو سترلمشدر .
 ایشته بو غائلہ دخی بر طرف اولدقدن صکرہ شمدی یه
 قدر برقاج دفعہ باشلانمش اولان بلغراد فتحی ایچون
 صوفیہ اوزرینہ طوغری حرکت اولندی . لکن
 ارناودلر ایلہ بردہ طونہ بوینک بعض محاررندہ بولندیر -
 لمقدہ اولان ترک عسکرندن مرتب پیشدارلر مجارلولر
 یندہ مغلوب اولدیغندن اردوی ہمایون بلغرادی
 یراقوب بوسنہ جہتہ توجیہ حرکت ایتمش و برچوق
 محارلر اور یلوب النددقدن صکرہ صوفیہ عودت
 اولتمشدر .

اورادن ذات شاهانه مناسبت و پر لیه طریقیله ارنایا -
 ودلغه کیرمش ایسه ده اوستریا ایچنه طوغری ممالیکی
 هرج و مرجه مأمور ایدیلان اوچ قول اقینجیلر لک اوچی
 بردن مغلوب اولدیغی و حتی بو اوچ قولدن بریسی
 قوماندانی بولنان میخال اوغلی علی پاشا ایله برابر دشمن
 طرفدن قور شونه دیزلدیکی خبری کلمسیله مؤخرأ
 بوشمال سفرینه بر نتیجه قطعیه ویر ملک قرار یله ۸۹۸ ده
 یعقوب پاشا سکزی بیکیچیری ایله استانبولدن چیقوب
 صربستان طرفلرنده بولنان عساکری دخی الهرق
 قوتنی تزیید ایلد کدن صکره بحار پر نسلری میاننده
 وقوعه کلان بر منازعه بی فرصت اتخا ذیله اول قدر
 غلباته مظهر اولمش ایدی که غلبات مذ کوره بحار لیلر -
 دن معزیاده انتقام درجه سنه وارمش ایدی . حتی مؤخرأ
 عموم پر نسلر بالاتفاق عساکر عثمانیه اوزرینه هجوم
 ایلد کیری حالد هجج بر شیئه موفق اوله مد قلدن ۹۰۰
 سنه سنه ده اوچ ییل مدت تمتد اولق اوزره بر متار که
 عقدینه مجبور اولدیلر .

اشبو بحار غلباتی اثنا سنه بر قول اردودخی بوسنه
 طرفدن هجوم کوستر و ب قوموتیا و ترساز ورتوا

وقوسن وروار قلعه لرینی ضبطله برابر دالماجباه دخی
کیرمش واوراده دخی زارا دریفیج وزرقینج ولواج
واوبرلباش طرفلرینی ازوب بتورهرک لهستان ایچلر -
ینه سوق اولنان سلسلره والیسی بالی بک دخی تکمیل
لهستانی چکنیوب غانماً عودت ایلشدر .

روسیه دولتنک بوزمانلر هنوز اسمایسی اوقو -
نمیوب باخصوص دولت علیه عثمانیه ایله برکونه
مناسبتی بولمیدیغی حالده ۹۰۴ سنه هجریه سننده حکو -
مت مذکوره ایله ایلاک دفعه اولیق اوزره بر تجارت
معاهده سی عقد اولمشدر .

۹۰۵ ده اشقودره طرفدن وندیك حدودی تجاوز
ایدیلهرک وندیکیلر دخی بحرأ کلوب کفالونیا اطه سنی
ضبط و پرموزه ده عثمانلی دونماسنی احراق ایلشدر
ایدی . ذاتاقوردوس وناوارین و سائر بعض سواحل
ینه وندیکلر لنده بولمغله ۹۰۶ ده ذات شاهانه
ادرنه دن موریه برأ عزیمتله سواحل مذکوریه یی
ضبط واسترداد ایلینجه وندیکیلر پایا و المانیا ایمراطوری
ایله انکلتزه و فرانسه واسپانیا و ناپولی و لهستان و مجار -
ستان حکمدارلرندن بالاسمده داد غایت کیتلی بر متفقین

دو نمانسی اق دکره مستولی اولدی . بونلر اوزرینه
 عثمانلی بحر یونندن مشهور کمال رئیس اناطولی سوا-
 حلنده نه قدر ترك قورصانی وار ایسه طو پلایه رق
 میدانه چیقوب اورو پاکیه لرندن بر چو غنی صید
 وشکار ایله کلری کبی ظهور ایدن عظیم بر فورطنه
 دخی دشمن جانبنده تلفات کلیه یی موجب اولدیغندن
 اعدای متفقہ خیلی رخنه دار اولمش ایدی . بوندن اول
 اولدیغی کبی بودفعه دخی وندیکیلر اناطولیده مستعد
 عصیان اولان قره مان زاده لر ایله سائر بر طاقم امرای
 ایاقلندیر مقله انلر دخی بر یاندن دولتی از عاجه باشلا-
 یلر . بنابرین ۹۰۸ ده دول متفقہ ایله مجبوراً متارکه
 عقد ایدیلرک اناطولی عصاتندن تکه وحید وایج ایلی
 عشایری اوریلوب دائره اطاعته صوقلش و دکرجه
 محاربه ده اصرار ایلیان وندیك دو نمانسنه دخی غلبه
 . میسر اوله رق نهایت ۸۱۴ تار یخنه قدر اصلاحات
 داخلیه ایله اشتغال ایدلشد .

دولت علیه نك اوزمان اصل نظر دقنه شایان
 اولان جهت ایران جهتی اولوب اوراده شیخ حیدرک
 اوغلی شاه اسماعیل کیتدکجه قوتنی آرتدیردیغی کبی

اناطولی عصیانده اشتراك ايله رك مؤخرأ مرعش
 طرفلرینه قسدر آقین ترتیب ایتیش ایدی . بناء علیه
 بایزید ثانی حضرتلری ایران اوزرینه دخی برسفر
 تصمیم ایلدیلر ایسه ده وجود شاهانه یه ضعف کلی
 طاری اولدیغندن ممکن اوله مدیغی کبی ولی عهدلاک
 مسئله سندن طولایی شهزاده لر ارسنده ظهوره کلان
 برنفاق دخی بو تصمیمه مانع اولمش ایدی .

ولایت عهد نفاسی بایزید ثانی حضرتلرینه ک
 سلطان احمدی ترجیحلرینه مقابل علما طرفندن سلطان
 قورقودک ترجیح ایدلمسندن نشأت ایلش و حاله بوکه
 شهزاده سلطان سلیم چله یه معارض چیقهرق ۹۱۶ ده
 جبراً استانبوله کیرمک ایچون ادرنه یه قدر کلش ایدی .
 سوق اولنان برفرقه عسکر اکرچه شهزاده مشار
 الیهک معیتنده کی عسکری بوزه بیلش ایسه ده نهایت
 یکپیری بی دخی کندیسنه جلب ایدنجه غالییت کلیه
 مشار الیه طرفنده قالهرق ۹۱۸ سنه سنده زمام سلطنتی
 جبراً پدیری یندن آلدی و بونک اوزرینه بایزید ثانی
 حضرتلری دیمتوقه یه کیدر ایکن یولده قهرندن وفات
 ایلدی . هر حالده موفق بالخیر و فقط اقچه یه میلی
 زیاده بر پادشاه ایدی .

سلطان سلیم حضرتلرینک کوسترمش اولدقلری
 جرأت بتون دنیایی و بالخاصه برادرلرینی تتره توب
 هرکس حیرته ایکن مشارالیه هیچ برکیمسه یی قورقد -
 یغنه اوغراتمیوب حتی برادرلرینی بالتأمین پدرلری
 زماننده والیسی بولندقلری ولایتله تکراروالی تعیین
 واعزام ایلش ایدی . یالکز سلطان احمدک اوغلی
 علاءالدین کندی پدری طرفندن کوردیکی تشویق
 اوزرینه برارهلوق اظهار عصیان ایلیه رک بروسه
 اوزرینه هجوم ایتسیله سلطان سلیم درحال معیتنه
 اتماش بیک عسکرالهرق ییلدیرم کبی یتشدیکندن علاءالدین
 اصلا مقاومت کوسترمیه رک باباسی یانسه التجا ایلش
 و بونک اوزرینه سلطان سلیم اماسیه اوزرینه دخی
 یورودکده کرک سلطان احمد و کرک اوغلی علاءالدین
 کاح طرفلرینه فرار ایتش ایدی .

بوحرکته سلطان سلیم مظفرآبروسه یه عودت
 ایلدکده سلطان احمد برطرفدن ایرانه اوغلنی کوندروب
 شاه اسماعیلدن استمدادله برابر دیگر طرفدن ینه اماسیه
 اوزرینه یورو یهرک ضبط ایدنجده سلطان سلیم حضر -
 تلی بوفسادده صدر اعظم مصطفی پاشانک یارمغی

اولدیغنی اکلایه رقانی قتل ایله بروسه ده بولسان بش
نفر برادرزاده لرینی دخی ازاله ایلشیدی . حتی دیگر
شهرزاده سلطان قورقود دخی غضب هم ایونه اوغرامغله
اوزرینه وارلدقده مغنیسا طرفلرینه قاچارایکن ترکمنلر
النده ازاله اولمشدر .

بوفاجعه لرهب جلوس سنه سی اولان ۹۱۸
سنه سنه وقوعه کلوب ایرتسی سنه سلطان احمد ایران
طرفندن دخی کوردیکی معاونت اوزرینه یکریمی بش
بیک قدر عسکر ایله بروسه اوزرینه هجوم ایلش و حتی
سلطان سلیم ایلک مقابله سنه ده غلبه ایتش ایسه ده نهایت
مغلوب دوشمکله اوده اعدام اولمشدر .

سلطان احمدک ازاله سندن صکره اوغلی علاءالد
ین مصره فرار ایدرک حالبوکه دیگر ایکی قرداشلری
ینه استمداد ایچون شاه اسماعیلک نزدنده ایدیلر .
ایمدی بو قدر سرعت حرکت و شدت مجازاتیه « یاوز »
عنوانی الان سلطان سلیم ارتق رقیبلر اندیشه سندن
قورتلقدن صکره دول متجاوره ایله مصالحه نامه لر
تجدید اولمش و یالکز ایران دولتیله تجدید مصالحه
وقوعه کلامش اولدیغندن هر کس یقین و قتده بر ایران
سفرینه منتظر بولمش ایدی .

اشبو ایران سفر عظیمه اوزمانه قدر اناطولی
 قطعه سی اوزرنده توره مش بولسان قرق بیك قدر
 شیملرک قتل عامی صورتیله باشلانمش ایدی . بوسفری
 تسهیل ایچون ذوالقدریه امیری علاءالدوله ایله ایران
 علیمنه اتفاق ایدمک ارزو اولندیسه ده علاءالدوله نك
 مصر ایله مقدا اتفاق اولدیغندن بودفعه سلطان
 سلیمك دعوتنه اجابت کوستر مینجه یاوز سلطان سلیم
 غضبلنوب تک باشنه ایرانك حقندن کلکه طاوراندی .
 اولا سیواسه اورادن ارزنجانه واروب اتای راهده
 بایوردی ضبط ایدرک فقط هنوز ایران شاهنی راست
 کتوره مینجه تبریز اوزرینه قدر یورومک ایچون
 چالديران طرفلرینه توجه ایلدی . بایزید قلعه سی
 بو ائناده النمشدر . ۹۲۰ سنه سنده چالديران اووا .
 سنده شاه اسماعیل اردوسیه برابر باش کوستر مسیله
 همان صفلر باغ-لانوب جنکه مباشرت اولندی . بو
 محارب بهر چکدن خونریزانه بر محارب اولوب ایران
 اردوسی عقللره حیرت ویره جک بر متانتله غوغا
 ایتدکن صکره بوزولدی . شاه اسماعیل تبریز
 اوزرینه رجعت ایدنجه سلطان سلیم تبریزه دخی

یوریدی • عجم عسکری اورادن دخی رجعت
کوستر مکه اطراف و جوار هرج و مرج ایدیلرک
کورجستان بکری طرفدن دولت علیه یه عرض
اولنان اطامات بالقبول قشلاق ایچون اما سیه یه
عودت یوریدی •

بوقدر غلبه اوزرینه ارتق ذوالقدریه لی علاءالدوله
نک دخی تکلیف اولنان اتقاق قبول ایتدیکندن طو
لانی جزاسی ویرلمک لازم کلدیکندن ینه ذوالقدریه
خاندانندن شہسوار زاده علی بکه بوزوق سنجاغی
علاءالدوله دن نزاع ایتک ما موریتله قیصریه والیلکنی
توجیه یوردی • وفی الواقع علی بک حیدرانه بر مظفر
یتله ذوالقدریه حکومتی علاءالدوله دن نزاع ایلدی •
حالبوکه علاءالدوله ایله مصر اراسنده موجود اولان
اتفاق مناسبتله امیر مومی الیه علیهنده کی شو معاملہ
مصر دکی حکومت چرا کسه بی دخی دلکیر ایتیش
اولدیغندن ۹۲۱ سنه سی موسم بهارنده سلطان سلیم
حضر تری کاح طرف لری دخی ذوالقدریه دن نزاع
وقف ایلدی • مصر طرفدن سفیر کلہرک ذوالقدریه
خاندانی مصر حمیسی اولدیغی بیانیله شہسوار اوغلنک

عزلی طلب و التماس ایملر در . بالطبع صورت التماس
موافق رأی پادشاهی اولمديغندن شهسوار زاده علی
بك ايله صدر اعظم سنان پاشا نك معينه اون بيك
اتلي و يريله رك البستان ضبط اولمش و علاء الدوله
ايله برقاج نفر اولادينك باشلى كسيلمش ايدى .
اشبو كسبك ققار مصرده كي حكومت چرا كسه يه
كوندرليككه محميرك دوچار اولمديغى شو حاله يقينه
حاميربك دخى دوچار اوله جقلى اشعار ايدلديكندن
مصر خيلجه تلاشه دوشورلمش اولدى .

اشبو سفرى دخى قوه دن فعله كتورمك اچون
ستانبوله عودت هم ايون وقوع بولمده اول بول
مكمل بردونما انشاسنه تشبث قلندى . انجق مصر
سفرينك بجله اسباب متمه سندن برى دخى اناطوليجه
بولن ان ايليشكى كسبك ايدى . بونك اچون
۹۳۲ سنه سنده كرستانه براردو كوندريله رك اورالى
كاملا فتح ايدلدى . واندن صكره دولت چرا كسه
اوزرينه دخى محاربه اعلان اولندى . برا حلب اوزرينه
واران اردوى هم ايون حلب پيشكاهنده مصر ملكى
قانسو غورى يه تصادفله آچيلان محاربه ده مصر

عسکری دها یکچیرینک ایلک هجو مننه قارشو ردیلرته
 برانهمزام کوسه تر دکلرندن سلطان سلیم حضر تلی
 بو محار به ده کمال درجه مظهر مظفریت اولدی . حتی
 غورینک لاشه سی دخی میدان محار به ده بولندی .
 بو غلبه اوزرینه اله چکن مال غنایمه نهایت یوقدر . حتی
 مصریلرک انهمزامندن صکره حلب و حما و حص و شام
 دخی کال سهولته ضبط اولندیلر . سلطان سلیم
 حضر تلرینک نام عالیترینه « خادم الحرمین الشریفین »
 دیه ایلک خطبه حلبده او قونمشدر . شامک قحندق
 صکره اردوی همایون نابلس و قدس و غزه قلعه لرینی
 دخی ضبط ایله مصر اوزرینه یوریدی . غورینک
 انعدامندن صکره سلطان مصر انتخاب اولنان طوما .
 نبای سلطان سلیمه مقابله یه چیقدی . چرا کسه مصریه
 حقیقه جنکاور آدم لر اوله رق بودفعه ایسه صکره
 درجه یه قدر مقاومتی کوزه الیرمش بولمیرله قاهره
 پیشکاهنده دو کیلان قانلر اوزمانه قدر امثالمر ایدیلر .
 نهایت مملو کبر بو دفعه دخی مغلوب اولغله سلطان
 سلیم حضر تلی ام دنیا یه دخی مالک اولدیلر .
 اشتهو مصر فتحی دولت علیه بی اساساً تأیید

ایده جک بر فتح مبین اولشدر . زیرا عباسیه خاندان
خلافندن اولوب مصرده ، حالا بر کوشه ده بولنان
متوکل علی الله حق عنوان خلافتی حضرت سلیم
غیراع انلشدر که بوعنوان جلیک بین الاسلام اهمیت
مال العالی محتاج ایضاح دکلدر .

سلطان سلیم حضرتلرینک اشبو مظفریات بی نهایت
بریه سنه مقابل او زمانلر بحرأ هر طرفی لرزنالك ایدن
تجیرالدین بارباروس جزایر وتلسانی فتح ایلش بولند .
یغندن ممالک مذکورہ بی خاکپای سنیہ یه عرض ایتملکه
شان فتوحات برقات دها ارتمش ایدی . بناءعلیه ۹۲۴
سنه سنه در سعادته وقوعبولان عودت همابونده
ملت عثمانیه کنندیسی ایچون سوریه ومصر ومغرب
زمین کی اوچ اقلیم جسمیدن ماعدا عنوان خلافتی
دخی قازانوب کلان یاوز سلطان سلیم حضرتلرینی
تیریک ایتدیلر .

ذات شاهانه مصرده ایکن توقات طرفلرنده شیخ
جلالی نامنده بر حریف باشنه برچوق درویش طویلابه .
وق بونلر واسطه سیله بعض سبکمغزان عشایری دخی
کندینه اوبدورارق اعلان عصیان ایتشیدی . برسنه

قدر محارباتدن صکره فرهادوشهسوار اوغلی نام سردار لر
اشبو جلالیلر اوزرینه صالدریلوب جمعیتلری پریشان
ایدلشدلر.

ایمدی سلطان سلیم حضرتلری چوقدنبری مصمم
بولنان ردوس قحی ایچون حاضر لنمقده ایکن ۹۲۶
سنه سنده شیرینجه اجل چورلو اوواسنده یتیشوب
مشارالیهی کاشنسرای عقبایه اعزام ایلشدلر. غایت
جسور و غایت غضوب و دبدبه و داراته زیاده سیله
منهمک برپادشاه کشور کشا ایدی.

دولت علیه عثمانیه نك ال پارلاق دوری سلطان
سلیم حضرتلر ندن صکره مقام خلافت و سلطنته کش
اولان سلطان سلیمان قانونی حضرتلر نك دور سلطنت
و خلافتلری عد اولنسه سزادر. ایران سفری ایشامنده
امور تجاریه لرنجه ضرر دیده اولان برطاقم تجارک ضرر
وزیانلرینی بالتأدیه جله بی ارضا ایلدیکی کبی سلطان
سلیمک بوسفرنده فرصت بوله رق خلق اوزرینه ظلم
ایش بولنان بعض حکومت مأمورلرینی اعدام ایلش ایدی
که جلوس هما بونله برابر وقوعه کلان شواثر مرحت
و عدالت جله نزدنده تقدیر و تحسین اولنمش ایدی.

هله دربار شوکت قرار سلطنت سینه ده رهن صور -
 تیله حفظ اولنق ایچون مصر دن کتورلمش اولان
 بش التیوز قدر معتبرانی نه مملکتلرینه اعاده ایلدی که
 بوحال پادشاهک کندی تبعه سنه امنیت کامله سی
 اولدیغنی اثبات ایلشدر .

مع هذا ابتدای جلو سده شام والیسی جانبر دوغزالی
 عصیان ایلدیکندن فرهاد پاشا قوماندانه سیله بر فرقه
 عسکر کوندر یله رک باشنده می چیمیتی پریشان و کندیس
 دخی اعدام ایلشدر . ذاتاً مرقوم عن اصل اسلاو
 اولوب مؤخرأ مصر مملوک لری میانه قارشمش و کندی
 پادشاهی اولان طومان بایه خیانه سلطان سلیمه دخالت
 ایلش برالحق ایدی . ایلک کوستردیکی خدمته مکافاة
 عهده سنه شام والیسی ویرلدیکی حالد سلطان سلیمک
 وفاتندن صکره سلطان سلیمان حضر تلرینک کنجملکنندن
 بعض امیدلره دوشه رک مصر والیسی بولسان وعن
 اصل ینه کوله من اولان خیره بکی ده عصیان تشویق
 ضمنده بر مکتوب یازمش ایدی . خیره بک مصرک
 سلامتی دولت علیه ارتباطده اولدیغنی کوزلجه
 اکلایه رق مذکور مکتوبی طوغریجه استانبوله

کوندردیکی جهته صدافتی اثبات انلش اولدی .
 ایران دولتی سلطان سلیمدن یمش اولدیغی سیه
 تأدیبک انتقامی المی ایچون بعض تدارکات حربیه ده
 بولمغله طرف دولت علیه دن فرهادپاشا حدود ایرانیه بی
 تر صد ایچون قیصریه یه کوندرلمش اولوب دیگر جهته
 ایسه مجارستانک سنوی دولت علیه یه ویرمسی لازم
 کلان ویرکویی مذاکره یه مأموراً بودینه کوندرلمش
 بولنان بهرام چاوش نام سفیری مجارلیر اعدام ایلد .
 یکنندن اوجهته بالذات حرکت همایون واقع اولدی .
 میخال زاده لردن محمدبک بر فرقه آقچی ایله ترانسلووانیا
 ایچنه صالیدیر یلوب صدراعظم پیری پاشا بلغراد
 اوزرینه کوندردی . ذات شاهانه ایسه شاپسه وزعلین
 وزرمی وباریج و برقاس و سلانقامن و متروویج و قارلو-
 ویجه وایلون قلعه لرینی برر برر ضبط ایدرک بلغرادده
 صدراعظم اردوسیه برلشدیکندن بوایکی اردو
 بلغرادی دخی ضبطه موفق اولمشدر .

بوفتوحات عظیمه ۹۲۷ سنه هجریه سننده میسر
 اوله رق در سعادت عودت همایون وقوعنده چوقد-
 نبری امل ایدنلش اولان ردوس فتحی ایچون برسنه

مدت اکیال تدارکله اوغراشلدی . بعده برأ و بحرأ عز -
 یمت واقع اوله رق حالبو که ردوس قلعه سنک متانتی
 فوق العاده اولدیغی کبی دروننده مدافعه ایدن شوالیه لر
 دخی بتون عمرلرینی دین یولنده محاربه یه حصر ایتک
 ایچون یمین ایتش سلاح شورلردن بولمغسله قلعه مذ -
 کوره نک فتحی سلطان سلیمان حضر تلرینی زیاده سیله
 یوردی . محاصره و مهاجده بش آی دوام ایدرلر عسا -
 کر عثمانیه بر قاق دفعه قلعه بدنلرینه قدر زردبان قورارق
 چیققد قلی و بوغاز بوغازه جنک ایتدکاری حالده
 ینه مغلوباً تلفات کلیه ایله رجعت ایلش لر ایدی .
 نهایت فتح میسر اوله رق حضرت سایمان قانونی
 مدافعه خصوصنده بودرجه دلرده ثبات کوسترین
 شوالیه لری قهر دکل بالعکس تلطیف ایلیرلر مالارینه
 وجانلرینه امان و یردی . جله سی منتظماً اوروپا طرفنه
 هجرت ایلدیلر .

اشبور دوس مشغولیتی اثناسنده مصر والیسی
 بولنان احمد پاشا برارهلر دولت چرا کسه کبی بردولت
 مصریه دخی کندیسکی تشکیل ایتک اوزره باشنه
 بر طاقم چرکس کوله لری طویلایه رق اعلان عصیان

ایش ایسه ده کندیسنه وز یر ایدندیکی محمد بک بویه
 قوهٔ اسلامیه نك تفرقه سنی موجب اولان بر حرکتی
 حسب الحیمیه تحسین ایتیه رك کیفیتی خا کپای شاهانه یه
 عرض وانها اینه برابر اصدقادن بر فرقه اینه مرقوم
 اجد پاشانك اوز رینه هجوم ایدوب ققاسنی
 کسمشدر.

بلغرادك طرف سلطنت سنیه دن فتح و تسخیری
 اوزمان اورو پانك هممان حکمدار عمومیسى اولمق
 مرتبه سنده براهمیتی اولان المانیا ایمپراطور لغنی تلاشه
 دوشور مکه دولت علیه عثمانیه علیهنده بیوجك
 برتدار که باشلاینجه سلطان سلیمان حضرتلری بودغه
 دخی طوغریدن طوغریه المانیا نامنه اعلان حرب
 ایلدی که شمدییه قدر شمال جهتلرنجه ایدیلان محاربه لر
 هب مجارستان و یاخود افلاق و یا بغداد نامنه اولد.
 یغنی حالده طوغریدن طوغرییه المانیا ایمپراطور لغنی
 نامنه اعلان حرب ایتك شمدی ایلک دفعه اولمق اوزره
 وقوعه کلیورایدی. مع هذا بو محاربه ده دخی دار الحرب
 مجارستان اولوب ذات شاهانه و ارادیه واسه ق
 قلعه لرینی بعد الفتح مهاج صحراسنه کلد کده بر طرفی

طونه و بر طرفی عظیم بطاققلردن عبارت بولسان
 بر محمله او توز بیک قدر دشمن عسکری اردوی همایونی
 وهله تضييقه باشلاينجه عظیم برتهلكه يوز كوستر -
 مشیدی . بونك اوزرينه نصرت ربانيه یی استرحاماً
 ذات شاهانه ال قالدیروب عموم عساكره اغلاشه رق
 امید ویرد کدن صکره دشمنه اویله بر صالیدیریش صا -
 لیدر دیلر که او توز بیک دشمندن انجق بیک بشیوز کشی
 قورتیله بیلوب باقیسی یا اسلحه عثمانیه ایله مقتول
 ویا خود بطاققلره ویا طونه نهرینه دو کوله رك مغروق
 اولمق صورتیله قردیلر ۹۳۲۰ ده میسر اولان بولمحه
 کبری اوروپا مورخلری نزدنده دخی کمال حیرتله تلقی
 اولنه رق بتون اوروپایی زانغر زانغر تترتمشدر .
 بحارستانک مرکزی بولنان بودین وپشته ایله فونکیرش
 وموروت وسکدین و یاش وسائر برچوق یرلر هب
 بومظفريت اوزرينه ممالك عثمانیه الحاق ایدلمشدر .
 هله اهالی مغلوبه جقلرنده حضرت پادشاهك كوستر -
 مش اولدیغی شفقت ورأفت صحیحاً پك فوق العاده
 ایدی . زیر ابحار کبارینی فوق الحد تلطیف بیوردقن
 ماعدا اردل سنیوری ژان زاپولیایی قرال عنوانیله

مجارستانه مأمور ایلده رک بوجمه تله زمام مملکت ینده
مجارلرک کندی الرینه تسلیم ایدلمش اولدی .

بوهنکامده دولت علیه نک انتظامات ملکیه یی
اکمال ایچون عادت اورو پاچه دخی معلوم اولمديغی
حالده ایلک دفعه اولمق اوزره عومی بر تخریر املاک
اجراسنه تشبث بیور مسندن طولای ایج ایل طرفلرنده
بولنان ترکینلر بر عصیان قیام ایلشیر ايسه ده دیار بکر
واطنه والیلری بونلرک جمعیتلرینی پریشان ایتکه
کفایت ایلدکاری کبی ایران طرفندن ایدیلان افساد
اوزرینه قلندر اوغلی نام سرسری اسکی جلالی
اشقیاسنی باشنه طویلا یه رق اعلان عصیان ایلدیکندن
انلر اوزرینه دخی صدراعظم ابراهیم پاشا مأمور
ایدیلرک جمعیتلری پریشان ایدلمشدر .

مجارستانک بر عثمانلی ولایتی حکمنی المسی المانیایا
ایچون برشین عد اولنه رق بهمه حال بوانتقاهی بزده
براقیه جغنی اکلاشلغله بر تدبیر متقابل اولمق اوزره
قول قول اقینجیلر چیتار یله رق از جمله بوسنه والیسی
وسمندره محافظی دالماچیا طرفلرینی هرج و مرج
ایلدیلرک بوسفرلرده پایچه و بانیا لوقه و بلوتسیه رو

و اور یواج و صوقول و لواج و حرپوار و آیزوق و پرغا
 و بوساج و غره بن قلعه و قصبه لری خروا تستاندن
 و مودروج و پوشه غا قصبه لری اسقلاو نیادن و ادرانه
 قصبه سی ده دالماچیادن اخذ و ممالک عثمانیه یه الحاق
 ایدلمشدر ۰ اشبوفنوحات دخی ۹۳۴ سنه سنده میسر
 اوله رق حالبو که بواثناده شارل کن اوروپا جه برقاچ
 معظم دولترک تاج حکم داریلرینی کندی باشنده جمع
 ایلکده بولنان جهانگیر بر پرنس اولوب مظفریات
 عثمانیه نك بویته سرعت القتریقیه ایله رقابتی چکه مد.
 یکنندن قرنداشی فردیناندی، مجارستان اوزرینه صالد.
 یرمش و ژان زاپولیایی خلع ایتدیره رک بودین و پشته بی
 ضبط ایتدیرمشیدی ۰

بونک اوزرینه مجارستانه درحال اعلان حرب
 ایدیلرک ۹۳۵ سنه هجریه سنده بودین تکرار تحت
 محاصره یه النمش و فردیناند اورادن پوسکور دیلوب
 ژان زاپولیاینه مقامنه اقعاد ایدلمشدر ۰ ویانه نك ایلك
 محاصره سی دخی بودفعه میسر اولمش ایدی ۰ اردوی
 همایون پشته مقابلندن رجعت ایلیان المانلری تعقیباً
 ویانه یه قدر وارمش ایدی ۰ انجق قیش باصدیروب

اسباب شتائیه چه کوریلان لزوم اوزرینه اورالده
بارینله میهرق عودت ایلشدیر.

۹۳۷ سنه هجریه سنده روسیه دولتی ایله وفاقی
مقضمن بر معاهده عقد ایلدیکی صروده المانی-دخی
تکلیف مصالحه ایله بویله بروفاقنامه امضا ایتک ارزو
ایلدی ایسه ده طرف شاهانه دن قبول بیورلمدی. بنا
علیه شارل کنک برادری فردیناند بتکرار بر قوه کلیه
ایلله مجارستانه کیردیکندن ۹۳۸ سنه سنده سلطان
سلیمان دخی تکرار شمال طرفنه اردوی همایونی سوق
ایلدی. بودفعه دخی فردیناند میدان مقاومتده ثبات
کوسترمیه رک رجعت ایلکله ایمپراطور شارل کن بو
رجعتی طوغریدن طوغریه کندی مغلوبیتی اولق
اوزره تلقی ایلدیکندن و سلطان سلیمان حضر تلرینک
اصل امللری دخی ایمپراطور علیهنه بر غلبه قزانوب
حدینی بیلدیر مک اولدیغندن شماله طوغری تعقیبه
دوام ایلدک ایستلمش ایدی. فقط بودفعه دخی شدت
شتا اردوی همایونک حرکتی منع ایلشدیر.

شارل کنی جله دن زیاده دلکیر ایدن شی اشبو
مظفریات بریه دن عبارت اولیوب خیرالدین باربروس

بتون سواحلی بحر سفیدی یا قوب یقیدی حالده عثمانلی
قورصانلرینه هیچ برشی یاپه مامسی ایمراط-ور موهی
الیهی هرشیدن زیاده مایوس ایلرایدی .

نونک ایچون مشهور اندریا دوریا نام ق-ودانی
عظیم بردونمایه سردار ایدرک خیرالدین پاشا اوزرینه
مسلمت ایتیش و اندریا دوریا برارهلق خیرالدین پاشایه
کورونمکسزین کلوب ۹۳۹ سنه هجریه سنده موره نك
بعض سواحلی ایله برقچ جزیره یی ضبط ایتیش ایسه .
ده ۹۲۰ سنه هجریه سنده اردوی همایون قره دن موره
سواحلی استرداد ایلدیکی کبی خیرالدین پاشا دخی
اندریا دوریا به مقابل دکره چیقدقه المانیا ایمراطور لغنک
دونمسی نك یمان حالره دوچار اوله رق شارل کن
صلح و مسالمت استمداسنه مسارعت ایتشد .

اگر بوارهلق ایران سفری یوز کوستر مسسه ایلی
طلب اولنار، مصالحه نك قبول بیورلیه جنی درکار
ایلی . فقط شرق طرفجه کوریلان مشغولیت المانیا
ایله عقد مصاحبه یی ایجاب ایلیه رک ۹۴۱ سنه هجریه .
سنده ذات شاهانه شرق جهته بالتوجه وانو بایزیدی
و بعده تبریزی الدقدن صکره همدان اوزرندن طولاشوب

بغدادہ کلدی وقیشی اورادہ بالامرار ینہ ایران ایچنہ
طالہرق تازر بایجانہ قدر ممالکی چیکنہ دکن صکرہ
۹۴۲ دہ استانبولہ عودت ہمایون واقع اولدی .

اناطولی قطعہ سنجہ اشبو مظفریات عظیمہ نک
محصولہ کلدیکی اثنادہ فرمان فرمای روی دریا اولان
بار بروس خیرالدین پاشا دخی اق دکرده برچوق
مظفریات بحریہ یہ نائل اولہرق ازجہلہ مغرب عربانی
ترکلرک جزایر طرفلرنده یرلشملرینی چکہ میہرک برأ
و بحرأ عظیم برہجوم ایلش اولدقلى حالده انلرہ دخی
نهایت پارلاق بر غلبہ ایلہ مرام اکلاتمش ایدی .

ایمدی دولت علیہ عثمانیہ نک بویلہ برأو بحر ایکدیکرینی
تعاقب ایدن مظفریاتنہ بر نہایت و یرمک اوزرہ پایامقامندن
اورو پانک ہر طرفنہ تشویقنامہ لر کوندریلہرک ذاتأ
اوستریا و المانیہ اواسپانیہ و ایتالیا ہبشارلکنہ تابع
دیمک اولدقلى حالده قوہ بحریہ جہ بتون اورو پایہ
غالب اولان و بناء علیہ زمانک انکترہ سی عد اولنان
وندیک جہوری دخی شارلکن ایلہ اتفاق ایلش ایدی .
شو حالده اردوی ہمایون وندیکی برأ اور کوتمک ایچون
بوسنہ طرفندن حرکت ایدرک بر قسمی اولونیہ اولدوینہ

جهتته يورومش و خيرالدين پاشادخی اسپانيا و ايتاليا
 ساحلاريني ياقعه مأمور اولمش ایدی . بوساحلار خالك ايله
 يکسان ايدلد کړی وکلیس و آولونيا و دلوينه قلعه لری
 النديغی و بوسنه اردوسی دخی خرواستان جهتله رینی
 الت اوست ایلدیکی کبی اندر یادور يانک قومانداسی
 التنده بولنان عظیم بر متفقین دو نمانسی ده قور فواطه سی
 مقابلنده خيرالدين پاشا مغلوب و پریشان ایلده رک
 ۹۴۴ و ۹۴۵ سنه لرنده قور فو و یاقسو و سائر بر چوق
 جزیره لر دولت علیه یر بط و الحاق قلنش و اندر یا
 دور یادو نمانسک بقیه سی سبته بوغازندن خارجه قدر
 قاچمینجه سمت سلامت بوله مامشدر .

ینه ۹۴۵ سنه سنده هندستاندن در سعاده کلان
 ایلچیلر پور تکیر لرك او طر فلردن بر چوق یرلری استیلا
 ایلد کړی بیاتيله دولت علیه عثمانیه و خلافت جلیله
 اسلامیه دن استمداد و استعانه ایتمکله اورایه دخی بر فیلو
 دو نمانسوق اولمش ایدی . بوسفر مراد و پیری رئیس لر
 کبی عظمای بحر یونک ترتیب کرده لری اولوب بحر
 احمرده انشا و لنان سفایندن تشکیل قلنش و انهای
 راهده یمز ولایتی فتح ایلدیکی کبی هندستانجه پور تکیر

لوك تعرض و برچوق فلاعنى استيلا ايلد كلى محل
 پكرات اقليمى اولديغندن اورايه بالو صول قلعه لر طوپه
 طوتلش و پورتكبر لرايله انلرك متفقلى اولان هندىلر
 پوسكوز تيله رك ممالك مذ كوره قورتارلش ايدى .
 مع هذا بوسفر ك اجراسى دولت عليه بى اسفار معاده .
 سندن اصلا منع ايتامش ايدى . خير الدين پاشا ق دكر
 جهتندن سكه تووسكيرو و كر په قلعه لر بى ضبط ايدرك
 بر فرقه دو نمداخى كريد اطه سنده بر طاقم لر لرى طوپه
 طوتلش و ناردده كور فزنده و نديك و پاپا دو نمارى تكرار
 مغلوب ايدلش ايدى . نهايت ۹۴۶ سنه سنده قاستل نووه
 قلعه سى و نديك لى طرفندن ضبط و مؤخر آينه خير الدين
 پاشا طرفندن استرداد قلمغله و نديك لى شوقدر جق
 بر غلبه لرى اوزرينه حر به نهايت و برمكى شانلرينك
 محافظه سنده مدار عدايله رك هر حالده دولت عليه نك
 شان غالبيتنه دهياز ياده موافق اولوق اوزره ۹۴۷ ده
 بر معاهده صلحيه عقدا و تلش ايدى .

مع هذا بومعاهده صلحيه يالكز و نديك مخصوص
 اولوب اسفار سائر هيه نهايت و بر مامشدر . ژان زاپو-
 ليانك وقوع و قاييله اوسترياليلر تكرار مجارستانه هجوم

ایلدکلرندن سسلطان سلیمان حضرتلری عظیم براردو
ایله تکرار واروب اوستریانک ضبط ایلدیکی یرلری
بالاسترداد زاپولیانک اوغلنی مجارستان قرالی نصبله
برابر شارل کینک جزایر اوزرینه اجرا ایلدیکی غایت
شدتلی برهجومی دخی خیرالدین کمال مظفریت ایله
رده موفق اولمش ایدی . نهایت اوستریا دولتی مجا-
رستاننی حرباً ضبط ایده میه جکنی اکلایه رق اگر
قطعه مذکوره اوستریا خاندانسه تفویض بیوربله حق
اولورسه اوتوز بیک دوقه التونندن عبارت بولنان
ویرکوسنی سنوی یوز بیک دوقه التوننه ابلاغ
ایلیه جکنی وبوکا طرف سلطنت سنیه دن موافقت بیو-
رلیدیغی حالده حربدن واز کچمه جکنی دردولته
عرض ایله برابر تأیید افاده خصصه صنده مجارستان
ایچنه یکیدن براردو سوق ایتمش ایدی . بوتکلیفک
طرف سلطنت سنیه دن قبولنه بلکه برمانع اوله من
ایلیسه دهینه بوارهلق شارلکن دولت علیه نک دوستی
اولان فرانسه قرالی برنجی فرانسه وایی تحت اسارت
المق درجه سنده مغلوب ایدرک والدوسی دولت علیه .
دن استرداد واسترحام ایتکله سسلطان سلیمان حضرت

تلمی مجارستان ایچون ایدیلان تکلیفی دخی قبول بیور-
میهرق قره دن ذات شاهانه لری و د کزدن دخی خیرالدین
پاشا سیف انتقامی چکدیلر .

اشبو سفر عظیمده والپو وسیقلوس و غران و ستو-
لیسنبرغ و قونقورش قلعه لرینی محاربات شدیدده ایله
اخذ و ضبط ایلدی . خیرالدین پاشا ایسه میسینایی
ضبط ایلد کدن صکره الیوم فرانسه یه تابع اولوب او
زمانلر شارل کنک ید ضبطنه یکمیش اولان نیس و مار-
سیلیایی دخی تحت محاصره ایلدی . بوخبر ۹۵۱
سنده سنده ذات شاهانه یه واصل اولدقده ممنونیت
همایون برتر اوله رق خیرالدین پاشا حقنده خیردعا
بیوردیلر . بناء علیه بوشوقله مجارستانده ویشغراد و نغو-
راد و وبقا ولونسقا و سالالا محارباتنه صالدیریلوب
اوستریالیلر طرف طرف پریشان اولمغله بریمی اوستریا
قرالی و دیگر المانیا و اسپانیا و سائر حکمداری بولنان
فردیناند و شارل کن برادرلر ارتق امانه دوشسدیلر .
سنوی اوتوز بیک دوقه خراج ویرملری شرطیله ۹۵۳
سنده سنده مصالحه عقد اولمشدر . بومناسبتله فرانسه
ووندیک دخی معاهده نامه لرینک تجدیدیله دولت علیه

حقنده کی عبودیتلرینی تقویه ایلدیلر.

۹۵۴ سنه میلادیه سنده هندستان حکمداری
پورتکیر استیلا سندن تکرار شکایت ایتسیله بر کره حایه
جلیه له عثمانیه تنه کیرمش صاییلان هندستاندن
اورو پالیرک یدتعرضلرینی بتون بتون کسمک ایچون
بو کره عظیم بردونما سوقنه لزوم کورلمش ایدی . حتی
پوتدار کاته اواره لق وهله ظهور ایدن بر ایران سفری دخی
ماذع اوله مامشیدی . بو ایران سفری شاه ایران طهماسب
خانک قرنداشی القاص میرزا شاه مومی الیه علیه نه
بالعصیان بعده باشنک قورقوسندن سلطنت سنیه عثمانیه
التجسا ایتسیله شاهک دخی بوندن طولانی کوچنه رک
اوزمانلر ممالک عثمانیه دن معدود اولان شیروان ایالتیه
تا کردستانه قدر ممالکی استیلا ایتسندن نشأت ایتمش
ایدی . بناء علیه ۹۵۵ سنه سنده ذات شاهانه ایران
اعلان حرب ایلیرک تبریزه قدر ایلروله مش و شیروانی
استرداد ایله ۹۵۶ ده قیشلامق ایچون حلبه کلورایکن
اثنای راهده کر جستاندن طرطوم واقچه قلعه بی دخی
ضبط ایتلش ایدی . موسم شتاده ایرانیه لری فرصت
دوشوردیکه ازعاج ایتک ایچون بفرقه عسکر ایله

ایران طرفلرنده براقیلان القاص میرزا بر خیلی ایش-
 کورد کدن صکره هلاک اولدیسدهده بخارا ایله ایلاک
 مناسبتیزی میرشارالیه حاصل ایلشدره القاص میرزا
 دن صکره بخارا امیرینک پیدا ایلدیکی بر قول اردو
 ایرانی اشغالده دوام ایدرک بوصردهده اوستریا دولتی
 فرصتی قاجر مامق ایچون تکرار مجارستانه یورووش
 ایسهدهده اردوی همایون همان اوروپا طرفنه کچهرک
 واقعاً پک چوق مشکلات خریبه یه دوچار اولمش
 ایسهده اردل ایالتی فتح اولندیغی کبی طمشوار ایالتی
 دخی یکیدن قبضه تسخیره کچیرلمش و بوارادهده
 قیو دان سنان پاشا مالطه شوالیه لری اوزرینه
 صالدیروب جزیره مذکوریه فتح واسیتیلایه موفق
 اولمشدره .

یکدیگرینک اشغالندن استفاده ارایان ایش-
 متقابل دشمنلردن ایرانلر بر ارهلق اوکلرینی اچیق
 بولهرق وانه قدر ایلروله مشرایسهده اولجه صدر
 اعظم رستم پاشا انی متعاقب ذات شاهانه ۹۶۰ سنه -
 سنده عجم اوزرینه هجوم ایدرک قارص وقره باغ
 ونخجوانه قدر ممالکی هرج و مرج ایلش ایدی نهایت

ارپه چاینه کلد کده طهماسب صلح استدا ایلدیسده ده
 هر حالده قبول شاهانه دن متردد اولدیغی ایچون
 عسکری دخی اردوی همایونی اوزاقدن اوزاغه ترصد
 ایلریدی . سلطان سلیمان حضرتلری بو صلح استدا .
 سنه روی التفات کو سترمدی . بناء علیه کرجستان
 و کردستان طریقیله شهر زوره کلوب اوراده ایرانک
 بر قوه کلبه سنی دها پریشان ایلد کدن صکره شاهک
 تکلیف ایلدیکی صلحی قبول ایتشدرد .

۹۶۴ سنه هجریه سنده اوستریا دولتی حدود
 عثمانیه بی تعجیزه باشلامغله سرحد بکری دشمنه ایلک
 مقاومتی پک کوزل ایفایه مسارعت ایلدیلر . یتنه بواثنا .
 ده یمن والیسی بولنان اوز تیمور پاشا بحر احری پکوب
 آفریقا قطع سنه داخل اوله رق نوبه و دنگله سوا .
 حانده بر چوق برلری فتح واستیلا ایلیمه رک برو لایت
 عظیمه تشکیل ایش ایدی اوستریا لیلرک تجاوزاتی اوزر .
 یتنه بر شمال سفری آچیلق تحقیق مرتبه سنی بولمش ایکن
 هله نصلسه اوستریا لیلر تضییقاتی آرتد بر مدق نندن طو .
 لابی بوسفره لزوم کورلیوب حتی ۹۶۵ ده شهزاده
 سلیم حنفده کی توجهات شاهانه بی چکمه می . ان دیکر

شهرزاده بایزید پدرینه بالعصیان ایران قاجمش و ایران
شاهی بولنان طهماسب بومناسبتله برایش کورورم
خلیاسنه دوشهرک دولت علیه به بعض تکلیفانده
بولنمش ایسه ده مؤخرأ شهرزاده بایزیدی اولاديله برابر
بالازاله بومشغولیت دخی کندی کندیسنه برطرف
اولوب کیتشدرد.

۹۶۷ سنه هجریه سنه اسپانیولر تکرار جزایر
اوزرینه هجوم ایدرک یرلی عربله دخی بالاتفاق اورادن
حکومت عثمانیه بی طرده قالمشترایدی. بونک اوزرینه
قیودان پیاله پاشا بر فیلو دونما و بر فرقه عسکرایله
جزایر اوزرینه مأمور اوله رق اسپانیول دونمسانی پریشان
ایلد کدن صکره آمیرالنی دخی اسیرأ در سعاده کتور -
مکه موفق اولشدرد.

اوستریا دولتنک لاینقطع ایقاع ایلیدیکی تعجیرلره
بر نهایت و یرلک اوزره اوتهدنبری تکلیف ایلکده
بولندیخی اوتوز بیک دوقه و بر کوی سنویتی قبول
اوله رق ۹۶۹ ده عقد مصالحه قطعیه به رغبت بیورلدی.
واقعا بومصالحه قطعیه دن صکره دخی اوستریا دولتی
ژان باسیلیکوس اسمنده بر مولدوان سردارینی تشویق

ایدرك بغداد طرفلرنده عظیم برفساد چته باش اسه ده
 دولت علیه در حال بغداد و یووده لغنی مرقوم ژانه
 توجیه ایدرك دولت علیه نك دشمنی ایکن بنده خلقه
 بکوشی اولمشدر . اوستریا ایله عقد اولنان معاهده
 قطعیه براز صکره ایتالیا و لهستان و جنویز و اسپانیا
 دولترینی دخی صلحه تشویق ایلیه رك ذ تاشوارهلق
 بونلرله بر کونه جنك وجدال بولنماقله برابر تجدیداً
 عقد مصالحه ایدلمشدر . لیکن تجدید مصالحه ماده سنه
 جنویز ایله اسپانیا اصلارعا یتیمه رك اولکی حرکات
 خصمانه لری ینه دوام ایلمدیکندن ۹۷۱ ده بونلرله
 برده مالطه شوالیه لری تادیب ایچون بردونما سوق
 اولنه رق ساحلاری یاقلمش و ساقز جزیره سی دخی ایشته
 بودفعه قطعياً فتح اولنمشدر .

۹۷۳ ده اوستریا و المانیا دخی نقض عهد ایدرك مجا
 رستانه تسلط ایلمدکندن سلطان سلیمان حضرتلری بودفعه
 دخی شمال طرفلرینه عزم سفر ایلیه رك طرف
 سوق ایلمدیکی قول اردولر دشمنی اوجه تدن دفعه موفق
 اولدقلری کبی ذات شاهانه دخی سیکت قلعه سنی قوشا-
 توب غایت شجیمانه بر محاربه ایله تمخیر ینه موفق

اولش ایدی . چه فائده که بوموقیت عظیمه اول شهریار
حیدر آتارک صولتموقیتی اولوب عقیب ظفرده
یعنی ۹۷۴ سنه هجریه سنده واصل رحمت یزدان
اولش در . سلطان سلیمان حقیقه عصر بنک سلیمانی
ایدی . زمان جم انکیرانه لرنده دولت علیه عثمانیه
ایکیوز میلیونه قریب نفوسه حاکم اولمشدر .

اردوی همایون هنوز سیکت قلعه سنده ایکن
وقوعه کلان رحلت شاهانه اردو خلقیدن غایت
مکتوم طولدیغی کبی استانبولجه دخی بومصیبت
کسمه یه سزدرلیه رک صاروخان والیسی بولنان شهزاده
ولی عهد سلیم ثانی حضرتلری استانبوله کلوبده
جلوس همایونلری طوپر انداختیله اعلان اولندیغی
زمان هرکسی برحیرت المش ایدی . شمال اردوسی
ایسه سلطان سلیمان حضرتلرینک رحلتی انجق پادشاه
نوجاه سلیم ثانی حضرتلرینک اردویه ورودندن
صکره خبر لهرق جلوس احسانلری ایچون ارتق معتاد
اولان مارسزلقلری تجدید الملش ایسه ده بواملرینه
انجق استانبوله کیر یلور ایکن نائل اوله ییشلدر .

تبدل سلطنت اوزرینه اوسلر یالیر بحارستان

و بوسنه و خرواستانه شدیداً هجوم ایدرک یک چوق
 سقطقلر ایقاع ایلشیر ایدی . بو کامقابل سرحدو الیلری
 دخی معیتلری عسکر یله دشمن ممالکنه آقینلر ایدرک
 اوقدر هرج و مرج ایلدیلر که یالکز الدقلری اسرانک
 مقداری طفسان یک درجه سنه وارمش ایدی . انجق
 ایکی طرفجه دخی کوریلان خرابلق و حصوله کلان
 یورغنلق محاربه ده دوامی منع ایتکله ۹۷۵ ده
 طرفینک حدودی تعیین و تقطیع اولنه رق اوستریانکینه
 بر مقدار خراج و یرمسی شرطیله مصالحه عقد اولمشدر .
 تبدل سلطنت اوزرینه افلاق و موره و طرابلس
 غرب و یمن و بصره کی اوزاق و موقعجه نازک اولان
 ولایتلرده دخی قاریشقلقلر ظهوره کلوب ازجمله افلاق
 و یووده سی پترومرچه استقلال داعیه سیله اهالی
 اوزرینه برطاق تکلیفات ظالمانه یه قیام ایلدیکندن
 عزل اولندیغی کج مؤخرأ سکسان یک دوقه التونی
 اعطاسیله استرداد مأموریتیه قیام ایلدکده بویله مقام
 سلطنته رشوت تکلیف ایتیمی دهاییوک برقباحت
 اوله رق قونییه یه نقی دخی قلمشدر . موره و طرابلس
 غربه دونخالر سوق اولنه رق اسایش احاده قلندریغی کی

بصره والیسی دخی ظهور ایدن فسادى باصديرمغه
موفق اولمش وین ولایتی ایسه سنان پاشا و اوز تیمور
زاده لک همتیله ایکی سینه قدر اوغراشلدقن صکره
تکرار تحت اطاعتیه ادخال قلمشدر .

روسیه دولتینک ایلک استیلاسی ۹۹۷ سنه سنده
ایشیدلمش برشی اولوب بواسیتیلان قزان و اژدرهان
طرفلرنده کی تاتارلر علیه نه وقوعه بولمش ایدی .
روسیه نلک پای استیلاسی قریله رق قزان و اژدرهان
طرفلرینلک ده دولت علیه یه ر بطی ایچون وزیر
محمد پاشا مأمور ایدلمش ایسه ده جزایز بحر سفیددن
بعضیلرینک سنیوری بولنان یوزف ناسی اسمنده بریهود
ینک توسیع دائره حکومتی ضمنده و نندیک و قبریس
اوزرینه آچلمسی لازم کلان سفرلر اشبو تاتارستان
استیلاسی مقصدینک تأخیرینه سبب اولمشدر .

پیاله پاشا قومانده سننده بولنان دونمای همایون
سر عسکر لالامصطفی پاشا قومانده کی اردوی
حامله اق دکره حقیقه رق اوچ قوله آیرلیدیغی حالده
بر بولق قولى قبر یسده واقع لیموسون لیماننه واروب
قره یه دخی عسکر اخراجیله یدی هفته محاصره و مهاجته

شده دن صکره لفقوشه قلعه سنی ضبط ایتش و قبر یس
 جزیره سی اوزرنده واقع سار قلعه لر دخی اول قدر
 مشکلاتی موجب اولقمزین فتح استیلا اولنه بیلش
 ایدی . حاله وکه دیگر بر قوله مأمور اولان قلیج علی
 پاشا تونسہ تعرض ایدن اسپانیالیلری دیل قور تلیه حق
 درجه لرده مغلوب و پریشان ایدرک ساحلی اوره قیره
 تا ارناودلغه قدر کلش و سو بوت و اولکون و بار
 قلعه لرینی فتح ایلش ایدی . ایدی شو مظفر یات جلایله
 اوزرینه دخی هر زمان اولدیغی کبی پاپالق مقامندن
 ایدیلان تشویقاتله ۹۷۹ ده متفقین دونماسی شارل کینک
 اوغلی دون ژوان قومانداسیله یونان دکرلرینه قدر
 کله رک قلیج علی پاشا ایله چارپشمش و حقیقه دکرک
 صولری انسان قانندن قزاره حق درجه لرده خونریزانه
 و بوغاز بوغازه بر محاربه ایله نهایت قلیج علی پاشا رجعتہ
 مجبور اولمشدر . بونک آجیسنی ایرتسی سنه مجدداً
 تدارک ایدیلان ایکی یوز الی پاره کمیدن مرتب دونما ایله
 چیقارمش ایدی . بوانتقام چوقه اطه سی مقابلنده
 واقع بر محاربه ده انمشدر . قلیج علی پاشا بو محاربه ده
 اورو پامتفقین دونماسنی او قدر مهارتله بوز مشدرکه

او چ یوز بیک دوقه التونی تضمینات حر بیه و سنوی
 بر مقدار و یر کوو یر مک شرطیله و ندیکی صلح استدعا .
 سنه ایشته بو غلبه مجبور ایلشدر . حالو که مغلوبیت واقعه
 اسپانیانک ناموسنه طوقنه رق و دولت مذ کوره و ندیک
 مثالو صلحی قبول ایتد کدن بشقه وارقوتنی بازو یه
 ویره رک تونس اوزرینه بر هجوم ترتیب ایلش و عن
 اصل تونس حکمداری ایکن طرف دولت علیه دن
 عزل و تبعید ایدیلان بنی حفص خاندانی ایله بالاتفاق
 خاندان مذ کوری ینه مقامنه اقعاد ایتش ایدی .
 سنان پاشا قومانداسنه و یریلان برجسیم اردو قلیج علی
 پاشا قومانداسنه و یریلان عظیم بردونمایه ارکا بآ ۹۸۲ ده
 سوق اولنه رق نفس تونس ایله خلق الواد قلعه لری
 شد تلججه بر محاصره ایله ضبط و عموم تونس قطعه سی
 طوغریدن طوغری به بر عثمانلی ولایتی حالنه ا فراغ
 ایدلشدر .

دولت علیه عثمانیه اق دکرجه شو صورتله
 مشغول ایکن شمال طرفلرنده افلاق و بغداد پرنسری
 یکدیگریله نفاقه دوشدرک لهستان دولتی دخی ایشه
 پارمق صوقسیله اورالری قارمه قاریشق بر حاله

کیردیکندن حالبوکه بونلر میانده دولت علیه به ال
 صادق اولانی بغدادان پر نسی ایدو کندن انک معیتنه
 بر اردو کوندر یلهرک افلاق پر نسی مقام امارتدن
 یوسکور تلمش و افلاق قطعده سی دخی علاوة بغدادان پر نسنه
 توجیه بیورلش ایدی . فقط مؤخرأ بغدادان پر نسی دخی
 اعلان مفسدته قازاقلری دائرة اتفاقنه الهرق بندر واق
 کرمان و ابرائیل طرفلرینی اورمش و عموم اهالی مسلمنه سنی
 قتل ایتمش اولدیغندن تکرار سوق عسکرایله قرق بیک نفر
 اشقیا و جلاددن عبارت بولنان اردوسی کاملاً قلیجندن
 کچیر یلهرک قتل عام ایدلشدر . بوده شتلی انتقام
 لهستانی لرزه به دوچار ایدرک تمام اردوی همایون
 او طرفلره دخی توجه کوسسترمک اوزره ایکن ایلچیلر
 کلوب امان دیله مشلر و لهستاندن ماعدا وندیگ و المانیا
 دخی تجدید صلحه مساعرت ایلشدر . بو حالده
 مناسبت حربیه و سیاسیه یالکیز روسیه و اوستریا ایله
 باقی اولوب قریمدن ترتیب اولنان تاتار عسکری موسقووه
 شهرینه طوغری یورو یهرک قازان طرفلرینی استیلاده
 بولنان روسلرک خطر جمعتلرینی کسوب بناده علیه روسلر
 او طرفلردن دخی حکمکه مجبور اولدقلری کبی اوستریا و زره

ینه دخی ترتیبلر کو رملکده ایکن سلطان سلیم ثانی حضور -
 تلی یکی یاپدیرمش اولدقلی برجامی کزرایکن نصلسه
 ایاغی قایه رق دوشوب وفات ایلدکارندن اوستریاسفری
 علی حاله قالمشدر . سلیم ثانی حضرت تلی هم غایت جسور
 هم ده امور سیاسیه ده غایت ماهر بر پادشاه عالیجاه
 ایدیلر .

سلیم ثانی حضرت تلی نه کنجیه قدر خاندان عالیشان
 عثمانیدن کلش بولنان پادشاهلرک کافه سی حقیقه جهها -
 نکیر اولغه لایق ذوات نادره دن بولندقلی حاله
 خفیف مشرب اوله رق ایلاک پادشاه سلیم ثانی حضور -
 تلی نندن صکره مقام سلطنه کلش بولنان سلطان مراد
 ثالث حضرت تلی اولدقلی کورلمشدر . کنجلاک
 زمانلرینی لهو ولعب ایله پکیرمش اولدقلی کبی
 ۹۸۲ سنه سننده مقام خلافتیه کلدکن صکره
 دخی زمام امور سلطنتی صوقوللی محمد پاشایه بالتودیع
 ذات شاهانه لری ینه ذوق و صفالریله اشتغاله باشلامشدر
 ایدی . بناء علیه تبدل سلطنت اوزرینه دول معظمه ایله
 معاهداتی تجدید مثللو پادشاهلره مخصوص اولان
 بر مهم ایشی بالذات صوقوللی کورمش اولدینگی کبی

منازع فيه اولان لهستان قرالغه بچار قرالی اولوب دولت
 عليه عثمانیه فك صادق اولمق اوزره شهرت بولمش اولان
 باطوری بی دخی صوقوللی نصب ایتدیرمشیدی . واقعا
 بر صدر اعظم ایچون بویله قرال عزال ایتدیروب قرال
 نصب ایتدیرمک مرتبه سننده کی اجرآت عقلره حیرت
 ویرایسه ده صوقوللی بوشلوا امورده اول قدر مهارت
 کوستر مشدر که اصل بومهارتی محیر العقول کورلشدر .
 حتی نیجه زماندنبری بچارستان و اوستریا سرحدلرنده اکیسک
 اولمیان منازعات بو کره جلوس همایون مناسبته تجدد
 مصالحه دن صکره دخی بزم سرحد بکاری طرفندن
 ایدیلان تعرضات اوزرینه تکرار میدان منازعه آچمغله
 المانیادن درسمعاده کلان سفیرلو غایت شدتلی لسانلر
 ایله همان اعلان حرب درجه سننده بر بکته قویو ادقیری
 حالده صوقوللی بونلری لسان سیاستله بالالزام وقوعی
 مرتبه تحققه کلان بر بچار به شیدیده بی منعه موفق
 اولمشدر .

مغرب زمینده واقع حکومت اسلامیسه اندلس
 انقراضندنبری ارالرنده دوام ایلمیان منازعات و مخالفاته
 بر نتیجه ویره میهرک حالبو که مخالفت مذکورده دن

استفاده ایلیانلر نصارادن عبارت اولسیله و بالخاصه
 ۹۸۵ سنه لرینه طوغری پورتغال دولتی بوخالفتری
 فرصت انخاذایلیه رک بورالری ضبط واستیلایه
 قالمشسیله فاسلیلر دولت علیه عثمانیه دن استمداد ایلملر
 ایدی . بونک اوزرینه فاسی پورتکیر تسلطندن قورتارمق
 مأموریتی جزایر بکیر بکیسنه توجیه اولنهرق اودخی
 قوه کلمه ایله واروب وادی السیل نام محله پورتغال
 قرالنه اویله برغلبه چالمشدرکه اردوسندن عادتادیل
 قورتلامشدر . بالذات قرال دخی بوخار به ده هلاک
 اولمشدر .

۹۸۶ سنه هجریه سنه نیجه قتنه و فساد ایرانی هرج
 و مرج ایلدیکی کی بوصره ده حدود دولت علیه یه
 دخی رعایت ایلدیکنندن صوقوللی محمد پاشا بومسئله یی
 دخی برطرف ایتک ایچون اول امرده ایران امورینه
 مداخله ده بولنان کرجی بکیرینه وصایای لازمه ارسال
 ایلیه رک بعده سرحد بکیرینی و پاشالرینی قارص
 و بایزید طرفلرینی ازعاجده بولنان عجملر اوزرینه
 صالدرمش و سرعسکر مصطفی پاشا ایله وزیرای ساره
 دخی کرجستان اوزرینه یورو یه رک عجملرک انک

یولک جمعیتلری مشهور چالديران صحرا سنده بولمغله
 جمعیت مذکوره غایت شدید بر محاربه ایله اوراده
 پریشان ایدلد کدن صکره تفلیس و مکر یل و کور یل
 و آجیق باش و قاختی و سوخام قلعه و وولاتلری اخذ
 اولمغله رقی جبال قفقاسه وارنجیه قدر بتون ممالک
 طیب دولت علیه عثمانیه الحاق قلمشدر . اشبو
 کرجهستان جهتلرنجه مغلوب و پریشان اولان ایرانیلر
 بغداد و شهر زور طرفلرنده غالب کلمه رک برارهلق
 ایله ایلروله مشلرایسه ده مؤخرأ اوجهته دخی کلیتلی
 عسکر سوق اولمش ایدی . حربک بوقسمنده ایرانیلر
 لوج قوله منقسم اولدقلرندن بو اویچ قولک ایکسی
 اوریلوب پریشان ایدلمشیدی . لیکن اوچنجی قول
 عادل کرای ایله کلان تاتار عسکرینی بوزدیغی و عادل
 کرای دخی اسیر ایلدیکی کبی اوارهلق صوقوللی محمد
 یاشا دخی بر غدار سوء قصد جینک یدخیانتی ایله شهید
 ایدلدیکندن و قدش دخی کلوب چا تدیغندن اردوی
 همایون قشلاقلره چکلمکه مجبور اولمش ایدی .
 شتاک ورودندن صکره عساکر شاهانه تحکیمه
 لازم کلاز بر طاقم محالرک استحکام التنه النمسیله اشتغاله

باشلا یوب قارص و تفلیس وار یوان و سائر مواقع
 بالتحکیم صوقولینک یرینه صدر اعظم اولان سنان
 پاشا شرق سفر لرینی ایلر و یه کتور مکه تشریف ساق اهتمام
 ایلدی ایسه ده صوقوللیدن صکره سلطان مراد ثالث
 حضرتلرینک غفلت لر یله پای تخت بر فساد او جانغی حالی
 الدیغندن سنان پاشا کبی بونجه موفقیات بر یه و بحر یه
 سیله مشهر اولان بروز یر عالی شان ایران لره قارشو هیچ
 برایش کوره میه رک بناء علیه ۹۸۸ سنه سنده هر
 طرفجه مغلو بیت بزم طرفزده قالمش ایدی .

۹۸۹ ده سنان پاشا استانبوله کلد کده اشبو اسفار
 شرقیه نکه اهمیت فوق العاده سندن بختله بوکا جمله
 همت اولمغی تر و یجده بولندی ایسه ده استانبول
 آیلرجه دوام ایدن سنت دو کونلری ایله مشغول اولد
 یغندن سنان پاشانک تشویق اته قولا ق بیله آصلدی .
 مع هذا سنان پاشانک اردوی همایونده بر اقدیغی عثمان
 پاشایه ویرمش اولدیغی تعلیماتی عثمان پاشانک حرف
 بحرف اجرا ایتسی ثمره سیله ۹۹۰ سنه سنده اردوی
 همایون ایچمه موفقیتره نائل اولمش و از جمله روان قاعده سنی
 ضبط ایلش ایدی . شو مظفر بیت دولت علیه نکه

متفقلمری بولنسان چركس ونوغای وقوموق
وتاتار بكارينك غيرتلىرى جانلانديره رق جملہ سی
عثمان پاشانك اطرافنه بالا اجتماع ویردیکی تعلیماتی حرف
بحرف اجرایه باشلامغله استانبولدن استعانه یه حاجت
قالق سزین سمور نهری اوزرنده عجمله او یله برغلبه
چالیدی که او کون محاربه اقامده قدر بتدیکی جهته
کجه دخی آتشلر و مشعلله لر یاقیله رق جنکده دوام
اولنوب نهایت غالبیت کلیه بزم طرفده قالدی .

عثمان پاشانك اشبو موقعیاتی در سعادت عكس
ایتد كده استانبولك حال وخامندن اندیشناك اولان
اصدقای دولت پك زیاده ممنون اوله رق هله سنان پاشا
سردار مشارالیه غایت التفاتلی تحسینامه لر یازمش
اییدی . حتی بودفقه اطاعتدن چیقمش اولان قریم
خانك تأدیب و تربیه سی دخی مشارالیه عثمان پاشایه
حواله بیورلمش اییدی . موسم قیش اولق وقفقاسیه
طاغلرندن مرور روسلر طرفندن منع ایدلك حسبيله
بوسفر هر نه قدر متمنع الاجرا بر سفر ایدیسده عثمان
پاشانك غیرتی محالری ممکن ایده جك درجه لرده
اولسيله هیچ بر مانع هیچ بر مزاجم اردوی هم ایونك

حرکتی منع ایده مدی . قریمه واروب رضای سلطنت
سندیه مغایر حرکتیده بولنانلری تأدیپ ایله اسلار
کرای خانی قریمه خان نصب ایلدی .

شومظفریت ۹۹۲ سنه سنده میسر اولوب ۹۹۳
سنه سنده عثمان پاشا استانبوله کلدکده فوق الحد مظهر
التفات اولمش و مسند جلیل صدارتی دخی بالا حرازیته
کرجستانه عودت ایلدیکه زمان بر صدر اعظم اوله ورق
عودت ایلشدر .

۹۹۴ ده در سعادتده کرک عسکر و کرک ملکیه
طابقدن بر طاقم کسه لراز غلشهرق اکرچه بیوک بیوک
فتنه لردن قور قلمش ایسه ده هنوز انتظامات داخلیه
بالکلیه مختل اولماش بولندیغی جهته اشو شورشلر
نوعا سهولتله بر طرف اولنه بیلشلرایدی ولایات دخی
بوشورشلردن بری اولیوب از جمله لبنان درز یلر
معن اوغلی شام والیسنک مظالمندن طولای عصیان
ایلیه رک مصرده دخی کوله منلر طرف دولتدن کوندریلاق
والی به اطاعت ایتمک دعوالرینه قیام ایلشلرایسه ده
دولتجه بوشورشلرک دفعنده دخی مأیوسیت حاصل
اولماشدر . شو قدرکه مصر اصلاحنه مأمور ابراهیم

پاشا در سعادت ایکموز بیک التون نقد و برده صوم
 التوندن معمول بر تخت هدیه کتوره بیلک داعیه سیله
 مصر خلقنی صویدیغندن بو حرکت اهالی مصریه بی
 بیر ارایش ایدی . دولت علیه نك انتظامنی ضایع ایتکه
 باشلسی اوزرینه افلاق و بغداد پر نسلی دخی باب عالی بی
 طانییه رق کندی اره لرنده کی منازعاتی کندی قنچلریله
 فصل و حسمه قالفش د قترندن اولکی زمانلر اولسه
 بورالره در حال براردو سوق ایدلک لازم کلور کن
 بودفعه پر نسلردن هانکیسی استانبوله پاره بی چوق
 کوندر رایسه انک دعواسی التزام اولمق کی غریب
 بر پولتیقه التزام ایدلشد . شو حال لهستان و اوستریا
 دولتلرینی د اشتکایه مجبور ایلدیکندن بوایکی دولتک
 شو مسئله ده کومتر دکلمی حد سزلکه نظراً اولکی
 وقتلر اواسه طرف باب عالی دن همان اعلان حرب ایدلک
 لازم کلور کن ارتق پولتیقه یه تبصیص معناسی ویر -
 یلرک اوستریا و لهستانه روی عجز و مسکننت کو -
 سترلشد .

نصلسه روسیه دولتی وزیر عثمان پاشانک قراندیغی
 غلبه دن طولابی دولت علیه نك یلغینی اولدیغی کی

اننگلتره و وندیک و ایتالیا و فاس دولتمری دخی عثمانلی
 دولتی اولنکی کبی شدیدالبطش بر دولت اولوق اوزره
 تلقی ایلدکلرندن عثمان پاشانک روسیه یه غلبه سندن
 طولایی دول مذکورہ اغر هدیایی حامل ایلچیلر
 کوندیره رل تجدید مناسبتہ مسارعت کوستره شلردر •
 الحاصل دولت علیہ نک انتظام سزلغی هنوز پک یکی
 و او ده بعض ار باب سفاهتک قید سزلقرینه اولدیغیچون
 دول سائرہ دولت علیہ یه سلطان سلیمان و سلطان سلیم
 زمانده کی دولت علیہ نظر یله باقارلر و خاطرینه رعایت
 ایدرلرایدی •

بواره لق صدر اعظم عثمان پاشا کر جستان طرفلر
 نده تدار کاتی بالاکمال تبر یزه قدر ایلروله یه رل عجملری
 پریشان ایلمکله او جهتملر ده شان سلطنت بر قاندها
 پارلامش ایسه ده مشار الیهک وقوع وفاتی اوزرینه
 اردوجه کندی وجود یله قائم اولان انتظام دخی
 مختل اولدیغندن اردوی همایون عجملره ایکی دفعه
 مغلوب اولمشدر • برکت و یرسونکه ۹۹۵ تاریخنده
 اوز بکلر آسیای وسطی جهتمندن ایرانہ هجوم ایتکله
 پاشلقدلری جهتمله بومشغولیت ایرانہ دولت علیہ ایله

اوغراشمنه میدان و یرمندی و او صروده سر عسکر
 فرهاد پاشا بوفرستی غنیمت یله رک آزر باجیان ونه اوند
 ولورستان طرفلرینی جولان ایتمکه ایران صلح استدا
 سنه مجبور اوله رق ۹۹۶ ده عساکر عثمانیه طرفندن
 ضبط اولنان ممالک دولت علیه یه ترك اولمقله برابر ایران
 شهزاده لرندن حیدر میرزا دخی رهن طریقیله در سعا
 دته کوندلک شرائط اساسیه سی اوزرینه مصالحه
 عقد اولندی .

اردوی همایونک اشبو شرق سفرندن استانبوله
 عودتی ارتق استانبولجه نظام وانتظامک بسبتون
 بوزولمش اولدیغی بر زمانه مصادف اولمقله شرق عسکری
 استانبول یکچیر یلریله برلشهرک بر طاقم قتنه و فساد
 ایقاع ایلدیلر که بوفساد اهالی یه دخی سرائتله هر کس
 باشلی باشنه بر زور با کسیددی . بر اهلوقار باب عصیان
 دیوانی با صهرق و کلایی دخی تهدید ایشلر ایدی .
 بوفساد ولایتله دخی یا یله رق طشره لرده کی ار باب
 تیمار وزعامت عصیان ایلینجه تهلیکه بر قاتدها آرتدی
 یالکز اشوار باب تیمار وزعامتدن ایکی ییک بشیوز قدری
 ولایتلرده کی قلعه بر جلرینه صلب اولنه رق ۹۹۸ ده

ولایتلرجه اسایش همان اعاده ایدیلور کبی اولدیسده
استانبولک شورشی آرتدقچه آرتدیغندن صدر اعظم
بولنان ذات صیانبجه کولنی مرمره دکرینه قاتمق کبی
برخیالی وسیله ایدینه رک استانبولدن فراره مجبور
اولمشیدی وکلای سائر ایسه هربری فرقه عسکریه یی
اله الهرق یکدیگرینک هلا کنه یوریمکده ایدیلر ۹۹۹ده
سپاهی گروهی سرای همایون میدانه قدر هجوملر
ایله رذالتک انواعنه متجاسر اولدیلر .

بالتصادف ۱۰۰۰ تاریخنده غایت شدتلی روبا
اورتالغی قاصدی قاووردی و ۱۰۰۱ سنه سنده بوسنه
طرفندن اوستریا حدودینی تجاوز ایدن اون بش بیک
کشیک بریردومز طاقینه برباد اولدی . استانبول زور
باری ایسه حالادولتی اصلاح ملکه همتدن منع ایدرک
بناء علیه بر بیک محاربه ایله ارباب نفاقی منع ایچون او
ستریایه اعلان حرب ایلدیلر سده اردوی همایونک
استانبولدن چیقارلمسی الک بیک برشورش موجب
اولمشیدی .

هله اوارالق اوستریا لیلرک مجارستانه هجوم ایله
پشته یه قدر ایلر اولدکری خبری کلدیکندن بوخبر

عسکرک غیرتنی ارتدیروب دشمنه قارشو حسن مدافعه
املنک تعممی دخی اردوجه ایجه انتظامی موجب
اولدی .

واقعا اردوی همایون بوخواهش ایله بالهجوم
بالتونه وسیرم محاربه لرنده اوستریالیلر مغلوبیت کامله یه
دوچار اولدقلری کبی سن مارتن وراپ قلعه لری دخی
پک شانلی برر محاربه ایله فتح ایدلمش ایسه ده اوستریالیلر
بو مغلوبیتک اجیسنی چیقارمق ایچون مجارستان افلاق
وبغدان طرفلرینی تمامیه ایاقلندیره رق جمله سنک قوت
مجموعه سیله بکرش ویرکوی و ابرائیلده بولنان اهالی
مسيله کابللاً قتل ایدلمش ونهش لری طونه کنارینه
پیغلمش ایدی . بناء علیه بومظلمو ملرک انتقامی المق
ایچون اردوی همایون وار قوتیه اشبو اعدای متفقہ
اوزرینه یوریمسی لازم کلد کده بعض قورقاق ووهاملرک
کوستردکاری سوء مثال اوزرینه اردونک انقیاد و متاد
نتندن امنیت منسلب اولمشیدی .

ایمدی برطرفدن اردوی روحلندیرمق ایچون
سنجاغ شریف اخراجی ودیکر طرفدن دخی قریم
عسکرینک هجومی مذاکره ایدیلورکن سلطان مراد

ثالثك شمدى به قدر بوانتظام سز قلره سبب محض اولان
 سودا علتى بردن بره شدت لنه رك اوچ كون ظرفنده
 وفاتى وقوع بولمغه تسويه امور سلطان محمد ثالث
 حضر تلى نه قالمش ايدى .

بر پادشاهك بويله شدتلى ودهشتلى خسته لى
 قوى الشوكه بر دولتى الك بيوك ضعفه دوچار ايله-
 جگنه سلطان مراد ثالث پك بيوك بر مثال اولمشدر .
 حتى اوزمان دولته عارض اولان انتظام سزلى بالىكايه
 دفع ايدى لك ممكن اوله ميوب بناء عليه دور استيلا من
 تاريخ نظر نده سلطان مراد ثالث ايله ختام بولمش واندى
 صكره دولت عليه عثمانيد بر دور وقوفه كيرمكلا كا
 مخصوص اولان دردنجى بابمى بوجه آتى كشاد ايدى لك
 لازم كمشدر .

✽ در دنجی باب ✽

« دور انحطاط عثمانی »

عن ۱۵۷۴ الی ۰۰۰

(برنجی فصل)

دور وقوف

عن ۱۵۷۴ الی ۱۶۹۱

تفصیل - سلطان مراد ثالث زمانده هیئت
 ارکان دولتک فکرلری نه قدر بوزولمش اولدیغنه شو-
 نکهله دخی استدلال اولنور که سلطان محمد ثالث حضر-
 تلرینک حین جلموسلرنده مراد ثالثک دها اون طقوز
 نفر شهزادهلری بر حیات اولوب شاید بونلر صاغ قا-
 لورلر ایسه دولته موجب صداع اوله حق بر طاقم
 فسادلر ایقاع ایدرلر دیه توهم اولنهرق اول نوجوا-
 نانک کافه سنه قیلوب بر طرفدن جلموس همایون تبر-
 یکاتی اجرا اولنور ایکن دیگر طرفدن دخی بونلرک
 جنازه نمازلری قلنهرق اصدقای سلطنت قان اغلا-
 مشلردر . حالبو که دولت علیه بی تهدید ایدن شی
 اشبو شهزادکان مظلوم دکل ایدیلر . اصل چاره ارا
 نمق لازم کلان تهلکه لر مهالک خارجیه اولوب واقعا

صدر اعظم سنان پاشا اہمیتی ہیچ برمسئلہ بہ قیاس
قبول ایمان افلاق و مجارستان عصیانلرینی محو ایچون
بر بیوک اردو ایله طونہ اوزرینہ کو پری قورہ رق
بکشرہ طوغری یورودی ایسہدہ نظام وانتظامی مختل
اولان بر پای تختدن چیقمش اردو ایله ایش کورمک
ذاتاً مأمول اولدیغندن افلاق و یوودہ سی میخال اشبو
اردوی ہمایونی آردج نہری یانہدہ بر بطاقلقہدہ
صفتش دیروب یک فنا مغلوب ایلد کدن ماعداد اردونک
حین رجعتندہ یعنی تمام روسحق پیشکاهندہ کی کو
پریہ وصواندہ بردہا مغلو بیت یوز کوسہتر مکلاہ
اشیا ومہمات موجودہ نک کافہ سی دشمنہ ترک ایدلک
اوزرہ کوچ حال ایله بری طرفہ کچمک قابل اولہ بیلدی
یومغلو بیت مدہشہ ۱۰۰۴ سنہ سنندہ یوز کو
ستروب شو حالہ طونہ نہرینک اوتہ طرفی دولت
علیہ تابعیتندن چیقمش دیمک اولدقدن فضلہ مغلو بیت
واقعہ ذاتاً حال شورشدہ بولنان ار باب وہم وتلاشی
بر قاتدہا اور کو تمش ایدی دولت ہیچ بر زمان غیرتلی
آدمردن خالی قالہ میہ جنی وشوقدر کہ ال بیوک مشکلات
زمانرندہ ال ممدوح غیرتلا اکثر یا ہیچ امید ایدلیان

طرفلردن کله جکی یك چوق توار یخده اثبات اولمش
 بر حقیقت اولوب بو کره دخی امداد مزه یتمشك لازم
 کلان غیرت خواجه شهر یاری سعد الدین افندی
 طرفندن حصوله کلمش وافندی مومی الیه پادشاه
 جهانی غیرت لندیر مرک تجدید ظفر ایچون یلدریم کبی
 بر سر عتله مجارستانی اور مق لزومنی اثبات یلش ایدی .
 بونک اوزرینه ذات شاهانه تدارکات عظیمه یه دو .
 شهرک اردوی همایون ایچون غیرت لرینه فتور کتور .
 مامش اولان ذواتی انتخابه باشلامغله بو اردونک شا .
 یعه غیرت و خواهشی اعدا ممالکنه دخی واصل او .
 لنجه مجارستان تتره دیکی کبی افلاق بالکلیه قورقه رق
 آمانه دوشمش ایدی . واقعا ذات شاهانه مجارستانه
 بالهجوم خطوان واردل واکری قلعه لرینی ارسلان
 کبی جنک لر ایله قازاندقن ماعدا اوچیوز بیک نفر دن
 مرتب بولنان عثمانلی اردوسنه کرشجه صحراننده یه
 اول مقدار عسا کر متفقین هجوم ایلد کبری زمان بو ملحمه
 کبری مهاج و چالدران ملحمه لرینده قیاس قبول ایده .
 میه جک بردهشت پیدا ایلش ایدی .
 محاربته مذکور ه تمام اوچ کون امتداد ایلشدر

ایلك كونی محار به قزیشور قز شمز ایکی طرف دخی
 پایدوس ایلمدکاری حالده ایکنجی کونی غلبه دشمن
 طرفنده قالمش و حالبو که او چنجی کونی بحکمته تعالی
 بزم عسکر او قدر پریشان اولمش ایدی که عادتاً اعدا
 اردوگاهه کیره رک خزینه بی و سائر هی یغما یه دخی
 قویولمش ایدی * بو پریشانلق اردوده بولنان چادرچی
 وسقا واشجی مثللو خدمه نك غیرتنه طوقنه رق بونلر
 « برده هانه کون ایچون طور ییورسکز ! » دیه چادر
 صریغی وبالطه و ساطر و حتی کفجه لره طور انوب
 دشمنه عظیم برولوله و یردکاری کی جغاله زاده سنان
 پاشانك بفرقه سواری ایله کوسه تردیکی هجوم دخی
 تمام موسمنه اصابت ایلر یکندن دشمن او یله رذیلانه
 بر مغلو بیته دوچار اولدی که یالکزیکرمی یک سوار یسی
 جوار د بر بطاقلغه صاپلان دیغی کی او توز یک قدسز
 پیاده و سائر ده دخی قلیچدن پکیرلدی *

ایشته بو غلبه عظیمه لسان تار یخده سلطان محمد
 ثالث حضرتلرینی « اکری فاتحی » دیه تشهیر ایلوب
 استانبوله عودت همایون شرف واقع اولدیغی زمان
 ونديك وایتالیا و فاس و ایران و بخارا دولتری هدایای

عظیمه ایله ایلچیلر کوندروب تجدید مصالحه به مسا
رعت ایلشدر .

اشبو غلبه عظیمه دولت علیه بی یکیدن احیایه
مدار اوله بیله جک بر نعمت ایکن حکم معکوسی کور ملک
انسانی نه قدر مایوس ایدر . خواجه سعدالدین افندی
وجغاله زاده کبی بوسفرده خدمات عظیمه سی کور
یلان اعظم سرآمدانن هر بری دولتی کندیلری قورتا -
رمش اولدقلرندن بختنه کبرو عظمتی عیوقه چیمقاره رق
وهر بری دیگر نیک محوی ایچون انتر یغله ره مباشرت
ایلیه رک مهم امور دوات یوزی اوزرینه قالدیغی کبی
استانبولک شو حال هر طرفه جرأت ویردیکندن اردوی
همایوندن مطرود بر طاقم سپاهی دو کونتیلری اناطولیده
فوج فوج اشقیا جمعیتلری تشکیل ایلش اولدقدن بشقه
قریم خانی دخی در سعاتی هیچ طایماق اوزره عصیان
ایلش ایدی . بوقار غشه لق اره سنده اوستریالی نقص
عهد ایدرک مجارستانه مستولی اولدیغی مثللو افلاقلیلر
دخی تکرار عصیان ایلیه رک طونه بی ده بالروور نیکبولی
قلعه سنی استیلا ایلش اولدقلرندن دولت اکری فتحندن
اولکی حالی آره به جق بر ضعفه یکیدن دوچار اولمشیدی .

بونک اوزرینه دیار بکر والیسی مراد پاشا انا -
 طولی اشقیاسنی تأدیه مأمور اولدیسده بر طرفه
 مقهور اولان اشقیا دیگر طرفه تکرار باش قالدیر مق
 صورتیه مشغولیت واقعیه اوزاتور کیدر ایدی .
 برکت و یرسون که محارستانه کیدن اردو غایت مها -
 رتلی بر محار به ایله قانیشه قلعه سنی فتحه موفق اولد -
 یغندن اوجهته ده بر یوز آقغنی کورلمشدر . بو یوز
 آقغنی ۱۰۰۹ سنه هجریه سنده میسر اولوب ایرتسی
 سنه اوستر یالیر بودین وستول ولیمبورغ طرفلرنده
 عساکر شاهانه یه غلبه ایدر قانیشه قلعه سنی تکرار
 همده شدیداً تحت محاصره یه المش ایسه لرده تریاکی
 حسن پاشا قوت و مهماتنه دکل بلکه عقلاره حیرت
 و یره جک خدعه حر بیه سنه طیانهرق قلعه مذ کو -
 رمی اویله بر مدافعه ایلشدر که عادتاً بومدافعه نک
 امثالی هیچ بر تار یخده مشاهده اولنماشدر . بناء علی
 ذلک جهت جهت غالب اولان دشمنلرینه جهت جهت
 مغلوب اولهرق شمالی سفری بیاغی موجب امنیت
 اوله جق بر نتیجه صلحه مبدل اولمش و انا طولی قطعه -
 سنده یازیجی اوغلی نام شقی سائر اشقیا فرقه لرینی

باشنه طو پلايه رق قره مان ولايتی بياغی استیلا در-
 چده سنه وار دینگی حالدہ مراد پاشانک هم تیلہ بر قاج بوز-
 قو تلغه دوچار اولدقدن ماعدا پیدر پی کوندر یلان
 وزرانک بعضیسی غالب و بعضیسی مغلوب اولقدہ
 ایدی . بر آره لق مر قوم یاز یجی اوغلی بر مصادمہ ده
 کیردی ایسه ده قرن دashi دلی حسن و سائر رؤسای
 اشقیایا هب مر قومہ بدل اوله جق دیشلی حریفلر
 اولسیله بوشغولیت اوزانوب کیدر ایدی . حتی بونلرک
 قیشمیریہ و سیواس و کوتاہیہ و تاروسه یه طوغری
 حالکہ مستولی اولدقلری دخی کورلمشدر .

اشقیای مر قومہ نك بودر جه لره قدر حدود استیلایی
 توسیع ایتلری اردو دو کونته سندن و خرسنز و حیدود
 قوایسی اشقیادن اون بشیک قدر افرادہ مر قوم
 یاز یجی اوغلانک دخی یکرمی بشیک قدر جلالی
 حاکمانی ضم و الحاق ایدرک قرق بیک کشیک برار-
 دیه قوماندہ ایتک مرتبه سنه وصولندن ناشی ایدی .
 اوزورلرینه کیدن وزرا مغلوب اولدقجه بونلرک جرأتی
 ارتقدن ماعدا اهلای مغلوبه دن الدقلری اقچه
 و عسکر دخی بر یاندن قوتلرینی آرتدیر ایدی . بناء علیه

« جلالی وقعه سی » ديه تاريخ عثمانیده باشلیجه بر
 صحیفه مهمه اشغال ایدن شو مسئله بیوک و قتمادی بر
 دولت محار به سی قدر دولت علیه عثمانیه بی صار صحت
 و بلکه بوشللو محاربات داخلیه نك اغمیتی محاربات
 خارجیه دن زیاده اولوق مصدق بولندیغی جهته غایله
 مذکور نك بر یانندن دخی اناطولی بی خراب ایتسی
 بر دولت محار به سندن زیاده سوء تأثیر اتنی کوسستر -
 مشدر .

ایمدی اناطولی قطعیه سی شویله بر بلیه مده شه
 ایچنده ایکن اسپانیا و ایتالیا و جنو یز و مالطه کیلرندن
 مرکب عظیم بر دونما دخی جزایر و تونس سواحلی
 ایله بر چوق آق دکز اطهر لینی اوروب هر طرفی یغما
 و تخریب ایتیکده ایدیلر . داخلدن و خارجدن بنای
 دولتمیزی قازمه لامقده اولان اشبو بلیاته مقابل استا -
 نبولده دولت آدمیری یالکز کندی ذوق و صفالرنده
 اوله رق مجرد صمدقلرینی طولدیر مق ایچون کرک
 رتب عسکریه بی و کرک مأموریت ملکیه بی انجق
 رشوتی چوق و یرنلره صائمغه باقارلرایدی . بر آره لق
 جغاله زاده قومانده سیله بر فیلو دونما آق دکره چیقدی

ایسه ده متفقین دو نمانده هیچ رشی یاپه میوب یالکز ایتالیا
سواحلنی یاقه رق ۱۰۱۱ سنه سنده استانبوله هودت
ایلدی .

ینه بواثناده شمال طرفلرنجه اوسه تر یالیر بودین
قلعه سنی تکرار محاصره ایلمشلر ایسه ده سرحد بکرینه
همتلی ثمره سیاه ترک محاصره یه مجبور ایدلدکن ماعدا
ستول و ولیمور غده دخی ایتدکلی هجو ملر بوشه
حقیقه رق دولت علیه نک شمال طرفلرنجه شان غالبیتی
تأمین اولمش ایدی . استانبول رجالی ایسه طشره
وسرحدلرک فالغنه اهمیت و یرمدکلی کبی بویله
مظفر یاتنه دخی هیچ اهمیت و یرمدیکندن وسوء اخلاق
کیتد کجه میدان الدیغندن ارتق استانبولده ایسه
عقلی ایرنلر دیل اوزاتمغه باشلادیلر ایسه ده قاریشقلق
اثناسنده الیز یاده دیل اوزاتانلر ایشلره هیچ ده عقل
ایردیره میان ایاق طاقی اولدیغندن بواعتراضلر دخی
اورته لغک شورشی تنزیل دکل تزید ایلدی . بوزما
نک برموده سی دخی تیمارلی وزعما مثلوا افراد عسکریه یه
مخصوص اولان تیمار وزعما ملرک منحل وقوعه کلدکجه
سرای همایون منسو بلرینه طو یوملق نامیله و یرلمسی

قضیه سی اولش ایدی . ار باب تیمار و زعامت بویو-
لسزلقدن طولایی شکایت ایده جک اولسه لر شکایت
اولک ایاق اولنلرک درحال باشی از یلیدیکی جهسته
بودفعه میدان المغه باشلایان ار باب کفت و کویه بوتلر
دخی التحاق ایدنجیه ناخشنودلر فرقه سی بردن بره
پیو یهرک علنی بر عصیان دخی میدان المشیدی .

ار باب عصیان تا سرای همایونه قدر هجوم ایسرک
پادشاهک بالنفس کندیلرینه عرض اولنه جق بر طاقم
استدعاری بولندیغی بیانیله مطلقا بر ایاق دیوانی قور-
رلمسنی ایستدیلر . بوار باب استدعانک الک چوغی
عسکری طاقندن اولوب ایچلرنده علمادن اصنافدن
دخی بر چوق آدملر بولنغله ذات شاهانه استدعا او-
لنان ایاق دیواننی مناسب کوردیلر . ار باب نمایش
کرک داخلی و کرک خارجی فنالقلرک کافه سی و کلا
ورجال دولتدن بر چوق آدملرک ارتکاب و رشوتلری
سیئه سی اولدیغندن بحثله امور دولتی دوزلتمک لازم
کلورایسه فلانجه و فلانجه دیه بالتعداد بر چوق آدملرک
باشلری کسیمک لازم کلدیکنی سولدیلر . واقعا اسملری
تعداد ایلدکلری آدملرک الک چوغنک حقیقه باشلری

کسیلدیکی کبی بوارهلق بلغراد سفرندن عودت ایلیان
 یخشی حسن پاشایی ده اعدام ایتدیرمک ایستدیلر ایسه ده
 یکی چری طائفه سی حسن پاشانک یارارلغندن بختله
 محافظه سنه قیام ایلدیکندن بوحال عر بده بی بیوتمک
 سبب اولدی . حسن پاشا یکی چرینک معاونتیه ارباب
 تیمار وزعامتک تر بیه سنی پک اعلا و یردی ایسه ده اندن
 صکره کندیسنه تابع قاله حق اولان یکی چری ایلده دولته
 مستولی اوله جغی اکلاشیلهرق اوده برآرهلق بوغدیر-
 یلوب اعدام قلمشدر .

بو اختلال احوال اوزرینه مصر والیسی یاوز علی
 پاشا مقام صدارته دعوت اولندقدده حلب و مرعش
 واطنه و قونیه طریقیله کلورایکن راست کلدیکی اشقیا
 فرقه لرینی برر برر اوروب اله کچیردیکی اشقیانک دخی
 برونلرینی قولاقلرینی و یاخود قوللرینی باجاقلرینی
 کسوب بنه اناطولی ایچنه صالی و یرمک مثللو مجازات
 ترهیبیه ده بولندیغندن شو حال اشقیانک بیاغی کوزلرینی
 بیلدیرمش و بناء علیه رئیس جلالیان دلی حسن البنام
 رققاسندن شاه و یردی بی استانبوله کوندروب نائل عفو
 اولمقدن ماعدا بوسنه والیلیکی دخی عهده سنه توجیه

بیوریلوب حتی درت بشیوز نفر کزیده سلا حشورلری
 معیت شاهانه سواری خدمه لیکنه قید اولمش ایدی .
 جللی اشقیاسک اناطولی بی هرج و مرج ایتسی
 اوزرینه عجم شاهسی شاه عباس برکیتلی اردوایله دخی
 کندیس یورویه جک اولورسه ارتق دولت علیه یی
 زیر وز بر ایتک ایشدن بیله اولمدیغنی حکم ایتش و بو
 امله اوروپایی ده تشریک ایچون یاپالقی عقایدله المانیا
 و فرانسه و ایتالیا و ونڈیک حکومتلری نزدینه سفیرلر
 کوندرمش ایسه ده المانیان ماعدا جمعه سی دولت
 علیه نک شمدیکی ضعفندن امیده دوشمک خصوصه یی
 احتیاط یله عجمه جواب رد ویرمشلر ایدی . یالکز
 المانیا دولتی میدان محاربه یه اولا ابرانک آتلسی رأینده
 بولمغله شاه عباس کلیتلی براردو ایله تبریز و روان
 طرفلرندن هجوم کوستره رک تا کر جسمه تانه قدر ممالکی
 چکنه مش ایدی . بو هجوم ۱۰۱۲ سنه هجریه سنه
 وقوعه کله رک سلطان محمد ثالث حضر تلی دخی مقابله
 تدارکات کلیه یه مباشرت اوزره ایکن وفاتی وقوعه
 کلمکه شرق سفری سلطان احمد اول حضر تلی نه
 قالمش ایدی . فاتح اگری سلطان محمد ثالث حضر تلی

ذاتندن وصفاتندن شکایت ایدیه جک بر پادشاه دکل
ایدیسه ده مراد ثالث زمانده بر کره شیرازه سسندن
چیمش اولان انتظام دولتی اعاده ایدیه جک قدر جرأت
ومتانتی یوق ایدی .

سلطان اجداول حضرتلرینک نصیل مشکلاتلی
بر زمانده تخت عالی سلطنته جلوس بیورمش اولدقلری
یوقارودنبری حکایه ایدیلان احوال ایله استدلال اولنه-
یلور . بوندن ماعدا حین جلوسلرنده هنوز اون درت
یاشنده و امر مسنون ختانلری اجرا اولنماش بر نو-
جوان اولدقلری دخی یدش نظر مطالعه یه النورایسه
بوله داخلا و خارجاً مختل و مشوش اولان بر دولتی
اداره خصوصنده دوچار اوله جقلری صعوبات وهله
انسانی اور کوتور . بونکله برابر پادشاه نو جاه
حضرتلرینک بر یاندن امر مسنون ختانلری اجرا
اولنمادیغی صروده دیکر جهتدن دخی اول باول سرای
همایونجه اجراسنه مسارعیت بیوردقلری اصلاحات
جهله بی تترتمش ایدی . زیرا استانبولده بولنسان
مرتکبلردن بر چوغنیک سراجیه ارقارلی بولنوب
بونلر میانده حائز اولدیغی مقامک اهمیتتی جهتیه الک

بیوکی والده صفیه سلطان اولدیغندن و بر طاقم خزینه دار
 اوسته لر ایلده حرم اغاری دخی مشار الیه هایه تابع اولد-
 یغندن سلطان احمد حضرتلری بونلری طاقیله اسکی
 سرایه نقل و حبس ایتدیردیک کی سرای هم-ایونک
 ارکاندن برقاج کسه بی اعدام دخی ایتدیره رک
 هر کسه بردهشت ویرمیشیدی.

سلطان محمد ثالث حضرتلرینک وفاتیله اون درت
 یاشنده بر صیینک پادشاه اولسی ایرانیره جرأت
 و یردرک شاه عباس روان واریوان ایله شیروانی
 ضبط و قارصی ده استیلا ایلدکدن صکره ایلرویه
 طوغری یورومش و یالکز آخسقه قلعه سی قرقاش
 پاشانک شجاعت مفرطه سی ثمره سیله طیانوب عباسی
 مایوس ایلش ایدی. بونکله برابر المانیا ایمپراطوری
 دخی شاه عباس ایله اولان اتفاقنه مبنی تکرار مجارستانه
 طوغری هجوم ایلدیکندن سلطان احمد خان حضرتلری
 صدر اعظم یاوز علی پاشایی شماله و جغاله زاده بی دخی
 شرقه مأمور ایدوب بونلردن جغاله زاده کرخستان
 بکرینی و پاشالرینی باشنه طوپلایه رق ۱۰۱۳ موسم
 شتاسنی ارضرومده چیقاردیغی ائشاده شاه عباس

کلوب وانو باکو قلعه لرینی ده محاصره ایلهش ایسه ده
برفانده سنی کورده مامش ایدی . فقط موسم بهارک
حلولی ایله تمام شرق اردوسی شاه عباسی تعقیب
ایده جکی ائنده جلالیلر تکرار باش قالدیره رق اردونک
بر بولک قسمی انلر اوزرینه حواله ایدلدیکندن عجملر
کرجستانی بالنسبه تنها بولدیله وارتق ایستیکلری
کبی ازوب چکنه دیلر .

شمال اردوسی ایسه سرحد بکار یله برلشوب
دشمن انه دوشمش اولان برطاقم قلاع وقصباتی استرداداً
برچوق مظفر یاته نائل اولمقده ایکن یاوزعلی یاشانک
معیتنده بولنان مصر کوله منلری ایله او جاقلی عساکر
شاهانه ارمه سنده ظهوره کلان قته وفساد اردوی
همایونی کلیاً محو کبی برتهلکه عظیمه یه یاقلاشدیرمش
ایدی . بونک اوزرینه درحال استانبولدن تازه عساکر
ارسالیه فسادده اوک ایاق اولانلردن التیوز قدر
حاصیلرک قفاسی کسیلرک ایش یولنه قونمش ایسه ده
دیگر جهتدن جلالیلر ایشی آزیته رق اولانجه قوتک
اناطولی یه حصری اقتضا ایتکله المانیا ایله همان
مغلوبانه بره صالحه عقدینه مجبوریت الویرمش ایدی .

شمال سفری بوضورتله برطرف ایدلد کدن صکره
 جلالیلر اوزرینه نصوح پاشا مأمور ایدیلهرلک کننیمنه
 عموم اناطولی والیاسکی عنوانی ویرلدی ایسه ده کوتاهییه
 ایله قونییه اره سننه وارر وارر جلالیلر یندنه مغلوب
 و پریشان اولدی . حالوکه نصوح پاشا طرفندن
 و یریلان امرلر اوزرینه حرکت ایلان سائر والیلر
 دخی برر برر مغلوب اولدقلرندن ارتق تکمیل اناطولی
 قطعده سی دولت علیه نك حکمندن چیقمش عداو لنمق لازم
 کشیدی . بعض عقلای دولت اکر شام و حلب جهتلر
 ندن اشقیانك ارقه سی انوبده بری طرفلر دخی
 تصدیق ایدیلهرلک اولورسه کلی فائده لی اوله جغنی
 حکم ایلدیلر ایسه ده جبل لبنان دخی حال عصیانده
 بولتمقله برابر شام و حلب والیلری ده همان مرکز سلطنت
 سنیه بی طایماق درجه لرنده برونلرینی بیوتمش اولد
 قلرندن بوکاده امکان کور یله مامشدر .

نهایت دولت و ملتی شو اشقیای جلالیه الندن قور
 تارمق ایچون ذات شاهانه نك بالذات اناطولی یه یکمسی
 لازم کلدی . واقعا بروسه یه قدر وارلدقده عن اصل
 سپاهی کروهندن ایکن تیمار وزعامتلی نك انقطاعندن

طولای جلالیسلر ایله برلشمش بولنسان الی بیک قدر
افرادک تیمار وزعامتلیری تکرار ویرلک شرطیله عرض
ایلدکلری اطاعت قبول اولنه رق بونلری جلالی بی
اورمغه مأمور اولان وزرا معیتلرینه تقسیم اینلک کی
مقدمات موقیت دخی کورلکه باشلادی ایسه ده
اصل فسادک باشی استانبول اولوب ذات شاهانه نک
استانبولدن آیرلسنی متعاقب غایت مدھش بر عصیان
دخی استانبولده باش کوستر دیکندن چارناچار پای تخته
عودت همایون وقوعه کلدی .

در سعادتده ظهوره کلان عصیان براز معاشلری
تداخلده قالان بعض صنوف عساکری بر طاق دولت
خائنلرینک فسادده تحریک ایتملرندن نشأت اینلش ایدی . اک
اول فسادباشیلری قتل اولنه رق قصوری دخی تهدید
اولندیغی صرهدده بونلرله بس بالی مخبره لری بولنان اناطولی
اشقیاسی بسبتون آزمغله مجارسه تان اردوسنده بولنان
صدراعظم لالا محمدپاشا جلب اولنه رق اناطولی یه
سوق اولمغه قالقشلدی . انجق لالا محمدپاشا برچوق
زماندنبری بر نتیجه قطعی یه ایصال ایدیله مامش بولنان
اسفار شمالیه بی حقیقه حسن ختامه ایصالی تأمین ایلده جک

بر طاقم تدابیر ده بولمغله اور اردن آیرلماق ایستمش ایدی .
 بو بایده بر قاقچ عریضه تقدیم ایلش ایسه ده قبول اولمده .
 یغندن اناطولی مأموریتی ایله اسکداره چکدیکی زمان
 قهرندن وفات ایلش ایدی .

ایشته احوال دولتك بودرجه لرده اختلالی ۱۰۱۵
 سنه هجریه سنه مصادف اولوب واقعا لالا محمد پاشانك
 دیدیکی کبی کندیسی شمال اردوسندن مفارقت ایدر
 ایتمز المانیا و اوسستر یا وترانسلمو انیا و بحار لردن مرکب
 عظیم بر اردو ایاقلانوب شمال اردوسنی بره قدر محو
 ایتمک عزمیه بر هجوم کوسستر مشر ایدی . برکت
 و یرسون که سردار مراد پاشا عادتاً کنیدی جاننی
 اورته یه قویه رق عظیم بر مقاومته بولمغله غالبیت هیج
 بر طرفی مغرور ایتمک سزین بحار لیه لیر ایله یکرهی سنه
 ایچون بر متار که عقیدینه موقیت حاصل اولدی .

مراد پاشانك بو خدمته مکافاة ۱۰۱۶ سنه سنده
 عهدده سنه صدارت توجیه اولنه رق اناطولی اشقیاسنك
 تنکیلنه مأمور بیورلمقله واروب ایکی سنه قدر اوغرا -
 شدقن صکره اشقیایی طرف طرف قهر و اناطولی بی جدأ
 تخلیصه موفق اولمشیدی . مراد پاشانك بو موقیتی

دولتی یکیدن احیا دیمک او لمغله دول معظمه دن دولت
 علیه ده دوست اولنلر مخصوصاً ایلیچیلر کوندروب
 تبریک مظفریته مسارعت ایلدیلر . هنوز محارب
 بولنان ایران اوزرینه دخی ۱۰۱۸ سنه سنده مراد
 پاشا مأمور بیور یله رق حالبو که بومأموریتدن وکلای
 دولتک اصل مقصدی مشارالیهی استانبولدن تبعید
 ایلدکدن صکره پای تخته بیلدکاری کی فساد و یرمک
 اولدینغنی مراد پاشا فهم ایلدیکندن ایرانه هجوم
 حقنده کی اراده سنیه برقاچ دفعه تکرار اولندینغی
 حالده اسکداردن بر خطوه بیله ایرلما مقصده اصرار
 ایلدی . اگر مراد پاشا در حال ایرانه حرکت ایتسه
 ایدی استانبول و کلاسی جلالیلری تکرار تشویق
 ایدرک اناطولی اولیکیدن بدتر بر حاله کیردکدن ماعدا
 ایران اوزرینه حرکت ایدن اردوگ دخی خط رجعت
 و طریق مخیره و مراسله سی کسیره لک ایشلرک پک فنا
 اوله جفنه هیچ شبهه یوق ایدی . بناء علیه مراد
 پاشانک شو اصراری پک بجما اوله رق اسکداردن
 و یردیکی قوماندلر ایله اناطولی شقاوتنی بالکیه ازاله
 واسایش عمومی قطعاً اعاده ایلدکدن صکره ۱۰۲۰ سنه

هجره سنده ایران اوزرینه دخی یورو یه رک و عنایت ربانیه
ایله عجمله طرف طرف غلبه ایلیه رک دولتی اوغاله دن
دخی قور تارمغه موفق اولدی . بومو قیامت نتیجه سی
تبریز شهرینک استرداد اوله رق ایرانلر در حال
استدعای صلحه مجبور اولدیسده مراد پاشا بواستدعا
لره جواب موافقت و یرمکده اصلاً عجله ایتیه رک
بوایش خاکیای همایون ملو کانه یه عرض اولنه جق
برایش اولدیغندن بحثله ایران سفیرلری بالاسغال
کندیسی محاربه ده دوام ایلدی . اگر عمری وفا ایتسه
ایلی ایران دولتنک بالکلیه محوینه قدر یورو یه جک
ایلی . انجق ۱۰۲۱ سنده حلول اجله له وفات
ایدرک وفاتندن صکره ایران ایله عقد اولنان غایت شانلی
بر معاهده دن طولانی قدر شناسان ملتینه مراد پاشایی
تبریک ایلشدر .

عجم سفرندن صکره دیار بکر والیسی نصوح پاشا
صدر اعظم اولدیسده ده دولت اداره سنه واقف آدم
اولیوب یالکر ظلاً جمع ایتش اولدیغی میلیونلری ایله
صدارتی یاقه لامش بولندیغندن صدارتنک ایلک سنه
سنده مملکتین ایله مجارستانده عصیانلر چیقهرق قره

دکز طرفیندن دخی موسقوف قازاقلری ایلك دفعه اولمق
اوزره سینوب لیمانه قدر سواحل عثمانیه بی تهدید ایلش
ومالطه وفیلورانسه کیلری ناوارین واستانکوی و آغالیمانی
وسائر هی اورارق بونجه اسلامی اسپر ایلش ایدی . واقعا
شاقشاقی ابراهیم پاشا قره د کزدن قازاقلری طردو خلیل پاشا
دخی مالطه یی احراق ایلدی ایسه ده نصوح پاشا بر سفیره
درت لقردی سویلکه مقتدر اولدیغی حالدده استانبولده
عالمک جانی یاقوب مستبد کسایش اولدیغندن برمد .
هش فساد دها باش کوستره . اوزره ایکن نصوح
پاشا امر پادشاهی ایله اعدام ایدلمکه هر کس ممنون
قالمش ایدی .

مراد پاشانک یرینه نصوح پاشا کی بر حریفک
صدارتی ایران دولتی او مغلوبانه معاهده یی امضادن
تادم ایلش اولمسيله تکرار نقض عهد ایلیه رک بر حق
یرلری ضبطه قویولدقده صدر جدید داماد محمد پاشا
برارد وایله سوق اولنه رق ۱۰۲۴ سنه سنده نهانوده
قدر ایرانلی بی تعقیب ایتیمکه ایرانلر صلح استمداسنه
مسارعت ایلدیلر ایسه ده قبول اولنمیوب آذربایجان
واردیله قدر ایران مالکی هرج و مرج اولندیغی کی

شمال جهت بنجه دخی مملکتین ولہستان و اوستریا تکرار
 اظهار عداوت ایلد کلرندن اورالہ سوق اولنان
 اردوی همایون دخی غایت پارلاق مظفریاتہ نائل
 اولقده ایدیسده استانبولک شورش و فساد ی بو غلبہ
 لردن ایدیلہ جک استفادہ یی دوشونمکہ میدان براقدیغی
 کبی بوصرہ ده یعنی ۱۰۲۶ سنہ سنندہ سلطان احمد
 حضر تلی دخی وفات ایتمکله دولت علیہ عثمانیہ
 هر طرفجہ غالب ایکن ینہ هر طرفجہ عظیم بر حیرت
 ایچندہ قالمشیدی . سلطان احمد حضر تلی حد ائت سنندہ
 ایکن پادشاه اولہرق و کلاسی ایسہ برر برر اعدامہ
 مستحق خائنردن عبارت بولند قلی حالده ینہ دولت
 علیہ یی شوکت قدیمہ سنندن دوشور میہ جک صورتہ
 ادار میہ موفق اولماری حقیقہ کار شناسملقزینی اثبات
 ایدر .

سلطان احمدک وقوع وفاتندن صکرہ نو بت
 خلافت و سلطنت شہزادہ سلطان مصطفیٰ حضر تلی ینہ
 کلش ایسده کرک استانبول و کرک ولایات کاملا بر نفاق
 ایچندہ بولند یغی زمان ایچون سلطان مصطفانک حال
 مجذو بیٹی بالوجوہ مانع سلطنت ایدی . لیکن کندیسی

اوتوز یاشنده اولدیغی و سلطان محمد ثالث حضرتلرینک شهرزاده لری بولندیغی حالده سلطان اجد حضرتلرینک دیکر اولادی اولان سلطان عثمان ثانی هنوز اون درت یاشنده برنوجوان اولدیغندن طبیعی هرکس سلطان مصطفایي ترجیح ایلمه چکی کبی اوارهلق مایین و باخصوص حرم همایونک نفوذینه قارشو نه و کلا و امرانک ونه خاقک هیچ بر دیه جهکری اوله مدیغندن چار ناچار سلطان مصطفی اجلاس ایلمش ایدی .

فقط کاشکی اجلاس ایلمسه ایدی . زیرا اوزمانه قدر بر پادشاهی تخت سلطنتدن ایندیرمک جرأت قبیحه سی بزه معلوم بیه دکل ایکن بوکا یول آچلمغه ایشته سلطان مصطفانک حال جنتی سبب اولمشدر . لیکن بوده ضرورت حکمنی المش ایدی . زیرا بر پادشاه نه قدر لیاقتسز اوله جق اولسه ینه کندیسندن قورقلق طبیعی و ضروری اولوب بر پادشاه مجذوب اولدقدن صکره ایسه ارتق اندن هیچ بر کیمسه نک خوف ایتیه چکی درکاردر . حالبوکه اوزمانلر استانبول و بالخاصه مایین همایون عادتایاوز سلطان سلیم اولسه ینه خوف ایتیه جک درجه لرده نفاقه قوت و یرمش اولدقلندن

بیچاره سلطان مصطفی هیچ یوق منزله سنده قاله رق والدہ
سلطانه بر کوزل ماصال سو یلیسان بر قوجه قاری یه
بیکرجه التون احسان اولنق و منسو بلره اتک طولو -
لری پاره لر و یرلک صورتیه همان ده اابتدای جلو سده
خزینه بوم بوش قلمش واستانبولک بو حالی طشره لر
عکس ایلد کده هر ولایت والیسی یالکز کند ی ولایتک
قیدینه دوشه رک استانبولی هیچ ده طایماغه باشلامش
ایدی .

والیری مقام خلافته انقیاد و اطاعت و وظیفه سنه
دعوت ایچون اطرافه امر نامه لر کوندرلش ایسه ده
رشید اولیوب مجذوب بولن ان پادشاهه اطاعت لازم
کلیه جکی ملا بسه سیله هیچ بر طرفدن روی اطاعت
کوسترلما مشدر . بناء علیه هیچ اولمز ایسه ادرنه و بروسه
کبی یقین ولایتله بر مقدار عسکر کوندرمک لازم کلد -
کده بو عسکرک مصارف سفریه سی ایچون خزینه ده
اچیه بولنمدیغی کبی ذاتاً و کلاً و امر انک کوسکونلکی
حرکت عسکریه نک اجرا اولنه مامسنی مستلزم بولنش
ایدی .

بناء علیه سلطان مصطفی اوچ آی قدر مقام حکو -

متده قالدقدن صکره اتفاق آرا ابله خلع اولنمش ایسه ده
 بو اوچ آی ظرفنده دولت برحاله گلش ایدی که خزینه
 و ثروت شاهانه هب قیانلرک الرنده قالدق داخلاً
 ذره قدر نفوذ و حیثیت قالمق شویله طورسون خارجاً
 دول معظمه نزدنده دخی اصلاً نفوذمن قالدیغندن او
 زمانه کنجه یه قدر جلوس همایونلر وقوعنده دول
 معظمه طرفندن استانبوله مخصوص سفرا کوندریلوب
 تبریک جلوسه مسارعت قلنور ایکن بودفعه بالعکس
 بزم طرفزدن سفیرلر ارسالیله جلوس عثمان ثانی اعلان
 ایدلمکه مجبوریت الویرمش ایدی.

سلطان عثمان ثانی حضر تلرینک هنوز اون درت
 یاشنده برنوجوان اولملریله برابر غایت حدتلی و سوز
 دیکله من بردات اولملری بوجلوسک دخی دولت علیه
 ایچون خیرلی برجلوس اولمدیغنی برطاقم دوراند
 یشلره اشراب ایلیه رک قان اغلاتمش ایدی.

واقعا حال مجنوبیت ایله کنجلاک اره سنده بیوک
 برفرق بولنه رق بوقدر کنج پادشاهلرک دخی و کلاهی
 عاقله واسطه سیله بیوک بیوک ایشلر کوردکاری منکر
 دکل ایسه ده اوزمانک و کلاسی دخی یاکندی کولکه.

لرندن قورقان ویاخود شورش جهانی کندی منفعتلر
ینه موافق بولان آدمردن عبارت اولوب بناء علیه
ابتدای جلوس ائالرنده بوهمیالیر آلمانیا دولتنه عصیان
ایلیه رک دولت علیه به عرض تابعیت ایتدکاری جهت له
بشقه بر زمانده اولسه بو تکلیفک جانہ منت بیلنه چکی
ودر حال براردو سوقیله بتون بوهمیانک ممالک عثمانیه
به الحاق قلنه جغی درکار ایکن بودفعه قوجه دولت
علیه عثمانیه وکلاسی بوهمیا اهاالیسنک عفوی ایچون
المانیا دولتنه یالکز بر رجانه کوندرمکه اکتفایلیه
رک باخصوص که بونی دخی بر دوقیت عظیمه عند
ایتملر ایدی.

معلومدر که استانبول بوقدر قارشیق بر حالده
ایکن دولت علیه هنوز ایران ایله محارب اولوب
اردوی همایون دخی ایران ممالکی ایچنده بولنیور ایدی.
اگر استانبولک صولق قاریش قلعقری اردویه عکس
ایتمش اولسه ایدی پک مدھش پریشانلقر وقوعه کله.
جکینه شبهه یوق ایدیسده ایران اردوسی هنوز احوال
لک بودرجه فنا لغندن خبردار اولیه رق بناء علیه
اردوی همایون کمال مظفریتله اردیابه کیردیکی زمان ایران

دولتی اوته دنبیری صلح استدعاسندن خالی قالدیغی کبی
 بوار دبیل مظفریتی اوزرینه دخی استدعای مذ کوری
 تجدید ایلیدرک استانبول قبول صلحی جانه منت
 بیملکه عقد مصالحه مسارعت قلمشدر .

۱۰۲۸ سنه هجریه سنده اولاح و بغداد پرنسری
 طوغریدن طوغرییه دولت علیهیه تابع بولنان عثمانلی
 والیرینک بیله مقام سلطنته الحاعت ایتدکرینی کوره
 رک انلردخی در سعادتی هیچ طائیماق صورتیله وادی
 استقلاله قیام ایلشرایدی . بناء علیه ذکر اولنان
 پرنسیرک عزللری لازم کلدیسهده کندی والیر مزه سوز
 اکلاته مدیغمز حالده انلره سوز اکلاته بیملک قابل اوله .
 جقمی ایدی ؟ بناء علیه باب عالی اولاح و بغداد او مور
 ینه مداخله ایتک ایستینجه انلردخی لهلولری ده دائره
 اتفاقه الهرق ارتق علناً عصیان ایلدیلر . وقت و حال
 ایجابنجه فسادک سریعاً اوکی النمسی لازمه دن اولمغه
 اردوی همایون طونه طریقیله سوق اولنهرق قریمک
 تاتار عسکری دخی پروت اوزرندن بغدادنه ادخال
 اولندی . اکر عسکرده یغما میدی اولسه و یا خود
 قریم عسکرینک مادوننده قالمق قورقوسی بولنسنه

ایدی مطلقاً بوحرکنده برفنالی چیقار ایدی . انجق
 فصلسه یاش شهرنده محشده بولنان عصاة پریشان
 ایدیلرک فقط لملور حر بدن یوز چو ویرمدکلی
 جهته ایرتسی سنه ینه هجومه باشلامشیر ایدی .
 خز ینه نیک پاره سزلیکی وقیشک شدتی وقحطک ظهور
 ایلر برابر ایلک بهسارده سلطان عثمان قرنداشی سلطان
 محمدی بعدالازاله بغداد طرفه بالذات عزم سفره
 مجبور اولمشیدی .

سلطان عثمان ثانینک بالذات حرکتی خبری
 لهستانه واصل اولنجه بونلر مونب همایونک نه دیمک
 اولدیغنی بوندن مقدم وقوعه کیش وحالا دهشتی
 یورکلرنده زائل اولماش بولنان اسفار سدیده ومدیده .
 دن اکلاقلری جهته بیاغی تلاشه دوشهرک قازاق
 طائفه سیله دخی اتفاق ایللمشیر ایدی .

قازاقلر دون ودنه پیرنهرلرنده کشت و کذاره
 مخصوص اولان برنوع التی دوز قایقلر ینه راکباً قره
 دکره طوغری اینشیر ایسه ده کرک قره دن وکرک دکره .
 دن مدافعه لینه سوق اولنان قوه قاهره مقابله ماحرز
 قالهرق پریشان اولمشلردر . طوغریدن طوغرییه

لهستان ایچنه صالدریلان اقبجیلر ایسه بزم اصل عثما
نلی اقبجیلرندن ماعداتاتار و مولدوان افرادیله دخی
مخلوط بولندقلرندن بونلر یکدیگرندن اشاغی قالماق
و محجوب اولماق ایچون رقیبانه بر شجاعت و غیرت
کوسترمکه مجبور اولدیلر . بنا علیه هر زهیه واردیلر
ایسه یاقدیلر یققدیلر . دائما مظفر اولدیلر .

حالبوکه اصل باشلیجه محاربه حوتین جوارنده
وقوعه کلمک اوزره ترتیبلر قورلش اولوب ۱۰۳۰
سنه هجریه سنده وقوعه کلان اشبو محاربده امید
اولندیغی قدر غلبه میسر اوله ماش ایسه ده لملولر
دولت علیه نك یدقا هر سه سنده بالکلیه مقهور اولمق سر
ین عقد مصالحه یه مجبوریت حس ایتمکله بزم طرفجه
دخی بوتکلیف جانه منت بیلنهرک قبول اولندی . اگر
تکلیف اولنان مصالحه قبول ایدلیوب ده جنکده
دوام ایدلسه ایدی بالاخره بوندن مشکلات و خیمه
ومهلکه ظهوره کله جکنه هیچ شبهه یوق ایدی زیرا
سلطان عثمان ثانی غایت خرچین بر ذات اولوب آدم
اولدورمکده بیله ذوق ارادیغندن اوتوردیغی یرده
عسکر اوزرینه اوق آتار و اوقلر بعض یکچریلره تصا .

د ف ایدوبده اولدورر ایسه خوشنه کیدرایدی شو
 حال یکچیری کروهنی پک زیاده دلکیر ایلدیکی کبی
 یکچیریلرک برطاقم عارمنزلقلری دخی ذات شاهانه بی
 صیقه رق اندن طولایی یکچیری آولاهنی ذوق ایدند -
 یکسندن غایت مدهش بر بورانک آفاق عالمی قرار تیغی
 علناً کوریلور ایدی .

استانبوله عودت همایون وقو عبولدیغی زمان
 او وقتلر ارتق استعمالی تعیم درجه سنه وارمش اولان
 توتونی بعض متعصبیلرک نصیحتی اوزرینه یساق ایدرک
 ار باب کیفک کیفنی قاچیردیغی کبی کیمه لری قول کزه کی
 دخی اعتیاد ایلیموب حالبوکه کیمه راست کتوردیکی
 یکچیری افرادینی همان قتل ایلدیکندن بوده عسکری
 ذات شاهانه دن صوغوتدچه صوغوتمغه باشلادی .
 نهایت سلطان عثمانک کنجلك حالی ایله حرکات خود
 سرانه سی بر درجه یه واردی که ارتق بویله ضررلی
 بر عاقلدن ایسه ضرر سنز بر دیوانه یه یعنی سلطان
 مصطفایه بیعت هوسی هر کسده کورونمکه باشلادی .
 زیرا سلطان عثمان بعض کبار اهلینک قزلرینی زورایله
 حرم همایونه آشروب تلویث ایلک درجه لرینه قدر

تعرضاتی آر تدیر مش ایدی . بو حالدہ یالکز عسکرک
د کل عموم ناموسکاران اہالینک یأسری صولک درجہ بی
بولہرق برارہلق ذات شاہانہ حج شریفہ کیتک املنی دہ
میدانہ قوننجہ ارتق بودہ ہیجان عمومی بی تزییدایلیہرک
تمام حج ایچون ایوب انصاری تربہ شریفہ سندہ قر بانلر
کسیلور ایکن خلق ایاقلانہرق سلطان مصطفای
اقامتکاھندن چیقاردیلر . وعموماً سلطان مشار الیہہ
بیعت ایلیدہرک بیچارہ سلطان عثمانی ایسہ تحریرندن
قلمرک حجاب ایدہ حکمری صورت شنیعہ ایلہ شہیدایتدیلر .
بوفاجعہ ۱۰۳۱ سنہ ہجریہ سندہ وقوعہ کلمش
ایدی . سلطان عثمان حقیقہ شجاعت و بسالنجہ برارسلان
ایدیسیہ دہ کنجلیکی سیئہ سندہ قر بان اولدی . ہنوزاون
سکرز یاشندہ برنوجوان ایکن جام شہادتق نوش ایلدی .
سلطان مصطفانک حال جنتی شرعاً مانع خلافت
اولدیغی کبی بوندن مقدم اوچای دوام ایدن مدت
سلطنتندہ نہ فاجعہ سوء استعمالر میدان آچلیدیغی دخی
ہرکسک کوزلرینی آچہ حق برتجر بہ ایدیسیہ دہ سلطان
عثمانک مظالمندن بیر ارقالمش اولان خلق شاید عقلی
وزرا النہ دوشرایسہ سلطان مصطفی ایلہ راحت ایدلمک

ممکن اوله جغنی حساب ایله مشه ارا الیهی تکرار تخت
سلطنته کتیر مشراییدی.

لکن درت سنه اول عقل و وزرا اورته ده یوق ایکن
سلطان عثمان ثانینک درت سنه دوام ایدن مدت سلطنتنده
عقلی وزرا یکیدن طوغه رق یتشمک قابل اولسور می
اییدی؟ بناء علیه سلطان عثمانی شهید و سلطان مصطفائی
تکرار اجلاس ایلان آدم لک هر بری برزور باکسیله رک
اولا ذاتاً بوش اولان خزینه دولتی یغما ایدوب هر نه
بولدیلر ایسه الدقدن صکره استانبول ایچنده هر کیمی
زنکین اولق اوزره خبر الورلر ایسه خانه سنی باصوب
اعدام و مالنی یغما و اغتنام ایتک موده سنه یول اچد-
یلر . بو حالدده سلطان عثمانک یالکز کوزل قزلره
رغبتمدن عبارت بولنان ظلمی عین عدالت کی کورو-
نمکه باشلا یوب صکره کی زور بارک هم جانه هم ماله
هم عرضه تعرضلری ایسه جله به جهانی زندان
ایلش اییدی . حالبوکه ار باب فساد خلقلک بو یأسندن
دخی استفاده یولنی بولدیلر . هر کس سلطان عثمانه
رحمت او قومغه باشلا نیجه زور بالر « اوت ! سلطان
عثمانک شهادتی محضاً فلا نیجه نک کوستردیکی سبیتدن

ایلرویه کلدی « دیه او فلا نجه یی واکا اتباعاً ده ا بر
 قاچنی اولدیروب ینه مال لرینی یغما ایندیرلر ایدی . حتی
 بوصور تله کنندی ارقداشلرینی دخی اولدورمکه باشلا -
 دیلر . سلطان عثمانک قاتلی دیه انتقاماً اعدام اولنلر
 میاننده یالکیز اصل سبب قتل اولنلر داود پاشانک
 اعدای پک مناسب بر انتقام اولوب اندن ماعدا اولدیرد -
 کلری آدمیر ایسه کرچکدن قاتل اولدقلری ایچون دکل
 بلکه شوندن بوندن یغما صور تله زنکین اولدقلری
 ایچون اعدام اولمشلردر .

پای تخت بر کره بودرجه یی بولدقدن صکره ولایتلرک
 دخی بوفساده اشترا کلری تأخرا یدرمی؟ سلطان عثمانی
 یکچیری کروهی اعدام ایلدیلدیه وقوعبولان شایعه
 اوزرینه طرابلس غرب و باخصوص اضروم والیلری
 بتون اهالی یی یکچیری علیه نه آیاقلاندیر هرق اورالده
 نه قدر یکچیری وار ایسه جله سنی اعدام ایتدیرمشلر
 ایدی . ارضروم والیسی آبازه پاشا سلطان عثمانک
 انتقامی وسیله سنی ده ا بیوک ایشلره سرماییه حصول
 عد ایدرک یکچیری یی کاملاً اعدام ایلدکن صکره
 برلیدن تدارک ایلدیکی اون بش یکر می پک قدر عسکر

ایله استانبول اوزرینه دخی یورومکه باشلادی . انجق
مرقومک مراهی انتقام فلان اولمیسوب بلکه واردیغی
یرلری کندی استیلاسی التنه العرق استبدادینی تعمیم
ایتمکدن عبارت ایدی .

ایشته دولت علیه ارتقی کندی کندیسنه انقراضک
یولنی بیاغی المش اولدیغی شوزمانده قازاقلر قره دکر
سواحله و مالطه و فلورانس قورصانلری دخی جزایر
بحر سفید اوزرینه صالدره رق هر طرفی هر ج و مرج
ویغما و غارت ایلدک لاری حالدده استانبولک امورنده بیل
اولمیسوب هر کس سلطان عثمانک قانی انتقام وسیله سیمله
هر کیمی سومز و یا خودهر کیمک مالسه طمع ایدر ایسه
انک اوینی باصمقده و او جاغنی سوندیر مکده ایدی .

بو قدر بلیاتک اوزرینه برده یکچیری کروهی
« سلطان عثمانی بزا ولدور مدک سپاهی طائفه سی
اولدوردی » دیه اورتیه یکی بر کورلی دها چیقار -
مسو نلرمی ؟ بوندن مقصد یالکیز کندیلرینی شو جنایتدن
قور تاراق اولمیسوب بلکه سپاهی طاقنک هنوز ثروتلرینه
تعرض ایدلماش اولدیغی جهته انلرکده ماللرینی یغما
ایتمک ایدی . سپاهی ایسه بو افترای اوزرلرندن آتمق

خصوصه صنده سلاحه طورانديغندن استانبولك ايچي
 كرچكدن برسلخانه صورتني الدي .

ايشته بويله برقره كون ايچنده كورجي محمدپاشا حق
 طرفندن حضر كي امداده كله رك مقام صدارتي بالتشر .
 يف اولاستانبول اشقياسني پاكه مكه باشلادی . فساد
 باشي اولنلري طوتديغي كي سلطان عثمانك منتقمي اولمق
 كي وسه بيله لري سويلكه بيله ميدان و ير مكسرين
 همان قعاسني كسرايدي . بو حال ايله استانبولي بياغي
 تميز له دي واسايش مملكتي اعاده يه موفق اولدي ايسه ده
 استانبولك تميز ليمسي و كلادن برچو غنك ايشنه كلد .
 يكنندن انلر سراي همايونده كورجي محمدپاشانك اجر آتني
 كو ياملكتي ده از ياده فساد و يره جك كي بر صورتده
 كومتري مكله بيچاره كورجي بي عزل ايتديرديلر .

محمدپاشانك يرينه مره حسين پاشا مقام صدارته
 كلكده كو يايكيچري وسپاهي بي احساندن بشقه هيچ
 برشي اسكات ايده ميه جكي بيانيه بونلره احسان و ير مك
 تدابير نه قيام ايلديسه ده اصل املي كنددي كيسه سني
 طولدير مقدن عبارت ايدى . حالبوكه خزينه مالیه ده
 اچقه دنيلان شيك نامي بيله قالدیغندن خزينه همايونده

مکوشه التونه متعلق هر نه بولندی ایسه جله سی اریتهلوب
 سکه کسیرلدی و بوضورتله نه قدر ذیقیت اشیا ضایع
 اولدی ! بوبلایالکز خزینه همایونه دخی منحصرقالمیه رق
 بیک التون درجه سنده ثروت و سامان کیمده بولنور
 ایسه یاطباق و یاخود اولوم ایله بالاخافه مصادره
 اولمغه دخی قیام اولندی . دیگر جهته دن هر طرف
 جاسوس ایله طولدیغی و بناء علیه بونجه مظالم علیه نه
 هر کیم اغزندن بر حرف قاپیرر ایسه قل و یاخود نفی
 ایدلدیکی جهته له هیچ کیسه اغزینی آچغده موفقی
 اوله مزایدی .

نهایت هر کسک طاقی توکنمکه برکون علما
 و معتبران اهالی سلطان محمد جاه عنده طویلا نوب شو
 حسین پاشا ایله طرفکیرانی اوزرینه هجوم ایتک برغزا
 ثوابله برابر اولدیغی حقفده فتوالر و یرلدی . بتون
 اهالی سلاحه صار یله رق میدان چیه قدی . بوهیئت
 سرای همایونه طوغری کیدر ایکن عسکر اوکلرینی
 کسمش ایدیسده خلق دخی مقابله دن کیر و طور مامغله
 کبار علمادن بر قاجی و اهالی دن بر چوغی رتبه شهادته
 واصل اولدیلر . لکن ظلم ارتدجه خلقده فکر انتقام

شدت بوله جفندن تکمیل استانبول اهاالیسی ایاقلاندیلر .
 بونک اوزرینه عسکر ایچنده عرضنی ناموسنی طانیانلر
 دخی اهاالی ایله برلشدیلر .

هبت سرای همایونه واردقده در سعادتك بر اشقیا
 جمعیتکاهی کسیمیلسندن فضله بتون ولایتلرک دخی عاصی
 اولدقلرینی وهله بغدادده بکر صو باشینک وسوریه .
 ده معن اوغلارینک طغیانلرین طولای عیراق وسور .
 یه فکده آتشلر ایچنده قالدیغنی عرض ایتلک ایستدیلر
 ایسه ده سلطان مصطفانک جنق ارتق قابل خطاب
 اوله میه جنق درجه یه وارش اولدیغندن صدر لاحق
 کانکش علی پاشا و زرا و علمانک اکی حیتلورینی براره یه
 طو پلا یه رق و امرای عسکر یه بی دخی بو مجلسه ادخال
 ایلیه رک سلطان مصطفانک تکرار خلعه نه قرار و یردیلر .
 ایشته بو قرار اوزرینه سلطان احمد اولک شهزاد
 ده سی سلطان مراد رابع حضرتلری هنوز اون ایکی
 یاشنده بر طفل اولدقلری حالده مقام سلطنته اجلاس
 اولنوب سلطان مصطفایسه تکرار بر محلده حبس
 اولندی که شوایکنجی خلعدن اون الق سنه صکره
 حلول اجل ایله وفات ایتشد .

بویله اون ایکی یاشنده بر شهزاده نك تخت سلطنت
 و خلافتیه جلوسی شو قدر قاریشق بر زمانه تصادف
 ایتمیه جك بیله اولسه ینه بر طاقم قتنه لری موجب اوله جغی
 در کار بولندیغی کبی جلوس همایونلر وقوعنده یکی-
 چرینك جلوس بخشیشی ایچ-ون عارسزلق ایتملی
 ده ارتق بر عادت قدیمه حکمنی المش اولدیغندن اشبو
 تبدل سلطنت ده استانبولجه برارهلق ده از یاده هر ج
 و مرجی موجب اولدیسسه ده ناموسکاران ملت ارتق
 فساد حاله نهایت و یرمك امرنده متفق اولدقلرندن شو-
 رش جدیدك او قدر دهشتی کورلمدی .

شمعی یه قدر هر جلوس وقوعه کلد کجه یکچیری
 افرادینه یکریمی بشر دوقه التونی و یریلور ایکن بودفعه
 خزینه ده پاره اولماق حسبیه هیچ اولمز ایسه یکریمی
 بشر غروش و یرلمسی کندیلر ینه تسکلیف اولندقدده
 بوکاروی رضا کوستر ماملرندن طولایی بر عربده وقو-
 عه گلش ایدمی . عارسزاتده سائر لرینه پیشرو اولنلر
 « بزخبر الدق . سلطان مصطفانك خزینه سنده بزی
 اداره ایدیه جك قدر پاره وار ایش . اندن و یرکز » دیملر یله
 فی الواقع کیمسه خبردار اولمیدیغی حالدده سلطان

مصطفیانک خزینه سنده ایچیه پاره بولندیغندن بوپاره لر
 صکره طاغیدیلهرق انلرک مار سزلغی بر طرف ایدلمش ایدی .
 بوندن صکره اصل فساد او جانی اولوق اوزره
 علما ووزرادن بعضلرینک او جاقلری سوندرملک لازم
 کلوب بونک ایچون اولاستبدادینی ارتدیرمش اولان
 شیخ الاسلام یحیی افندی ویکچیری اغاسی عزل اولند.
 قلری کبی محمد پاشا وکانکش علی پاشا وحسین پاشا
 دخی هپ فساد ققمه لری اولدقلرندن برر برر ازاله او.
 نهرق استانبول نفاقنک بیاغی اوکی کس یلیدی . ذات
 شاهانه پدرلری سلططان احمد حضرتلری کبی هنوز
 امر سمنون ختانیلری اجرا اولقمسزین مقام سلطنته
 کلش اولدقلرندن جلوسک اشبو ایلک سنه سنده اوامر
 سمنون دخی اجرا اولندی .

بریاندن استانبول ایشلری بو صورتده تسویه او.
 نهرق دیگر طرفدن امور دولیه نک ده اصلاحنه همت
 ولندی . ذاتاً محارب بولنلمیان دولتر ایله تجدید مصا
 له ایدیلهرک المانیا و اوستریا دولتلری هر نه قدر هنوز
 دول مصاحله دن عد اولنمز لر ایدیسده انلرله دخی
 یکیدن عقد مصاحله اولنهرق اوروپا پولتیقه سی بیاغی

یولنه قونلیدی • فقط اناطولینک احوالی پک یمان ایدی •
سلطان مصطفی زمانده حاصل اولان غایله لر دولتی
جدا تهذیب ایتکده ایدیلر •

از جمله بغدادده بکر صو باشی بغداد والیسی
یوسف پاشایی طرد ایدرک عراق حوالیسی قبضه
استیلاننه المش و بناء علیه دیار بکر والیسی ایله سائر
برطاقم امرا بغداد اوزرینه مأمور ایدمشر ایسه ده
بکر صو باشی باشنه طو پلادیغی عشایر خلق ایله بونلره
قطعیاً مدافعه ایتکده بولنمش ایدی • ایکنجیسی ایسه
معهود آبازه پاشا اولوب هنوز سلطان عثمان مر حومک
خون مظلومی انتقامی المق داعیه سیله هر طرفی
استیلاده اولوب هانکی مملکته وارسه البیوک ارباب
نفوذینی « سنده سلطان عثمانک شهادتنه ممنون اولمش
ایدک » کبی بروسيله ایله اولدیرر مالنی یغما ایدر ایدی •
حالبوکه الیدیغی یرلره کندی طرفندن مدبرلر متصرفلر
و حتی والیر نصب ایلدیکندن مر قومک یکی برجه -
نکیر اولق سودا سنده بولندیغنه شبهه یوق ایدی •
اوچنجیسی بر یة الشامده معن اوغلاری اولوب بونلره
اویاندها بر چوق عاصیلر اوراسنی ده دولتن آیرمشر

یدی . ایشته انک باشلیجه لری شونلردن عبارت اولان
وقواته انا طولینک سائر ولایتلرنده دخی استانبوله
طاعت هوسی قالدیغنی ضم ایدر ایسه ک دولتک مبنای
صلی شوکتی دیمک اولان انا طولی احوالی بحق
کورمش اولورز .

ایمدی استانبولده کی از باب همت اولانجه فوتلریله
شوانا طولی بی اصلاحه غیرت ایدرک حافظ پاشایی
عظیم براردو ایله بغداده سوق ایلدکارنده بواردونک
بکر صو باشی بی پریشان و بغدادی تخلیص ایده جکنه
شبهه قالدیغنی برزمانده مرقوم بکر صو باشی ایراندن
الاستمداد شهری ایرانلره تسلیم ایتدیکله و ذاتا سنی و شیعی
دعوانوی هر ایکی طرفی یکدیگرک قانه صوصامش
رحاله ایصال ایتدیکله بودفعه دخی بغدادده بیکارجه
مظلوم سنیلر قتل اولندیلر .

آبازه پاشایه کلنجه : انک اوزرینه صدر اعظمک
قومانده سیله اصل اردوی همایون حرکت ایلش ایدی .
واقعا آبازه نک موجود عسکری صدر اعظم اردوسنک
برقاج مثلنه بالغ اولدیغندن بودفعه دخی غلبه انک
طرفنده قاله جغنی شبهه سز کورلمکله استانبولده بولنان

ار باب حیت آ بازه اردوی هم-ایونه دخی غلبه ایدرک
استانبوله یور رایسه نه یاپه جقلرینی دوشو نوب قهرلرندن
هلاک اولور لر ایدیسه ده صدر اعظم حضرتلری
غایت تدبیرلی طورانه رق بو تپلمکه نك اوکنی المشردر
شویله که :

آ بازه نك معیتنده بولنان قوت اساساً اوچ قسسه
منقسم اولوب بونك برنجیسی اصل حیدود وخرسز
مقوله سندن عبارت اولمغله انلره سوز چکیرمك قابل
دکل ایسه ده ایکنجی قسسی قهرراً و جبراً مرقومه
او یش بولنان برطاقم بکار اولمسیله بونلرک درحال
دولت علیه اطاعت ایده جکلری درکار کورلمشدر
اوچنجی قسم ایسه آ بازه نك کندی یتشیردیکی برطاقم
بکار وپاشار اولوب صدراعظم بونلرله بالمخاربه «اویله
برعاصینک سزه و یردیکی بکلک و پاشالق ایله نصل
افتخار ایده یلورسکز؟ پادشاهه اطاعت اید کرده رتبه لر
کزی عهده لر کرده ابقا ایلیه رک سزی جداً مسعود
ایلسون!» وادیسنده وعدلر کوندرمکله اک اول بونلر
آ بازه دن آیرلدقلری کبی ایکنجی قسم کندیکلرندن اول
عاصی بی ترک ایلدیله .

ایمدی صدراعظم قیصریه جوارنده آبازه ایله
تلاقی ایلدکده مرقوم یالکز کندیسنه صادق اولان
اشقیا ایله صدراعظمه غلبه ایدهمبه چکنی اکلایه رق
ضایت سریع السیر برآته را کباً نراریلش واشقیا ایسه
محاربه ده اصرار کوسه تردکارندن بره قدر جمله سی
قلیچدن کچیرلشدرد .

آبازه پاشا غائله سنک بو صورتله اورته دن قالمسی
دولته خیلمیدن خیلی فرح ویرمشیدی . بواره لق معزول
قریم خانی محمد کرای ایله قرنداشی شاهنکرای کندی
کندیلرینی قریمه خان نصب ایدرلک دولته عصیان ایتکله
استانبولده بولنان جانیك کرای بردونما ایله قریمه
کوندرلش ایدی . ایکی قرنداشلر دونمای همایونه غلبه
ایلدکارندن بوفرستی غنیمت بیله رک قازاقلردخی بوز الی
پاره قدر کیلر ایله علی الغفله استانبول بوغازینه قدر
ککش واوزلرینه سفینه لر ارسال اولنجیه قدر برخیلی
صارقتیبلغه یول بولش اولدقلرندن هر نصلمسه بونلر دفع
ایلدکدن صکره ارتق قریم غائله سنی ده بیوتمامک
ایچون محمد و شاهنکرایک املری استانبولجه ده تصدیق
اولنق جهتی ترجیح اولنمشدر .

آبازه پاشادن صکره اناطولیجه غائله اوله رقی یالکیز
قره سی طرفلر نده تور دیار حنیذاوغلی قالوب واقعا مرقوم
دخی اوزرینه کلان بعضی امرایی بوزمش ایسه ده
صدر اعظم کتخداسی قانلی محمد اغا قوه کلیمه ایله مأمور
ایدلد کده مرقومی تپه له مش ایدی .

ایندی اناطولی و قریم مسائلی بر طرف ایدلد کدن
صکره ارتق استانبول ارباب حیثیتی شوایرانلی به بر
مرام اکلاتیق لزومنی او که الدیلر . زیر ابکر صوباشی
بغدادی ایرانیه تسلیم ایدلد کدن صکره ایرانیلر تا کر -
دستانه قدر ممالکی هرج و مرج ایدرک هر نه قدر دیار
بکر والیسی حافظ پاشا بغدادی محاصره یه المش ایسه ده
یکچیریلرک نابجا زور بالقری اوزرینه اردونک انتظامی
تیر بوزولد یغندن مغلوب اوله رقی دیار بکره قدر عودته
مجبور اولمشیدی . بناء علیه ۱۰۳۶ سنه هجریه سنده
اردوی همایون بریسی دیار بکر دن و دیگری کر جستان
اوزرندن ایرانیه هجوم توتینی کوروب انجق فراری
آبازه پاشا کر جستان دن تکرار قوتنی دوزمش بولمغله
اوطرفه توجه ایدن قول اردونک کندی اوزرینه حر -
کت ایدلد یکنی ظن ایلمه رک مرورینه ممانعت ایلش

وحتی برچوق نفراتی ده قتل ایتش ایدی . بو حالدده دیار بکر قولنک دخی کر جستانه تحویل حرکتنه مجبوریت الوردی . آبازه پاشا ارضرومه تحصن ایلدیکندن قلعه مذ کوره یتش کون محاصره اولنهرق فقط ۱۰۳۷ سنه سی موسم شتاسی حلول ایتکله اردوی همایون بقادر فلرینه رجعتنه مجبور اولدی . بومصرده ایرانلی دخی هجوم ایدرک اخسقه بی ضبط ایلش ایدی .

هله راست کله مسند صدارت بوشناق خسرو پاشایه توجه ایدرک اوایسه ایشه یارامیانلری دفع وارباب مصالحی تشویقه مقتدر برآدم چیقمغله کیتلی براردوایله سریعا آبازه پاشا اوزرینه یورونجه آبازه نک اصدقاسی اورکهرک استیمان ایلدکلی کبی نهایت آبازه دخی بالذات دخالت ایتکله استیمانی قبول اولندی . فقط ارتق کر جستان والیلکنده بقاسی جائز اولمدیغندن برای تبعید بوسنه والیسی نصب ایلدی .

شمال و شرق مشغولیتلرندن طولانی برمدتن برو جنوب طرفلرینه حواله نظر دقت ایدیله مامسی مکه شریفی ایله مصر والیبری ارمسندده برطاقم مناقشه

میدان آچدیغندن ویمین طرفلرندۀ عشایر شیخلری ینہ
وادیء استقلالہ صایدقلرندن او طرفلرہ یکیدن والیسلر
کوندیرمک و عساکر مستحفظہ لری تیکشیر ایدلک مثللو
تدابیر ایلہ بوفنالغک اونکی بالسهوله اندہ بیلشدر .

۱۰۳۹ سنہ ہجریہ سندہ المانیا طرفندن اللی بیک
قدر اقبجی مجارستان ایچلرینہ طوغری اقوب کلہرک
پشتہ و بودینی اورمسیلہ سرحد بکلری اعدای مذکوہ
رہیہ مقابل حرکت ایتدیریلوب المانلر رجعتہ مجبور
ایدلش ایدی . بو حالده المانیا تجدید مصالحہیہ مجبور
اولدیغی کبی مقدا اورتہ لغک قاریشقلغندن فرصت
بولہرق قریم خانلغی جبراً یقالہمش بولنان محمد کرای
وشاہین کرای دخی بودفعہ عزل ایدیلوب اگرچہ
برارہلق قزاقلر ایلہ بالانفساق حدود عثمانیہیہ تعرض
ایلشلرایسہدہ بر شیشہ موفق اولق شویلہ طورسون
کندیلری محو اولوب کیمشدر .

بونجہ موفقیتلر ہب خسرو پاشا یوزندن حصولہ
کلش اولوب اگر ایش استانبولک سائر ارکانہ قالسہ
ایدی یمندہ بر عشیرتک عصیان بیلہ بردولت محاربہ سی
قدراہمیت الہ جفی درکار ایدی . ۱۰۴۰ سنہ سندہ

خمسرو پاشانک ترتیبی اوزرینه ایران طرفلرینه سوق
ایدیلان اردوی همایون اویله بر غلبه یه مظهر اولدی که
یقین وقتلرده بونک ایشالی کورلماش ایدی . انجق
خمسرو پاشا غلبه نك ثمره سنی دخی اقتطاف اوزره
ایکن بعض خوند رقباسنك انتریقده لری ایله عزل
ایدلی .

بو حال یکچیری کروهنی غضبلندیره رق ۱۰۴۱
سنه سنده بونلرک عصیانیه یکیدن بر چوق قانلردو کلش
ایدی . انجق سلطان مراد رابع حضر تلری سن
طفولیتدن چیقوب رشد صحیح اربابی اولدیغندن ارباب
فسادی لزومی وجهله بالتریه بعدازین زمام اداره یی
یدا استقلاله المغله دولت علیه یی کرک استانبول و کرک
ولایات مفسدلرندن قورتارمق لزومی در پیش ایلدی .
بر سنه قدر هب بونلری تپه ملک ایله اوغراشوب
۱۰۴۲ سنه سنده ایران سفرینی بالذات اتمامه توجه
بیور مشر ایدی . ذات شاهانه هنوز بروسه یه وار مقسزین
استانبولده یکیدن بر فتنه چیقدیغی خبر المغله دونوب
منبع فتنه و فساد اولان شیخ الاسلام ایله سائر ارباب
فسادی اصوب کسه رک اوفتنه یی ده بر طرف ایلدی .

سلطان مرادك املى مطلقاً ايرانلى يه حدينى
 بيلدير مك اولوب انجق معهود معن اوغللىرى جبل
 لبسانده تكرر باش قالديردقلىرى كې لهليلر وقزاقلر
 دخی هر زمانكى تعجیر نرينى تكرر ايلدكرندن اولو
 بونلىرى برر برر بيلدير دقدن ودول متجـاوره ايله صلح
 ومسالمتى تجديد ايلدكدن صكره ۱۰۴۴ سنه سننده عجم
 اوزرينه يورودى وروانى ضبط ايله ۱۰۴۵ سنه سننده
 آذربايجانى هرج و مرج ايليه رك غلبه ومظفر يت كامله
 ايله عودت شاهانه وقوعبولدى .

دولت عليه نك بورايه قدر حكايه ايديلان مسائل
 سياسيه وعسكريه سى مياننده بعض طرفلك القالاتى
 ايله خريستيانلرجه برده مسئله مذهبیه ظهوره كتور
 لكده ايدى . شو يله كه : سلطنت مسنيه نك ابتدائى
 تأسيسندن برو هر صنف اقوام امتيازات عثمانيه دن
 مساوات اوزره حصه مند اولوب بناء عليه بونلك
 جله سى كنديلر ينى عثمانلى بيله رك افسادات خارجيه يه
 يوز و یرمـ دكرندن واوزمانلر اورو پا حكوماتك
 اغلبى قتولىك مذهبنده بولندقلىرى اكر عثمانلى خريستيا
 نلر ينى دخی بومذهب اداخل ايدرلر ايسه بعدما هر

ایستدکاری صورتده افسادلرینه موفق اوله جقلری
اکلاشیش و بناء علیه برطاقم سفیرلر استانبوله برچوق
جزویت پاپاسلری جلب المشر ایدی . ذکر اولنان
پاپاسلر روم پطریقخانه سنک غیرت دینیه سنه غلبه
ایده میه رک روملردن همان هیچ بر کیمسه یی قاندره ما-
مشر ایسه ده ارمنیلردن برطاقنی قتولک ایده یله رک
بو یله تبدیل مذهب ایلان ارمنیلری برطاقم سفیرلر
صورت مخصوصه ده جایه یه قالمشغله تبدیل مذهب
موده سی ارمنیلر میانده کیتد کجه رواجنی آرتدیرمش
ایدی .

ایش یالکز بر مذهب بدلندن عبارت بولنسه ایدی
مذاهب مشهوره و منتشره دن هیچ بر یسنه ممانعت
کوسترمامک دولت علیه نک شعار حریت پرور یسندن
اولغله بومباحثه مذهبییه دخی برشی دینلیه جکی درکار
ایدی . انجیق قتولیک اولان ارمنیلر قتولیک اولیان
ارمنیلره و بالخاصه روملره بغض ایدرک جزو یترک
تحریک و افساد یله روم وارمنی کلیسالرینی باصغله
قالمشد قلدن فساد کیتد کجه بیومش و حکومتک ید
اصلاحنه احتیاج کوسترمش ایدی . بناء علیه فسادده

پیشرو اولان فرانسه سفارتی ترجمانی ایله اولاح قپو
کتخداسی و سائر لازم کلانلر اصیلوب کسینجه
سائر ار باب فساددخی جسارتلرینی غائب ایدرک مسئله
برطرف اولمشدر .

۱۰۴۶ سنه سنده عجمار روان طرفلرنده کی
عساکر مستحفظه قاجر توب تا کردستانه قدر کلشدر
و شهر زور و شایان طرفلرینی غارت ایتشلایدی .
بوندن ماعدا مجارستانده راقوشی و قریمده دخی عنایت
کرای اورارک حکومتی یداستقلاله المی ایچون عصیان
وقزاقلر دخی ازاق قلعه سنی ضبط ایلشدر ایدی . بناء
علیه ۱۰۴۷ سنه سنده ارل امارتی مرقوم راقوشی یه
توجیه اولنوب قریم طرفلرینی افساد ایدن نو غایلر
قتل و قریم خانی عزل اولنهرق بوفسادلره خاتمه
چکلدیکی کبی ۱۰۴۸ سنه سنده عجم طرفندن صلح
استدعاسیله کلان ایلچیلره کال عنقله جواب رد ویریه
رک ذات شاهانه یکیدن ایران اوزرینه روان اولدی
و بغدادی بالمحاصره بریحقی آی تضییق ایله ضبط
واولجه ایرانلیرک سنیلری قتل عام ایتلرینه مقابیل
سلطان مراد رابع دخی اوتوز بیک شیعینک قفاسنی

کسه رڼاندن صکره عسا کر شاهانه نڅک ید ضبطنه چن
یرلر طرف دولت علیه ده قالمق اوزره عرض اولن ان
مصالحه یی قبول ایلدی .

بوسفردن عودت همایون وقوعبولدقده قزاقلرک
قره دکره اولان صارقنتیلخی وارناودلنک قاریشقلخی
واناطولی ساحلنه ونیدیک کیلیرینک تسلطی منع ایدیله
رڼک حتی ۱۰۴۹ سنه سننده ونیدیکی اورمق ایچون
دونما چیقارمق تدارکنده ایکن ونیدیکیلر امانه دوشه
رڼک ایکی یوز اللی بیک دوقه التونی مقابله صلیحی
صاتون اله بیلدیلر . انجق سلطان مراد رابعک کینج
یاشنده ایکن وفاتی دخی بوسنه وقوعبولمشدر . ایران
مخارباتنده طوب ایله دو کیلوب اچلمسی قابل اوله میان
قلعه قیولرینی اون اون بش قنطار اغرلغنده دیرکری
قاورایوب قیولره حواله ایدرڼک ارقه سنه طیامق مرتبه
سنده قوت حیدرانه مالک برپادشاه صاحب شوکت
ایلدی .

سلطان مراد رابعک زمانندن صکره برادرلری
سلطان ابراهیم مقام سلطنت و خلافتنه جلوس ایلد
یلر . ایلک سنه یالکز دول معظمه ایله تجدید مناسبات

دوستانه مشغولیتلری ایله چکوب ایکنجی سنه مرتبات
میریہ نك تحصیلی وعشرت وتوتون وسائر مکیفه نك
منعی مثلاً بعض اصلاحتن صکره ۱۰۵۴ سنه سنده
قره دکزه تعرض ایدن قزاقلر اوزرینه بحرأ دونغاوبرأ
تاتار عسکری سوق اولنوب ازاق قلعه سی بونلرک
ید استیلا سندن قورتارلشدر.

سلطان مراد حضر تلر نك اصلاحتنه دور
سلطان ابراهیمک شو ایلاک سنه لرنده کی اصلاحات دخی
منضم اولنجه نیچه زماندنبرو مشوش بولنان احوال
دولت بیاغی یولنه کیردی . انجق دولت علیه ایچون
بر راحت دوری اچیلور ایکن البته بر طرفدن بر مشغله
دخی باش کوستر مک ایچه بروقتدن برو عادت حکمنه
کیردیکندن شو ایلاک راختی دخی نصوح پاشا زاده
حسن پاشانک مجنونانه بر عصیان مختل ایلش ایدی .
بو حسن پاشا غایت زنکین و بناء علیه استانبو -
جله طرفدارلری قوتلی بر آدم اولوب اخیرأ حلب
والیسی تعیین اولندقدده مقام صدارتدن کوندریلان
امرلری طائیمغه و کندیمی کی بر نصوح پاشا زاده -
نك صدراعظم قره مصطفی پاشا کی برارناوددن ده

شرفلی اولدیغنی ادمايه قیام ایتکله نیجه نصاح
 حکیمانه بی حاوی فرمان هم ایونلر دخی کوندلرش
 ایسه ده انلری ده دیکله مامش و باشنه طو پلادیغی
 کلی حشرات ایله سیواسی اورهرق و مقابله سنه چیقما
 نلری تدبیر ایلیه رک چاملیجه به قدر کلوب عادت استا
 نبولی ده تهدید ایتش ایدی . بونک اوزرینه صدر
 اعظم قره مصطفی پاشا بر قوه کلیه ایله اسکداره بکده
 رک غایت خونریزانه بر محارب به ایله مرقومی وعونه
 سنک کافه سنی قلیچدن چکور مشدر .

بو همت قره مصطفی پاشانک همت ذاتیه سی
 اولوب اکر ایش سائر استانبول رجانه قالسه ایدی
 سلطان ابراهیمک ضعف شعوری مناسبه ایله انتر یقه لر
 میدانی اولکندن زیاده وسعت بولمغه ذاتاً مستعد
 اولدیغندن مرقوم حسین پاشانک بر طور مستبدانه ایله
 استانبولی دخی اله آله جفی شبهه سزایدی

مع هذا بوانتر یقه میداننک آچلمی یننه تاخر
 ایتدی . کویا ذات شاهانه بی تداوی ایچون مراجعت
 اولسان جینجی خواجه هر طرفه جناح استیلا سنی
 اوزاتمغله براره لق حرم هم ایون ایچون بش یوز چکی

اودون مہایعہ سی برقاچ کون تاخر ایتکدن ناشی او
 قوجہ صدر اعظم خانلر کی بوغیلوب آتیلدی .
 بووقعہ ہائلہ ۱۰۵۴ سنہ ہجریہ سندنہ وقوعہ
 کلوب اندن صکرہ اورتہلق او قدر فساد و فترتہ
 دوچار اولدی کہ تعریفندن اقلام مورخین دخی عاجز
 قالورلر . ارتق جینجی خواجہ ہر کیمی ایستر ایسہ
 ال بیوک مقاملرہ کتورمکدن فضلہ اموال میریہ
 تحصیلاتی دخی خزینہ دولتہ کیرمیوب بونلرک ید
 غصبندہ تقسیم اولنورایدی . بناء علیہ عسکرہ
 معاش ویریلہ میہرک عسکر طغیان ایتد کجہ کندیلرینک
 ممنون اولمدقلمری ادملری مشوق عصیان اولمق اوزرہ
 بالاتہام ہمان بیونلری اورلمق ایچون ارادات سنینہ
 استحصال ایدرلرایدی . زمانک حالی قیاس ایچون
 شوققریہ دقت ایتلی کہ ذات شاہانہ برارہلق ادرنہ یہ
 عزیمتہ بعض بندکان « ادرنہ نک اودونی کوزل
 یانمز » دیہ پادشاہی جایدردقلمری حالہ دیکرلمری
 « ادرنہ نک اودونی کوزل یانمز ایسہ استانبولدن اودون
 جلبی ممکندر » دیہ اصرار ایلشور ایدی .
 ایدی یالکز براودون مسئلہ سی بر صدر اعظم

بوغدورمغه ویاخود بو قدر مباحثه لره سبب اولدقدن
صکره ارتق دولتک مهم سارہ سی نه قدر نظرا هتمامه
الندیغنی تعریفه حاجت قالمیوب دول تجاوره ايسه بو حال
کورنجه نیجه تکلیفات عنیفه یه یول بولمش لر ایدی .
اورته لق قارشد قجه افکار عمومی یی بر جنک تلاشی ايله
مشغول ایتک پولتیقه سی بوزمان دخی موقع اعتباره
النوب کریا هر ایش یولنه قولمش ده یالکز جهانگیر
لک مصلمحتی قالمش کبی کرید جزیره سی فتحه قرار
ویردیلر . ۱۰۵۵ سنه سنده نه قدر کی وارسه عسکر
طولدیر یلوب جزیره مذ کوره یه سوق اولندی و اوتوز
بیك کشیدن مرکب بر قوتله حانیه اوزرینه هجوم
ایدیلوب الی کون جنک و محاصره ايله ضبط اولندی
ایسه ده بر حانیه نک ضبطی ايله کرید جزیره سی فتح
اولمش صایله میه جفندن کرید محارباتی تمام یکر می
یش سنه دوام ایتشدیر .

۱۰۵۶ سنه سنده وندیك کیلری موره طرفلرینه
عسکر دوکهرک بر طاقم واقعی ضبط ایدنجه علت
دماغیه لری مرتبه غایه یه واران سلطان ابراهیم حضر
تلی بر طاقم مفسد لک تحر یکی ايله ممالک شاهانه ده

نه قدر خروستيان وارسه جمله سنك قلمچدن چورلمسنى
فرمان ايلش ايدى . بويله شيلرك موافق عقل و حكمت
اولديغى بيك مشكلات ايله كنديسنه اكلاتلمدقدده
هيچ اولمسه اجنبيلرك عموماً اعدامنده اصرار يورديلر
ايسه ده موافق شرع و عقل اولميان بواصره دخى
اتباع ايدلمدى . شو قدر كه اوزمانه قدر دول اجنيه
سفراسى استانبول ايچنده اوتوررلر ايكن بعدزان بك
اوغلى طرفنده اوتورمغه مجبور اولديلر .

كريدده بولنان اردوى همايون بر غيرت فوق العاده
ايله حانيه و رتمو سنجاقلرينى كاملاً استيلا ايلديكى كى
دونماى همايون دخى و نديك و پايامكلى ايله چارشمقده
ايدى . انجق استانبولده اوله سفرلره محاربه لره فلانلره
اهميت و يره حاك حال اوليوب سلطان دوكونلرى
و پادشاهك على العاده برزقافه مراقى حسييله تللى
نامنده برجاريه نك ذات شاهانه به تنكيچى كى شيلر
ايله اشتغال اولنور ايدى .

نهايت ۱۰۵۹ سنه سينده دشمن كيلر ايله كليولى
بوغازيني كسهر ك كريد ايله طريق مخابره و مراسله
منقطع اولدى . و هر زمانكى كى بوزمان دخى اناطو -

ایده مستعد عصیان اولانلر میدان بولهرق طرف طرف
ایاقلندیلر . روم ایلیده کارشناس اولان والیر ایسه
استانبولک هیچ بر امرینی قبول ایتمک صورتیه
موقعلرینی محافظه باشلادیلر . نهایت اهالی وعسکر
بو حالک دوامی قابل اوله میه جغنی کوره رک صدر اعظم
احد پاشا هر نه قدر ارباب قیامه مخالفت ایچون تشریق
اهتمام ایلدی ایسه ده ارباب قیام انی پاره لیوب سلطان
ابراهیمی خلع ومقام سلطنته شهزاده سلطان محمدی
اقعاد ایلدیلر . فقط سلطان ابراهیم محبوس اولدیغی
محلده آوازینی کوکله چیقارمغله سپاهی کرو هی
کویا سلطان ابراهیمه مرجه برفساد چیقارمق استعداد
دینی کو سترد کلرندن بوفسادک منعی ایچون عذر جسته
معذور اولان بیچاره سلطان ابراهیمی قربان ایلدیلر .
سلطان محمد رابع حضر تلی هنوز پک چوجق
ایکن مقام خلافت وسلطنته کلش ایسه ده بر زمانه پرو
هر فسادک سبب محضی اولان یکچیریلر نصلسه بودفعه
اثر صداقت کو سترمک عزمه دوشملریله کندیلری طر
فندن برکونه قارغشلق ایقاع ایتمکدن بشقه استا
نبولک اصلاحی خصوصه صنده ارباب حیتیه معاونت

دخی ایلدیلر . درت پادشاه زماندن برو والد لاک
 ایدن ماه پیکر سلطانک رأی عاقلانه سی اشبو استانبول
 اصلاحاتنده پک زیاده ایشه یرایه رق معهود جینجی
 خواجه نفی ایدیلوب خزینه سنده ایکی میلیون دو قه
 التونی ظهوریه خزینه دولته ادخال ایدلمش و مرقو
 مدن ماعدا اوزمانه قدر دولت خزینه سنی صویان
 خائنلرک کافه سی جزالندیریله رق ماللری هب خزینه یه
 آلمشدر . بوصره ده ا کرچه غلطه سرایى خدمه
 سیله یکی سرای خدمه سی میانده بر عربده چیقهرق
 سپاهی گروهی دخی ایشه قاریشوب اهمیتنی ارتدیرمش
 ایدیه ده یکچیریلر سلاح تأدیب ایله ایکی طرفه ده
 مرام اکلاتدقلرندن فساد قولایجه باصلمشدر .

شو قدر که اناطولیده رفع لوای عصیان ایلیمان
 حیدر اوغلی ایله رفیق قاطرچی اوغلی اوزرینه سوق
 ایدلمش اولان عسکر آفیون قره حصارى اوکنده مغلوب
 اولدیغندن بو ایکی شقیه کرجی محمد پاشانک قرنداشی ده
 بالانضمام « یدی یاشنده برچوجغک پادشاهلغندن نه
 اولور ؟ » دیه اسکداره قدر یورومش کلش و استانبولی
 تترمش ایدی . برکت ویرسون که یکچیریلر بودفعه

دخی صداقتدن ایرلمه رق بوماصیلرک قلع و قمع مسئله
مشکله سنی تسهیل ایشلردر .

ایشه بومصورتله بر باشلا نغجدن بیوک بیوک نتیجه لر
حصولی مأمول ایدیه ده ار باب اعتراضک بقیه سی
وقتیله مابین همایونده متشکل اولان انتر یقه انجمنک
بقیه سیله برلشهرک کارشناسان و کلایه تبدیل وایستد .
کلری آدمیری نصب صورتیله ینه اموال خزینه یی
کندیلری یمکه باشلادیلر . بو حال کرک اهلای یی کرک
عسکری بیر ار ایلدیکنندن خلق میاننده کفتکولر
چوغالمش ایدی . هله کریدمحرار به سی بسبتون نظر
اهمیتدن دوشور یلوب اوراده بولنان دلی حسن پاشا
لا ینقطع امداد طلب ایلدیکی حالده انجق ۱۰۶۰
سنه سنده برقاق کمی کوندر یله یتیش ایه ده انلردخی
دشمن سفاینه مغلوب اولمشلر ایدی .

صدراعظم بولنان ملک احمد پاشا زنگینلری
اولدوروب ماللرینی یغما ایتک موده سنه تکرار رواج
ویردکن ماعدا عقلنجه مسکو کاتک مقدارینی چوغالتیق
ایچون عیارلرینی ده تغشیشه قالشدیغندن بودخی خلق
تهیجه یاردم ایتیش ایدی . ۱۰۶۱ ده ایه سه علما ایله

مشایخ ارمنه بر شریعت و طریقت منازعه سی ظهور
ایدرك بر چوق تکیه دلر با صلغله و بر چوق مشایخ
اصیله خلق ایاقلانوب عسکر شماردی • حتی کوسه م
والده دیه شهرت کیر اولان ماه پیکر سلطان کویا بو
فساد لرك مروجی اولمق تهمتیه بالاتهام شهید دخی
ایدلدی •

سیاوش پاشا صدارته کلدکده بر طاقم منبع فساد
اولان لرك باشلرینی کسمکه قیام ایدرك اورته لغی ایچه
قورقوتور کبی اولدیسه ده اناطولی احوالی بالکلیه
مختل اوله رق کوتاهیه دن جبل لبنا نه قدر بتون خلق
یکدیگرینی قیرمقده و ابازه حسن اسمنده بر تورودی
ایله ابشیر پاشا اسمنده بر عاصی بر لشهرك انقره
وحوالسنی بالاستیلا یکی بر حکومت قورمقده ایدیلر •
بومشاغل داخلیه ضمیمه وندیکیلرك بر اوسمنه یی
و بحر آق دکز بوغازینی اوروب قزاقرایله لهیلرک
دخی بغدادن ایالتنی هرج و مرج ایلدکاری دوشونیلور
ایسه دولتك دوچار اولدیغی حاله یقین حاصل ایدلمش
اولور •

حالبو که بو قدر مدهش احواله قارشو کو یا چاره

و تدبیر اولمق اوزره دوش-ونیلان ش-یلرکده کافه سی
 مضرتدن بشقه رشئی داعی دکل ایدی . طرخونچی
 احمد پاشا مضایقه خزینهیه مقابل عسکرک کرک معا-
 شجه و کرک مقدار نجه بر چوق تنقیحانه قالقشمش و بر
 یاندن دخی رعیه اوزرنده کی تکالیفی ارتدیر مش ایدی .
 بونی بر زمانده اجرا ایش ایدی که دولتک چوق عسکره
 احتیاجندن ماعدا عسکرک صداقت و ممنونیتنه لزومی
 دخی وار ایدی . رعایا ایسه جانلرندن بشقه اله حق شیلری
 قالماش بر حال فقر و ضرورته بولندیغندن جبراً و قهرأ
 تحصیل اولنان اموالده اولکی امواله نسبتله یوز بیک
 کیسه درجه سنده نقصان دخی وقوع بولمش ایدی .

ایشته ایشلرک محضاً الله قالمش اولدیغی بویله بر
 زمانده مجرد عواطف الهیه دن اولمق اوزره قریم تاتارلری
 قزاق و لهلیلری پریشان ایلدکلری کبی و ندیکیلر دخی
 کرک بوسنه و کرک آق دکزجه مغلوب اوله رق عثمانلی
 کیلری غنایم بریه و بحر یه ایله طوپ طولو اولدقلری
 حالده استانبوله کلدیله . تربیه سندن عاجز قالنان
 عاصی ابشیر پاشا صدر اعظم نصب ایدیله رک اوده
 شقاوتدن و از یکدیکی کبی براره لق استانبولده یکپجری

وسپاهی طاقی بالاتفاق مرقومك قفاسنی کسمکه
وجودی ده اورته دن قالمش ایدی . بوحالده یالکز
قره مان طرفلرینی استیلاده اولان ابازه پاشا ایله
حلب والیسی وادی عصیانده پایدار اولوب برده
حبشلیلر اوراده بولنان والیزی طرد ایدرك کندیلری
بر حکومت قورمغه قالمشملر ایدی .

۱۰۶۶ تاریخنده عسکر گروهی بر عصیان ده
چیقاروب بو کره امور دولت وملت رؤیتده تغافل
کوسترلرك ازاله وجودلرینه مسارعتله سلطان احمد
میدانده کی معهود چنار اغاجنی مصلوبلر ایله طوناند-
یلر . ینه بوسره ده ونديك دونمسا سی جزایر بحر سفیده
بر هجوم ده ایدرك بر چوق یرلری یاقش یمش
ایدی .

ایمدی دولت علیه عثمانیه نك معاذ الله تعالی انقراض
کلییه تقرب دکل عادتوا اصل اولش بولندیغی شویله
بر زمانده کو پر یلی محمد پاشا حضر کی بر صورتده
مقام صدارته کلوب دولتک قولنه یا یشمشر . شو-
یله که :

صدر مشارالیه رجال و مأمورین دولتک کافه سر

یگدن عزل ایدرک یرلینه کندینجه مجرب اولان
 عقیقه و مستقیم و غیرتلی ادملری نصب ایدنجه استانبول
 قنده کارلری بریوک فساددها مباشرت ایلدیلر ایسه ده
 کوپرلی بوکاده میدان ویرمه رک برطاقنی نفی و برطاقنی
 حبس و بر مقدارینی ده قتله قدر جرأت کوستر مشدر .
 شریعت و طریقت منازعه لری هنوز اورته ده بولنه رق
 علما اهل طریقتی تکفیر و مشایخ دخی علمایی تجمیل
 ایلدکلرندن بو فساددی ده قتل و نفی ایله اورته دن قالد
 یر مشدر . اندن صکره وار قوتی و ندیک دونماسی علیه نه
 صرف ایدرک بوزجه اطه و لمنی بی استرداد و مملکتینی
 دائرة اطاعته ادخال ایلدیک کی بروسه اطرافنده
 متحشد یکر می بیك قدر اشقیایی همان کاملاً استیصال
 ایلدکلر صکره قره مان و حلب و شام طرفنده بی
 حاصیلری ده بره قدر پاکلدی .

بو صروده اولاحر بعض بحار بکلری ایله بالاتفاق
 ابرائیل و اسماعیل و ارنجه یه قدر طونه بوینده ساکن
 اهالی مسلمان قتل عام ایتش اولدکلرندن کوپرلی
 بونلر اوزرینه قریم خانلرینی مأمور ایدوب اگرچه
 قریم خانی دخی دولت علیه حقنده اطاعتی مشکوک

برحالده بولنیور ای دیسه ده خانه یازدیغی امر نامه ده
 حسن ایفای مأموریت ایتز ایسه بالاخره کندیسنک
 دخی دومانى هوایه اوچور یله جغنی بیلدیرمسندن
 طولای خانک عقلی باشندن کیتش و حسن ایفای
 مأموریت ایچون یوز بیک قدر اولاحک ققاسنی
 کیمشدر .

شو وقعه ۱۰۷۰ سنه سنده وقعه کاهرک قریم
 خانه انواع نوازش والتفاتى حاوی امرلر ارسالندن
 ماعداروسیه نك تحریریکیه حدودی تعجیردن خالی
 قالمیان قزاقلرک ترپیه سی ده اکا حواله ایدل دیکندن
 والتفات شاهانه اوزرینه تزايد ایلیمان غیرتی قلع جبالی
 بیله تاتارخانای ایچون ممکن عدایتدیردیکندن نوووغورود
 شهرینی اوروب روسیه نك ممالک وسطیسنه وارنجیه
 قدریرلری هپ آت طرفناغی ایله چیکتندی .

بوحوادث مملکتین و محارستانی بری رینه قاتهرق
 اوطرفلرک اشقیاسی اولدقلری برلرده دیکیش طوتیره
 مدقلندن اوستریایه التجا ایتشلر ایدی . بناء علیه قوجه
 کوپرلی اوستریا اوزرینه بر سفر ترتیبیه اوکنه کلان
 قلاع و حصارلری بر حله ده الور و دشمن مغلوب

هر طرفجه چیل یاوروسی کبی طاغیلور ایدی . حتی
 صدر عالی اوجهته ده بوموق قیتلر ایله شان عثمانی یی
 آرتدیردیغی حالدده بوسنه اوزرینه هجوم ایدن اوتوز
 قرق بیك اعدادن درت بیكك ققاسی کسـیـله رك
 قصوری ده کوچ حال ایله جان قورتاره بیلش اولدقنری
 خبری کیکله اردوی عثمانینک قوتی برتر اولمش
 ایدی .

یتیمش بش یاشنده تجربه و صداقت صاحبی
 بروزیرك سایه همتمده جزایردن ماعدا هر طرفجه اشقیا
 واعدانک برونلری قریله رق ۱۰۷۱ ده بتون دولتهلر
 طلب صلح ایچون امانه دوشدیلر . جزایرک فنالغی ایسه
 عسکری طاقان والیدن خوشلانمیه رق نفی حبس ودایی
 عنوانیه کندی رئیس لرندن بریسنی والی نصب ایتیمش
 اولم لرندن عبارت ایدی .

۱۰۷۲ سنه سنده کوپر یلی واصل رحمت رجن
 اولدقده ینه کوپر یلی لردن فاضل احمد پاشا کندیسه
 خیر الخلف اولمش ایدی . مجرد کوپر یلی محمد پاشانک
 خوفیله امانه دوشمش اولان اوستریا و المانیامشار الیهک
 وفاتندن صکره تکرار ابراز خصومتیه باشلا دقلرندن

فاضل احمد پاشا ۱۰۷۳ ده و اردی نو هو سل قلعہ سنی
 غایت ماهرانہ بر محاصرہ ایلہ الدقن صکرہ اوراسنی
 مرکز استناد اتخذ ایدرک قول اردولرینی سوق ایلہ
 لونز و نوو یغراد و نو ترہ و فریستادل و شنتو قلعہ لرینی
 دخی برر برر الہ کچروب کوپر یلینک صدارت پوستنہ
 لایق بروزیر اولدیغنی انلرہ دہ اثبات ایلدی • بوندن
 ماعدایوز بیک قدر تاتار سوارسیسی تا مور او یاسلریا
 ایچلرینہ قدر یوریوب هر طرفی یانغینرینہ چویر مشلر
 ایدی •

۱۰۷۵ سنہ سنہ دشمن قانیشا و سیکتوار قلعہ لر
 ینہ تعرض ایتش ایدی سہ دہ صدر عالی یالکز بونلری
 قور تار مق دکل زرینوار و راپ قلعہ لرینی دہ آلدی
 و هر طرفہ سوق ایتدیکی اقبجیلر اطراف و انحایی ہرج
 و مرج ایتدی • بو حال دہ اور و یادن بر قوہ عمومیہ
 ایلہ عثمانلیری ییلدیر مق تدبیری کور یلوب اوسستریا
 و المانیا و فرانسه و مجارستان و خروا تستان طرفلرندن
 ہربری برکزیدہ جنکاور اولق اوزرہ قرق بیک کشیلک
 ممتاز براردو سن غوتار صحرای مشہورندہ فاضل احمد
 پاشایی قارشولدی • واقعا بوملحمہ کبرادہ مغلوبیت بزم

طرفده قالمش ایدیه ده فاضل احمد پاشانک بومغلو بیتدن
 ییلدیغی کوریلنجه اعداتی متفقه اسندهای صلحه مسار.
 عت ایلیه رک اوزمانه قدر عثمانلیلر یدینه یکمیش اولان
 ممالکک کافه سی ینه عثمانلیلر یدنده قالمق شرطیه قوجه
 فاضل قبول صلحه رغبت ایلدی .

۱۰۷۶ ده فاضل احمد پاشا ونیدک و کرید سفرلر.
 ینه ده بر حسن نتیجه و یرمکده ایکن مصرده اطاعت سزلک
 ایلیان عسکری تأدیب و مظالم واقعه لری اهالی بی
 بیرار ایلیان قهریس و ساقز والیرینی و سائر مأمورین
 ملکیه بی قتل و ازاله ایله بونی دخی جله مؤققیاتنه
 ادخال ایلدی .

بوصمرده کردک بریسی موصل طرفلر نده مهیدیلک
 دعواسیله خروج ایلدیکی کبی از میرد، دخی بریهودی
 مسیح اولمق دعواسیله خروج ایلیه رک باشلرینه برچوق
 ادم طوپلامش ایدی . فاضل احمد پاشا بونلری اله
 کچیردکده خیشلری اعدام ایلیه جک اولسه مرتبه لر
 ینی اعلا ایتش اوله جفندن بریسنی باغچوان و دیگرینی
 ساییلک خدمته و یرمش ایدی . حاصلی ۱۰۷۸
 سنه سی دخی درلو درلو اصلاحات ملکیه ایله کچه رک

کریده عزیمت ایلد کده سن غوتار محار به سنده بولنان
 دول متفقہ کریدی قورتارمقی ایچون بر متفقین دو تناسی
 سوق ایتش اولد قلرندن قوجه فاضل بودونمای بر باد
 ایدرک کریدک هر طرفنی فتح ایله یکرهی بش سنه دبرو
 دوام ایلیان بوغائله بی اورته دن قالدر مشدر .

۱۰۸۰ و ۱۰۸۱ سنه لری هب اصلاحات

ملیکیه ایله مرور ایدرک اوزمانه قدر هنوز صلح
 قطعی یه کیرمادش اولان وندیک جمهوری ایله شرائط
 صلحیه و بوسنه حدودینک تعیینی ماده لری مذاکره
 اولمش و فرانسه و مجارستان ایله دوستلغه قوت
 ویره جک صلح و تجارت معاهده لری امضالشمس و حتی
 المانیا ایمپراطورینه طارغین اوله رق دولت علیه یه
 عرض تابعیت ایلیان محار رؤسای ایله ایمپراطورک
 اره سی بولنوب بارش دیرلش و ژاپوروف قزاق لری کندی
 مملکت لری بولنان اوقرانیا ولایتی ینه کندی رضالریله
 دولت علیه یه ترک ایلد کارندن لهستانک بوکا اعتراضی
 اوزرینه فاضل احمد پاشا ۱۰۸۲ ده لهستان اوزر-
 ینه اردو سوروب قامه نیچه قلعه سنی خونریزانه بر جنک
 ایله فتحدن صکره ژاپوروف قزاق لری ایله تاتار لردن

مر کب بر اقجی فرقه سنی لهستان ایچرولرینه صالدیروب
لمبورغ شهرینی دخی الدیر مشدر . بناء علی ذلک لهلیلر
او قرانیایی عثمانلیله ویرمیهلم دیر ایکن کنیدیله یه-ک
پودولیا ایالتنی دخی ترک و س-نوی بکر می بیك دوقه
التونی خراج اعطا ایتک اوزره کوچ حال ایله
صلحه نائل اوله یلیدیله .

۱۰۸۳ ده عقد ایدیلان بو معاهده لهلی ایچون
یک اغر بر معاهده ای دیسه ده بحاق کردند اولدیغی
مناسبتیله قبول ایلمش ایدی . بناء علیه ۱۰۸۴ سنه -
سنده اردوی همایون چکیلور چکیلز بونلر اولاح
و بغداد امارتلیله بالاتفاق یه ایاقلندیله و عثمانلی
الینه یکمیش اولان بر طاقم برلری استرداد ایلیدیله .
صدر عالی فاضل احمد پاشا بودفعه دخی لهلینک
تر بیه سنی و یرمکه کیتیش ایدی . انجق استانبول
خلق سلططان محمد خان حضرتلرینک صیدوشکاره
افراط مراقندن ناشی مرلدانمغه باشلایوب روسیه
عسکری دخی لهلیلر ایله بالاتفاق فاضل احمد پاشایی
ایکی دفعه مغلوب ایدنجه استانبولک قتنه سی بر قاند -
ها علولندیکنندن صدر عالی استانبول اصلاحي

ایچون دشمندن صلح طلبنه مجبور اولدی .

۱۰۸۶ سنه سنده یالکیز اوزی ایله طور له
اره سنده کی ممالک بزم الیمزده قالمق اوزره عقد
مصالحه ایدیلوب بر سنه صکره دخی فاضل اجد پاشا
کو پر یلی محمد پاشانک واصل اولدیغی دار رجه
انتقال ایلدی .

ینه کو پر یلی لردن اولق اوزره مقام صدارته
چکن قره مصطفی پاشا واقعا برارهلق لهستان طرفندن
تعرضه باشلایان روس وله عسا کر ینه مرام
اکلاته رق چهرین قلعه سنی فتح ایده ییش ایسده
سیاستکار لقمده کو پر یلی محمد و فاضل اجد پاشا لرد رجه
سنده اولمیدیغندن کرک وکلای دولتی و کرک سفرای
اجنبیه یی بیر ار ایلیه جک بعض تضییقات ناجایه
قالشمش و باخصوص روس ولهرک ۱۰۹۰ سنه
سنده کی غلباتی کنیدیسنی بتون بتون شاشیرته رق
شانسز بر معاهده امضا سنه مجبور اولدیغی کبی فرانسه
سفیر ینک جزایر قورصانلری علیهنده دوستانه شکا
یتدن عبارت بولنان بعض مستدعیاتی اوزر ینه بر سفیر
حقنده لایق اولیه جق درجه لرده حقارت کو ستروب

بودخی ۱۰۹۱ سنه سنه فرانسزلرك وار قوتلریله
مزاریری اوروب یا قلمرینی و جزایر قورصمان کیلرینی
اناطولی ساحلنده واقع چشمه لیمانه قدر تعقیب و طرد
ایلملرینی موجب اولمش ایدی .

۱۰۹۱ و ۱۰۹۲ سنه لری ایشته یوفنا القلریله
یکدیگی کی ۱۰۹۳ سنه سنه طرف سلطنت سنیه دن
مجار قرالی نصب اولن ان آهر یغ تکه لی نام پرنسک
انتخابنه المانیا طرفندن اعتراض اولنسی اوزرینه
اوستریا و المانیا یه قارشو اعلان حرب ایدیلوب
قره مصطفی پاشا عظیم براردو ایله حرکت ایلمش
ایدی . واقعا بوسفرده دشمنی طرف طرف مغلوب
ایلدیکی کی ایکنجی دفعه اولمق اوزره و یانه یی ده
تحت محاصره یه المش ایدی .

اشبوا یکنجی محاصره ده شد تلخه بر هجوم ایله
ویانه یی ضبط ایتک ممکن ایکن قره مصطفی پاشا هجوم
ایله ضبطی بکنیوب مطلقا شهری عرض تسلیمیه
مجبور ایتک ارزوسنده اصرار ایلدیکندن
بوصورتله وقت کچورلدیکی صره ده لهیلر خارجدن
ویانه نك امدادینه یتیشوب علی الغفله بر هجوم

کوسترملر یله اردوی همایون مغلو بآ رجعت
مجبور اولمشدر . ۱۰۹۴ سنه سننده وقوعبولار
شو مغلوبیت اوزرینه المانیالیر و ندیك ایله بالاتفاق
لهستاندن یونانستانه وارنجیه قدر شمال غربی
حدودمن اوزرینه بویلی بویینه برهجوم عمومی ترتیب
ایلمهرك اجراسنده موفقی اولدیله . بو کامقایل
عساکر عثمانیه اوچ قولدن یوروتیلوب لهستان
اوزرینه کوندریلان عسکر ۱۰۹۵ سنه سننده کالیل
موفقی اولمش ایسده دیگر جهتلرده بوموفقیته
کور یله میوب ۱۰۹۶ و ۱۰۹۷ و ۱۰۹۸ سنه لرنده
مجارستان و بوسنه وارناودلق و دوره طرفلرنجه
هلب مغلوبیت بزم طرفده قالدیغندن اورالری کاملا
دشمن الینه کچمش و بتون روم ایلی تهلیکه ده قالمش
ایدی .

بومغلو بیتلر و کلادن بعضیسنک عدم لیاقتند
و بعضیسنک خیانتنه جل اولنده رق سلطان محمد
حضرتلری ایسه ادرنه صیدگاهلرنده صیدوشکاردر
بشقه هیچ برشیئه صرف ذهن ایتمدکلرندن اهالی
وعسکر پریشانلغک اصل سببی ذات شاهانه نك

مسلطنتده مهم امورده صرف همت بیورمادلی
 یعنی حکم ایله ۱۰۹۹ سنه سننده مشاری الیهی
 مع و شهزاده سلطان سلیمان ثانی بی اجلاس ایلدیلر.
 ز صید و شکاره مرقاری براردها معتدل اولسه
 ی بومراقلرندن طولایی آوجی عنوانی آلان سلطان
 سد رابع حضرتلری الک مقتدر پادشاهلریزدن
 سی اولور و کوپرلیلر کی وزرا معاونتیه حقیقه
 لک ایشلر کوره یلورایدی.

سلطان سلیمان ثانی حضرتلری مقام سلطنت و خلا
 کلدکاری زمان قرق یدی یاشنده برانسان کامل
 بوب اوزمانه قدر وقت عالیلرینی ریادن بری و صافی
 ه و تقوی ایچنده کچیرمش اولدقلری جهته بتون
 عالی نزدنده محترم و معزز بر شهزاده ایلدیلر. انجق
 ل و رغبتلری یالکیز علوم و معارفه منحصر اولوب
 یله حکومت و سلطنتک دغدغه سنی لذت عبادت
 هر قته دکشدیرمک ایستدکلرندن وزرا و علما کند.
 ینی تخت عالییه دعوت ایلدکاری زمان امتناع
 جه سننده استغنا کوسترمشلر ایدی.

بعض فرنک مورخلری سلطان سلیمان خان حضرت.

تلیک بو استغفارینی کویا برادرلری آوجی سلطان محمدک
بر حیات بولململرندن مایوس اولملمینه جل ایدر
ایسه لرده بو افتارلری برهزیان محضدر . اویله بر افترایه
محل اوله بیلک ایچون سلیمان ثانی حضرت تلیک حر -
یص تخت و تاج اولملری لازم کلوب حالبوکه قرق
یدی یاشنه کیرمش اولدقلری حالدده اویله بر حرصک
اثری بیله کورو نمامش ایدی .

ذاتاً وقت و حال او قدر دیگر کون ایدی که سلیمان
ثانی حضرت تلیری کبی تقوی و علمدن بشقه بر شیئهر غبتلری
اولمیان بر شهزاده دکل اولور اولمز سیاست پرستان بیله
استانبولده حکمران اولمغی قبول ایتسه بجاکور یلور
ایدی . زیرایکیچری و سپاهی کروهی محاربات
واقعده کی مغلو بیتلمری غالبیته تحویل ایچون سیف
غزایی چکوب ساق جهادی تشمیر ایده جکلمینه مجرود
خلقک عرضنه و ماننه اذاله دست تعرض ایچون قباحتی
هانکی طرفه عطف ایده جکلمینی بیله مدکلمی بر زمانده
سلطان محمد رابع حضرت تلیرینی خلع ایلمد کارندن انک
یرینه اجلاس ایده جکلمی پادشاهی دخی عادت اکنیدی
الرنده بروا سطة ظلم اتخا ایلک قرار و تدبیرنده ایدیلر .

سلیمان ثانی حضرت تلی ایسه هیچ بر کیسه یه جور و ظلم
ایتمک شانندن اولیان بر ذات ملا نکسمات ایدیلر .

بناء علی ذلک علما و وزرائک ابرام و الحاحیه تحت
عثمانی بی تشریف ایلدیلر ایسه ده یکچیرینک امید ایلد-
کاری کبی شونی بونی اصمق و کسمک مثل و مظالمی تجویز
ایلدکلرندن اهل عرض و ارباب ناموس اولنلر هر نه
قدر سلیمان ثانی حضرت تلیندن پک زیاده ممنون اولدیلر
ایسه ده عسکری طاقی اصلا ممنون اوله منبجه ارتق
ذات شاهانه یه ده عموم ارباب ناموسه ده اعلان عصیانندن
کیز و طور مدیلر .

یکچیریرات میداننه سپاهی لر دخی سلطانی احمد
میداننه چادر لر قوروب عادتاسفر بر حالنی المشر ایدیه-
ده بوسفر بر لک دشمن اوزرینه دکل بلکه پادشاه ایله نامو-
سکاران اهایلی اوزرینه ایدی . وزرادن علمادن اهایلیدن
هر کیم اولورسه اولسون بلافرق هر کسک خانه سنی
باصوب مالنی یا غمادن ماعدا معاذ الله تعالی حرملر مقاد-
بلنده یازمقدن قلملرک دخی حیا ایلده جکاری ناموس سز-
لقلری ده ارتکابه قدر وارر لر ایدی .

استانبولک بو حالی طشره لره عکس ایلدکده سر-

حدود ده بولنان عسکر استانبولک بویله بردن یاغما
 واغتنام اولندیغنی کورونجه دشمن قارشوسنده اوغرا-
 شمدن ایسه استانبولده زنکین اولغنی ترجیح ایلیه رک
 انلردخی فوج فرج درسه عاده کلمکه باشلادیلر . بو
 حالده ایسه اعدای دین و دولت ارتق قارشولونده
 بر قوه مانعه کورهمیه رک حدودلره ایستدکاری کی
 تعرضه باشلادیلر .

ایمدی استانبول اهالیسی ارتق بو مظالمه طاقت
 کتوره میه رک دین و دنیایی اول باول شویکیچری و سپا-
 هی اشقیاسندن قورتارمق ایچون سنجاغ شریف چیقار-
 مغه و عسکراوزرینه اعلان حرب ایتمکه مجبور اولدیلر .
 بو حالده استانبول عادت باردار الحرب حالنی المش اولوب
 شمال جهتندن یورومکده بولنان اعدایه قارشو دخی
 یکن عثمان پاشایی سردار تعین ایلدیلر ایسه ده او حیثت سر
 دخی شویله بر زمانده اناطولی طرفنده عصیان ایلمش
 بولندیغندن دشمنه قارشو کیتدی . سائر صنوف اهالی بی
 محاربه یه سوق ایتمک ممکن اوله میوب عسکر ایسه جنکه
 کیتماک ویالکز کندیله اعلان حرب ایدن استانبول
 اهالیسی ایله جنگلشماک دعوا سنده اصرار کوستردی .

نهایت استانبولک استر حامی اوزرینه یکن عثمان
 پاشا روم ایلنه کچوب المانیا و اوستریا و مجارستان ایچلر-
 ندن دیرلنمش طوپارلارنمش اولان اردویه مقابله ایتک
 ایستدی ایسه ده معیتنده بولغان عساکرک قوماندان
 و ضابطانه اطاعتلری اولدیغندن بلغراد و سمندر دشمن
 انه دوشدیک کی بهکه و بانیالوقه و ابرودریغه و اوزیجه
 و سائر شهرلر قصبه لر قلعه لر دخی برر برر هب اعدا
 انه دوشمکه باشلادی .

بو حالر هب برسنه ظرفنده وقوعه کله رک ۱۱۰۰
 سنه سندن ارتقار باب همت جمع غیرت ایلیمه رک
 بریاندن استدعای صلح ایچون المانیایه ایلچیلر کوند-
 مکه برابر دیگر طرفدن صوفیه اوزرینه قرق الی بیک
 کشیلاک براردو سسوقنه و بحرأ دخی سواحلی یاققده
 بولغان ونیدیک دونماسی اوزرینه کملر کوندرمکه موفق
 اولدیلر . استانبولک معلوم اولان حاله مقابل المانیایه
 کیدن سفیرلرک ایستدکاری صلح و مسالته روی مسا
 عده کوسه تریلیه جکی درکار اولدیغندن بونلر مأیوسأ
 عودت ایتمشلر ایدی . صوفیه اردوسی بادی امرده
 برقاج موققیته مظهر اولدی ایسه ده اندن صکره دأما

مغلوب اولمش و دشمن دخی نیش و شهر کو بی وودین
 و قومانووه واسکوبه قدر ممالکه استیلا ایلیدرک یالکز
 اق دکره چیقار یلان دونمای هم-ایون وندیگ کیلرینی
 طرف طرف مغلوب ایدوب اغریبوز اطه سنی ضبط
 ایلش ایدی.

ایشته دولت علیه عثمانیه شورش و ضعفک بویله
 درجه نهایه سنه وارمش اولدیغی بر زمانده کو پر یلی زاده
 مصطفی پاشا مقام صدارته کله رک الحق آبا واجدادینه
 رحمت او قوته جق اصلاحات اینله دولتی یکیدن قور-
 تارمغه موفق اولمش در شویله که :

اوزمانلر دولت علیه نک بر بیوک قوتی دخی پاشا-
 لرک دائرملری خلق اولوب بونلر میاننده سکبان و صار-
 یجه دنیلان سلاحشورلر وقت و زمانیه دولته بیوک
 بیوک خدمتلر کورمش اولدقلری حالده بر زماندنبری
 پاشالری دولته قارشو عصیاننه تشویقیدن بشقه برایشه
 یاره مدقلری جهتمله کو پر یلی زاده اول بول پاشا-
 لرک دائرملرینی اصلاحه باشلامش ایدی . ذاتاً بونلر میا-
 ننده اغلبی دولت علیه نک زوالیه کندیلرینک دخی
 زائل اوله جقلرینی بیلدکارندن مصطفی پاشانک و یرد-

یکی نصایحه امثالاً در حال سکبان و صار یحه افراد -
 ینی بالازاله یرلر ینه اهل عرض کروهندن دلیل و بشه لی
 نامیله یکی افراد یازمشلرو بولند قلمی بحلاردن کوکلی
 عسکر یازمغه دخی مأذون اولمشلر ایدی . بواجراآت
 طشره لرک اصلاحنه کلی یاردیم ایلدیکی کبی مصطفی
 پاشا سائر صنوف عسا کرایچون دخی « نظام جدید »
 نامیله غایت شدتلی قوانین جدیده وضع و مرعیت احکام -
 ملر ینه رعایتیه دخی جمله ینی مجبور ایلدیکنندن بوده
 عسکری طاقنی سر یعاً اصلاحه یاردیم ایش ایدی .
 بوندن صکره نوبت اصلاح خلقت خانهلر ینی
 باصوب اموالنی یغما ایش اولان ظلمیه کلوب مصطفی
 پاشا بونلری برر بر قلع وقع ایلکده دقیقه فوت ایتدی .
 انلردن استرداد ایلدیکی ثروت عمومیه ایله یکیدن
 اردولر تشکیل ایلدی . ایشته بوندن صکره دخی اعدایه
 مرام اکلاتمغه موفق اولدی .

ایلیک موفقیت تاتار عسکر ینک لهلو ینی بوزهرق
 روسیه ممالکنک تالچرولر ینه طوغری آقینلر اجراسیله
 سائر طرفلرده بولنان عسا کرل دخی یوز ینی کولدره جک
 وغیرتلی ینی آرتدیر هجق مظفر یاته نائل اولملری قضیه سی

ایدی . بونک اوزرینه بوسنه طرفلرنده قاچانق بوغازی
 وروم ایلمده قوصووه وولہستانده قادینجه وقریمده دخی
 اورقیو محاربہ لرنده خروات ولمان وله وروسیه
 اردولری و بحر اوندیک کیلری اویله بر بوزولش بوزلد-
 یلرکه عادتا چیل یاوریسی کی طاغلدیلر .

ایشته بوموقیات مسعوده ۱۱۰۲ سنه سنده
 وقوعه کله رک بتون اهل اسلامک یوزلری کولش
 اولدق دن فضله اعدایله دولت علیه عثمانیه ایچون
 ضعف دنیلان شی اداره سزلکدن عبارت اولدیغنی
 وهر زمان ایش باشنه بر اهل آدم کله جک اولورسه دولت
 علیه عثمانیه نکه ینه فرمان فرمای جهان اوله یله جکنی
 اکلادیلر .

مظفريات واقعه اوزرینه دشمن طرف طرف صلح
 استعاضه مسارعت ایلمه رک حدود عثمانیه ینه اسکی
 وسعتی بولش ایدی . حتی صدر عالی کوپرلی زاده
 مصطفی پاشا حاضر تلی مصرده قبریسه ادب سزلک
 واطاعت سزلک ایدن بعض عسکری گروهنی دخی شدیداً
 بالتأدیب دولت علیه عثمانیه نکه هر طرفجه انتظام وشو-
 کتنی تأیید ایش ایدی . بو حالد ۱۱۰۳ سنه سی ایچون

یکیدن بردور استیلایه کیرمک درجه لرنده حس غیرت
ایله هر کس تحسین ایکن سلطان سلیمان ثانی حضر -
تلینک وقوع وفاتلیله هر کس ماتم کیشلرایدی .

سلیمان ثانی حضر تلی حقیقه ولی عنوانه لایق
متدین شغیق و رحیم بر ذات ملکسمات اولوب اوچ
سنه دن عبارت اولان مدت سلطنت و خلافتلرنده
دولت علیه معاذ الله تعالی نقطه انقراضه یا قلاشمش
ایکن مجرد قلب کرامت مشحونلرینک اثر خلوصی اولق
اوزره بر کوپر یلی زاده شو قوجه دولتی قور تارمغه
موفق اولمشدر .

فقط چه فائده که بوندن صکره ار باب همت و غیرت
یکدیگر یله ال اله و یره رک کوپر یلی زاده نک اثرینه
اقتفا ایده حکمر ایکن طریق معکوسه کیش و بوسنه لر
ارتق اورو پانک دور تجدد و ترقیمی اولوب هر طرفجه
نظامات جدیده و اختراعات متابعه اعدانک قوتلرینی
ارتدیردیغی حالده ملت عثمانیه بالعکس جهلک درکات
مدهشه سنه کنیدیسنی اتمقده بولنش اولدیغندن بر
زماندبری قدرت استیلا و توسیع حدود کبی شانلر
شویله طورسون حدود موجوده بی محافظه اقتداری

دخی قالمیه رق دولت علیہ نك دور وقوفندہ نہایت
ویرمشر وعادتا دور انحطاطہ یول اچشردر • بناء علی
ذلک سلطمان احمد ثانی حضر تلی نك جلوسہ لری
تاریخمزدن اشہ بودردنجی بابك ایکنجی فصلی اولان
دور انحطاط فصلنہ مبدأ اتخاذ ایدرک بروجه آتی فصل
مذکور کیشادایلرز •

(ایکنجی فصل)

« دور صحیح انحطاط »

عن ۱۶۹۱ الی ۱۷۸۹

تفصیل - سلطان محمد رابع حضر تلی نك قرق
برسنہ امتداد ایلیان مدت طویله حکومتلری دیگر
شہزادہ لری شہزادہ لک حالندہ قوجالتمش و بناء علیہ
سلطان سلیمان ثانی تحت سلطنتہ انجق اوچسنہ معمر
اولہ بیلدیکی کبی سلطان احمد ثانی حضر تلی دخی الی
یاشنہ قریب بر شہزادہ اولدقلری حالہ مقام سلطنتہ
کلہ رک انجق درتسنہ پادشاہ اولدقلری حالہ معمر
اولہ بیلشردر •

یوقاروکی فصلاک نہایتندہ ایضاح ایدلش اولدیغی
اوزره کو پر یلی زادہ مصطفی پاشا سلطان سلیمان ثانی

زماننده موفق اولدیغی اصلاحات کلیه ایله میدانده کتور-
دیکی مکمل براردوی شمال سفری ایچون سفر برحاله
قویمش اولدیغندن یکی جلوس همایون واقع اولدیغی
زمان کندیسی دخی اردوی مذکور ایله بوسنه طرفلرنده
بولنیور ایدی . انجق سلطان احمد ثانی حضر تلی
تجر به کار بر شهریار اولغله جلوس همایونلر یله برابر
بر تو جهات جدیده یاه ر ق تدار کات سفر یه بی بوز ماق
ایچون مسند صدارتی ینه مصطفی پاشا عهدده سنده ابقا
ایلشیدی .

بو حالده المانیالو بر صلح تکلیف ایلد یسه ده بو صلح
ایچون قویدیغی شرائط دولت علیه ایچون قبول اولنوز
شیلردن دکل ایدی . زیر ابحارستان و صربیه طرفلر -
ندن المانیا استیلاسی التمه کیرمش اولان یرلر کافه سی
کندیسنه ترک اولغله برابر لهلولر ایله وندی کلورک
ممالک شاهانه دن استیلا ایلش اولد قلی یرلری دخی
انلره ترک ایتک و بوندن ماعدا اوز مانلرجه حدود
استیلاسی هنوز او قدر واسع اولمیان روسیه یه دخی
بر طاق امتیازلر و یرمک شرائط صلحیه جله سندن ایدی .
بو شرائطی قبول ایتک یوزلرجه سنه لردنبری بونجه

قانلردو کولهرك قازانيلان شيلرى كاملا آلدن چيقارمق
ديك اوله جفدن سلطان احمدثانى حضر تلى شرائط
مذ كوره يى قبول ايتديلر .

واقعا بوار دلق مكه شر يغلر ينك يكديكر ينه قارشو
ميدانه قويدقلى اثار نفاق دولت عليه يى كرمى كې اشغال
ايدە بيله جك بر مسئله ايديسده بومسئله شمال سفر لرى
ايچون مانع عد اولمىدى . سرحد بكار ينه مقاومت
امر لى و ير يله رك استانبول جە دخی يكيىدن تدار كات
حر بيه يه مسارعت قلندى . شو حال دشرك نظر
دهشتنى آچهرق شرائط صلحيه يى براز تعديل ايلديكى
كې فلنك وانك لتره دولت لرى دخی توسطده بولنديلر
ايسده بولرك توسط لرى صافيانه اوليوب مجرد كندى
منافع تجاريه لرى ايچون بو حر كته بولنديلرندن
شرائط صلحيه ينه قبول اولمىدى .

تجدد سلطنت كرك مصطفى پاشانك و كرك اردوى
همايونك انتظام وغيرته اصلافتور و خلل كتور ميه -
رك مصطفى پاشا نهر او برا ترتيباتنى بالا كال صاوه
نهرينى مرور ايلدى و يتره واردين ايله سلانقاش
اره سنده المانيا اردوسنه مقابل كلهرك محارب يه

طوتشدی . بو محاربہ حقیقۃً پک قانلی بر محاربہ ایدی .
 نہراً ترتیب اولنان قایقلرده کی عسکر بر غلبہ کاملہ یہ مظہر
 اولمشیدی . اصل اردوی ہمایون دخی کر چکدن جان
 سپارانہ بر جنک ایلدیسده صدر عالی مصطفی پشا
 جام شہادتی نوش ایلدی کی اردودہ بولنان وزرا
 و امرانک کافہ سی ہب غیر تتری مسلم یکیتلر اولسہ
 بونلرک دخی بر چوغی مرتبہ شہادتہ قدر وارد قلرندن
 وعسا کرک دخی بر چوغی شہید و مجروح دوشد کلرندن
 نتیجہ مغلو بیت بزم طرفدہ واقع اولمشیدی . بو حالہ
 المانیالی پترہ واردین قلعه سنی تحت محاصرہ یہ الہرق دھا
 بری طرفلہ طوغری دہ تجاوز و تعرض کوستر دیکی کی
 ۱۱۰۳ سنہ ہجریہ سندہ دخی قامہ نیچہ قلعه سنی بالمحاصرہ
 طونہ نلک برو طرفلرینہ طوغری تعرض ایلدی .

ایمدی ۱۱۰۴ سنہ ہجریہ سندہ تدارک اولنان یکی
 اردو مجارستان اوزرینہ سوق اولندقدہ دشمن دخی
 بوندن اول تحت محاصرہ یہ المش ایکن ترک ایلدی کی
 بلغراد قلعه سنی تکرار محاصرہ ایدی . فقط اردوی
 ہمایونینہ غیرت و انتظامی بوزمیوب طوغریچہ
 بلغرادہ طوغری یورو نیچہ بلغراد محاصرلری رفع

محاصره ايله رجعتنه مجبور اولدقلى کي قريمدن
ترتيب اولنان تاتار عسکري دخي له و مجارعسا کريني
برايکي برده مغلوب ايلديکندن طرف طرف مغلوبيت
هبدشمنده قالبوب هله لهستان ايچي هرج و مرج
ايليش ايلدي .

اشو مظفريات سر يعه دشمنك جرأت خصمانه سني
ايچي تعديل ايلديکندن شو حالده ده خفيف شرائط
ايله بر مصالحه عقدي امکاني دخي ميدانه چيتمش
ايديسه ده نه چاره که اناطولي طرفلر نجينه بر طاق عصاة
دولت عليه بي اشغاله باشلا دقلندن مصالحه تاخر
ايلشدر .

اناطولينك بودفعه كي حالي سائر وقتلرده قياس
اولنده من ايلدي . بر کره بصره طرفلر نده معني اسمنده
بر عرب شيخني عصميان ايدرك اوزرينه کيدن بصره
واليسي عثمان پاشا زاده بي شهيد ايلديکي کي بعض
جوار والير و متصرفلر دخي خليل پاشا معيته و يريله رک
تعين اولندقلى حالده انلر دخي هيچ بر ايش کوره مامشدر
ايلدي . بناء عليه عربلر کجرأني آرتهرق بغدادی تحت
محاصره يه المنه قدر و ارديلر . بونلردن ماعدا حجاز

طرفینك شورشی شام طرفلرینه ده عكس ایدرك اورالده
 اهل اسلام بر برینی قیرمه قیام ایشلر و مصر و کردستان
 دخی بر فترت حالده دوچار اولمشلرایدی . ایشته بواحواله
 صمیمه برده اناطولی اغازی کنددی هوالرینه قیام
 ایلیرك استانبولی طایماق عادت کریمه سنی تکرار
 ایلری اوزرینه دولت علیه دخی عادت اعدای
 شمالیه یه روی ضعف کو سترسه معذور کور یله جك
 بر حالده قالمش ایدی .

مع هذا سلطان احمد ثانی حضر تلی ینه غیر تلی ینه
 قنور کتور مدیتر ۱۱۰۵ سنه هجریه سی اول بها -
 رقه تنظیمنه موفق اولدقلى تازه الیلری شماله
 سوق ایدرك اسکی عسکرایله برلشیدیرد کدن صکره
 اردوی همایون ایکی قوله بالا نقسام بریسی پتره واردین
 قلمه سی محاصره یه و دیکری بوسنه یی تجهیز ایدن
 ونیک اوزرینه تعیین اولندیلر . فقط نه قدر اولسه
 دولتک اصل منبع قوتی اولان اناطولینک حال شورش
 و فترتی مقتضاسنجه اردوی همایونک مقدار موجودی
 لهستاندن و ندیکه وارنجه یه قدر بر قایچ دولتک قوای
 مشترکه سندن مرکب اولان قوت اعدایه نسبتله پک آز

اولدیغندن پتره واردین قول اردوسی بلغراد اوزرینه
رجعتیه مجبور اولدیغی کبی وندیك اردوسی دخی بر قاج
غلبه دن صکره مغلوب اوله رق حدودی محافظه ایچون
اقتضا ایدن نقطه لره چکدی . بودفعه یوز آغارتمق
موقعیتی دونمای همایونده کورلمشدر . زیرا اقی دکره
چیقان دونمای همایون ساقز پیشکاهنده وندیك دونما -
سنی فنا حالده پریشان ایده بیلش ایدی . واقعا قریمدن
ترتیب اولنان تاتار عسکری دخی براره لقی ترانسلووانیا
ممالکینی یاقش بیقمش ایسه ده عودتده طونه نهری
کنارینه کلدکاری زمان لهلولر انده مغلوب اولمشلر
ایدی .

حاصلی در دست بولنان محارباتک هنوز بر نتیجه -
سی اله الله مامش اولدیغی کبی حجاز طرفلرنده کی
شورش دخی سعید ابن سعید نام شریفک حجاج مسلمینی
عموما صومغه قدر وارمی صورتده بر نوع ادبسنر -
لکه تحول ایلش وبر زماندنبری احوالی محتمل اولان
جزایر او جاقلری ممکن مرتبه اصلاح ایدیلرک اورالردن
مرتب کیلر وندیك اوزرینه صالدرلق ترتیباتی کو -
رلمکده بولنش ایکن یعنی ۱۱۰۶ سنه هجریه سنده

سلطان احمد ثانی حضرت تترینک وفاتی وقوعه کله رک
نه ایشلریوزی اوزرنده قالمش ایدی . سلطان احمد
ثانی حضرت تتری حقیقه مدبر و تجربه کار بر پادشاه
ایدی . نه چاره که نیجه ییلاق فناقلری کلیاً اصلاح
ایده بیله حاک قدر مدت سلطنتلری امتداد ایده مدی .
سلطان احمد ثانی دن صمکره مقام خلافت و سلطنته
کلان سلطان مصطفی ثانی حضرت تتری اوتوز ایکی
یاشنده بر بابا یکیت اولوب غیرت عثمانیه لری ایسه
جهلایه فائق بولندیغندن جلوس همایونلریله برابر
شدید المأل بر خط همایون نشر ایدرک جهلایه صداقت
و غیرته دعوت ایشل ایدی . پادشاه نوجاه حضر -
تتری اشبوخط همایونلرنده بروقتدنبری کوریلان سوء
احوالک بریسی ده سرای همایونک یالکز اسباب ذوق
وصفا ایله اشتغال قضیه سی اولدیغندن و حالبو که
ذوات شاهانه لری او احوالی کلیاً بر طرف ایدرک کیجه
و کوندوز امور سلطنتله اشتغال ایلد کدن ماعدا بر
وقتدنبری سفرلره پادشاهلرک بالذات عزیمت لری قاعده
قدیمه سنه رعایت اولنه مامقده بولندیغنی حالده بعدما
کندی لری غزا و جهاده بالذات عزیمت بیوره جقطندن

بحشله هر کیم حسن خدمت ایتز ایسه شیداً مجازات
اوله جغنی کبی فدا کارانه حسن خدمت ایدنلر حقیقه
دخی مکافات لازمه دن کیر و طورلیه جغنی بر صورت
قطعیده اعلان بیورمش ایدی.

بر زماندنبری بومثللو تذبیهات شیدیه کورلمدیکتمن
اشبو خطهما یونک پک بیوک تأثیراتی کوریلرله حقی
عسکری طاقی « بر صداقت وفدا کارلقده قصه
ایتمورز . فقط وزرا و امرانک الک چوغی قورققی
و بر طاقی مرتکب اولدقلری کبی ایچلرنده خائلی
دخی نادر اولمدیغسندن دولتی زواله دوچار ایدنلر
انلردر! » دیه بیاغی عصیان صورتنده بر پروتستونه
بولمشلر ایدی . مع هذا عسکرک بودعوامی حقی
دخی دکل ایدی . مقام سلطنته کلان پادشاهلرک
تدنیات واقعه جه نه تأثیری اوله بیلور ؟ اصل سبب
انقراض بر طاقی انتریغه جی وخائن و مرتکبلر اولد .
قلرندن عسکرک برر بر تعیین اسامی ایتسی اوزرینه
بولنلردن بر چوغنک باشلری کسیلدی که بودخی خط
هما یونک تأثیراتی آرتمدی .

واقعه بومثللو دهشتلی تدبیرلر هر زمان ایچونه

موافق اولیوب اکثریا تأثیرات معکوسه کوستر
ایسه ده اوزمان ایچون تأثیرات حسنه کوسترمش
ایدی . زیرا عموجه زاده حسین پاشا ساقزاوکنده
راست کتوردیکی و نیک دونمائی فناحالدیه پاتاقلای
یهرق پریشان ایلدیکی کبی بتون موره بی استیلا ایلش
اولان و نیکلواوزرینه برأ برقول اردو ایله سوق
ایدیلان ابراهیم پاشا دخی « پادشاهک غضبنه اوغر -
یهرق کوپک کبی بوغولقدن ایسه دشمن قارشوسنده
فدای جان ایدلمده شهید اولهلم ! » دیه بر غیرت مخصوص -
صه ایله تعبیه جیوشنه همت ایلدیکندن و نیکلوی
هر طرفه مغلوب ایدرک نه قدر انشا آتی و ارایسه
اتشه یاقش ایدی . حالبوکه اصل هدف حرکت
اولان شمال طرفلرنده کی موقعیات ده یارلاق ایدیلر .
شویله که :

تاتارلردن ترتیب اولنان اقبجیلر لهستان طرفلرینی
یاقوب یانیردقلری کبی بوسنه طرفلرینه سوق اولنان
اردودخی دالمه اچیا لورو و نیکلور ایله بوغاز بوغاز
جنهکرا ایدرک بونلرک زیر ضبطنه کچن اکثر یرلری استر -
داده موفق اولمش و ذات شاهانه موکب همایون ایله

مجارستانه کیره رک لیا و تیتیل قلعه لرینی الدقدنصره
 لوغوس طرفنده وقوعبولان عظیم بر محاربه ده المانلری
 چیل باورسی کبی طاغتمش ایدی . بو محاربه ده المانیا
 طرفدن قوماندان اولان و ته رانی او قدر مغرور و معند
 بر آدم ایدی که اردوسی کاملاً پریشان اولدیغی و کندیس
 مجروح دوشدیکه حالد اوزرینه وارن افرادینه
 تسلیمیت کوسه ترمیه رک تا تسلیم روح ایدنجیه قدر
 النده کی قلیچ ایله اطرافه صالدرمقده دوام ایلشدر .
 بوایسه دشمنک دخی شو محاربه ده نه قدر غیرت کوسه ترمه
 مش اولدیغنه دلالت ایدر .

ایشته بو مظفریات عادتاً دور سلیم و سلیمان
 مخصوص اولان بر صورت مشعشعه ده اولغله ۱۱۰۸
 سنه سننده ذات شاهانه موقفاً و مظفراً پای تختلرینه
 عودت ایدر لر ایکن دونمائی همایونلرینک اق دکرده
 ایکنجی دفعه اوله رق و ندیک دونماسنی پراکنده
 و پریشان ایلش اولدیغی خبر بشارت اثرینی دخی
 الهرق جلله نک سرور و عبوری بر تراولدیغی حالد
 عودت همایون شرفواقع اولمشدر .
 دولت علیه نک بودوری روسیه جه دخی دلی پترو نک

دور تنظیماتی اوله رق ایمپراطور موسی الیه قره دکزی
 پر روس اسکلہ سی ایتک املنہ دو شملکله اوتہ دنبری
 آزاق قلعه سنہ تسلطدن خالی قالمیان قازاقلرایله بالاتفاق
 دولت علیه نك مشاغل واقعہ سندن ده استفادہ ایدوب
 یوزالتش بیک عسکرایله آزاغی محاصره ایلش ایدی .
 روسیہ دولتنک بزم اوزرمرزہ منتظم عسکر سوق
 ایتمی ایلک دفعہ اوله رق بو محاربہ ده کورلش ایسه ده
 سلطان مصطفی ثانی حضر تلر نك موفقیات عمومیه سندن
 شوقلنان عساکر عثمانیه نك غیر تلی یك فوق العاده
 اولدیغی کی اطرافدن تاتار ونوغای عساکری دخی
 امداده یتشه رك دلی پترو تمام اون آی مدت آزاق
 قلعه سنی محاصره ایلدیکی حالده مغلوباً رجعتہ مجبور
 ایدلشدیر . ایشته بو ظفر دخی سلطان مصطفی حضر-
 تلر نك اثار مظفرانه لرینی اکیال ایلشیدی .

ایمدی غلبات واقعہ عموم اوروپانك نظر حیرتنی
 آچمه رق الك اول را کوزه جهـ وریتی بر زماندنبری
 کندیسنی دولت علیه نك خرجگذاری عدا ایتما مکده
 وویر کوی سنویسنی ویر مامکده ایکن در حال سفیر لر
 ارسالیله آمان دیله یه رك مترا کم ویر کولرینی ده ویر مش

اولدیغی کبی المانیادخی صلح استدعاسینه مسارعت
ایلش ایدی. بعض عقلای دولت المانیانک صلح ایچون
ایتدیکی استدعایی اسعاف رأینده بولندیلر ایسه ده عموم
استانبولی خلقی بر زماندهبری اعدای شمالیه نك شمارمش
اولسندن طولایی يك زیاده داکیر بولندیقندن صلح
فلان قبول ایدلیوب مطلقه ایچنکده دوام اولتمق رأیی
بر رأی عمومی حکمنی المیش ایدی. هر کس قدرتنک
فوقنده معاونت نقدیه لر عرض ایدرک و بر چوق شجعان
کوکلی عسکر اوله رق یکیدن ایکی مکمل اردو وجوده
کتور لیکله بولردن بر یسی بر سردار قومانداسیله
لهستانه و دیگر دخی حضرت پادشاهک قوماندهلری
التنه اوله رق مجارستانه کیردی. لهستان اردوسی
قلمه نیجه طرفلرنده لهملولری مضحمل و پریشان
ایلدیکی کبی موکب همایون دخی طمشوار طرفلرنده
اوستریا و المانیا عسکرینی فنا حالده مغلوب و منهزم
ایلش ایدی. انجق مغلوب دشمنی لزومندن فضله تضییق
ایتمکده کی مضرت دخی کندیسنی کوسرتدی. زیرا
دلی پترو یوزاللی ییک تازه عسکر ایله تکرار آزاق
قلعه سی اوزرینه هجوم و ضبط ایلش اولدیغی کبی

بوسفرده غیرت عمومیه ایله دشمنه برغلبه قطعیه
 کوسه ترمک ایچون باشلانان تدارک دخی انجق ایکی
 سنه یه قدر ارقه سی انه یله جگ بر مقیاس واسعه
 اولمسیله لوازم سفریه یئتشدیریله ماش اولدیغندن
 اردوی همایون بوتدار کاتک اکلنه قدر عودته مجبور
 اولمشیدی. حالبوکه تمام اردوته یس نهرینی کجرا یکن
 دشمن دخی ارقه دن صقشدیرمغله اردوجه بیوک
 بریریشانلق یوز کوسترمش ایدی. بناءعلیه دشمن
 بوسنه ایچنه طاله رق هر طرفی وحتی نفس سرای
 بوسنه شهرینی دخی یاقوب کول ایتشدیر.

بوفاجعه ۱۱۰۹ سنه سنده وقوعه کلوب مع هذا
 غیرت عمومیه ینه فتور کلامش ایدی. باشلانان
 تدارکات سفریه بحر سفید و سیاه لیمانلرینک کافه سنده
 برر ایکیشر کی انشا ایدلمک اوزره دفعه بر قایچ یوز
 پاره تکه نه وجوده کتور مکدن ماعدا پراوشته ده دخی
 طوپ ودانه دوکو مخانه لری انشاسی صورتده غایت
 اساسلی برشی اولدیغندن اگر وقت مساعدده بوتدار
 کات کور یلوبده اندن صکره محاربه یه باشلانسه
 ایدی پک بیوک فائده سی کور بلور ایدی. لکن اردوی

همایونك رجعتی اوزرینه مالیه جه دخی تدارکات
عظیمیه مسارعت اولنه رق تکرار دشمنه مقاومت
غیرتنده بولنیلورایکن فلنك وانگلتره دولتری میدان
توسطه آتیه رق شروط مصالحه بی تعدیل صورتیه
اجرای مذاکراته باشلادیلر .

ایران دولتی بزه ایلك معاونتی اولقی اوزره بصره
طرفلرنده باش قالدیران عربانك تربیه سنده یار دیم ایلیوب
دولت علیه نك هیچ برطرفجه اندیشه سی اولدیغندن
شروط مصالحه مذاکره سنده پك صلحه محتاج کبی
طورانمغه حاجت یوق ایدی . نهایت بومذاکره قارلوفجه
مصالحه سنده منجر اولدی که ۱۱۱۰ سنه هجریه سنده
عقد اولنه رق مجارستانك و دالماسیانك و یونانستانك
بعض برلری المزدن کتمش ایسه ده دشمنك صولك
هجوم واستیلا سنده نظراًینه آزشی ایله بونجه سنه لك
برقانی محاربه یه ختام ویرلش اولسننن طولابی عقلای
دولت ممنون قالمش ایدی .

۱۱۱۱ سنه هجریه سنده اوروپا دول معظمه سی
پیولك سفارتلر ترتیبیه تبریک مصالحه یه مسارعت
ایلدیلر . بونده حقیری وار ایدی . زیرا اوزمانه قدر

مجارستان و لهستان و اوستریا و حتی المانیا دولتی بیله
دولت علیه عثمانیه نك عادتاً خرج كذارى ايكن
قارلوفچه معاهده سنده بجه شروط اساسيه سندن
اولق اوزره بعدما دولت عليه نك بونتردن خراج
وهديه ناميله هيچ برشى طلب ايتيه چكى درج اولمش
ايدى. شو حالده دول مذ كوره على الاطلاق برر مستقل
دولت اولق اوزره سفارتلر ترتيب ايتيلش درر.

مجار به مشغوليتى بوضورتله بر طرف اولدقدن
صكره دال طبعان مصطفى پاشا بروقتدنبرى بغداد
طرفلرنده دوام ايدن شورشى دفع وتسكينه مأمور
اولوب حلب و ديار بكر ارسنده و فرات نهرى اوزرنده
واقع بيره جك قصبه سنده قايتلر انشا ايدرك نهر فرات
طريقى ايله بغداد جوار ينه واردى و حال عصيانده
بولنان منتفك عشيرتنى يوله كتورديكى كى بصره يى
ضبط ايتمش اولان عجملى ده طرد ايدرك ۱۱۱۲
سنده سنده قدر اوحوالى يى كاملاً اصلاحه موفق
اولدى.

قارلوفچه معاهده سندن ممنون اوليان قريم خانك
برادرى باشنه برچوق تاتار و نوغای طوپلايوب عصيان

ایلمش ایسه ده اوزرینه عسکر سوق اولنور اولمز یوله
 کلمش و بوزمانه قدر احتیاج کورلبدجه ضم اولنه
 اولنه ارتق طاقت کداز بر درجه یه وارمش اولان
 ویر کورل تخفیف و کذلک احتیاج کورلبدجه عددی
 آرتسون دیه معدنی تفشیش ایلدش سکه لر تصحیح
 قلندر ق بر زماندنبری احوال داخلیه یه اهمیت
 ویر یله مامک حمیله میدانی خالی بولان جزو یتر دخی
 بالتبعید قتولیک ارمیلر ایله غره غورین ارمیلر منازعه
 تنه ختام ویرلشدیر .

صلح و مسالمت کامله اوزره چکن ۱۱۱۳ و ۱۱۱۴
 سنه لوی ایشته بومثللو اصلاحات ایله امرار اولنوب
 انجق قارلو فجه معاهده سنه اعتراض ایدنلرک تقو هاتی
 چوغالیدیغی کبی ۱۱۱۵ سنه سنده دخی عسکری
 طاقی معاشلرینک وقت وزمانیه ویر یله مامسنی وسیله
 ایدینه رک بر عصیان چیقارد قلدنن سلطان مصطفی
 ثانی حضر تدرینه دخی فتور کلوب سلطنت و خلافتدن
 فراغتله مهمام دولتی برادری سلطان احمد ترک
 ایلدیلر .

سلطان احمد ثالث حضر تدری اوتوز یاشنده بر بابا

یکیت اولدقلری و غایت ترقی پرور برشهرزاده بولندقلری
 حالده مقام سلطنت و خلافت کله رک برادرلرینی ترک
 سلطنته مجبور ایلیان بر طقم بی ادبانی تربیه و تنکیل
 ایلد کدن صکره کر جستان طرفلرنده بر زماندنبری
 ظهور ایدن فساد و عصیانلری منع ایله اول حوالی بی
 اصلاح ایچون دخی ۱۱۱۷ سنه سنده عسکر سوق
 ایلیه رک موفق اولمش و بصره طرفلرنده حالا وادی
 عصیانده طولاشان منتفک عربانی دخی اوروب تربیه
 ایلمشرایدی.

دولت علیه نك بودور انحطاطی بالطبع بعض
 اسباب تنزله دخی میدان آچهرق آینه لی قواق و قره
 اغاج و میر کون مسیره لرنده بزم صفایه رونق و برلمنی
 چکه میان بعض یکچیری طاییلری بر فساد دهاچیقار مغه
 یلتمشرا یسه ده وقت مسالتمده دخی استانبولی دارالحرب
 حالنده بولندیر مقدر استفاده ارایان بومقوله آدم لرک
 در حال باشلری کسیره رک قتنه لری بر طرف ایلمشدر.

۱۱۱۸ سنه هجریه سنده روسیه جه حس اولنان

تدارکات حربیه مقابل قره د کزه بردونماچیقاریلوب
 بعض قازاق قایقلری طاغیدلش اولدیغی کبی اق د کزده

دخی مالطه لی بر طاقم خرسز کیلری تنکیل و محو ایدلش
و ممالک شاهانه ده قالان جزو یتلرک بقیه سی ینه منازعات
مذهبییه میدان آچد قلرندن وار منیلردن دخی بر چوقلری
بونلره او ید قلرندن ارمنی قتلرک چاعتنک رؤسای
نفی اولنهرق بومسئله دخی حل اولمشدر .

قریم خانی ایله روسیه ارسنده مناسبت دوستلغه
موافق بر صورتده جریان ایتیموب حقیقت حالده قریم
خانی حتملی و روسیه ایسه قریم قطعه سنه طمعکار اولد .
یغنی استانبولجه معلوم ایدیه ده بوندن طولانی بر منازعه
چیقارملق موافق سیاست کورلیه رک ۱۱۱۹ سنه
هجریه سنده روسیه نك خاطری ایچون قریم خانی تبدیل
اولمش و ۱۱۲۰ سنه سنده ایسه استانبولده حرکت
ارضلر حر یقلر و شدید فورطنه لر ظهور یله بونلرک
تخریباتنه چاره بولنق ایله وقت کچیرلشدر . بوسنه
مصرده دخی شدتلی بر قحط ظهور ایلش ایدی .

بوعصرده جزایر او جاقلری شمیدیکی خدیویت
مصریه دن ده مستقل وعادتا جانلری ایسترایسه
دولت علیه بی هیچده طایمیه حق قدر جرأتلی بولند .
یغندن فاس واسپانیا دولتلر ینک جزایر جوارنده کی

تعرضاتنی منع ایچون ۱۱۲۱ سنه سنده اعلان حرب
ایلیه رک وهران قلعه سنی بونلرک ید تعرضلرندن قورتار-
مشر ایدی . کذلک بو عصر اسوج قرالی اولوب بزم
تاریخ عثمانی زده « تیمور باش » دیه شهرت المیش اولان
اون ایکنجی شارلک چلغنجده سنه جنکاور لکده بولندیغی
زمان اولمسیله موخی الیه نهایت روسیه ایمپراطوری بیوک
پتروئک النده مغلوب وزبون اولنجده بزم حدود منجه جان
آتوب دخالت ایلش و ۱۱۲۲ سنه سنده بندر طرفلر نده مسافر
ایدلش ایدی . قرال موخی الیه روسیه دن اله دیغی
انتقامی بزه الدیر مق ایچون دولت علیه بی روسیه علیه نه
تشو یقندن خالی قالمیه رق واقعا ۱۱۲۳ سنه سنده روسیه یه
اعلان حرب اولمش ایدی .

بالطه جی محمد پاشا معیتیه اردوی همایون پروت
نهری اوزرینه سوق اولند قده بیوک پترو دخی اردوسیه
اوراده بولنه رق تلاق صفین واقع اولدی . بالطه جینک
تدابیر عسکریه سی بیوک پتروئک نظامیه عسکرینه غالب
کلرک پک کوزل برمانورا ایله پتروئک اردوسی کاملاً
قوشا تلمش اولدیغندن روس چارمی ایچون بلا شرط
تسلیمیتدن بشقه هیچ امکان سلامت قالماش ایدی . بو حالده

اردوجه موجود اولان ذی قیمت اشیانک کافه سی تقدیم
اولنق اوزره طلب اولنسان صلحی بالطه جی محمد پاشا
نصاسه قبول ایدرک عقد مصالحه ایدلمشدر .

بو حال بالطه جی محمد پاشانک خیانتنه حل اولنه رق
مؤخرأ بیچاره نك اعدامنه ده سبب اولدیغی کبی بعض
مورخلر بیوک پترو نك زوجه سی اوزرنده بولنان الماسله
وارنجه یه قدر تقدیم ایلدیکی هدایای بالطه جینک عادتاً
رشوت اوله رق قبول ایلدیکنی دخی یازار لر ایسه ده
بومسئله بالطه جی حقنده صرف افترادن عبارتدر .
هدایای مذکور هنی بالطه جینک کاملاً استانبوله تقدیم
ایلش اولدیغی محقق اولوب ذاتاً بیوک پترویه امضا
ایتدیردیکی مصالحه نامه دخی الشانلی بر معاهده غالبانه
اولدیغندن پترویی تحت اسارت المش اولسه بیله استانبولده
ینه بوندن اعلا بر معاهده امضا ایتدیر یله مزایدی .
زیرا روسیه نك لهستاندن ال چکمی ولهستانده
نه قدر عسکری وار ایسه چیقارمی وقریم خاننک
روسیه دن طلب ایلدیکی قرق بیک دوقه بدل جزیه نك
اعطاسی وازاق و اطرافنده نه قدر قلعه لر وار ایسه
بجمله سنك مشغلاتیله برابر دولت علیه ویرلسی ویر-

حد لره بنا ایدلمش اولان قلاع واستحکامات سائرهنک
کاملأ هدم وخراب ایدلمسی جلہٗ شرائط صلحیہ دن
اولوب بوندن ماعداد روسیہ اردوسندہ برجہ یہ
وارنجہ یہ قدرهرنه موجودایسہ جلہٗ سی دخی تضمینات
حر بیہ کی بر صورتلہ النمش ایدی . بونلردن بشقہ
بیولک پتروندن انه حق برشی قالور ایسہ اودہ جانندن
عبارت قالورکہ اکر بالطہ حیہ اعتراض ایدنلرک
«موسقوفک اوجاغنی سوندرمک قابل ایکن نیچون
سوندیرمدی» دیملری عاقلانہ برسوزعداولنہ حق ایسہ
اکابزم ہیج بردیہ حکمزاولہ من .

۱۱۲۵ سنہٗ ہجریہ سندہ مصرده کولہ منلر میانہ
اختلاف دوشہ رک یکچیری وسائر عسا کر منظمہ دخی
بر بشقہ طرفدن روی مخالفت کوستر مکلہ اویچ طرفلی
بر مقاتلہ میدانہ چیقمش ایسہ جہ در حال استانبولدن تازہ
عسکر کوندر یلہ رک قتنہ باصدیرلشدہ . بر زماندنبری
وندیک جمهورینک ارناودلقدہ اجرا ایلدیکی تشویقات
دخی بوصرہدہ آثارینی میدانہ قویہ رق بعض ارناود
بکری وادی عصیانہ صایمشلر ایسہدہ کو پر یلی
نعمان پاشا یتشوب اورالرینی اصلاح ایلشدہ . بونک

اوزرینه وندیک جمهوری کو یادولت علیه وندیک
 جایه سنده بولسان بر مملکتی اورمش کبی باب عالی بی
 اتهامه و عقلنجه ارناودلغی استیلایه قالدشغلله ۱۱۲۶
 سنده سنده وندیک اوزرینه دخی اعلان حرب ایدلمش
 و برأ کوندر یلان عسکر سواحل یونانیه ده واقع وندیک
 مواقع مستحکمه تجاریه سنده کی دشمنی طرد و دفع
 ایلدیک کی ۱۱۲۷ سنده سنده دخی بحرأ استندیل
 اطه سی وجوارنده واقع سائر اطه لر وندیکلو یدندن
 ضبط اولنده رق بونک اوزرینه بوسنه وهرسک طرفلر
 ندن ۱۱۲۸ سنده سنده بزم اوزر مزه سوقنه چالشدیغی
 براردوسی دخی تاروما را ایدلمشدر .

وندیک جمهورینک بویله اوچ سنه متادیا مغلوبیتی
 المانیانک غیرتنه طوقنه رق کویا ایلک تعرضی بز
 ایتشز کبی بو محاربه نک قارلوفجه معاهده سی حکمنه
 مغایر اولدیغی دعواسیله المانیانقض عهد ایش و غرب
 طرفجه وندیک محاربه سی حالادوام ایتمکده ایکن شمال
 جهته دخی صدر اعظم داماد علی پاشا قومانداسیله
 براردو سوقنه مجبوریت حاصل اولمش ایدی . انجق
 داماد علی پاشا پتره واردین پیشگاهنده شهید اوفات

ایدرك ۱۱۲۹ سنه سنده المانیالو تا افلاقه قدر ممالکی
استیلا ایلدیکی کبی ایرتسی ۱۱۳۰ سنه سنده دخی
اردوی همایون بلغراد پیشگاهنده مغلوب اولدیغندن
بلغراد قلعه سی دشمن اننه کچمشدر . لیکن ونیک
دوئیماسی اق دکرده طرف طرف کوزآچیدیرلیوب
مغلوب ایلدیکی کبی ارناودلغه سوق ایلدیکی بر
اردوسی دخی اولکون جوارنده پریشان اولمش بولند
یغندن بو کره دخی انکاتره وهولاندا دولتری توسط
ایدرك باساره و یچده بر معاهده صلحیه دهانتظیم
اولمش و بومعاهده یونانستاننی بزه تکرار مال ایتمش
ایسده افلاق و صر بستانک یاریدن زیاده برلرینی
دشمنه ترک ایتدیرمشدر .

معاهده مذکور اوزرینه بش سنه قدر دوام ایدن
صلح و مسالمت بزجه تعمیر بلاد و ترقی صنایع کبی امور
خیریه صرف اولنه رق المانیالولردخی افلاق جهندن
الدقلمی برلری اوستریا یه ربط ایدرك صر بستاننی ایسه
بر ولایت مختاره شکنه قویق مقدماتنی اله المشل
ایدی .

دولت علیه نك صنایع داخلیه یه عطف نظر

اهمیت بیوردیغی بومو سنده اوروپا جه مطبعه جلیق
 صنعتک علوم و معارفی احیا درجه سنده منافع عظیمه
 سی نظر دفته النهرق بزجه دخی صنعت مذکور هک
 ایلک ظهورینه یول آچلمشدر . فقط صلح و حضریت
 زمانه ک امتدادی خلقی ذوق و صفایه دهـ از یاده
 منهک ایدوب ایشته لاله زار عالمی بوزمان رونق
 بولمشدر .

۱۱۳۵ سنه هجریه سنده روسیه دولتی ایران
 دولته تسلطه باشـ لایوب اوزمان ایرانده حکومت
 سورن خاندان صفویه ک شوکتی زواله منقلب اولمسیله
 اوتـ طرفدن افغانستان و بو طرفدن کرجستان کنـ دیلر
 ینی ایرانـ آروب استقلال و ادیلرینه سلوک ایلشدر
 ایدی . بو حال دخی روسیه ک استیلا سی تسهیل ایلیدرک
 بحر حرز ساحلنده واقع باقو قصبه سنه قدر عسکر
 سوقیله استیلا ایلدی . حالبوکه تفلیس و شامخی و قره باغ
 و شروان و لایترینک ذاتاً دولت علیه میلی اولوب
 بو صرده روسیه استیلا سندن خوفلی ده بو میلی تأیید
 و تقویه ایلدیکندن ایران دولتی روسیه النده بالمغلوبیه
 استرآباد و مازندران و کیلان ایالتلرینی روسیه ترکه

مجبور اولنجده دولت علیه دخی قره د کزه دونما-
چیقاروب روسیه نك حرکات و مراسلاتی منعله برابر
دیگر طرفدن دخی عراق اوزرینه براردو سوق ایدرک
لورستان و کرمانشاه و سنه ایالتلرینی استیلا ایتدیرمش
وبعده اردلان و همدان طرفلرینی اشبو عراق اردوسی
وخوی و مراغه و اردبیل ایالتلرینی دخی کرjestان
فرقه سی ضبط ایلش ایدی.

اشبو حرکات عسکریه ۱۱۳۷ سنه هجریه سنده
میسر اوله رق روسیه دولتی موققیات واقعیه مزی
منعه قالدشمقله بالطبع دولت علیه دخی روسیه اوزرینه
اعلان حرب ایلدی. لکن معاهدات صلحیه نك بویله
بر مسئله ایرانیله نقضنه فرانسه وانگلتره و المانیادولتلی
رضا کوسه ترمد کلرندن بونلرک توسطلریله حدودلر
تعین اولنه رق هر کس کندی حقنه راضی ایدلمشدر.
اشبو حدود جدیده بالطبع ایران دولتی الزیاده
ضررلی و روسیه یی الزیاده کارلی چیقاروب دولت
علیه ایسه معتدل برحالده کارندن زیان ایلش ایدی.
زیرا بحر حزره منصب اولان قور نهرینه قدر ممالک
روسیه یه ترک ایدلمش و بوضورتله تکمیل قفقاسیه

وطاغستان و چرکستان روسیه طرفنده بر اقلش
 اولدی . بوکا مقابل عراق عجم ایله یسه ایران النده
 بولنان کردستان و ازربایجان و قرهباغ و روان و شروان
 و کرجستانک بقیه سی دولت علیه یه تملیک ایدلمش
 ایدی که بویورل ذاتاً بزم طرفزدن دفعاتله ضبط ایدلمش
 اولدقلری حالدده روسیه یه و یریلان یرلرده اوزمانه
 قدر موسقوفک اسامیسی بیله او قونمز ایدی . ایران
 ایسه ذاتاً داخلی دشمنلرندن ماعددا برده دولت علیه
 و روسیه کبی ایکی معظم دولتک حرکات خصوصتکا
 رانه سندن قورتلقله برابر بعد ازیں بونلرک حایه سی
 التنه کیرمش اولمغی کندیمنه کار عدا ایلدی .

روسیه دولتک کرک ایران و کرک عثمانلی حقنده
 بر زمانه قدر اثارینی کویسترمکدن کیر و قالمیان انتر یقه لری
 مؤخرأ « بیولک پترو وصیتنامه سی » دیه بر شهرت
 مدهشه ایله یاد اولتمق اوزره هب بوزمان ترتیب اولتمش
 شیر اولمغله ۱۱۳۸ سنه هجریه سننده ایرانجه وقوع بولان
 بعضی انقلاباته روسیه نک انتر یقه لری و تشویقلری دخی
 قاریشهرق ایران ایله دولت عثمانیه نک اره سی بوزلمش
 و عجملر معاهدهء اخیره حکمنجه حدود عثمانیه داخلنه

کیرن یرلری کاه بالاغفال عصیانہ سوق و کاه کندیلری
 اچیقدن اچیغه هجوم ایلمک صورتیله استردادہ باشلامش
 ایدی . بو حالده ۱۳۸ سنہ سندنہ بر حرکت همایون
 دها وقوعہ کلہ رک تہر یزک ضبطیلہ ازر بایجان تکرار
 الہ کچورلدیکی کبی ایران یدینہ کچن سائر ممالک دخی بر
 برر اور یلوب ضبط و تکرار دولت علیہ یہ ر بط قلغش
 و ایجاب ایدن محللہ قلعہ لر و قلعہ لر انشاسیلہ شو مر بوطیت
 جدیدہ تأیید ایدلمشدر .

حالبو کہ ممالک مذکورہ اہالیسنی شیعیلمک غیر تیلہ
 بر یاندن عجزملر و دیگر یاندن نیچہ بیک و عدلر ایلہ موسقو فلر
 افساد و تحر یکدن خالی قالدقلری جہتہلہ ایرتسی ۱۳۹
 سنہ سندنہ اورالرحہ بر عصیان دها چیقمش ایدی .
 بودفعہ ایران و یاخود روسیہ علیہنہ دکل بلکہ
 طوغرینن طوغری یہ ممالک مذکورہ علیہنہ ترتیلر
 کور یلہ رک الی التمش بیک قدر عاصیلرک کافہ سی
 قلیچدن کچورلمش و ناطهران جوارینہ وارنجہ یہ قدر
 یرلر چالقانوب ایرانہ یولبر پر یشانلق کوسترلمشدر .
 ۱۴۰ سنہ سندنہ جزو یترک افسادیلہ ارمنیلر میانندہ
 بر طاقم ادبسنلرینہ اورتہ لغی قارشیدیرمغہ باشلادقلرندن

بونلردن ایجاب ایدنلری تأدیب اولندقلری مثللو بمصرده
کوله منلردخی برطاقم آزغلقلره قیام ایلمش بولندقلرندن
و قریم طرفلرنده دخی نوغایلر ایله قزاقلر یکدیگری علمینه
ینه ابراز اثار خصوصته باشلادقلرندن بونلرک تأدیب و تربیه
لری دولت علیه ایچون باشلیحه بر مشغولیت حکمنی
آلمش و منتقل عشی یرتک بصره طرفلرنده کی عصیانلر -
ینک تسکینی دخی مشاغل مذکوره جمله سنه داخل
اولمشدر .

بو موقعیات اوزرینه ایران طرفلر ینک همان کاملاً
دولت علیه نفوذی التمه کیرمی روسیه نک اورالجه
ترتیب ایلدیکی استیلا جویانه انتر یقه لره بر درلو
توافق ایده مدیکندن شمال طرفلر ینک کسوندن کونه
قوتی آرتان تشویقاتنه قاپیلهرق ۱۱۴۱ سنه سنه
اسماعیل قلندر نامنده بر معتبر ایرانی بر بلوک حشراتی
باشنه طو پلا بهرق اردبیل اوزرینه هجوم ایتمش
ایسه ده اردبیل والیسنک قپو خلقی حشرات مذکو-
ره بی مغلوب و پریشان ایتکه کافی اولدیغی کبی مؤخرأ
اوتوز بیک عسکر ایله مرقوم اسماعیل قلندر تکرار
اردبیل اوزرینه یوریمش و بودفعه کی هجومی دهشت

متقدمه سنی دخی کوس-ترمش ایدی . اردبیل والیسی
 مرقومك شدت هجومه قارشو شمان اظهار ضعف
 وعجز ایتك اوزره ایکن تبریز وتفلیس وشروان
 والیری اردبیلک امدادینه قوشه رق عادتایوجك
 برکلفت ومشقته قلندر یلری مغلوب ایده بیلشرایدی .
 ۱۱۴۲ سنه سنده ایسه مؤخرأ نادرشاه دیه شهرت بولان
 نادر قولی نام کیمسه کندیس-سنه او یدیردیغی بر قوه
 کلیه ایرانیه ایله اولافغانستانی اوروب هرات وسائرہ بی
 ضبط و اوطرف لر دن تدارك و پیدا ایلدیکی خزان
 وعسا کر ایله قوه حر بیه سنی بر قاندها تزید ایلد کدن
 صکره وهله وکمال شدت و سرعت ایله حدود عثمان-
 نیه دخی تعرضه باشلامش و هر هانکی طرفه یوز
 کوس تردی ایسه موفق دخی اولمش ایدی .

بو خبر استانبوله انجق ۱۱۴۳ سنه سنده واصل
 اوله بیلدیکی کبی بعد مسافده کوره ایران ایچ-ون
 اقتضا ایلان تدارکات و ترتیبات عسکریه مذاکراتی
 ایچون بش التی آی قدر زمان پکشدیرلدیکندن ونادر
 قولی ایسه الك کو چك برفرصتی بيله قاچرمیه رق
 تعرضاتنده دوام و همدان طرفلرنده دخی بر غلبه

کایه ایله والیلر مزك كندی قوه عسکریه لرینی مغلوب
ایلد کدن صکره ایکی قوله آردیغی اردوسنك بر قولنی
تبریز و دیکرینی همدان اوزرینه صالدرمش و بو خبر لر
دخی پیدر پی استانبوله ورود ایتد کجه یکپیری گروهی
بو مغلویتلری و تدارکات سفریه خصوص صنده کوریلان
تأخر لری هب و کلانك ایران طرفدن مجلویتلری
صورتیله ارتکاب ایلدکاری خیائته حل ایلیره رك
ایاقلانمشلر ایدی .

حالبوکه بو کورلتینك نادر شاه ایچون الیوک
فرستله میدان اچه جغنی دوشونمور لر ایدی . جله
حائاندن اولمق اوزره صدر اعظمك و قپودان پاشانك
و کتخدابكك قتلار یله یرلرینه یکیدن بر هیئت و کلا -
نصبنه تشبثلری سلطان احمد حضرتلری ایچون دخی
موجب یأس و فتور اوله رق زمام سلطنت و خلافتدن
کفید ایشلر ایدی . بعد الاستعفا الی سنه قدر دهامهر
اولمشلر و صفای خاطرله زمان کچورمشلردر . هم ترقی
پرور هم کرچکدن مظفر بر پادشاه عالی جاه اولوب زما -
نلرنده ارباب معارف و صنایع بحق جایه و تشویق
کوره رك مظهر ترقی اولمشلردر .

سلطان مصطفی ثانی حضرت تکریم‌نک شهرزاده لری
 سلطان محمود اول حضرت لری ۱۱۰۸ سنه سنه بالتولد
 ۱۱۵۳ سنه سنه رشید و کامل بر شهریار اولدق لری حالد
 مقام سلطنت و خلافته جلوس بیور مشلر ایسه ده بویله
 عصیان صورتیه و قوعبولان جلوسلرک ابتدالری
 هب بر طاقم حاصی و شقیملرک تأدیمله مرور ایلمدیکی
 کبی اشبو جلوس همایون ابتداسی دخی اشقیا و سر
 کشانک تدمیری ایله مرور ایلمشدر .

شو ایلك مشغولیت اوزرینه ایران دولتی ا کرچه
 صلحه رغبت کوسه ترمش ایسه ده درمیان ایلمدیکی
 شرائط صلحیه غایت فاحش و قبوللری عدیم الامکان
 شیلر اولدیغندن نزد سلطنت سنیه ده قبول ایدیله میوب
 بریسی روان و دیگری بغداد اوزرندن سوق اولنق
 اوزره ایکی جسیم اردو تدارکنه مباحثت قلندی .
 عسکر طاقنک بودفعه کی عصمیا نده کندیلرینه مقصد
 ایدندکاری شی بو ایران مسئله سی اولدیغندن انلرک دخی
 انضمام ایدن معاوتلری ایله شوایکی اردو بالسهوله
 تهیه ایدلمش ایدی .

ایلك حرکت عسکریه ده ایرانلیلر قزوینه طوغری

رجعت کو ستر دیلر . نادر شاه ایسه مقدا همدان طر-
 فلرنده دوچار اولمش بولندیغی مغلوبیتک آجیسنی ینه
 همدان انحاسندن معدود اولان کوریمچان صحراسنده
 چیقارمق ایچون غایت قوتلی ترتیلر کوره رک اردوی
 همایونک کوریمچانه وصولیه برابر مهاجرات شدیده یه
 مباشرت ایلش ایدی .

بو محاربه کرچکدن بر ملحمه صورتنی ایدی . طرفین
 معرکه دن چکیلدکاری زمان معرکه نک او توز قرق بیک
 نعش ایله طولمش اولدیغی کورلمش ایدی . انجق غالبیت
 بزم طرفزده قالوب نادر شاه همان اردو احوال و ائقالنی
 میدانده براقق درجه سنده بر پریشانلق ایله کاشان
 طرفلرینه فرار ایلدی .

ایشته بو صورتله غالبیت کامله بزم طرفزده قالوب
 ایرانلو دخی صلحی عادتا بر آمان دیله مک صورتیه
 استدا واسترحام ایلدیکی حالده عقد اولنان معاهده
 صلحیه ده اردیل و ازربایچاندن ماعدانهاوند واردلان
 و همدانک دخی ایرانلویه ترک ایدلمسی کبی بر غرابت
 کوریلنجه سلطان محمود اول حضرترلی یکچیرینک
 و کلایی ایران طرفندن مجلوبیتله اتهم خصوصنده

عادتاً حقلی اولدیغنی حکیم ایدرک بومعهاده بی ترتیب
ایلیانلرک کافه سنی مأموریتلرندن عزل و قهر ایلدی.

۱۱۴۵ سنه هجریه سنده روسیه دولتی نهر قوبان

طرفلرینی بنمسه مکّه قالمشغله روسیه علیهنه تدارکات
عسکریه کوریلور ایکن نادر قولی ابرانده اصل پادشاه
اولان شاه طهماسبی خلع ایدرک کندی شاهلغنی
بالاعلان هرکسه تأیید شوک ضمیمه شعشعه لی

برموقیت کوسترمک ایچون عراق عجم و کردستان

اوزرینه یوریمش و کرمانشاهی فلانی چکنه یوب

یکه رک بغدادی دخی بر طرف ایلدکن صکره بغداد

ایله موصل ارمسندده و بغداده اون بش ساعت قدر

مسافده واقع امام سامرایه قدر یرلره وحله و کر بلایه

طوغری مستولی اولمش ایدی. بناء علیه روسیه ایچون

تدارک ایدیلان اردوی همایون طوپال عثمان پاشانک

قومانداسنه و یریلهرک موصل طریقله ایران اوزرینه

کوندردی و عثمان پاشا ۱۱۴۶ سنه هجریه سنده

ایرانلوی ایکی دفعه بوزدی ایسه ده کر کوک جوارنده

سردار مشارالیه شهیددوشنبه اردوی همایونه

برپیشانلق کلدی.

بونک اوزرینه نادر شاه کردستان عثمانی به یعنی
 شهرزور و سلیمانیه طرفلرینه دخی تعرضدن کیر و قالمدی .
 ۱۱۴۷ سنه سنده قریم خانی دخی ایران محاربه سنده
 دولت علیه به معاونته دعوت اولنده رق قبارط او ابازه
 و چرکس و کورچی ممالکنندن کچدکجه خانک اردوسی
 بیوش و شو حالده نادر شاه اردوسنه جناحدن هجوم
 اولنقی صورتیه عظیم پر پریشانلق ایقاعی شک و شبهه
 دن وارسته قالمش ایسده ۱۱۴۸ سنه سنده نادر شا-
 هی استصحاباً و قویان وادیسنی استملاکاً روسیه دخی
 بزم اوزرمرزه اعلان حرب ایلدیکندن قریم اوزرینه
 بیوک براردو سوق ایدیلهرک ۱۱۴۹ سنه هجریه سنده
 ازاق قلعه سنک تحت محاصره به النسی قریم خانک
 بالمجبوریه تعطیل حرکت ایلسنی مستوجب اولمش
 ایدی .

بو حالده دخی سلطان محمود اول حضرتلری تداییر
 مقارمتکاریدن کرو طورمدیلر . شرق اردوسندن بشقه
 روسیه ایچون دخی طونه اوزرینه سوق ایدلمک
 ضمنده عظیم برقوه عسکریه تدارک اولنورکن نادر
 شاهک یکیدن یکی به برطاقم استیلاری خبری استانبوله

واصل اولدیغی کبی قریم اردوسی دخی ازاق اوزر -
ینه ارجاع حرکت ایلدیکندن و حالبو که روسیه نك
حرکات واقعه سنده کوریلان دهشته مقابل نادر شا -
هک تکلیف ایلدیکی شرائط صلحیه مغلوبیت واقعه -
مزه نظراً اهون کورلیدیکندن ایران ایله مغلوبانه
بر مصالحه عقدینه مجبوریت الویرمش ایدی .

واقعا ایران دولت جدیده سنی وجوده کتورن
معاهده بو معاهده اولوب اوزمان استانبولجه دخی
پک چوق عقلا بو معاهده یی مؤاخذه نن کیر و قالماملر
ایسه ده نادر شاه عراق عرب بدن شماله طوغری تبدیل
حرکت ایلیرک و قره باغ و شروان و کنجه یی چکنه -
یه رک آر په چایی مقابله نده بر قول اردومزی بولوب
بوزدقدنصرکه بایزید و تفلیس و روان و الحاصل بتون
کرجستانی استیلاده سهولت کوردیکی کبی ا کر عقد
مصالحه به مسارعت کوسترلماش اولسه ایدی انک
غلبه کلیه سنه و روسیه مهاجراتنک ده تهدیدینه مقابل
بزم عجز کلیمزه کوره ناطولی ایچلرینه قدر کلمسی دخی
شک و شبهه دن وارسته ایدی . بودفعه کی معاهده ده
عراق عرب و کردستان عثمانی یی بزه اعاده ایلدی که

استیلا کرده سی اولان ممالکک همان نصفه قریب
ایلی • بوندن ماعدا ایرانجه مذهب شیعه بی قالدیروب
فقط کربلا زیارتنه کیده جک اولان زوار ایرانیه نک
عربل طرفندن دو چارتهلکه اولماسی شرطنی درمیان
ایلدی • طرفین فراریلرینک اعاده وعقوی جلهء شرا -
ئطدن اووب طرفین ممالککنده شهیندرلر و کارپردازلر
اقامه سی دخی بومعاهدهنک جلهء احکامندن ایلی •

ایران ایشی بو صورتله بتورلد کدنصکره
روسیه مسئله سنه عطف نظر اهمیت ایلدی • بو کونه
قدر اهمیت سیاسیه سی حسیله دلارده داستان اولان
مسئلهء شرقیه نک اصل مرتبی بولنان جنرال مونیک
ترتیباتی اوزرینه روسلر قریمه هجوم ایملر ایلی •
قریم شبه جزیره سنی قره یه ربط ایدن اورقپو نام برزخ
روسلرک هدف الهجماتی اولمسيله تاتارلری بر کره اور
قپوده بوزدقدن صکره شبه جزیره کیرن روسلر
هر طرفه آتشر و یرمشر وشبه جزیره خارجنده واقع
قیل برون قلعه سنی ضبط ایتدکری کبی قوبان نهرینه
قدر ممالک قفقاسیه بی دخی کاملاً اطاعتلری التنه
المشر ایلی •

اوزمانلر اوروپا دولتری دخی شومسئله حربیه
 و سیاسیه بر نظر مخصوص اهمیتله باققدن فضله
 اسوج ایله فرانسه روسیه قارشو انتقام سیاسیلرینک
 اخذینی بزه حواله ایدرک روسیه ایله محاربه مزى
 تشویقده بولندقلری و انکلتزه ایله هولاندا ایسه بومحا-
 ربه نك امتدادینی منافع تجاریه لرینه موافق بولمیه رق
 صلحی تشویقه مسارعیت ایلدکاری و المانیا ایله اوستریایه
 کالجیه روسیه ایله کیرلی اتقلاقلرینی بزندن و عموم
 اوروپا دن صاقلایوب بیطرف و حتی متوسط کورند-
 کاری حالده سلطان محمود اول حضرتلری ارتق
 دولت علیه ایچون برنیت قطعیه صورتنی المش بولنان
 حرب جهتنی بالترجیح ۱۱۵۰ سنه هجریه سنده
 موسمک وقت شتا اولدیغنه دخی باقیه رق لهستان
 ایچنه طوغری آقینجیلری صالدر مشلر ایدی.

بو حالده هولاندا ایله انکلتزه برنجی درجه ده
 و اوستریا ایله المانیا انلره تابعاً صلحی اجباره باشلاملریله
 زمیرو قصه سنده شرائط صلحک مذاکره سنه ابتدار
 و لنديسه ده روسیه دولتی افلاق و بغداد و قریم
 قوبان طرفلرینی کندیسنه تملیک کی قبولدن بعید

بر طاقم شرائط سرد ایلدیکندن و بوندن فضله کویا
 متوسط صفتیه اورتیه چیقان اوستریا دخی المانیانک
 مظاهرتنه کووه نه رک بوسنه دن و دینه قدر بقیه صر-
 بیستان ایله نیش و شهر کوینک دخی کندیسمنه و یرلسنی
 ایستدیکندن روسلرک آمال استیلا کارانه لرینه سد ماما-
 نعت چکه لم دیرایکن اندن فضله بر طاقم ممالکک دخی
 اوستریا به پیشکش چکلمسی دولت علیه جه موجب
 استغراب اوله رق بریاندن وقت قزاق ایچون مذا-
 کرات صلحیه ده دوام اولندیسده دیکر طرفدن یالاکز
 روسیه به قارشو دکل اوستریا به قارشو دخی تدارکات
 حربیه به مسارعت قلندی .

دولت علیه نک اشبو ترتیب و تدارکندن دشمن
 در حال خبردار اولش ایدی . بناء علیه هنوز هیچ
 بر طرفدن نقض متارکه و اعلان حرب ایدلماش ایکن
 روسیه و اوستریا اردولری حرکات خصمانه به
 باشلامش ایدی . روسلر اوزی طرفلرینی استیلا ایلد-
 کلری کبی اوستریا لولر دخی نیش قلعه سنی ضبط ایلد-
 کلرندن صوفیه و بابا طاغنده اجتماع ایلدیان عثمانلی
 اردولری ایلرو حرکت امر بنی الدیلر و اوزی طرفلر-

ہ مجھڑ بولن ان اردولر دخی مدافعه و مقاومتہ
لا دیلر .

اوزی اردوسی روسلرہ قارشو بوزلمش ایدی .
ستریالو اوزرینہ سوق اولن ان اردومن ایسه مظهر
ر اوله رق اولاح و بغدادن ایچنہ طالان دشمنی طرد
رایوہ و اورصوبہ بی ضبط ایلدیکی کبی اوستریانک
ین اوزرینہ کلان برقول اردوسی دخی تیموق نہری
زرنده و شملر کوی طرفنہ سوق اولن ان مفره زلری
صبہ مذکورہ مقابلندہ مغلوب و منہزم ایدلر کدن
عدا بوسنہ یه کیرن قول اردوسی دخی بانیالوقہ
شکاھندہ پریشان ایدلشد .

غریبدرکہ اوچ دولت اردولری بویله یکدیگریله
غاز بوغازہ مهاجمہ ایکن صلح لقر دیلری حالا غزلردن
شما مکدہ ایدی . بناء علیہ ۱۱۵۱ سنہ سی موسم
باسی دخی صلح مذاکراتیلہ یکدیسیہ شراائط واقعہ
ب قبول اولنور شیلردن کوریلہ میہرک موسم بہار دہ
مہاجاتہ ابتدار اولندی .

بودفعہ دخی روسلر غلبات متعددہ ایلہ قریبی
ملاً استیلادن ماعداد پروت و طونہ طرفرینہ قدر

یوریشلر ایسه ده اوستریالولر بودفعه دخی طرف طرف
مغلوب اوله رق بوسنه و صربستاننی کاملاً تخلیه یه
مجبور ایدلشلر ایدی. حالبوکه ۱۱۵۲ شتاسنک مذا-
کرات صلحیه سی دخی بر نتیجه یی منتج اوله میه رق
غوظانک اوچنچی سنه سنه دخول ایدلدی. اشبو
اوچنچی سنه محارباتنده دخی اوستریالولر کاملاً مغلوب
اوله رق اولاح یقه سنندن بالکلیه طرد ایدلد کدن ماعدا
مهادییه وارنجه یه قدر مجارستان دخی بتکرار استیلای
عثمانی اتنه کیرمش ایدی. حتی بوسنه مغلوبیت
روسلرده دخی کوریلوب پروت وقریم طرفلرنده کی
قول اردولری بر قاج دفعه رجعتیه مجبور ایدلد کلری
کبی ازا ق دکرنده کی دو ننامی عادتاً کلیاً احراق ایدلش
ایندی. انجق روسلر مؤخرأختن و یاش شهرلرینی ضبطله
اسماعیل و غلوص و ابرائیل حذالرینه طوغری طونه
بوینه یایلد قلرندن شو حالدیه متوسطلرک تکلیف ایلد-
کلری مصالحه نك قبولنه مجبوریت کوریلهرک بلغراد
ونیشده مذاکره اولنان شرائط مصالحه بر معاهده
قطعیه صورتنده امضادخی ایدلدی.
اشبو ایکی معاهده دن بلغرادده امضا اولنان معا-

هذه اوستریا ایله اولان مصالحه نامه اولوب اوستریا -
 لولر بلغراد قلعه سنی بزه رد ایتمک ایچون نه قدر
 اصرار ایلدیلر ایسه ده برطریق امکافی بوله مدیلر . نه
 یت بلغرادک بزه رد اولنسی صلحک شرط اساسیسی
 اولغله ارتق عنادک فائده سی اولمدیغنی اکلادقلری
 زمان دخی هیچ اولمز ایسه قلعه نک هدی صورتیله
 ردینی اولسون باب عالییه قبول ایتدیرمکه یک چوق
 چالشدقلری حالده بوده ممکن اوله هدی . نهایت صکره
 دن اوستریالیلرک یامش اولدقلری بعض استحکامات
 منضمه هدم ایدلک شرطیله او قلعه معظمه یه عثمانلی
 سنجاغی چکلدی . اوستریالیلر صربستان وافلاق و بو -
 سنه بی دخی قبول لائق غیر تنده ایکن بورالرده اسکیدن
 مالک اولدقلری یرلری دخی غائب ایدرک افلاق حدودی
 اورصووه حذا سندن و صربستان و بوسنه حدودلرینی
 دخی صاووه و او نیه نهرلری بویجه تحدید ایدادی . نیشده
 مدا کره و امضا ایدیلان معاهده ایسه روسیه مصالحه
 نامه سی اولوب نیجه زماندنبری منازع فیه اولان ازاق
 قلعه سنک هدی اساس صلح اتخاذیله قبارطایلرک مختار -
 یت واستقلال اداره لرینی روسلر طایفه مجبور ایدلده .

کدن ماعدا قریم و اوزی طرفلرندن دخی الاری چکدیر-
 لدی وازاق وقره دکزده اصلا کی بولندیره مامسی
 و بود کز لر اوزرنده سفینه انشا اید. جک ترسانه دخی
 یاپدیره مامسی شرائطی هب معاهده نامه یه ادخال
 اولندی. بناء علیه شوایکی معاهده صلحیه انجق
 سلطنت سنیة عثمانیه فک اوچ سنه دنبری قازانمقده او -
 لدیغی شان غالبیتہ تمامیلہ موافق ایدی .

۱۱۵۳ سنه میلادی سنه اسوج و سچلیا و فرانسه
 دولتریله تجارت معاهده لری عقد اولنوب ینه بوسنه
 ظهور ایدن قحط و غلا اوزرنه اها لیجه بعض مرتبه
 فتنه و عصیان علامت لری کوسترلمش ایدیسده در حال
 التزام اولنان تدابیر شدیده ثمره سیله قحطک دخی
 تأثیری بر طرف اید لدیکندن اسایش عمومی محافظه
 اولنه یلشدیر ۱۱۵۴ سنه سنه نادر شاه مذهب جعفری پی
 موجود اولان درت مذهبک بشنجیسی اولق اوزره
 دولت علیه قبول ایتدیر مک ایچون استانبوله سفیر لر
 کوندرمش ایدسه ده بوبله بر حال در سعادتجه قبوله قرین
 مواددن کور یله میهرک سفیر لری اعاده قلمشدر ۱۱۵۵
 سنه سی سور همایونلرایله امرار اولنه رق بوسنه دخی

نادر شاه اولکی تکلیف لری نی تجدیداً استانبولده سفرا کوندر-
 مش و مذهب جعفر ینک بشنجی مذهب اوله رق قبول
 و تصدیقندن ماعدا عراق ایله کردستان طرفلر ینک ده
 ممالک ایرانیه ضمیمی التماسده بولنش ایسه ده بومثللو
 مطالبک عادتاً حرب و سائل اولدیغنه در سعادتجه شبهه
 قالمیه رق ۱۱۵۶ سنه سنه دیار بکرده براردو ترتیب
 اولنه رق بعضی طاغستان و کر جستان امراسی دخی نادر
 شاه علیه نه تشویق ایلدیکه باشلانمش ایدی . بوضره ده
 نادر شاه بصره نی بغدادی آشهرق و هله موصله قدر
 کلوب محاصره اسپانه تشبث ایلدیه ده نزد سلطنت
 سنیه ده مسافر بولن ان شهزاده صفی میرزانک ذاتاً ایران
 صندالی حکومتنده حق مشروعی اولدیغندن شهزاده *
 مشار الیه بر مقدار عسکر ایله کوندر لده کده ایرانلری
 تورودی دیمک اولان نادره نسبتله مشار الیهی حکومته
 احق کورمکه باشلاملری اوزر ینه نادر شاه یکی ممالک
 فتح ایدیم دیر ایکن اصل ایرانی دخی الدن چیقارمش
 اولماق ایچون علی جناح الاستعجال ایرانه عودت
 ایلش و حتی حین عودتنده دیار بکر اردوی همایونی
 دخی تعقیبه شتاب ایلیرک عجم اردوسی فرات نهرینی

مرور ایدر ایکن وقوع عبـولان هجومده کای پریشانلغه
دوچار اولمشدر .

۱۱۵۷ سنه سنده نادر شاه تکرار حرکات خصما .
نه یه ابتدار ایدرک چلدیر طرفلرینه تعرض ایدن بر
اردوسی چلدیر والیسنک قیو خلقندن عبارت بر قوه
عسکریه مزئی بوزدهش ایسه ده ایکیوز بیک نفردن
مرکب براردو ایله قارص قلعه سنی تمام بش آی محما .
صره و تضییق ایلدیکی حالدده هیچ بر شیئه موفق اوله .
مدقندن بشقه ایچرودن ترتیب اولنان بر خروج هجومه
دخی مقاومت کو ستره میهرک منهنزماً پریشان اولمشدر .
شو حالدده نادره کوزجه برتریه ویرمک ایچون
۱۱۵۸ سنه سنده بعض هنس حکمدارلری ایران
علینه تشویق ایدیلوب قارص طرفندن ده قریم و کر .
جستان عساکری اردوی همایونه بالانضیمام خوی
وما کو طرفلرینه طوغری ایلرولمشدر ایدی . اصل
باشلیجه محاربیه روان پیشگاهنده باشلانهرق تمام درت
کون درت کیجه دوام ایلدکن صکره نادر شاه کلیاً
منهنز اولوق درجه سنه کلدیکی حالدده سرعسکر بولنان
یکن محمد پاشا شهید دوشمکله غالب اردومز مغلوب

اولش و نادر شاه از ضرومه قدر ممالکی چکنه یه رڭ
کلشدر .

شو حالده ایرانیه لرڭ انف غرورلری قباره رق
بصره و بغداد و موصل و وان نقطه لرندن امرار
اولنه جق بر خط مو هو مک شرق طرفده کی ممالکک
ایرانه و غرب طرفده اولان یرلرڭ دخی دولت علیه یه
ترک ایدلمسی شرائطی ایله بر صلح عقدینی غالبانه
و مظفرانه بر طور ایله تسکیف ایلدیسده ده دولت علیه
اردولری اوزمانه قدر دائما غلبه ایتش و روان
مغلو بیته ایسه مجرد یکن محمد پاشانک شهادتی مناسبه یه
قضا نو عندن بر شی اولسی لازم کلش اولدیغنه دن اکر
مخار به ده دوام اولنه جق اولورسه ده دولت علیه
ایچون غلبه امیدلری هنوز باقی بولنش ایدی .
بو حالده ایرانک درمیان ایلش اولدیغی شرائط بحق
رد ایدیلرڭ دیار بکرده ینه بر عظیم اردو تدار کینه
شتاب ایدیلنجه نادر شاه اولکی غرورینه نادم اوله رق
۱۱۵۹ سنه سنده تکرار سفرا اعزامیله اولکی شرا -
ئطدن واز چکدکن ماعدا اوزمانه قدر وقوعه کلان
مخاصمه نکه کا ئن لم یکن حکمنده طو تلمسی و استاتوقو

اساسی اوزرینه بر مصالحه عقد ایدلمسی جهتنی تکلیف
ایلمش ایدی . بو تکلیفی قبوله شایان کور یلهرک
۱۱۶۰ سنه سنده معاهده صلحیه امضا ایدلمشدر .

۱۱۶۱ سنه سنده نادرشاه بر سوء قصدجینک
مغدور خنجر ظمی اولدوقده تبریز و کرمانشاه و همدان
اهالیسی ینه دولت علیه نك شرف تابعیتنی استدما
ایتملریله در سعادتجه بو کیفیت مذاکره اولنور ایکن
اوزمانلر المانیاجه ایمپراطور یچه ماری تره زك حقوق
ارثیه سی طائما مقدن طولایی ظهوره کلان وتفصیل
وایضاحی اشبو کائناتمک المانیا و اوستریایه مخصوص
جلد لرنده بیان اولنان محاربه ارثیه میدانه چیقوب
برقاج بیوک دولت بو محاربه ایله مشغول اولدولرندن
دول محاربه نك هر بری دولت علیه نك اتفاقنه نائل
اولمق ایچون اجرای تشویقاته باشلامش وباخصصوص
اوستریایه بر حرب اعلانی ایچون باب عالی عادتاً
جبر ایدلمکه قدر وارلمش ایسه ده سلطان محمود
اول حضرتلری عهدشکنلک سیننه دولتی دوچار
ایتمامک ایچون اوستریایه اعلان حرب ایتمکدن ماعدا
ایرانک دخی حقوق عهدیه سنه تعرض ایتمامک ایچون

تبریز و همدان و کرمانشاه اهالیسنگ استعمارینی
رد ایلشدر .

ایندی ۱۱۶۲ سنه سی صلح واسایش و بعض
افشآت خیریه و اصلاحات ملکیه ایله کذران ایدرک
۱۱۶۳ سنه سنده مصر و بغداد طرفلرنده اوفاق
تفک بعض عصیانلر وقوعه کلش ایسه ده بونلر دخی
اسایشی بوزه حق قدر شیلر اولیوب بالسهوله منع
ایدلشدر . سنه مذ کورده ده اق دکرده ظهور ایدن
بعض خرسز کیلری اکرچه بر طاقم جزایر و سواحله
ایچه صارقندیلق ایده بیلشدر ایسه ده دونما سوقیله
انلر دخی پریشان ایدلدیلر .

۱۱۶۴ سنه سنده نجد و بر العربک حوالی سائر سنجه
وهابی مذهبندن طولایی مؤخرأ اهمیتتی ارتان شورشلرک
مقدماتی ظهوره کلش ایدی . اوزمانلر وهابیلرک هنوز
هیچ برکونه اهمیتلری اولمیدیغی جهتله بو شورشلر منا
زعات عادیه مذهبیهدن عد اولنه رق بر سهله تأدیب
ایله برطرف ایدلدکلری کبی ینه بوارهلق لوند طائفه
سیله بعض کردعشایرینک عصیانلری دخی هب مسائل
عادیهدن اوللق اوزره محملاری قوای عسکریه سیله بر
طرف ایدلشدر .

۱۱۶۵ سنه سنده لهستان ايله فرانسه دولتری
 سلطنت سنیه یی روسیه علیه نه حربه تشویق ایتکه
 باشلادیلر . فرانسه تارینخنده کیفیت ایضاح ایدلمش
 اولدیغی اوزره اوزمانلر لهستان ایچون فرانسه دن
 بعض پرنس لر حکمدار انتخاب اولندقلری حالدیه بونلرک
 تأیید حکومتلرینه بعد مسافه دن وموقعجه عدم مناسبت
 سبتدن طولای فرانسه مقتدر اوله مامقده و روسیه
 ایسه لهستانی یوتمق املارینی میدان قوعمقده ایدی .
 فقط باب عالی روسیه ايله موجود اولان معاهدهء صلحیه
 یه رعایه فرانسه نك بوتشویقاتنی قبول ایتماشدر .
 ۱۱۶۶ سنه سنده ایسه روم ایلیجه روسیجق وانا طو-
 لیجه قره مان طرفلرنده برطساق دره بککری عادتا وادیء
 استقلاله صاپشلا ایدی . بونلر اوزرینه بعض پاشا لر
 قیو قوللریله صالدریله رق جمله سی تشکیل وتادیب او-
 لنمشلر واق دکرده یکیدن ظهور ایدن قورصانلر دخی
 پریشان قلمشلردر ۱۱۶۷ سنه سنده استانبولجه حر-
 یقلر کثرت پیدا ایدلرک اهالی کندی دقتسزلککری
 ثمره سی اولان بوبلیه دن طولای دخی حکومت سنیه یی
 مسئول طوتوب عادتا بر عصیان میدانه چیقمش ایسه ده

بیچاره دارالسعداءه اغاسی بشیر اغانک خون شهادتی
حاصـیلرک تسکین حدتـه کفایت ایدرک بوبلیه دخی
اول صورتله باصدیر لمشدر

ینه بوسنه روملر کندی پطریققلرندن خشنود
اولیه رق پطریق خانیه هجوم ایله فنارده عظیم برعر-
بده چیقارمش اولدقلرندن وحالبوکه بوفسادک اصل
موردی دشمن انتریقـه لری اوله رق پطریق افندیـنک
دولت علیه صـداقتی نزد حکومت سـنیه ده مسلم
بولندیغندن روملرک اصراری موجبجه پطریق افندی
عزل ایدلرکدن ماعدا باله کس پطریق خانیه عسکر
کوندریلوب ارباب هجومک شرلرندن محافظه ایدلش
وبوصـره ده روم آزعنلرینه کوزل برتـریه ویرلمشدر *

۱۱۶۸ سنه سنده برار زماندنبری نامزاج بولنان

سلطان محمود اول حضرتلری ینه غیرتی الدن برافیه رق
برجعه کونی سـلامغه چیقـمش اولدقلری حـالده آت
اوزرنده ایکن وفاتلری وقوعه کلـکـله هر کس سیاه
پوش ماتم اولمشدر در ۰ زیرا غایت عادل وسوزلرنده ثابت
مرحمت و مروتلری هر شیئه غالب بریادشاه فاروق جاه
اوله رق ابتدای جلوس هما یونلری دولت علیه ایچون

عادتاً بر پریشانلق زمانی ایکن علو همت پادشاهانه لری
 سایه سنده او اخر حکومتلری جنت کبی آسایش زمانی
 اولمش ایدی . بو عصر دولت علیه نك حقیقه جنکدن .
 ده صلحدن ده تمامی تمانه عاقلانه اوله رق استفاده ایتمش
 اولدیغی بر عصر در که بوده مجرد سلطان محمود اول
 حضرت تلی نك امور حکومتی بجه دن زیاده وقوفلری ثمره .
 سندن عبارتدر .

سلطان مصطفی ثانی حضرت تلی نك شهزاده لری
 بولنان سلطان عثمان ثالث حضرت تلی الی الی یاشنده
 بر شهزاده اولدقلری حالدی سلطان محمود اول حضرت تلی .
 نك وفات ایلدکلری جمعه کونی مقام خلافت و ساطنته
 کلشدر . عمر لری نك بویله الک بیوک بر قسمی شهزاده لک
 حالنده امرار ایلدکلری صروده هب تصفیة ذات
 ایده جک علوم و عبادات ایله اشتغال یورمش اولد .
 قلرندن ناس بیننده صلاح حال و مرجت ایله مشهور
 اولدقلری کبی پادشاه اولدقلری زمان دخی غایت صلح
 پرور بر حکمدار اولدقلری کورلمشدر . بناء علیه اوچ
 سنه قدر تمتد اولان مدت سلطنتلری ایچنده دولت علیه
 غوائل حریبه دن ازاده اوله رق وقت یکیروب اصلاحات

وانشا آت خیریهدن برخیلی شیلرده موقیقلری کو -
رلمشدر .

از جمله ایلک سنه جلوسده سرای همایونده سازنده
و خواننده طرزنده نه قدر ارکک وقادین وار ایسه
جمله سی چیقاریلوب سرای خلقی عبادت و طاعته
اجبار ایلدیش ایدی . واقعا ذات شاهانه ک غایت زاهد
و متقی اولسنه امتثالاً بندکانک دخی ساز و سوزه
بدل ازان شریف صدرالرینی استماع ایلری موافق حال
کورلمشیدی . ینه بوسنه قیودان جعفر بک برکی ایله
اوچ قورصان کیسینی باترمق مثللو بر اثر شجاعت
کوستردی که شو حال سفن همایونک اهمیتنی دکر
خرسزلری میانده بر قاتدها آرتدیرمش ایدی . ایکی
یوک حریق و قوعیله استانبولک همان نصفندن
زیاده سنک محترق اولدی وروم پطر یقخاننه سنی بیزار
ایتمکدن خالی قالیبان روملرک نفی بوسنه نک اعظم
وقوعا تندن اولمشدر .

۱۱۶۹ سنه سنده اهلایک شکایتنه دوچار اولان
صدر اعظم علی پاشا مقتول اوله رق مصرده تحکملرینی
آز دیران کوله منلر وار ضرور و بایزید طرفلرنده استقلال

وادیلرینه صایان کردلر و بلغرادده زور بالق ایدن
یکچیریلر و جزایرده قور صانلغی آرتدیرهرق ایتالیا
سفائننی ازعاج ایلیمان طایلر طرف طرف تأدیب اولنوب
بوسنه پروسیا دولتی ایله تجاوزی و تحافظی براتفاقنامه
امضا اولندی و نور عثمانیه جامع شریفی اتمام ایدلدی که
سلطان محمود اول حضرتلری باشلا تمش لرایدی .

۱۱۷۰ ده از میر طرفلرنده قره عثمان اوغلاری کرک
تروتلری کرک تحکملری ایله باشلرینه بر طاقم حشرات
طوپلایه رق عصیان ایتمکله اوزر لرینه عسکر
سوق اولمش و اصل قره عثمان اوغلی نامنی الانر یسلری
اعدام قلمشدر . ۱۱۷۱ ده دخی سلطان عثمان ثالث
حضرتلری وفات ایدرک بتون اهالی محبوب قلوبی
اولان بر پادشاه ملک خصلتسلرینی غائب ایلدکلرندن
طولایی محزون و مکدر اولمشدر .

سلطان عثمان ثالث حضرتلرینه خلفا لان سلطان
مصطفی ثالث حضرتلری سلطان اجد ثالث حضر-
تلرینک شهزاده لری اوله رق قرق بر یاشلرنده ایکن
مقام خلافت و سلطنته کلشدر . ذات عالیلری غایت
صبور و وقور بر پادشاه اولوب زمان سلطنتلرنده

دولت علیه عثمانیه پک بیوک وقواته مصادف اولمغه
اکر بادشاهک علوهمتنه پیرو اوله جق وکلاو عسکر
بولتسه ایدی سلاطین عثمانیه میانده اک پارلاقردن
برسی دخی سلطان مصطفی ثالث حضرتلری اولور
ایدی .

ایک سنه جلوسده حالا قایتولا سیونلر دینلان
امتیازات اجنبیه بر عهد و یاخود قانون مخصوص
صورتنده تعیین ایدلدی که اوزمانه قدر پک ده معین
اولیان امتیازات دولتهک حال عجزنده آرتار قوتلی
زمانده اکسیلور و هر حالده بونلردن اصل مستفید
اوللری لازم کلان تجار صنفی همان مستفید اوله میهرق
هر استفاده یالکز قونسوسلرک النده قالور ایدی .
امتیازات مذ کوره معین اولدقدن صکره ایسه بتون
تجار اجنبیه ممالک شاهانه کندی مملکتلرندن زیاده
مظیر امنیت و حمایت اولهرق بومناسبتله تجارت
یوللری وسعت دخی بولشدر .

ایک سنه جلوسده کور یلان اصلحاتک برسی
دخی بر زماندنبری خلقک زیاده جه انهماکه باشلا-
دقلری ذوق و صفا و سفاهت و اسراف منع قضیه می

اولوب کو چکر بیو ککره باقرق سفاهت ایدہ حکم دیدہ
خانمانلرینی بر باد ایتکدن قوز تارلدی .

پروسیا ایله انکرتزه دولتلری صلحپورولک سلطنت
سنه عثمانیه نك شانندن اولدیغی و یالکز سلطان عثمان
ثالث حضرتلرینك جنکدن اوشندیکی ایچون محاربه
به یه میل ایتدیکی اعتقادیه یکی پادشاهی حاضر حال
ضعفده بوانان اوستریا اوزرینه صالدیر هرق کنسیر
آمال سیاسیه لرینی یوروتک تدبیرینی قوردیلر ایسه ده
معاهدات صلحیه یه سلطان مصطفی ثالث حضرتلری
دخی رعایتده قصور ایتدکلرندن قشقرتقلری محاربه یی
حصوله کتوره مدیلر .

اناطولیدن برطانیسم ایش قاققنلرینك استانبوله
طولهرقی چوبچیلک وایوازلق کبی خدمتله یناشملری
برزماندنبیری خدم معروفی تجا اوزایلش اولدیغندن
و بونلر استانبوله چوغالمری ایسه استانبول معیشتی
بوزدیغی کبی وطنلرنده زراعتیه ایدہ چکرلی خدماتی
دخی منع ایلدیکندن اومثالو سرسریرلر ۱۱۷۲ سنه -
سندہ مملکتلرینه اعاده اولمشلر ایدی . کرک خزینہ
مالیه و کرک سرای همایونجه هرجهتله تصرفاته

رعایت قلندر قوچورته حصوله کلان فضله وار -
 دالله بر طاقم انشاءت خیریه وجوده کتورش و ترقی
 صنایع و تجارت دخی خدمت اولم شد .

۱۱۷۳ ده حجاز طرفلرنجه شرفانک و ۱۱۷۴ ده
 مصر طرفلرنجه کوله منلرک ایقاع ایلدکاری شور شلر
 طرف ایدیهلرک چلدیر والیسی دخی استانبولی طا -
 تفاق داعیه لرینه قیام ایتکلر قفاسی کسیدلری
 و ۱۱۷۵ ده مسکرات استعمالی منع اولنهرق بعض
 احیا طرفندن بیان اولنسان منافعنه مبنی خلق انقیه
 استعمالنه اجبار اولندی و ۱۱۷۶ سنه سنده روسیا
 ایل اولان اتقاقز تجدید قلندر قوچور باخسوس اوروپا -
 جه توسیع حدودی سنه دن سنه ده موجب اندیشه
 اولان روسیه دواتی علیهنه تحویل اتقاق ایدلری .

۱۱۷۷ سنه سنده بغدادده بعضی خدمه و عسکر
 افرادی طغیان ایتکلر تأدیب اولندیغی کبی آچیق
 باش دنیلان بر قسم کرجی طائفه سی بر زماندیری رو -
 سیه نیک اغفالاننه قابلقده اولسی مناسبتیه عادت آغلا -
 شش اولدقلرندن اوزر لرینه عسکر کوندیریلوب تر -
 یه لری و یرلری .

ایشته بورایه قدر هر سنده نك الك باشلیجه وقوعاتی
 اوله رق اخطار ای دیلان وقعده لر دولت علیه عثمانیه نك
 هپ کندی امور داخلیه سیله بر فکر مصلحانه ایله
 اشتغالاتنی کوستر مکنده اولوب ۱۱۷۸ سنده سنده روسیه
 سیه امپراطور یچه سی قاترینا لهستانی مقاسمه ایچون
 پروسیا ایله اتفاقه قالدشلیجه شو حال بعضی مرتبه خط
 برات دیپلوماتیکه ایله دولت علیه یی یوردی ایسه ده
 ایشی محاربه یه قدر واردیر ماش ایدی . ویرا
 لهستان دولت علیه نك بر نوع حایه سی اتنده اولوب
 پروسیا دخی ذاتاً بزمله متفق ایکن لهستانی تقسیم
 طمعی اوزرینه باب عالی دن بوز چو برنجه بوسال
 دولت علیه یی ایکی صورتله متأثر ایش ایدی .

۱۱۷۹ سنده سنده ینه روسیه نك تشویقیله کر-
 جستانده بیوجک بر اختلال ظهوره کله رک خلیجه
 حرکات عسکر یه یه لزوم کوستردی ایسه ده نتیجه امر
 حاصیرک کاملاً تنکیلنه منجر اولدی . ۱۱۸۰ سنده
 سنده دخی مصرده کوله من بکری اره سنده ظهور
 ایدن منازعه عادتاً بر محاربه داخلیه صورتنی الیه

یغندن بونلرک اصلاح بینلری یکچیری یه حواله اولنده.
 زق حجاز طرفرنده بعض عربانک منع مکیدتلریله
 استانبولده شدتلی بر حرکت ارض وقوعه کله رک
 برخیلی ابنیه نیک انهدامی بوسنه نک جله وقوعاتندن
 عد اولندی.

۱۱۸۱ سنه سننده قارص اهاالیسی ایقلانه رق
 والیرینی اعدام وانا طولیده دخی تنکه ولایتی اهاالیسی
 اموال میریه بی بحصیلله مأمور اولنلرک شدتندن طو-
 لایی عصیان ایلدکاری کی قبریس وردوس اطه لریته
 دخی دکر خسزلری صارقندیلق ایتش و مصرده
 علی بک نام کوله من یکی بعض شیخلر ایله برلشهرک
 وادی استقلاله صایمش اولدیغندن بوسنه ظرفنده
 دخی شوفناقلرک اصلاحلریله اوغراشلدی.

۱۱۸۲ سنه سننده کر جستان وقارص طرفرنده
 ارتق روسیه نک درجه معروفه سنی ده اشان انتر یقه -
 لردن متولد یکی بر عصیانی منع ایچون دونما کوندر -
 لدیکی کی روسلر بر زماند نیری قره طاغایلری ده تشو -
 یقندن خالی قالدقلری جه تله بوسنه انلرک ده ایلك
 دفعه اولق اوزره وقوعه کتوردکاری بر عصیانی

بوسیه و هر سگ عسا کری منع ایلش و اق دکرده
چو خالده قجه چو غالار دکر خرسزلی اوزرینه دخی
دونما سوق اولمشدر.

ایندی کرجه سنان و قارص طرفلرنده روسیه نك
بونجه امکار صرفیه وجوده کتوردیکی عصیانلرک
دائماً منع ایلمسی و نهایت قره طاغ عصیانندن ایمپرا -
طور یجه قاترینا بیوجک بر نتیجه بکاه دیکی حالدیه او
نتیجه نك دخی کور یله مامسی ارتق روسیه نك افکار
خصوصیتی میدانه چیقارمغه سبب اولمغه قاترینا
کویا دولت علیه بی حایه و مظاهرتدن منع ایچون
برمخاره دیپلوماتیکه آچهرق فقط اصل مقصد
جنک اولمغه بومخاره دیپلوماتیکه او یله پکده او -
زون اوزادییه اوزاتلمسزین ۱۱۸۳ سنه سنده
اعلان حرب قضیه سی دخی وقوعه کلدی .

مخاربه نك مبادی سنده قریم تاتارلر نك روسیه
ایچرولر یسه طوغری آقین ایتملی و خوتن قلعه سنده
تعرض ایدن روسیه عسکرینک هیچ برشیده موفق
اوله مامسندن فضله قلعه درونندن ترتیب اولنان بر خروج
هجومنه مقاومت ایده میهرک منهزم و پریشان اولسی

واصل اردوی همایونک دخی تا لهستانه طوغری مظفرآ
ایلروله سیی مثللو آثار موفقیت وغالبیت بزم طرفه
کوراش ایسه ده مهمات حریه سوقنه مأمور اولنلرک
مراسلات عسکریه بی بحق ایفا ایدمه ماملری سیئه سیله
برارهلق دشمن مغلوب کیرویه برهجوم رجعی ترتیب
ایدنجه ردوی همایونی مهماتسز بوله رق معلو بیت
عظیمه بزم طرفه قالمشدر.

بو معلو بیت اوزرینه اردوی همایونک طونه
نهرینی مرور ایدرک برو طرفه واصل اوله بیلمسی عادتا
برامر مشکل صورتنی المش ایدی. ارقه دن تعقیب
ایلمان روسیه اردوسی بتون افلاق وبغدانی استیلا
ایلدی. ایرتسی ۱۱۸۴ سنه سننده دخی روسیه اق
دکزه سبته بوغازی طریقیه بر بیوک دونما سوق ایدرک
موره روملرینی اغفال ایتمکله اکرچه برارهلق رومله
شدتلی برسبله تأدیب اورلش ایدسه ده روسیه دونما.
سی ساقز اطه سی قارشو سننده واقع چشمه ایماننده
دونمای همایونی احراق ایلدی که بو فاجعه بزم ایچون
اک بیوک مغلو بیتلردن عداولندی.

فاجعه مذکوریه دائر ویریلان ایضاحات

تار یخیده دن اکلاشلدیغنه کوره روسیه دونماسی
 اون بش قطعه قیاق والقی قطعه فرقتین و یکریمی قدرده
 سفاین صغیردن مرتب اوله رق قاترینانک الکزیده
 بندکانندن اورلوفک قومانداسی تحتنده ایدی . بزم
 دونما دخی بوقوته بیاغی مساوی عد اولنه یله جک
 برحالده بولوب غازی حسن بکک قومانداسی التنده
 بولنیورایدی . ایکی دونما اولاساقز ایله چشمه ارمندده
 کائن کنیشجه برقالده محار به یه طوتشدیلر . غازی
 حسن بکک بالذات سوار اولدیغی قیودانه همایون ایله
 اورلوفک سوار اولدیغی قوماندان کیسی اوزرینه
 ایدیلان هجوده کیملر بورده بورده یه و غنکاورلر
 دخی بوغاز بوغازه کله رک غایت شدتلی برمحار به
 ایلدکلی کی سائر کیملر دخی بعض کوچک اطه لری
 سیرالهرق پک کوزل محار به ایتکده ایدیلر .

ایکی قوماندان کیسی نک محار به لری او قدر متمدد
 اولدی او قدر شدت بولدی که نهایت ایکیمی دخی
 آتش الهرق ججخانه لری پاطلامغله ایکیمی ده برهوا
 اولدیلر . لیکن قوماندانلر جانلرینی قورتاره یلدیلر .
 کیجه اولدوقده دونمای همایون ایچون کیولک سلامت

آچیققره چکلمک ایکن ایشته بوراده خطا ایدیلرک
چشمه لیمانه کیرمک صورتی ترجیح قلنش ایدی .
حالبوکه کیلرک صو کسملرینه نسبتله چشمه لیمانی صیغ
اولدیغندن بر طاقم کیلر قومه اوتوردقلری کبی بر چوق
دخی حین حاجتده آتش اجر اسنه ومانورا چوریرمکه
مقتدر اوله میه جق بر صورتله بالیق استینی کبی یکدیگر
ینه صقشمشتر ایدی .

بو حالده دخی ایش روسلره قالمش اولسه ایدی
انلرک مهارت بحر یه لری ینه برایش کوره بیلکه کافی
دکل ایدی . لیکن دونما ایچنده بر چوق انکیر قپودا -
نلری بولندیغی کبی اق دکرده نه قدر روم قورصانلری
وارایسه انلر دخی روسیه دونماسنه التحاق ایلش اولد -
قلرندن بونلر دونمای همایونک پک فنا بر موقعه پک
تهلمکه لی بر حاله دوچار اولمش بولندیغی ا کسلایه رق
اک ماهر وجسر قپودا نلردن اوچ نفری فدا کارلخی ده
کوزه الیدیرمق آتش قایقلری رتیب وکال مهارتله
بونلری عثمانلی دونماسی اوزرینه سوق و تسریب
ایلدیلر .

بر ساعت صکره بتون عثمانلی کیلری آتش ایچنده

قالمشلايدى . عسا كر بجر يه ايسه حر يقرى اطفايه
چالسه جق يرده جانلر ينى قور تارمق قيدينه دوشد .
كلرندن اصل فدا كار بولسا ن امرا وضا بطان
وافراد ايسه نارجهان سوز ايچنده ياند قلرندن ايشته
او قوجه دوئما بو صورت فاجعه ايله محو اولوب
كيتمشدر .

بحر آشومغلو بيت هر كسى داغدار تأسف ايلد .
يكي حالده برأ بغدادن ايچنه سوق اولنان اردوى همايو .
نك دخی مغلو بيتي خبري كلنجه ارتق يتون ارباب حيت
مايوس اولديلر .

بونك اوزر ينه روسيه نك اق دكر دوئماسي كليولى
بوغاز ينه قدر كلهرك عادت امر مرهيه كلك واستانبولى
طوپه طوتمق جرأتلرنده بولنديغى استشمام ايدلكه
غازى حسن ياشا كليولى بوغاز ينى تحكيمه و دشمنك
هجومنه قارشو اسباب مدافعه يي اكمله مأمور ايدلدى .
غازى مشار اليه فى الواقع ارباب غيرتدن برآمد
اولوب سر يعاً بوغازى مرور قابل اوله ميه جق صور .
تده تحكيم ايلديكى كبي شورادن بورادن تدارك ايلد .
يكي كيلرله برفرقه دوئما پيدا ايليهرك منتقمانه برحس

فداکاری ایله بوغازدن چیقوب هجوم وروسیه دونما .
سنی رجیمه مجبور ایلشدیر .

انجیق شمال جهتمدن سوق اولنان اردو شو
مغلوبیتنی زور بالق ایله ستره چالیشه رق فوج فوج
اوتیه برویه طاغیلوب عاجز کو ییلیری یغمايه
قویلق درجه سنده الحقه قلمری ارتکاب ایلدیکنه
و بر یاندن دخی اوستر یادولتی اولاسلطننت منیه یه اتفاق .
وصداقت و عهد ایتش ایکن مؤخرأ سوزندن جایمش
اولدیغنه مبنی ارتق روسیه اردوسنک اوکنده بر قوه
مانعه قالماش و ۱۱۸۶ سنه سنده دشمن طونه نهرینی
دخی برو طرفه کچرک ماچین و طولچی و ایساچه طر .
فلرینه مستولی اولدیغی کبی اوتیه طرفدن قریمی دخی
پامال خیول ایلش ایدی .

بناء علی ذلک ۱۱۸۷ تار یخنده دولت علیه بالمجبوریه
طالب صلح اوله رق ایکی طرف سفراسی فوقشان
قریه سنده شرائط مصالحه یی مذا کره یه باشلادیلر .
روسیه دولتی قریم شبه جزیره سنی عادتاً بتون بتون کند .
یسنه تملیک ادعا سنده بولتمقدن ماعدا مملکتینی دخی
استملاک ایلک درجه سنده تکالیف بارده ده بولنمغله

بو تکلیف سلطان مصطفی ثالث حضرتلری نزدنده
قبول اولنه میهرقینه حرکات خصمانه ده دوامه قرار
ویرلدی .

روس لر جنوب جهتمدن دخی سلطنت سنییه یی
مشغول ایتک ایچون مصرده کوله من بکی اولان علی
بکه عسکرله بالمظاہره مرقوم دخی سلطنت سنییه
علیهنه طغیان ایلش ایدی . انجق مصره سوق ایدیلان
عسکر مرقومک تر بیه سنی ویرمکه کفایت ایلدیک
کی تجدد ایدن حرکات خصمانه نک ابدالرنده روسیه
علیهنه غالبیت دخی همان کاملاً بزم طرفده قلمش ایدی .
از جمله طولی سنجاغی ایچنه کیرمش اولان اون بش
بیک نظامیه افرادنن مرتب براردوسی پراکننده
و پریشان اولدیغی کی سلسیره قلعه سنی محاصره یه
کیدن الی بیک نفردن مرکب دیگر براردوسی دخی
دلی اورمان چیتاقلرینک صوپه لری طرپانلری یتاغلری
اوکنده رز یلانه بر مغلو بیتله فراره مجبور اولمش
وطونیه یی اوتیه طرفه یکر ایکن عادتاً یاری یاری یه تلفات
ویرمشر .

لیکن چه فائده که بو غلبه لر هب نفیر عام صورتیه

حیتکاران اهل قرانک ثمره همتی اوله رق و قوعه کلوب
یکچیری طایلیری ایسه ارتق نظام و انتظامی بالکلیه
ضایع ایش واسکی شجاعتلری هیچ قالمیوب موسقوی
نرده کوررلر ایسه قلیجه ال صونمق سزین فراردرجه -
سنده جبانن و دناشله تمام قچان دشمنی تعقیب ایده جک
زمانده ایکن او خدمت عظیمه بی کوررمیوب نفیر عام ایسه
وطنلرندن تباعد ایده مامش اولمق له قانارجه و قره صو
محاربه لرینی موسقو فلر بالکلیه بادهوا قزانمش و اندن
صکره بازار جق و سلسلتره و خر سوده طرفلرینه بالسهوله
مالک اولدق دین ماعدا تا وارنه و توزلیجه طرفلرینه
طوغری یوریمکه دخی موفق اولمش ایدیلر *

ایشته ۱۱۸۷ سنه هجریه سنده احوال حربیه
بو یله حیتمندان ارکان سلطنتی قان اغلاته جق بر صو -
رتده ایکن سلطان مصطفی ثالث حضیرت لرینک دخی
وفاتی و قوعیله ذهنلر بر قانده سا پریشان اولمشلر در *

پادشاه مشار الیه غایت شجیع و غیور اولمق له برابر
صلحه میال بر شهر یار مال العال ایدیه ده بو صوک
مغلو بیتلر اراق جنسکدن فتور کتورمش اولان یکچیر -
ینک قالدیرم طایلیقلری سیئه سیله و قوعه کله رک بیچاره

سلطان مصطفی ثالثک یاسلہ وفاتنی موجب اولشدر در .
 سلطان مصطفی ثالث حضرت تکرینک حین وفاتلر .
 نده کی شو اهمیت احوال سلطان عبدالحمید اول حضر .
 تکرینک حین جلوس لرنده برده یکچیرینک جلوس
 زمانلرینه مخصوص اولان اطوار معلومه لریله بر قاندها
 آرمش اوله حنفی نظر دقتنه طو تلبیدر . انجق سلطان
 عبدالحمید اول حضرت تکرینی ذات حلم و حکمتله متصف
 اولدق قری کبی الای یاشنه وارمش بر پیرروشن ضمیر
 اولدق لرندن جلوس همایون قاریشفق قریینی بالنسبه
 غایت اهون یکچیرد کدن ماعدا روسیه نک بتون روم ایلنی
 تهدیدینه مقابل عروق غیرت و حیتری حرکت ایلش
 اولان کارشناسانی در حال نزد شاهانه لرینه جلب
 ایلیه رک همان تدارک ایلدکاری مکمل براردوی ۱۱۸۸
 سنه سنده علی چناب الاستعجال شمنی یه بتشدیردی و شمنی
 کبی حریجه درجه اهمیتتی الی الان بتون انظار عسکریه
 اربابی نزدنده مسلم بولسان بر موقعک ایلک اهمیت
 عسکریه سی اوزمان اکلایشله رق موقع مذکور
 اس الحركات اتخذ اولنق صور تیله طونه وادبسنی
 استیلا ایلان دشمنه اورادن مقابله یه باشلاندی .

۱- کرچه روسیه نك طونه واديسنه ييغمش اولديغي
 قوته نسبتله شمنی اردوی همایونی بك كوچك بر فرقه
 عسکر یه دن عبارت قالور ایدیسده موقعك رصانت
 و متانت طبیعیه سندن عثمانلی قوماندانلری بحق استفاده
 ایله ایلك اثر موقعتلرینی دشمنك دها بر وره طوغری
 تجاوزاتی منع صورتسده کوستر دیلو . هله اوارالق
 روسیه مالکی ایچنده ظهوره کلان براختلال من طرف الله
 بر معاونت سماویه دمنك اوله رق اردوی همایون دشمنی
 دهاز یاده تعقیبه همت کوستر بجه روسیه قوماندانی
 بولنان رومانزوف در حال صلحه طالب اولمش ایدی .
 رومانزوفك بو طلبی مجرد طونه نهرینی منتظماً
 چکوب عودت ایده بیلك امکانشی استحصال مقصدندن
 ناشی ایدی . زیرا دلی اورمانك هر آغاجی دیننده بر
 عثمانلی غضنفری مترصد فرصت اولوب روسلر
 روی رجعت کوستر کوستر مز دشمنی اکیسه لیکه
 مسارعت ایلیه جککری و بو حالده رومانزوفك عسکری
 کاملاً طونه یه دو کیله جککری درکار ایدی .
 نه فائده که یکچیری بودفعه دشمنی جبلت معلومه .
 لری آثارینی کوستره رك ضابطلرینك و یردیکي قو .

مانداره عارسزلقله عصیان اینجه بوندن رومانزوف
یوز بولوب آرتق روسیه ممالیکنده بی اختلالدن طو-
لایی لیدیغی عودت امرلرینکده خلافتیه اوله رق
کمال شدتله طوغریدن طوغری به شمنی اوزرینه یور-
یمش و بر کره شمنی بی صاروب حکمدن دوشورد کدن
صکره دهها برو طرفله طوغری صارقتش اولدیغی
قوای حربیه قارشو قویه حق بزده بر قوه احتیا-
طیه قالماشدر . بوندن ماعدار روسیه نک موره و مصر
طرفلرته کی انتر یغسلری دوام ایتکده بولمسیله
بورالرجه دخی یکیدن یکی به عصیانلر ظهوره کلد-
یکندن ارتق دولت علیه دخی کندی مشغولیت
داخلیه میله اشتغاله مجبور اولمش ایدی .

ا کر یکچیری میدان اطاعتده بر ازدها ثبات ایتش
اولسه ایدی مشهور قینارجه معاهده سنکدها بشقه
بر صورتله عتمدی میسر اولوردی . مع هذا وقت وزما-
نک کوسه تر دیکی مجبوریت ایله مقایسه ایدیه جک
اولورسه قینارجه معاهده سی پکده اوقدر موجب
تأسف عد اولمیه حق معاهداتدن کور یلور .
معاهده مذ کوره اقتضاسنجه تاتار وقوبان و بو-

جاق طوائفك استقلالی و قیل برون قلعه سیله آزاڭ
و یکی قلعه نك و کر جستان و قبار طای و چر کسستانك
روسیه یه ترکی و اوزی نهر ینك حد فاصل اعتبار اولنسی
لازم کلدی که بو حالده قریم دخی دائمی برابلو قه التمه
النش دیمك اولوب هله آزاڭ د کزی بالکلیه بر مو -
سقوف د کزی کسلش ایدی .

بونلردن ماعدار روسیه عسکر ینك تحت استیلا سنه
کیرمش اولان ممالکینه دولت علیه یه ترک اولندی .
شو قدر که بحر سفید و سیاهده روسیه کیلر ینك سر -
بستجه تجارتی تأمین اولنه رق مملکتینك دخی روسیه
حایه سیله اداره جه مختار بر امارت صور تنده تشکیلی
ضرورت حکمی الدی .

قینارجه معاهده سنك اشبو شرائط اساسیه -
سنده کی آغراق رومانزوفك اول امرده استمدای
صلح ایلدیکی زمان یکچیر ینك کوستردیکی سرکشك
اوزرینه همان عقد مصالحه ایدیه میهرک بالاخره
شمی اردوسنك دخی محصوریتی کبی بر اثر مغلو -
یتدن نشأت ایلش ایکن یکچیری گروهی وادبسنز -
لکارینی سترایچون سفیر مرخص رسمی افندی ایله سائر

بعض رجال دولتک خیانتلرینه ذاهب اوله رق استانبولجه
برکورولتی دها چیقارمده قالمشملر ایسه ده بود فعه
برونلری قیر یله رق پک کوزل تربیه لری ویرلشدر
روسیه مشغولیتی برطرف ایدلد کدن صکره مصرک
اساس استقلالنه بیاغی قوت ویرمش اولان علی بک
اوزرینه غازی حسن پاشا مأمور ایدیلرک ۱۱۸۹ سنه
سینده مرقوم علی بک هلاک اولمغله مصر غایله سی
برطرف اولدیغی مثالو ۱۱۹۰ سنه سینده بریه الشام
طرفلرنده کی شورش وفساد دخی برطرف ایدیلرک
اورالری ده تحت تأمینہ النمش ایدی . غازی حسن پاشا
اشبو اثار مو فقیتی نزد عبد الحمید خانیده زیاده سیله تقدیر
بیور یله رق ۱۱۹۱ سنه سینده مورده طرفلرینک اصلاحی
دخی مشار الیه ک عهدده سنه حواله قلمش ایدی .

روسیه نک افساد یله یالکز مورده روملری دکل
خرستیان اولان ارناودلر دخی طغیان ایلرک نیجه
خسارات فاجعه یه قولش بولند قلرندن و نیجه اهالی
مسلمه بی قتل غامله قلوب عمومیه ده برحس انتقام پیدا
ایلد کارندن غازی حسن پاشا روم وارناودلردن پک
چوقلرینی قتل عام صورتله غلیان افکاره انجق اعتدال
ویره یلیدی .

قینارجہ معاہدہ سندن صکرہ روسیہ دولتی انتریقه
 قوتنی قریم اوزر بنہ تخصیص ایلیہ رک تانار پرنسری
 میانده شقاق و نفاق پیدا سیچون هیچ بر فر صندن غفلت
 ایتمز اولدی . قریم خانی دولت کرای خان دولت علیه یه
 صادق بر آدم اولغله مشارالیه حقنדה کی توجه عامه یی
 انواع افترا لر ایله ازاله ایتدیر رک وقوعه کتوردیکی
 بر اختلال نتیجه سنده دولت کرای خانی استانبوله قاچیر .
 تمش وانک برینه نیچه زماندنبری پترسبورغده اقامتله
 روس تر بیسه سنی آلمش بولسان شاهینکرای خانی قریم
 اهلایسنه خان انتخاب ایتدیر مش ایدی .

بو خدعه لر هب ایمپراطور یجه قتر یسنانک اثراری
 اولوب قریمی روسیہ یه ر بطایمکه سبب اصلی اولان
 خدیت دخی بوشاهینکرای خاندن . واقعا قریمده کی
 ارباب حیت و غیرت روسیہ جایه سنی دولت علیه
 جایه سنده اصلاتر جمیع ایتمیه رک ۱۱۹۵ سنه سنده
 عصیان ایله ایکی سنه قدر شاهینکرایک قوه عسکر .
 یه سنه مقاومت کو ستر مکه مرقوم عادتا عاجز قالمش
 ایدیه ده اهلینک بو غلبه سی قریمی روسیہ جایه سنده کل
 طوغریدن طوغری به روس استیلا و استلا کمنه ویرمک

نتیجه سنی تعجیلدن بشقه بر شینه یار اماه شدر . چونکه
شاهینکرایک وقوع استمدادی اوزرینه جنرال پوتمکین
قومانده سیله یتمش بیک نظامیه عسکری قریمه کیره رک
۱۱۹۸ سنه سنده قریم قطعه سنک طوغریدن طوغرییه
روس ممالیکی اولدیغنی رسماً اعلان ایلدی .

روسیه نك بو حرکتی سلطنت سنیة عثمانیه یه غایت
کران کله رک حالبوکه اوزمانلرا سوجو پروسیا دولتر -
ینک ده اوستر یا وروسیه ایله پولتیقه لری بوزلش اولد -
یغندن بونلر دخی سلطنت سنیه یه معاوتلر وعدا یدرک
دولت علیه یی حر به تشویق ایلدیلر .

سلطان عبدالحمید اول حاضر تلی ینک بود قعه اعلان
ایلدکاری حرب روسیه لو و اوستر یا لونک ایدکی سنه دخی
شامل ایدی . ایکی قولدن تدارک ایدیلان عسکر روسیه
واوستر یا اوزرینه صالدر یله رق بلغرادی المقی خلیا -
سیله یور یمش بولنان اوستر یا عسکری قلعه مذکوره یی
اله بیلک شو یله طورسون لاینتطع بوز یله بوز یله مجار -
ستانی بیلک بالخلیه بسارایا جهته چکیلوب اوراده
روسیه عسکر یله برلشمکه مجبور اولدی .

ذکر اولنان اردو بسارایا طرفنه کلنجه عسا کر

عثمانیه قیل برون قلعه سی اوزرینه بر قاج دفعه مفرزه لر
 صالدره رق اگر چه نائل ظفر اوله مامش ای دیسه ده
 مغلو بیت دخی کور مامش ای دی . لکن اوستریا عسکر یله
 روسیه عسکری بر لشد کدن صکره ایکسی بر دن عسا کر
 عثمانیه نك تحت محافظه سنده بولنان یاش شهر یله خوتین
 قلعه سی اوزرینه یورویه رك استیلا ایلد کاری کی اوزی
 قلعه سی اوزرینه وقوعبولان محاربه لر ی غایت خو -
 ریزانه بر محاربه قطعیه صورتی الی .

اوزی اوزرینه یور ییان دشمنك مقداری یوز بیك
 قدر اولوب حالبو که قلعه دروننده بولنان عسا کر
 عثمانیه مقدار جه پك آز اولد قدن ماعدا استحکاماتی دخی
 همان هیچ بر اهمیتی حازد کل ای دی . شو حالده اوزی به
 بحرأ امداد و اعانه یتشدیر لك لازم کلدی . بر یاندن
 خازیلر بوغاز بوغازه جنك ایده طور سونلر بر یاندن
 دونمای همایون امداد و اعانه یه مسارعت کوستر دیسه ده
 بحکمته تعالی بر دنبیره قویان بر لدوس روز کاریله
 دونمای همایون قریه اور دیغندن مطلوب اولان امداد
 و اعانه میسر اوله مدی .

ایشته بوندن صکره دشمن دخی وار قوتنی اوزی

اوزرینه یوریتهرک قمعده بولنان اوتوز بیک قدر عسکر
همان بره قدر فدای جان مرتبه سنده غیرت و همتمده
قصور ایتماشلر ایسه ده انجام کار اوزی دشمن النسه
یکدی .

عبدالحمید خان حضرتلری بو مغلو بیت فاجعه
اوزرینه دخی جنکدن یوز چو یرمیه رک فقط روسیه -
نک بونجه غلباتنی تأمین ایلیان شی تعلیمی و منتظم
عسکریتشدر مش اولسی قضیه سی ایدوکنندن
بو عساکر منتظمه یه قارشو محتل النظام اولان
یکچیری ایله مقاومت ممکن اوله میه جغی کورلمکله
صدر اعظم یوسف پاشا بونلره ممکن مرتبه تعلیم
اوکرتیک ایستدکده اومتعصبلر « بو تعلیم معلم کاور
ایجادیدر . بزنی کاور ایتیک ایستیمورلر « دیه ایاقلانمغله
برابر ۱۲۰۳ سنه سنده عبدالحمید خان حضرتلری
واصل رحمت رحان اولمغله ایشلرینه جهانی اغلته -
حق بر صورت فاجعه ده قالدی .

تاریخیمزک تقسیمات اساسیه سی اقتضاسنجه
بو حال دور صحیح انحطاطیمزک خاتمه سی اولوب بوندن
صکره دور تجدد و تنظیماتمز حلول ایتش اولمغله

انک مبدای بولنان سلیم ثالث حضرتلر ینک جلو سنی
بروجه آتی اوچنجی فصلزده حکایه یه باشلایه جغز .

(اوچنجی فصل)

— دور تجددو تنظیمات —

عن ۱۷۸۹ الی ۱۸۷۶

تفصیل — بودور تجدد و تنظیمی کال علم و عرفان
وشوکت شان ایله کشادایلیان جنتمکان سلطان سلیم
ثالث وشهید حضرتلر یدرکه ذات شاهانه لری قدر حلم
وعلمه حکمت و معرفته مالک حکمدار لر حقیقه
روز کارک نوادر ندر لر .

علوم شرعیه وفنون ادبیه ده بهره کامله لری یالکز
شهر یارلق کبی بر موقع عال العالده بولندقلری ایچون دکل
بلکه علمانک جداً سلطانی وادبانک بحق شهر یاری اولد.
قلری ایچون اول موقع شان وشرفده تاریخ عالمنده دخی
اثبات وجودایلشدر .

دولت علیه عثمانیه نک نیجه زماندن بری دوچار
اوله کلدیکی مشکلات و مصائبه چاره ساز اولمق مشاللو
ایکی جهاننده اهمیتی خارج از مقیاس ومیران اولان
برهمت عالیله نک برکون اولو بده کندیلرندن بکننه چکنی

دها شهزاده لك حالارنده ايكن در پيش ايليه رك تدرس
 وتعلم وتفنن وتآدب زمانلرندن ماعدا اوقات عزيزه لر يني
 دائما علماي زمان وعقلاي عصر ايله استشاره يولنسه
 حصر ايلش ايدى . اوز زمانلر استانبولده فرانسه سفيري
 اولوب عثمانلير حقننده محبت وتوجه ايله شهرتشعار
 بولنان قونت (شوآزول) شهزاده ولى العهد حضر -
 تلىنه كندى محبت عثمانيه سنى بالتأمين درلت عليه دوائر
 ملكيه وعسكر يه سنك اورو يا اصولنجه اصلاح
 وتجديدى حقيقه احيائى دولته مدار اوله جفنى قلب
 سليم سليمى يه كوزلجه يرلشدير مش ايدى .

بو حالده سلطان سليم حليم حضر تلى هذوز
 شهزاده لك اكر يله برابر امناسندن اسحق افندي يني
 فرانسى سفير ينك توصيه سيله فرانسه يه بالارسال اورا
 ده عمومًا اورو پادولتلى ينك وبالخاصه فرانسه دولتنك
 تنسيقات ملكيه وعسكر يه سنى او كرنوب بعده در سعا
 دته عودتله خاكيائى نجايتن اهيلر ينه عرض ايتكه
 مأمور ايلدى .

اشبو پادشاه حال آگاه ۱۲۰۳ سنه سنده يكرمى
 سكر ياشنده بر قهرمان صاحب قران اولدقلى حالده

تخت عالیء خلافت و سلطنته اولیه بر زمانه جلوس بیور -
 دیر که روسیه و اوستریا ایله محاربه حال بردوام اولوب
 ۱۲۰۴ سنه سنده مجرد پادشاه نوجاهک غیرت مخصوص -
 صده سیاه دوام ایلیان حرکات حربیه ده اوستریا یه
 قارشو طرف طرف غلبات بزه قالمش ایسه ده روسیه
 دولتی اکثر حرکات عسکر به سنده غالب چیه مغله
 اوستریا صلحه رغبت ایله دیکی حالد روسیه بر درلو
 مصالحه یی قبوله یا ناشمزایدی .

ذات حکمتسمات حضرت سلیمی ۱۲۰۵ سنه سنده
 دخی وار قوتی بازویه و یره رک حربیه دوامدن کرو
 طور مامش ایسه ده روسیه نك بشیوز کشیلک منتظم
 بر طابوری قارشو سنده بزم بشبیک کشیلک یکچیری مفرزه -
 لری بش دقیقه بیل طایانه مامق درجه لرنده انتظامات
 عسکر یه قوتی دشمنده وعدم انتظام ضعیفی بزه ایکن
 غلبه نك قطعیم ممکن اوله میسه جغنی ذات شاهانه
 بالتفرس بو حالد محاربه یه مداومتدن ایسه بای حال
 صلحی قبول ایدوب اولانجه همتی دولت علیه یی
 تجدیداً احیایه صرف ایلک ده از یاده موافق عقل
 و حکمت اوله جغنی حکم ایلشرا یددی . بناء علی ذلک

۱۲۰۵ سنه سنده بعض دول متوسطه ارایه گیرنجه
 زشتوی قصبه سنده بر مجلس مکالمه عقد اولنوب
 عریض و عمیق مباحثاتدن صکره اوستریالو ایله استا-
 توقو یعنی طرفینک قبل المحاربه معین اولان حدود-
 لری نه رعایت اساسی اوزرینه بناء صلح ایدلمش و بو
 حالده اوستریا محارباتندن ملکا ضررلی چیقلمدیغنه
 تشکر اولمشدر .

اوستریا معاهده سنی متعاقب دول متوسطه روسیه
 ایله دخی بر مصالحه عقدینی تو صیه یه باشلایه رق اکر-
 چه روسیه یه قارشو متابع مغلو بیتلر یزه نظر اشراط
 مصالحه نك اغر لغندن قورقه رق سلطان سلیم حضر-
 تلی بادی امرده تردد بیورمشلر ایسه ده بغداد
 جهتمندن طورله وقعاسیه طرفندن دخی قویان نهرلری
 حد فاصل اعتبار اولنه رق قریم قطعه سنك روسیه یه
 الحاق کلیسی شرائط اساسیه سی اوزرینه روسیه نك
 بتون ممالک بغدادی و اسماعیل و کیلی ایله طونه سواحلنك
 سائر جهتلرینی تخلیه ایده جکی درمیان و تأمین اولنجه
 مغلوبیات واقعیه یه مقابل شرائط مذکور خفیف
 کور یلرک ۱۲۰۶ سنه سنده بغدادنك مرکز اداره سی

اولان یاش شهرنده عقد اولنان مجلس مکالمه قرار یله
 برده روسیه مصالحه نامه سی امضا قلمشدر .
 اخص آمالی دولت علیه قوانین ونظاماتنک تجدید
 یندن عبارت بولنان سلطان سلیم حضرتلری مو-
 جود اولان مسائل حربیه اوله اوج سنه ظرفنده
 ختام ویره یلمد کدن صکره اصلاحات و تجدیدات ملکیه
 وعسکریه اول بول امور بحریه دن مباشرت بیور .
 مشلدر .

امور بحریه نک هر جهتی ایچون نظامات جدیده
 وشیدیه وضع اولنه رق باخصوص انشات دائرهلری
 توسیع قلمغله پک آزر زمان ایچنده طرز جدید اوزره
 کوزل کوزل کیملر انشاسنه باشلانمشدر .
 اصلاحات بحریه بی متعاقب یکچیری اوجاقلر یئکده
 اصلاحنه باشلامش ایسه ده بوایشک صعوبت
 ومشکلاتی درکار اولوب اولایکچیری اورته لرینه
 وقار و ناموس عسکری ادخال اولتمی جهتی ترجیح اولنش
 ایدی . مثلاً اوزمانلر یکچیریلر برنوع زور بادیلنجی
 حالنی دخی الهرق فقرای اهالییه وارنجیه قدر
 شوندن بوندن بنخشمش نامیله جبراً پاره المغه قالشدقلر .

ندن و بوايسه وقار و ناموس عسکری يه بالکليه مخالف
دوشا يکندن الہ اول يکچر يلر بوعارسز لادن منع
اولنديلر .

اصلاحات ملکيه و علميه يه ايسه از جله يکي طوغان
چو جقلره هدايه و لادت اوله رق رؤس لر کوندر ملک
درجه سنده کي سوء استعمالاتي قاندير مقدن بدأ اولنمش
ايدی . زير اطوغديغي زمان مدرسلک يورود يکي و مکتبه
باشلانديغي و سنت اولديغي و تأهل ايلديکي زمانلر دخی
دخی طفره لر ترقيلر ايله طريق علميه زادکانی هنوز
جام جاهل ايکن مراتب عاليه علميه يه وارد قلدن اصل
مدرسه دن يتشمش ار باب استحقاتک ترقی يوللری
بالکليه قپانمش قلمش ايدی .

تیمار و زعامت دخی بر زماندن بر و بر نوع سهم
صورتی الهرق اوراق امتيازیه سی پیاسه لرده النوب
صاتلغه باشلا ديفندن بعدما بالفعل حرب و ضربه
مقتدر اولانلردن ماعداسنه تیمار و زعامت و يرلماسی
ايچون دخی شديداً نظاملر قونلدی .

بواصلاحات هپ ۱۲۰۷ سنه سی محصولی
اولوب بونلردن ماعدا خبره جی و لغمجی و طوپچی

و عرب به حی صنفلی ایچون دخی یکی وشدتلی نظاملر
 قونیه لر ق صنف و صنفلر نجه اسباب تر قیلری دخی
 اکال و تأمین قلندی ایسه ده اجراآت مذ کوره بالطبع
 بعض ار باب طمع و ارتیکابک منفعتلرینه مغایر دوشمکه
 بویله کافر ایجادی نظاملر و قانونلر ایله دولت اسلا-
 میه بر اورو پاللیق سوسی ویر یله جک وهر کس
 کاور ای دیله جک کبی ترهات و هذیانلر بر طاقم کو-
 پکراک سرمایه عوعوه سی اولغه باشلادی .

سلطان سلیم حضرتلری یکچیرینک وجودی
 باقی اولدقجه اصلاحات لازمه یه بحق تشبث ممکن
 اوله میه جغنی کورمکه برابر بویله دولت علیه نک
 ظهورندن برو دوام ایده کلان راو جاغی سوندورمک
 دخی ایستدیکندن یکچیری فسادلرینه مقابل الده بر
 قوه جدیده اولغه به برابر حین حاجتده یرار قیلری
 فعلاً کوستریله رک جهانک انظار عبرتی آچق ایچون
 نظام جدید عنوانی التنده یکی بر هیئت عسکر یه تشکیله
 لزوم کوردی .

اشبه هیئت جدید نک هیچ بر طرفی اینجه تمام سنه
 اول قدراعتنا و اهمیت کوستردی که بونلره ویر یله جک

معاشاتك و اردات قديمه دن النيموب ايرادلر بوله رق
مخصصات جديده عسكريه نك و اردات مذكور ه دن
تعينه قدر دوشوندى .

برياندن شو اصلاحات اجرا اولنور ايكن ديكر
طرفدن دخى اناطولیده اوفاق تفك شقاوت جمعيتلر .
ندن ماعدا كر دستانده ميللى خليل بكك و عربستانده
بعض مشايخ ايله مصرده كوله منلرك و نجلده و هايملرك
سر كشيكارى بشقه بر زمانده اولسه دولتى خليلدن
خيلى يورمى لازم كلان وقايعدن ايديسه ده سلطان
سلیم حضر تلى ذكر اولنان عصيانلر و طغيانلرك
اوزرينه وارلدقجه شدتى ارتيمه رق هب بر حالده
قاله جغنى كوروب اصل قوت و همى اصلاحات
جديده حصر دن فراغت ايدلامسى نقطه سنده
قرار قيلدى .

۱۲۰۹ سنه سنده طوپخانه اصلاحاتى مياننده
باروتخانه لار انتظام التمه النهرق ديكارى تكثير و دستگا .
هلى توفير قلنديغى كى نظام جديد افرادى چوغا .
لتيلوب يكچرينك دخى غيرت انتظام پرورى مى
تحرىك ايدلك ايچون درلودرلو و سائط ايله بر جوق

نصایح ایفاسیله ممکن مرتبه اصلاحلرینه همت ایدلدی .
 انجق اناطولی طرفلرنده کی دره بکیلکی و سرکشک
 هواری روم ایلییه دخی عکس ایدرک از جله و دینده
 پاسبان اوغلی نامیله شهرت آلان بروالی علنا عصیان
 قدر وارمغله ۱۲۱۰ سنه سنده سلطان سلیم حضرتلری
 بریاندن اناطولی و عرستان اشقیاسی اوزرینه سوق
 عسکرله دیگر طرفدن دخی پاسبان اوغلنک تریه سنه
 برطاق وزیرایی مأمور ایلش ایدی .

اناطولی اشقیاسنک بعد مسافه دن و عظیم چولار
 و منیع طاغلردن ایتدکاری استفاده حسیله تریه لری
 نه قدر مشکل ایدیه ده و دینده پاسبان اوغلنک دخی
 و دین قلعه سی کی جسم و متین بر قلعه یه تحصنه
 باشنه کلیتی حشرات طو پلامش اولسی تأدیب و تریه
 سی مصلحتنی مشکلات عظیمه دوچار ایلش ایدی .
 بناء علیه اوزرینه کیدن وزیر لر عادتاً هیچ بر شیئه
 موفق اوله مدقلری کی ۱۲۱۱ سنه سنده قیودان دریا
 کوچک حسین پاشا برأ و نهراً قوه کلیه ایل و دینی
 تضییق ایلدیکی حالده یه بر شیئه موفق اوله مامشدر .
 شو مشغولیتلرک در دست بولنان تشبثات اصلا .

حیه بی بیاغی منع ایتسی سلطان سلیم حکیم حضرت تیرینی
 نه قدر بیرار ایتدیسه ناپولیون بونا پارطک انکلتزه
 ایله اولان محار باتندن ناشی کویا هندسه تانجه دخی
 انکلتزه بی مشغول ایتک بهانه سیله اوتوز بیک کشیک
 براردو بی مستحجاباً ۱۲۱۳ سنه سنه مصره کلوب
 استیلا ایتسی داخلی شقاوتله قیاس قبول ایده میه چک
 بر مشغولیت اولدیغندن بوده ذات حضرت سلیمی بی پک
 متأثر ایلش ایدی .

اوزمانلر فرانسه نك اورو پای وسطیده طوب کبی
 کورله می عادتاً بر چوق دولتری دوچار فتور ایلد-
 یکندن دولت علیه عثمانیه فرانسه علیه هانکی
 طرفه باش اورسه متفق بوله جغنی اکلا یوب هله
 انکلتزه دولتی فرانسه ایله اچیقدن اچیغه محارب
 بولمغله دولت علیه نك دخی متفق طبیعیسی عداو لنور
 ایدی .

بناء علی ذلک امیرال و یلسون قومانداسیله آق
 دکره کلان انکلیز دونماسی ابوقیرده فرانسز دونما-
 سنی یاقه رق ناپولیونک طریق رجعتنی کسیدیکی کبی
 روسیه دولتی دخی فرانسه علیه متفق اولان اورو پا

ولتلی میانه داخل اولمغه دونماسی معیت عثمانیه
 برهرك عثمانلی و روسیه دونماسی بالاتفاق فرانسه نك
 یر ضبطنده بولنان جزایر سبعة و پرهوزه و پارغیه
 و رتارمغه عزیمت ایلدی.

واقعا مختلط دونما بومأموریتی حسن ایفا ایلدیلر
 سبعة جزایر سبعة عن اصل دولت علیه ملکندن
 لایوب فرانسزلر بولتلی ونديك جمهورندن المش
 ولدقلى جهته فرانسزلر یندن تخلص اولندقدن
 سكره دولت علیه به تسلیم و تمليك ایدلك جهته
 لیدلیوب بولنلر بر جمهوریت مخصوصه و مستقلة صو-
 تیه تشکیل اولمشلردر.

فرانسه علیه نه اجرا اولنان اشبو حرکت بحریه
 ن ماعدا برأ دخی جزایر قومانده سیله مکمل براردو
 قوق اولمش ایدی که بواردونك بر بیولك قسمی نظام
 عدید عسا کرنندن متشکل اولدیغی جهته عسا کر
 کوردنك ایلک تبحر به کاهی اوله جق شو محاربه
 دولت علیه جه برده اهمیت معنویه بی حائز ایدی
 جق بونا پارط بو حرکت عسکریه بی حس ایدر ایتمز
 ها اول طاورانه رق سوریه جهته توجیه عنان ایله

غزه و رمله و یافه بی و الحاصل بتون بر الشامی
ایتمش و باخصوص یافه خلقنی عموماً قلچیدن و تفه
پکورمک کبی برده حرکت و حشیانه کوسترمش
یغندن اردوی همایون ناپولیونه انجق عکا قلعه
هلاقی اوله ییلمشدر .

بو محاربه حقیقه بر امتحان محاربه سی او
ناپولیون دخی فرق ایدرک محاصره و تضییق ا
بولندیغی عکا قلعه سنی بهمه حال ضبط ایچو
قوتی بازویه ویرمش و هج و ملرده عادت
واصرار کوستره رک هرفدا کارلغی کوزه الد
ایدی . لیکن برقاج سنده دن برو سلطان سلیم ک
حضر تریک تنظیمات و تنسیقات عسکریه سی سای
طوپچیلر من و مهندس لر من یاغی بر مهارت فوق
پیدا ایلد کیری جهت له فرانسه لرک متعدد هجوم
غایت کوزل مدافعه لر کوسترلمشدر .

بو حالده ناپولیون همان یکیدن ایجاد ص
بر طاقم یا کلتاجلی مانوره لر ایله بر صوک هجوم
ترتیب ایلش ایدی که بو هجومه کوستریلان
کندیسنی ده حیرته بر ایش ایدی . شویله که :

فرانسزلر بر قاج جهندن سه اخته هجو ملر کوستر -
 ی ائاده بوساخته هجو ملر له سه ترايد ککری بر
 هجو می او قدر تیر نوشدید اجرا انیشلر ایدی که
 قلعه نك بر جلرینه قدر چیمشملر و حتی درون
 یه دخی کیر مشملر ایدی ۱۰ کر بو حالده عسا کر
 نه طوب باشندن و مزغال او کندن آراسه ایدیلر
 وله کله جاک قار غشه لقی اراسنده دشمن عسا -
 سک کافه می قلعه یه طولوب عکایی ضبط ایده -
 رینه شبهه یوق ایدی ۰ انجق ضابطلر و مهند -
 که اوزمانه کور و مهندس دیمک ارکان حربیه دیمک
 طایفه لردن عسکری آیر میوب اشبو صحر اوزرینه
 ش کلمش اولان دشمن اوزرینه افواه نار یه دن
 ملر قوصه دیر دقلری کبی یالکز بر ایکی
 پیاده درون قلعه به کیروب نعره لر و لوله لر ایله
 ککری شاشیر تمغه چالیشان اعدا اوزرینه سونکوکو -
 نور و دکلرندن بوغاز بوغازه تعبیرینه سزا اولان
 ک یالکز بونلره منحصر قالمش ایدی ۰

بو حالده دخی بزم ایچون ظفر محقق دکل ایکن جزار
 سر یعا قلعه ایچنده تدارک و تهیه ایلدیکی ایکی لغمک

ایکسینه بردن آتش و یرمسینه دشمن افرادنن یک چوغی
بر هوا اولمش و بوتدیر اوزر ینسه ارقه دن عسا کر
شاهانه « یوها ! » چاغردقلى حالده ناپولیون
مقهوراً و منهزماً فرار ایلشد .

بومقدمه ظفرک تنایجی دخی استحصال ایدلک
ایچون یکدل و یکجهت اوله رق حرکت ایدلش اوله
ایدی فرانسزل مصرده دخی دیکیش طوتدیره میسه رق
ناپولیونه بویونک اولچیمی یک کوزل کوسستر یلور
ایدی . انجق جزار پاشا ذاتاً مغرور و معند اولوب
هله ناپولیون کی مغلوبیت نه اولدیغنی هنوز بیلیان
بر صاحب قرانه غلبه ایلد کدن صکره دخی ارتق کبر
وعظمتی بر قادهما ارتدیره رق جبل لبنان امراسنک
عزل ونصبی خصوصنده انکیر لرله منازعه لر چیقار .
مش و در سعادتن الدیغی تعلیماته ده حواله سمع اعتبار
ایتماکه باشلامش اولدیغندن نهایت مومی الیهک عز
لنه مجبوریت الو یرمش ایدی .

حالبو که جزار معزولیتی قبول ایتماک صورتیه
بالکلیه وادی عصیانیه صاینجه ایشک رنکی ده
زیاده بشقه لشوب مصر مسأله سنده ال بیوک فنالق
کندی یوزندن کورلمشدر .

ینه بو ائشاده نجد و هایلری دخی ایشی آزدیره رق
 اهل قبوره اصلا رعایت ایتماک و مباح و مسنون اولان
 بر چوق شیلری بدعتدر دیه رد و تحقیر ایتک مثللو
 غرابت عقیده لرینه پک چوق کیسه لری تشویق ایلد کدن
 ماعدا بغداد و حجازه وارنجه به قدر هر طرفه مفرز لر
 سوقیله اهل اسلامی غلیمانه کتورمش اولد قلرندن بو
 مسئله دخی مصر مسئله سنه بر ضحیه مده شه اولمش
 قالمش ایدی .

بو قارغشه لق اراسنده سلطان سلیم حضرتلر نیک
 امیدلرینی محافظه ایدن یالکیز برشی وار ایدیسه اودخی
 نظام جدید عسکر نیک کوسترمش اولدیغی منافع
 عظیمه قضیه سندن عبارت ایدی . زیرایالکیز کندیمز
 دکل بیطرفلر و حتی دشمنلریله نظام جدیدک جسم و احد
 صورتنده حرکتی اوزمانلر تعلیم و انتظام ایله مشهور
 اولان فرانسلره دخی فائق اولدیغی تسلیم ایدرک
 عثمانلیلرک ذاتاً عجبول و مفطور اولدقلری شجاعت
 و بسالته خدمت غزایی برده فریضه دینه بیللری
 ماده سی ضم اولنجه دنیاده الک منتظم و موافق عسکر
 انجق عثمانلی عسکری اوله حغی بر بدهات قطعیه صورت
 تنده تحقق ایلش ایدی .

بناء علی ذلک سلطان سلیم حضرتلری نه جزارک
عصیانیه مصر مسئله سندن ونه ده وهابی و یاسان
اوغلی بلیه لرندن اصلا دوچار فتور اولیه رق بریاندن
نظام جدیدی تکثیر ایلرودیکر طرفدن طابورلر طو-
لدقچه مصره سوق ایدر ایدی .

اسفار مصریه جه کاه غالب و کاه مغلوب حقیقتمش
ایسه کده هر حالده غالبیتلریمز مغلوبیتلریمز فائق اولد-
یغی جهته ناپولیون مصری استیلادن مأوس اولد-
یغی کبی او آرائق فرانسه جه ظهوره کلان برانقلاب
دخی ناپولیونک سریماعاجلاً مملکتی جانینه عودتنی
ایجاب ایتکله ویرینه باش قوماندان براقدیغی ماره شال
(قله بر) دخی برفدایی عربک خنجر انتقامیه معدوم
اولغله فرانسز لک کوزلری بسبتون یتیش و انجامکار
مصردن چکملری مجبوریت تحتنه کیرمشدر .

حسب الزمان اولانجه همتی عسکر یتشدر مکه
صرف ایتک مجبور بکنده بولنان سلطان سلیم حضرت-
ترلری عساکر نظامیه یی تکثیر همتنه هیچ بروقت
نقیصه کتیر میوب مع هذا عساکر عثمانیه یی ایستدیکی
قدر تکثیر و تنظیم ایچون موجود اولان عصیانلرک

و شقاوتلرک منعی لازم اولدیغنی دخی کوروب بالخاصه
باسبان اوغلی اوزرینه طیار پاشایی و اشقیای و هابیه
اوزرینه دخی حجاز عسکرینی مأمور ایش و میلی
تیمور بکه وزارت و بره رک حال شقاوتنی صدق و اخلا-
صه بالتحویل جبل لبنانده کی فساد و عصیان قارشو
دخی تدارکات لازمه یی اتمام بیورمش ایدی .

انکلیرلرله بالاتفاق مصردن فرانسه لری طرد
ایله برابر فساد داخلی دخی یواش یواش برطرف
اولدقچه سلطان سلیم حلیم حضرتلری یالکز عسکرک
انتظامی کافی اولدیغندن اسلحه جه دخی برتجدده ازوم
کورهرک اسکی سلاحلر عسکرک لندن النغه ویرلرینه
اسلحه جدید تدارک و توزیع ایدلمکله باشلانمش ایدی .
ایمدی ۱۲۱۶ سنه شجر به سنده عما کر عثمانیه نک

طرف طرف غالبیتی دشمن اولان فرانسه لری پریشان
و دوست اولان انکلیرلری حیران ایلدیکی کی نظام
جدیدک یارارلغی یکچیر یلرک حسدور قابتنی مستلزم
اوله حق درجه لرده پارلاق کورلمش و بوايه خبیثلرده
پیدا ایلدیکی یأسی برحس خصوصته نحو یله باشلامش
ایدی .

خطه مصریه فرانسزلردن قور تارلدقدن صکره
بر اراق ابو مرق محمد پاشا مصر والیسی نصب
اولندیسه ده سردارلردن خسرواغا دخی مصری قور
تارمق ایشنده پک بیوک یار اراق کوسه ترمش بر آغا
اولدیغندن و مصر والیلمکنه پک ده هوسی بولندیغندن
عهمده سنه رتبه وزارت بالتوجیهه ایکنجی درجه ده
اوله رق مصر والیلمکی ا کا حواله اولمش ایدی .
بو خسرو پاشا محمد علی پاشا ایله رقاقته دوشه رک مصرک
بر ولایت مختاره صورتیله تشککنه سبب اولان خسرو
پاشادر .

مصر و جبل لبنان مسئله لری بالکلیه بر طرف
اولدقدن صکره سلطان سلیم حضرت نوری جله دن اول
روم ایلی اصلاحاتی در پیدش ایلدی . زیر و دینده
پاسبان اوغلی اوزرینه کلان وزرانک کافه سنی مغلوب
ایلد کدن صکره عادتاً بر حکومت مستقله تشکیل ایدرک
روم ایلمنک سائر طرفلرنده دخی بعض متغلبه لری دائره
اتفاقده دعوت ایلدیکندن و حتی صریه رؤسای
اشقیاسیله ده خبرلشه رک بونلرده دیگر جهتمدن غایانه
باشلا دیغندن روم ایلی طرفلری یواش یواش دولت

علیه نفوذندن چیتمه دخی یوز طوتمش ایدی .

شدت و سسور تله مشهور اولان یانیه والیسی
تپه دلیلی علی پاشا او آراق هنوز ابتدای شهرتده
اوله رق دولت علیه عثمانیه اطاعت و صداقتی
دخی بر کال بولمشفه روم ایلی از باب تغلبنک تأدیب
و تربیه سی کند بسنده حواله اولمش ایدی . واقعا
علی پاشا بر چوق عاصیلری ازاله ایدوب باقیسنک دخی
کوزلرینی ییلدیر دیسه ده اوزمانلرجه براز سیور یلان
چبانلرک در حال تشنج ایتسی موده حکمنی آلفله
علی پاشا دخی بر یاندن دولت علیه ایچون یکی بر طریق
مشکلات کشاد ایتمکده ایدی .

۱۲۱۷ سنه هجریه سنده یکیدن یکی به بر طاقم
نظام جدید طابور و آیلری تشکیل اولنه رق اولکی
موجودلرینه علاوه ایله مقدارلری چوغالتلدی و با-
خصوص بونلرک نظاماتیده توسیع و تصحیح ایدلدیکنندن
احوال عسکرلری بیاغی اورو پاعسا کرندن فرق اولنه
میه حق درجه لری بولدی . اوزمانه قدر سواری عساکری
هنوز نظام جدید اتنه انماش بولندیغندن جبل لبنان
واناطولی فسادلری کاه تلطفیف و کاه تشکیل صورتیه

بر طرف ایدلد کدن صکره اورالردن تدارك اولسان آتلر
ایله منتظم سواری دخی تشکیلنه باشلاندی .
آسیای عثمانینک بقیه فسادی اولان وهایلره کلنجه
بونلر اعتقادلرنده اولان ساده لکی برچوق کیمسه لره
بکنندیر مرک استانبولده بیله بعض مرتبه طرفدارلر پیدا
ایلدلارندن عربستان طرفلرنجه ارتق اوکلرنده بر مانع
قالماق درجه لرنده میدانی خالی بولمشلر و بناء علیه حجاز
اوزر ینسه ده یور بیوب طائفه قدر مستولی اولدقدن
ماعدلر بقوللرینی یمن اوزر ینسه دخی اوزاتمشلراییدی .
سلطان سلیم حضرت تلی آدم افندی اسمنده بر ذاتی
وامرادن احمد پاشایی دخی مدینه منوره اوزر ینه مأمور
ایلیه رک بونلره ویردیکی تعلیماته کرک نصیحت و کرک
تهدیدات ایله هر نه وجهله اقتضا ایدرسه حرکت اوانوب
وهایلرک بیحه حال قلع و قمعن و زمان بیورمشلراییدی .
فقط بومأمورلر دخی امید اولندیغی قدر مظهر موفقیت
اوله میهرق وهایلر مکة مکرمه بی ده استیلا ایله نیجه
تحقیراته قویولمشلر و تاجرده بی محاصره یه قدر جرأت
بولمشلردر .

نهایت ۱۲۱۸ سنه سنده جده اهالیسی بر خروج

هجومی ترتیبیه اشقیای و هابیه بی طرده موفق اولد .
 قلمی کبی بر کره روی رجعت کو سترن اشقیا اوزرینه
 شرفای مکّه ایله امرای عثمانیه بالاتفاق صا لدیروب
 وهله مکّه یه کیدرک اشقیای مر قومه بی اورادن دخی
 طرده موفق اولمشلردر .

مصره کنبجه : فرانسرلرک ورودیله استعدادی
 بشقه لشمس اولان مصر قطعده سی حربک اندفاعندن
 صکره کایتلی و متنوع عسا کر عثمانیه بجمع اوله رق
 حالو که هنوز یکی قورتلش اولدیغی عظیم راستیلادن
 صکره خزینه مصریه بو قدر عسکرک اداره سندن بالطبع
 عاجز قاله جغی کبی روم ایلی عسا کرینک طاغیدلمسی
 دخی بوزمانه تصادف ایدرک بونر معاشلرینی المقسزین
 طاغلامغه قرار ویرمشلر واره یه بعض انتر یقه لر
 دخی کیرنجیه سر چشمه لری بولنه رق مؤخرأ مصر
 والیسی دخی اولمش بولسان محمد علی اغانک قوناغنه
 هجوم ایله عظیم برعر بده چیقارمشلرایدی .

بو محمد علی اغا غایت حر یص بر آدم اوله رق هله
 مصرده بر حکومت جدیده تشکیل ایلک امل و قرارنده
 اولدیغی مؤخرأ میدانه چیقمش اولمغه کندی هم شهر

یلری دیمک اولار روم ایلی عسکرینک بوقیاملری کندی
 طرفندن ایدیلان تشویقات اوزرینه وقوعه کلدیکی
 کبی طوغریجه کندی قوناغنی باحملمری دخی ینه ستر
 تشویق ایچون التزام ایدلمش برتدیر اولسی ده
 اوزمانلر برچوق کیمسه لر نزدنده ظن اولنمش ایدی .
 هر نه ایسه محمد علی کو یا تسکین قتال ایچون عسکره
 برطاقم نصایحدن ماعدا معاشلرینک دخی فلان کونه
 قدر تسویه اولنه جفنی وعد ایلش ایسنه ده او کون
 کلدیکی حالده مصر والیسی خسرو پاشا بالطبع ایفای
 وعده ایده مینجه عسکر بالیکلیه شمارمش وعده سا کر
 مذکور هئک ال بیوک قوماندانی بولن ان طاهر پاشا
 ایله مصر والیسی خسرو پاشا ارمسنه ینه محمد علینک
 صوقش اولدیغنی رقابت وعداوت حسدیه طاهر
 پاشا ذاتاً برعر بده ایچون وسیله ارمه قده اولدیغنی کبی
 خسرو پاشا دخی مصرده بر نوع نظامیه عسکری
 تشکیل ایدرک بونک انتظام و اطاعتنه پک زیاده اعتماد
 کوستر مکنده بولنمش اولدیغندن ایشه هر طرفک
 استعدادی یار دیم ایلیه رک ۱۲۱۸ سنه سنده روم ایلی
 عسکری ایله خسرو پاشانک نظامیه سی ارمسنده غایت
 شدتلی برغوغا باش کوستر مشدر .

خسرو پاشانک نظامیه سی مصر قلعه سنک ایچنده
 وطاهر پاشانک ارناودلری قلعه نك خارجنده بولندقلری
 حالده بر قاج ساعت دوام ایدن محاربه اوزرینه روم ایلی
 عسکری قلعه یی فتح ایلد کدن ماعدا خسرو پاشانک
 کندلی اقامت ایلدی کی قوناغی دخی طوپه طوتجه
 خسرو پاشا فراردن بشقه جای سلامت بوله میهرق
 مصردن فرار ایلشدر . ایکی عسکر یکدیگریله شویله
 بر محاربه یه طوتشدیغی صره ده مصر اهالیسی کند -
 یسنی فرانسز استیلا سندن دها مدھش بر بلیه ایچنده
 بولمشلرایدی . محمد علی اغا بو حال کورنجه اصل اهمیت
 و یریه جک شی اهالی مصریه نك توجهنی قازانمق اولد
 یغنی حکم ایدرک اصل کندلی قومانداسی التنده بولنان
 روم ایلی افرادینی چارشو و محلاته طاغتمش و کرک
 خسرو پاشانک بوزغوز نظامیه لرندن و کرک ارناودلر -
 دن هر کیم اهالی یه تعرض ایده جک اولورسه در حال
 منع و مدافعه سینه شتاب ایتش اولدیغندن بتون مصر
 کبار و صغاری بوندن طولابی محمد علی اغایه منتدار
 قالمشلرایدی .

خسرو پاشانک فراردن صکره طاهر پاشا کرک عسکر

و كرك معتبران اهالى مصر يه طرفندن والى قائم مقامى
انتخاب اولمش ايسه ده هر حالده طاهره بر نوع عاصى
نظر يله باقلىق لازم كله چكنى ذاتاً بو عصيانه كنديسى
تحريريك ايلش اولان محمد على معتبران اهالى
مصريه اكلاتقدن ماعدا مدينه منوره واليسى
اولوب اوارهلق بش التيوز قدر يكيچرى حاجيلر يله
برابر مصرده بولنان اجد پاشايه دخى اكلاتيغندن
مقدم طاهر پاشانك خسرو پاشا عليه مدار شكايت
عدايلديكى معاش و يرمازلك مسئله سنى دخى بودفعه
اجد پاشا ايله يكيچرلر ايسه دكلى بر معاشى طاهر
پاشانك تسويه ايده مامسى اوزرينه كندى عليه
مداراشكا عدايليه رك يكيچرلر انك اوزرينه يوزومش
وطاهرلر قفاسنى كسدرلر مدينه منوره واليسى اجد پاشا
عهده سنه كندى كنديلرينه برده مصر واليلى
توجيه ايتمشلردر .

اورته دن طاهر پاشا مندفع اولوب ده ارناودلر باشلسن
قالنجه و باخصوص اجد پاشا ايله يكيچرلرلر مبعوضى
اونجه جله سى محمد علينك بابر اغى التنده طويلانغه مجبور
اولدقلى كى محمد على اغا تجارت وسائر طر يقيله غايت

مالدار بر آدم اولوب یاره سزله یاره یتشیر مکدن دخی
عاجز قاله یغنه مینی یالکزمسافر بولنان یکچیر یلردن ماعدا
مصرده کی کرک عسکرو کرک اهلینک کافه سی کند -
یسنه متوجه قالمشدر ایدی . شو حالده محمد علی ارتق
احد پاشایده قاق صالامغه کنسیدیسنی مجبور عد
ایشینجه احد پاشا علی یه بر نوع عاصی نظریله باقه رق
دائرہ اطاعته دعوت ایلدی . فقط محمد علیدن الدیغی
جواب : « سن مسافر آدمسک . هاییدی ایشنه کیت .
بزاولکی کورلتی بی باصدیرمش ایکن سن تجدید ایلدک .
سن کیدر ایسک بزاورته لغی ینه اصلاح ایده یلورز »
سوزلندن عبارت قالمشدر .

بوجواب احد پاشایی غضبه کتوره رک یکچیر -
یلری محمد علینک اوزر ینه صالدر مق ایستد کده بونلو
قلعه دن آیلان ایلک طوبه فرار ایتمکله احد پاشا ایچون
دخی خسرو پاشانک طوتمش اولدیغی طریق فراردن
بشقه سلوک ایدیله جک یول قالمدی .

ایمدی علی اغا بوحالده مصرک یکانه صاحب و امر
مسئقلى قالدی . مصر اهلایسی حالا ارناودلرک بر بلا
چیقار ملرندن خوف و احتراز اوزره اولد قلرندن و محمد

علی اناهر نه قدر سلا نیک طرفلری اها لیسندن ایسه ده
 اها لی مصریه کنندیسی دخی ارناود عدا یله دکارندن
 اگر مصری طوغریدن طوغرییه کنندی اداره سینه
 اله جق اولور سه خلقك احترازی مقصدك تماخی
 حصولنی منع ایلدیکنی اکلادی . بو حالده بر زماندن
 بری مصر دن طرد ایدلش بولنان کوله منلری تکرار
 مصره جلب ایتکه لزوم کوردی که شوتد بیردن هم
 مصر اها لیسنك بر قاتدها مظهر امنیت واعتمادی
 اولق وهم ده کوله منلرك مصر اوزرندن اکسیک
 اولیان انتر یقه لرینی دخی تـ ورمك کبی ایکی باشلی
 بر منفعت حصوله کتورمش اوله جق ایدی .

کوله منلر ذاتاً مصر ده بر حکومت مشترک یه
 الشمس اولدقلرندن محمد علی اغا بونلرك اعظم امر اسندن
 ابراهیم بك ایله برادر لری عثمان بکه حکومت مصریه ده
 اشتراکی تکلیف ایدنجه ایکیسی دخی جانه منت
 بیلدیلر .

بو وقوعات مصر ده هب بر قاچ ماه ظرفنده گذران
 ایلیمان شیر اولوب بونلر استانبوله عکس ایدوب ده
 طرابلسلی علی پاشا مصر والیسی اولنجیه و فراری

خسرو پاشا دخی یکی والینک انضم-ام معاونت مادیه
ومعنویه سیله برایش کوره بیلک یعنی محمد علیدن انتقا-
منی المق ایچون تکرار کندیسنی دیروب طویلا بجهیه
قدر محمد علی دیگر ایکی رفیقزیه اشتراکینه قوت
ویرمش وهر کونه احتمالاته قارشو تدارکات لازمه سنی
اکمال ایلش ایدی. بناء علیه خسرو پاشا مصر اوزرینه
یورودیکی زمان یقاسی محمد علینک انده کچهرک قره غول
الته الندیغی کبی والی جدید علی پاشا دخی مصره
کلده کده اهل الی مصریه محمد علی ایله ایکی نفر
شریک حکومتندن بشقه والی طانیه میه جقزری جوابنی
ویردیلر.

بونک اوزرینه علی پاشا کوله منلرک محمد علی ایله
اتحادی بونلرک دولت نظر حشمنده مبعوض اولملر-
ندن نشأت ایلدیکنه سطحی بر تحقیق اوزرینه حکم
ایدلرک بجایه سنک عفو واطلاق بیورلدقلرینه دأر برده
فرمان عالیشان استحصال ایلدیسده ده محمد علی کوله منلری
دخی اهل الی مصریه مثلور مقصد استقلالو یانه امرنده
تمامیه اقناع ایلش اولدیفندن علی پاشانک استحصال
ایلدیکی اطلاقنامهیه دخی کوله منلر کندیلرینی محتاج
کورمدیلر.

ایشته ۱۲۱۸ سنه سنده مصر احوالی شو صورتی
 المش اولسنه مقابل عربستان طرفلر نجه وها یلر دخی
 کربلایه و بغداده قدر هجو ملر ایدرک هر طرفی یغمایه
 ویرمش اولدقلرندن انلرک آز غلطلری ده تحمل اولنه -
 میه حق درجه یه وارمش ایسه ده استانبولک بحق
 نظر دقت و اهمیتینی یالکز مصر مسئله سی جلب ایلمکده
 ایدی . هله براره لقی طرابلسلی علی پاشا کو یا محمد علی
 ایله رفقای سی علییه نه مصرجه بر قوت پیدا نیلک
 ایچون کوله منلرک بعض امراسیله مخاره یه کیرشریکی
 محمد علی طرفندن در دست ایدیلان اوراقله تحقق
 ایدوبده در حال قوناغنه هج - وم اولنه رق اعدام
 دخی ایدلسی اوزرینه مصر مسئله سنک رنکی بالکیه
 د کشمش ایدی .

طرابلسلی علی پاشانک اعدای مسئله سنده محمد
 علی پاشا او قدر اوسته لقی طور انمش ایدی که بوایش
 عادتاً مستقلا کندی ترتیبی اولدیغی حالده هر کس علی
 پاشایی اعدام ایدنلر کوله منلر اولدیغنه قناعت کوسستر -
 مش - لر ایدی . حتی محمد علی کوله منلری اهالیسن دخی
 تنقیره غیرت ایدرک بونلر اهالیسن متنقر اولدقجه

اهالی ده انلردن احترازه باشلامش و نهایت محمد علی
اغاک قویلدیغی مشوقلر واسطه سیله بر طاقم کوله منلر
بعض اهالی بی صومعه دو ککه قیام ایدنجه محمد
علینک اصل مقصدی اولان کوله منلردن نفرت عمومی
قضیه سی دخی حصوله کیش اولدی . شو کوله منلردن
قورتلیق چاره سی کن دیسندن طلب ایلیان معتبران
اهالی یه « چاره سی سزدن ! بن ایسه انجق سزه معین
وحامی اوله یلورم » یوللو مقابله ایدرک بومعاونت
وحایه ایسه در حال بر اتفاق صورتی الهرق کرک حیل
و کرک علی تعرض صورتلرله کوله منلری کاملاً
مصرف طرده موفق اولدیلر .

محمد علی بو کره دخی مصر و الیکنی قبول ایتیه رک
اسکندر یه محافظی بولان خورشید پاشای اهالی نامه
مصره دعوت و والی انتخاب ایلدی و بو کیفیتی استا
نبوله عرض وانها ایدرک خورشید پاشانک و الیکنی
استانبوله ده تصدیق ایتیردی . زیرا استانبول خور
شید پاشانک کن دیسنی والی ایتیرمک ایچون هیچ
فمادده بولندیغنه وهرایش محمد علینک باشی التنده
بولندیغنه امین اولوب خورشید پاشا مصره والی

اولور ایسه بوندن دولته هیچ بر ضرر کلیه جکندن
 ماعدا بالعکس محمد علینک حرکاتنی ترصدایدی جکی
 ایچون منفعت دخی امید ایلر ایدی .

محمد علینک آمال و مقاصد حقیقه سندن استانبولی
 خبردار ایدن خسرو پاشا اولوب اکر دولتک
 سائر مشغولیتلری مساعد اوله جق اولسه ایدی سلطان
 سلیم حضرتلرینک در حال مصره بر قوه کلبه سوقبله
 اصلاح احواله سارعت کوستره جگرری در کار ایدی .
 یسده مصر مسئله سی هنوز مستعد انبساط بر مسئله
 اولوب اکانسبتله وهابی مسئله سی ارتق درجه کالنه
 وارمش اولدیفی و ۱۲۱۹ سنه سنده سوریه طرفلرنده
 دخی بر عصیان علنی ظهوره کلدیکی حالده بيله انلره
 دخی بر چاره اصلاح تدارکنده ذره قدر استعجاله جدأ
 امکان یوق ایدی . زیراروم ایلی طرفلری تالاستانبول
 جوارلرینه کالنجیه قدر بر طاقم دره بکریله بر طاقم
 دخی اشقیانک عادت استیلای عومیمی التنده بولنوب
 اورالردن عربستان ایچون بر قوه عسکریه تدارکی
 ممکن اوله مدقن فضله الده بولنان قوه عسکریه بی
 کندی تبعه مزى اصلاحه صرف ایتکه دیگر جهتدن

صر بستانك حالى دخی مساعداوله مزایدی . زیراروسیه
 و اوستریانك افسادیه صربلیلر قره کورکی اسمنده بررئسه
 تبعاً عصیان ایدرک نفس بلغرادى محاصره درجه سنده
 تکتیر قوت ایلدک لرندن و هر نه قدر بلغراد قلعه سنده
 دیش بکیره مامشیر ایسه ده صر بستانك سائر طرفلرنده
 بر مسلمان کزه میه جک قدر عصیان علنی ایلد خصوصت
 علمیه یه وارد قلرندن دولتجه بر قوه اصلاحیه موجود
 ایسه انی ده مطلقاً بوطرفه صرف ایلک لزومی آشکاردر .
 اصل مقصد مجددانه سی دولت علیه بی تجدیداً
 اصلاحه منعطف بولنان سلطان سلیم حکیم حضرتلری
 بو قدر موانع عاصیانده دن نه درجه لرده بیرار اولور
 ایدیه استانبولجه بعضیلری کویا طریق علیه دن
 بولندقلری حالد یاجیم قرننده بر نقطه و یا خود
 اصل هنرو معرفتی تعصب عامه بی تحریک ایدرک
 قتنه جولقدن عبارت بولنائلر کویا عسکر طرفنده
 بولندقلری حالد عسکرلکی عاصیلقدن فرق ایده میان
 دیگر بر گروهله بر لشهرک سلطان سلیم حضرتلری
 هر نه تشبثده بولنسه « اوخ ! دولتی احیا ایده جک !
 هیچ بویله کاور ایجادیلر و فرنک مقلدلیکی تشبثلر

ایله دولت احيای ایدیلور ایش؟ تعلیم دیه بو او یو-
 نجاقلر ندر؟ مهندس دیه شو یکی یئشمه چو جقلر نه
 اولیورلر؟ ترسانده یاپیلان یکی ایجاد کیلر بر قوری
 سوسدن عبارت شیلر! « کی تزیفات ایله افکار عمومی-
 بی دائماً تعصبه س-وق ایلدکار ندن قوجه سلطان
 سلیم بو حالرده واقف اولدیغی حالدده ص-انکه هیچ
 برشیدن خبردار دکل ایش کی عظیم بر حلدده بولنه-
 رق « حکیم » عنوانی « حلیم » عنوانی ایله بر قاندها
 تزیین بیور مقده ایدی .

سلطان سلیم حکیم و حلیم حضرتلری دولتک
 ایلک مجددی اولوب دولت علیه و ملت نجیه عثمانیه
 ایچون تأمین سلامت و بقا مطلقاً تجدد و ترقی و اتمام
 و انتظام ایله میسر اوله جغنی قطعياً محقق بولندیغنه
 کوره ترقی پروران عثمانیایک ذات حضرت سلیمی یه
 یک بیوک اهمیت ویره رک احوال تاریخیه سنی اکا کوره
 تدقیق و تنقیده چالشملی عادتافر ضیات سیاسییه دندر .
 بناً علیه اویله بر غیوو و حلیم پادشاهک پاسبان اوغلی
 کی بر تورودی و عاصی بی تریه دن عاجز قاله رق عهدده سنه
 و دین و ایلدکنی توجیهده مجبور اولسی نه آجی برشی

اولدیغنی نظر اهمیتده کوزجه تقرر ایتدیردکن
صکره اوکافر نعمت یاسبان زاده نیک دخی در حال صرب
اشقیامی ایلله برلشهرنک یندولی النعمتی اولان دولت
علیه ینه ابراز آثار خصومتده بولنمی قلب پاک حضرت
سایمی نه قدر مکدر ایدیه جکئی اکاکوره محاکمه یه چکمیلیدر .
یاسبان اوغلی درجه سنده دکل ایسه ده انک بر بشقه
درلوسی اولیق اوزره بیوک برانتر یغه اثری دخی
مصرده کورلمشدر . شویله که خورشید پاشا مصر
والیسی اولدقدن صکره محمد علی اغانک ینه برفساد
چیقارمسندن امین اوله میان سلطان سلیم حضرتلری
اغای مومی الیهک عهده سنده رتبه وزارت توجیهیله
۱۲۲۰ سنده سنده جده والیلکنه نصب ایلش اولدیغنی
حالد محمد علی جده یه کیتک ایستیه رک چونکه کوله -
منزلک مصر دن اخراجی ایشنی دخی مصر اهالیسنه وکویا
کندی امرینه اطاعت ایتیموب اهالی ایلله برلشان ارنالدره
کوردیروب انلره ایسه الک بیوک دوستلری کنندیسی
اولدیغنی تأمین ایلش بولندیغندن بودفعه دخی اکر
مصره هجوم وخورشید پاشایی استیصال ایدرلر
ایسه اهالی مصریه دن ده انتقاملرینی المق میسر اوله .

جغنی تأمین ایلش و بناء علیه کوله منلری والی و والی بی
ارناودلر و بونلری انلر اوزرینه تشویق ایدرک عظیم
بر غوغا دها چیقارتمش ایدی .

واقعا خورشید پاشا مصر قلعه سنه قیانونب اطرافه
کولاله یاغدیرمغه باشلا یه رق پک کوزل مدافعه کوستر -
مش ایسه ده بوخبر استانبوله عکس ایدنبجه محمد علی
مصر و الیسی اولمدق دن صکره اورایه هر کیم والی اولسه
و محمد علی به دخی هانکی مأموریت ویرلسه مصر
مسئله سی بتمش اوله میه جغنی نظر حکمته انده رق
چار ناچار مصر و الیسی عهده مشارالیه توجیسه
اولنمش ایدی .

بونک اوزرینه محمد علی ارناودلر دن کوله منلر دن
واهالی مصر یه دن کندیسنه هر کیم تابع اولمش ایسه
جمله سنی براردو صورتیله تشکیل و تعیین ایدرک مصر
قلعه سنی بالمحافظه خورشید پاشایی فراره اجبار ایلدی
و تمام خورشید پاشا قاجوب کندیسسی والیک مقابله ده
قوت بولسدق دن صکره کوله منلرک برشر کشدکلرینی
دها بوله رق ارناودلر ایله مصر یلره بواجقلری بردها
قیردیدی .

هر حالده محمد علي نك مصر و اليكې بر زمان ايچون
 اوجھتدن دولتي اشغال و تهديد ايتيه چك برشي ايدي .
 انجق ۱۲۲۱ سنه سنده مصر غائله سنده فائق اولق
 اوزره بر صرب و قره طساغ غائله سي باش كوستردى .
 بو غوائل روسيه نك اثر تشويقي اولديغي مستغني
 اخطاردير . همده يالكز اثر تشويقي دكل اعانه ماديہ
 و فعليه سنك ثمره سي ايدي . زيرا صرب و قره طساغ
 اشقياسنك استعمال ايلدكاري اسلحه و مهمات حربيه هب
 روسيه اچقه سيله النوب اوستر يانك انضمام معاونتيه بو
 محالره ادخال ايلدكده ايدي . بوسنه و اشقودره و اليكې
 اشقياي مذكور نك تنكيلى ايچون پك بيوك غيرته
 قصور ايتدكاري كې مؤخر اروم ايلينك سائر بر طاقم وزرا
 و امرا سي دخي بوايشه مأمور اولديلر ايسه ده اشقيا
 بوراده تنكيل ايلد كچه ديكر جهتدن باش كوسترمك
 صورتيله همان بتون روم ايلي قوت عسكريه سني
 مشغول ايتمكه باشلادی .

ايمدي سلطان سليم حضرت تلي نك بونجه غوائل ايچنده
 ينه اراءه سندن خالي قالدیغي ثبات و متانت سايه سنده نظاميه
 عسكركينك مقدار يني يكرمي درت بيك نفره وارد ير مش

اولسيله بواردوي صوفيه اوزرينه كوندرر ايسه
 ظاهر حالده هم صر بستان وقره طاغ اشقياسنك قطعي
 بر حر كترينه مانع اوله جني كي همده شايد اشقياي
 مذ كوره نك تأييد هجماتي ايچون روسيه طرفندن بر اثر
 تعرض كوستريله جك اولورسه انلره قارشو ايلك
 قوه مدافعه يي تشكيل ايلش اوله جني حساب ايلدي .

چه فائده كه درين طرفلري پاسبان اوغلنك ورو سچق
 طرفلري تر سنيكلي اوغلنك وادر نه طرفلري طاغ دويرن
 اوغلنك زير تغلب و تحكمنده بولنق كي روم اينجه
 هر طرف بر متغلب دره بكنك تغلب و تحكمي اتنده
 بولنديغندن شويله بر زمانده روم ايلي قطعه سنده اردو
 سوق مي دانده واشكاره بر حالده بولنان دشمن عليه نه
 مخصوص اولسه بيله اشبودره بگري اردوي مذ كوري
 مطلقا كندى عليه لرينه اولق اوزره تلق ايدى جگري
 دركار ايدى . بوندن ماعدا اوزمانه قدر الزان نظام
 جديد افرادى هب اناطوليدن و برازده استانبولدن
 النوب هنوز روم ايلي طرفلرنده نظام جديد اصلا
 اجرا اولنماش بولنوب اوزمانه كوره قرعه اصولده
 اولمديغندن اهالينك اولاديني دوشيرمه صورتيله
 طولامق هر كسي بيزار ايلر ايدى .

بناء علی ذلک روم ایلی دره بکاری اردوی همایون
 نك صوفیه به سوقندن پاك زیاده قوشقولاندقیری کبی
 بونلراهایلی دخی «ایشته سلطان سلیم سزك اولاد کزی
 زور ایله نظام جدیده اله جق ارتق عمرلرینك آخرینه
 قدر چوجق قمر کزدن محروم قاله جقسکز!» دیه قشقرتمغله
 بتون روم ایلی برده شته دوشمش ایدی.

تاریخك تدقیقات واقعہ سندن ا کلاشلدیغنه کوره
 بو قوشقولانمندن بوفساددن یالکز روم ایلی اعیانی ده
 مسئؤل دکل ایدیلر. بلکه درسه ادا تده بولنه رق نه
 نظام جدیددن نه ده سلطان سلیم حضرتلرینك سائر
 اصلاحات مجددانه لرندن اصلا خوشلانمیان و بونلری
 کندلی اغراض و منافع شخصیه مستبدانه لرینه مانع
 کورن خائئر دخی نظام جدیدك وجودینی اورته دن
 قالدیرمق ایچون روم ایلی طرفلرینی بو صورتله افساد
 ایشلر ایدی.

حاصلی اردوی همایون هنوز سیلیوری یه واصل
 اولور اولز بتون روم ایلی اهایلیسی نظام جدیدی
 کندلی مملکتلرینه اوغرا تمامق ایچون ایاقلا نمشله وهر
 طرفك حاصیلری فوج فوج ادرنه یه دو کولوب طو

پلانه رق اورادن مقـاومتـه قرار ویرمـشـلر ایدی . شو
 حالده کنـدیـلرینه نصیحت ویرمک ایچون طرف اشرف
 حضرت پادشاهیدن کوندر یلان بعض رجال دولت
 علیهنه هجوم ایدرک بر طاقنی اعدام ایتک صورتیه
 برشدتلی . جزا و تأدیه لزوم واستحقاق کوسـتـردکاری
 کبی یکریمی درت بیلک نظامیه عسکرینک بونلری ایلک
 هجومده بر باد ایده جـکـرینه هیچـده شبهه ایدلـامـش
 ایسهـده بویله بر تأدیه مراجعت اولنسه ایشته اصل
 اوزمان استانبول مفسد لرینک نشریاتی موجبـه اردوی
 همایون روسیه یی ترصد دکل روم ایلی اعیاننی تأدیه
 مأمور اولدیغنی خلقه اثبات ایتش اوله جغنی سلطان
 سلیم حکیم حضرتلری دریش ایلیه رلک در سعادتدن یکی
 مأمور لر ارسالیله غلیان افکاری تسکین طریقنی ترجیح
 بیورمشلر ایدی .

کرک استانبول مفسد لرینک و کرک روم ایلی مأمور
 لرینک شو حرکتلری سلطان سلیمـدن بشقه هانکی
 پادشاه اولسه عادتاً دوچار یأس وفتور ایلیه جـک
 وقایعـدن ایدیهـده بوزمان ناپولیون بونابارت فرانسهـده
 ایمپراطور اولوب روسیه یه اعلان حرب دخی ایلش

وروسیه دولتی ایسه دولت علیه عثمانیه نك فرانسه
ایله اتفاقدن شبهه نهرک شاید سلطان سلیک نظامیه
اردوسی بر هجوم کوس تره جک اولورسه جبهه دن
فرانسز لک هجومه مقابل جناحدن دخی عثمانلیرک
هجومی روسیه ایچون عظیم بر پریشانلیغی موجب
اوله جغنی کورمش بولمغله کنیدیسی بزدن اول طور ا-
نهرق خوتین واق کرمان قلعه لرینی دفعه اوروب المش
واسماعیلی دخی محاصره ایلش ایدی . بناء علیه بویله
ال بیوک برتهلکه یه مقابل ادرنه عصیان ایله اشتغاله
وقت اولدیغی کبی انلردخی سلطان سلیک حرکت
عسکر یه سنده کی حکمتی اکلامش بولند قلدن ارتق
دولت علیه روسیه یه قارشو تدارکات و تدایره حصر
همت ایلدی .

هله چوق شکر اسماعیل محافظه سنده بولنان
پهلوان اغانک همت قهرمانیسی اسماعیلی محاصره یه کلان
روسلری پوسکورتمکه کفایت ایلدی کی یاسبان
اوغلی دخی بواره لقی و دینده وفات ایتمکه انک غائله سی ده
برطرف اولمش و ترسینکلی اوغلی دخی برچنکی آشفته -
سنک عشقه قر بان اوله رق معدوم اولدقن صکره

روسیچ اعیانلغی مؤخرأ صدر اعظم دخی اولان مصطفی
 بایراقداره توجیه اولنوب اوایسه صداقت قدیمه سندن
 دولت علیه یی تأمین انیش بر آدم اولمغله در حال تدارک
 ایلدیکی اردو یی مستحجاباً بکشرش اوزرینسه بالهجوم
 روسیه نك صر بلیلر ایله برلشک ایچون صالار دیغی
 بر قول اردو یی بر باد انیش ایدی . بو حالر سلطان سلیم
 حضرتلر نيك امیدلر بنی آرتدیره رق هر طرفه اصرلر
 و عسکرجه و اچقه جه معاونتلر یتشدیرمکله اسماعیلده
 پهلوان اغا روسیه یی بردها بوزنجه ارتق افکار عمومیه یه
 دخی بیوک بر اعتماد کلش ایدی .

اوزمان فرانسه ایله دولت علیه اره سنده صروی
 اولان اتفاقه کأنجه :

واقعا ناپولیون بو اتفاق اوتهدنبری دولت علیه یه
 تکلیف ایلر ایدیه ده بر درلو قبول ایتدیره مز ایدی .
 قبول ایتدیره مامسنت سببی دخی مصرجه ممالک دولت
 علیه یه کوسترمش اولدیغی طمع ایدی . فقط بودفعه
 ناپولیون روسیه ایله محارب اولدیغی بر زمانده دولت
 علیه دخی روسیه یه مجبوراً اعلان حرب ایدنجه فرانسه
 و دولت علیه بالطبع متفق اولش بولندیلر . واقعا

براره لقی انکلتره دولتی فرانسه ایله اولان شوا اتفاقزی
 بوزمق ایچون اعمال دسائیس سیاسییه باشلادی ایسه ده
 دشمنمیزی تاقلبکاهنده اشغال ایتدکده بولنان برمتفقدن
 آیرماق ایشمزه کلمینجه انکلتره دولتی دخی حدتله رکه
 مادتا ابراز آثار خصوصته باشلادی . اما سلطان سلیم
 حضرتلرینک اشبو فرانسه اتفاقنده کی ثباتلری حقیقه
 موافق حال و مصلحت ایدی . زیرا ناپولیون تاموسقووه
 اوزرینه طوغری یور ییکندن بزی روسیه نك پنجه
 قهرنده از یلکدن منع ایچون بوندن بیوک بوندن انفع
 هیچ برمتفق هیچ بر حرکت عسکریه اوله مز ایدی .
 انکلتره دولتی بزی فرانسه اتفاقندن جبراً آیرماق
 ایچون کلیبولی بوغازی خارجه بردونما کوندروب
 بودونما ایسه استانبولده کی انکلیر سفیرینک او یله
 اولور اولمز انکلیر لوده دخی اودرجه سی نادر کور .
 یلان جنتنه قایلوب شد تلجه برلودوس روز کاری ایله
 وهله بوغازدن کیری و یردی .

بوخبر استانبوله کلمجه یه قدر انکلیر دونمائی دخی
 اطه لر جهته کورلمش ایدی . استانبول ایسه ذاتاً
 سلطان سلیم حضرتلرینه اسناد ایده چک مسؤلیتله

ارامقده بولنديغندن ارتق دونمانك بوصورتله وروندن
 تلاشه دوشن اهالی بی برقاتدها اغضاب ایچون مفسدله
 عظیم بر میدان آچلمش ایدی . سلطان سلیم حضرتلری
 ایسه حلیم و حکیم اولدقلری قدر جسور و قهرمان دخی
 بولندقلرندن انکلیز لرك اشبو حرکت کستاخانه سندن
 طولای اصلاجسار تله رینی غائب ایتمک کدن ماعددا
 دونمانك بو حرکتی قواعد حر بیه کلیاً مغایر اوله رق
 کندی کندیسینی برمه لکه یه القا دیمک اولدیغنی ده
 کوروب در حال استانبول سواحلنی استحکام التمه المعه
 مسارعت کو ستر مشلدر .

سلطان سلیم حضرتلرینک بو وقعه ده کو ستر دکاری
 غیرت فدا کارانه بر درجه بی بولمش ایدی که استانبول
 اهالیسی بالنفس پادشاهک کندینی اورتیه آتدیغنی
 کورنجه « پادشاه بوغیرته ایکن بز نه کونمه
 طور یورز ! » دیه علما و اصناف طاقنه وارنجه یه قدر
 جملهی غیر تلمدیلر . بتون اهالی قازمه و کور که
 طور انوب چند کون ظرفنده یدی قوله دن سرای برونه
 وقاضی کویندن قز قوله سینه قدر تکمیل سواحل
 استحکام التمه الهرق طو پلرینی ده تعبیه ایلدیلر . یکی

مهندس لک بو عملیاتده کوسترد کاری مهارتی استانبولده
بولنان فرانسه مهندس لری دخی تحسین ایدرلرایدی .
استحکاملر خلاف مأمول برقاج کون ظرفنده دوناتلد .
قدن صکره ینسه تکمیل اهالی سلا حله رق طایه لر
اوزرنده طوب باشلرنده مدافعه یه حاضر و آماده
بولندیلر .

برده بواره لوق بروقعه ظهوره کادی که عادتاً
هیچ برملتک تار یخنده امثالی یوقدر . شویله که :
استانبولک بالقجی وقایقجی طاقندن بر بلوک
کنجملر برقهوده اوتوررلرایکن مصاحبه ولطیفه
یوللو ایچلرندن بریسی « آیه شو انکلیر کیلرینک
قارشوعزده شویله جه طفره فروش اولملری بزه عیب
دکلیدر ؟ » یوللو اورتیه برسوز آتهرق دیکر بعضلر
ینک « آدم سن ده ! انلردن نه اولور ؟ درت بالق
قایغی ایله کیدر انلرندن کیروب اوستلرندن چیقارز ! »
یوللو ویردکاری جواب درحال نیوک بر بحث صو .
رتنی الوب « کیدرز کیده مزسکز ! » درجه لرینه
قدر یو کسلش اولان سوز اوزرینه برقاج یوز بالقجی
قایقیره را کباً سرای برونی طولاشمشراییدی . بونلر

وهلةً انکیر: دونمائی اوزرینه صالدیروب کیلردن
یکدیگرینه کیدوب کلان صندالری همان اولامغه
باشلائیحه انکیر لر شاشردیلر قالدیلر • قایقچیلرک با-
لقچیلرک شو کوسه تزدکاری جرأت حقیقه انکیر
مجنونلرینک دخی عقللرینی باشلرینه کتوره جک بر
حرکت فوق العاده ایدی • غریبدرکه قوجه بر دونما
بالقچیلرک ید صیدلرینه یکن صندالرینی قورتارمقدن
عاجز قالدی • استانبولده بولنان سفن همایون دخی
بشکطاش پیشگاهنده حاضر لاقمغه بولندیغی انکیر •
لرک معلومی اونیجه شو حالده مرمره دکزینک کندیلری
ایچون برمه لکه اولدیغی اکلایه رق تکرار قلعه
سلطانیه یه طوغری یلکن قالدیردیلر •

شو قدرکه انکیر: دونمائی بودمغه بوغازدن
چیقارایکن عثمانلی محافظلرنده کیردکاری زمان کور-
دکاری غفلتی کورمدیلر • قلعه لر جهنم کی اتش یو-
سکورتهرک انکیر لرک ایکی کیسی کاملاً یانوب محو
اولدقدن ماعدا قصور کیلر دخی عادتا بردها هیچ بر
ایشه یرامیه جق مرتبه لرده خر پالندیلر •

اسماعیلده روسیه یی بوزمش اولدیغی یوقاروده

بیان اولنان پهلوان اغا کرچکدن بر قهرمان قاتل کسپله رک
 روسیه یی زرده یتشدی زرده راست کتیردی ایسه
 اوروب بوزهرق تمام اون بش دفعه دهه ا مظهر غلبات
 کلیه ایله سرفراز اولمشیدی . هله بایر اقدار مصطفی
 پاشا بکر شده ایکن روس بحق ایله طریق مر اسله سنی
 کسمک ایچون بکرش و روس بحق اره سنده واقع یر کوکی
 واسلا بوزیا قصبه وقریه لرینه طوغری یورو یوب نقاط
 لازمه یی طومش اولان یکی بر موسقوف قول اردوسی
 اوزرینه وزیر مشار الیه بغته اویله شدتلی بر هجوم
 کوسترمش ایدی که روسلر عادتا پرا کنده و پریشان
 اوله رق یاشه طوغری فراره مجبور اولمشلر ایدی .

بووقوات و موقیات هب ۱۲۲۱ سنه سنده
 وقوعه کله رک ایرتسی ۱۲۲۲ سنه هجریه سنده دخی
 سلطان سلیم حضرتلری اشبو موقیات حربیه سنک
 نتایج قطعیه سنی اله کتورمک اوزره طونه جهته یکیدن
 براردو سوقیه برابر انکلیر لک تسلط اتدن سواحل
 و جزایر بحر سفیدی قور تارمق ایچون دخی آق دکزه بر
 دو نماجیقار مغه مسارعت ایلش ایدی . حیفاه که محاربات
 و غلبات واقعه ده نظام جدیدک یرارلغی جمله عندنده

نه درجه تحقق ایلش ایسه یکچیرینک ارتق هیج برایشه
 یرایه مامق درجه سنده کی انتظام سزلغی و قور قافلغی
 دخی کندیلرینه وارنجیه قدرجه نظرنده اول صورتله
 تحقق ایتمکه بونلر کندیلری طرفندن کوستر یلان اشبو
 سببیتلر اوزرینه اوجاقلری منقرض اولور ایسه رتبه
 و معاشلرندن محروم قاله جقلرینی دوشونه رک نظام
 جدیدی ایجا اادنن طولایی سلطان سلیم حضرتلری
 علیهنه علنادیش بیله مکّه باشلامشیرایدی . حالبوکه
 دنیانک هر طرفنده افکار جدیده اصحابی و ترقیات
 متجددانه غیرتکارانی هر زمان افکار عتیقه اربابنک
 حسد و رقابتنه دوچار اوله کلدیکی هرملت تار یخنک
 شهادتیه معلوم اولوب استانبولده دخی رتب علیه بی
 حائز اولدیغی حالده جهالتده هر بری اوزرا بوجهله
 بدل اولان بر طاقم علما ایله رتب و مواقع ملکیه بی حائز
 اولدقلری حالده وظیفه مأمورله رنجه سرقت و ارتکاب
 و ظلم و معاصیدن بشقه بر فکر اجمالیلری بیله بولنیهان
 سائر مأمورین دخی یکی یتشمه لر چو خالوب ترقی ایدرلر
 ایسه میدان کندیلرینه قالمیه جغنی دوشونوب یکچیریلر
 ایله سوزی بر ایلدیلر و دولتک بویله الک نازک واک

مهم زماننده قباجی اوغلی نام ملعونك ریاستیه
 بوغاز محافظی اولان یماقلر میاننده بر عصیان اوجاغی
 پارلاتوب بوفسادی در حال یکپیری اورته لرینه ده
 سرایت ایتدیره رك استانبولك هر طرفی هرج و مرج
 ایلدیلر .

بوزمان استانبولده موجود اولان نظام جدید طاہور لری
 تأدیب عصاته کافی اولدیغندن سلطان سلیم حضرتلری
 اکر عسکره آتش امرینی ویرمش اولسه ایدی ادبسنز
 لك کله لری هوایه اوچور یله جفی هیچ شبهه سنز ایدی .
 انجق اول حکیم ذیشان قان دوککسنزین دفع فسادی
 الترام ایلدیکندن بعدده ایجابنه باقملق اوزره نظام
 جدیدی الفعا ایلدیکنی اعلانه قدر تنزل وفدا کاری بی
 کوزه الدیرمش ایکن عاصیلر بالاخره سلطان سلیمك
 پنجه قهرندن امین اوله مدقلری جهته یله تسکین غیظ
 و شدت ایده مدیلر . بو حالده دخی نظام جدید اصدقاسی
 و افکار جدیده ار بابی اولان اصحاب حمیت عاصیلر ایله
 مقاتله بی سلطان سلیمه تکلیفدن کیر و طور مدیلر و هر بری
 او غور همایونلرنده جان و باش فدا ایده جکلرینی بحق
 تأمین ایلدیلر ایسه ده سلطان سلیم حضرتلری « اکلا-

شلمدی که انلرك ایستمدکری بن ایمشم • بنم ایچون امت
محمدك قانی دو کولسون • درت کونلك اقبال حکومتك
بویله قانلر بهاسنه صلتون انه جق دگری یوقدر «
یوللو برمطالعه حکیمانہ و قناعتکارانه ایله انخلاء
راضی اولدیلر •

ارتق بو ساعتمدن صکره بتون ار باب همت
وحیتك قان اغلایه جققری قاره کون کلمش اولدی •
فکرواملی تجدید قوانین و تأیید بنیان دولته منحصر
اولان وزمان سلطنتنه کنبجه یه قدر ترقی پرورلکده
هیچ بر امثالری کورلماش بولنان اویله بر پادشاه
ذیشانہ هیچ اولما یسه دشمن دین و دولت علیه قزانمش
اولدیغی بونجه غلباته حرمة اولسون اصلا روی
تعظیم کوسترمکسزین بر محبس حقارتی قرارگاه تعیین
ایلدیلر •

سلطان سلیم حلیم و حکیم حبسندن صکره کرچه
سلطان مصطفی رابع حضر تلی مقام سلطنت و خلافت
کتورلماش ایسه ده سلطان مشارالیه حضر تلی قبا -
جی اوغلی و عونہ سنک النده برواسطه اجرادن عبارت
قالوب یوقسه اصل حکم و حکومت اشقیای مذ کوره -

نک کیفرینه تابع قالمش ایدی . ارتق بونک اوزرینه
سلطان سلیم حضرتلرینک بونجه سینه لرده وجوده
کتورمش اولدیغی اصلاحات ملیکیه وعسکریه نک
کافه و کاملاً کائنم یکن حکمنی المش اولملری محتاج
ایضاح کوریلورمی ؟

هله نظام جدید حقنده کی معامله لری عادتاً بر
معامله و حشمانه اولمش ایدی . زیراً نظام جدید
اوجاغنی یالکزلغو و محو ایتمکله قالمیوب قیافت نظامیه ده
اوله رق زرده هانکی ضابط و نفری کوررلر ایسه
یکچیر یلر در حال اعدامه یوررلر ایدی .

اشبو عاصیلرک شو یولده کی حرکتلری اکر یالکز
تنظیمات جلیله سلیم علیهنه اولوب ده کندیلری
دولتمزک اصول عتیقه سنه عودت ایلمش بولنسه لرایدی
نه ایسه نه ایدی .

زیراً اصول عتیقه مزده بر فئالق و ارایسه اوده
نظامات موجوده سنه کیسه نک رعایت ایتماسندن
عبارت اولوب بونظاملره بحق توسل ایدلدیکی زمانلر
دولت علیهنکینه اعداسنی تهدید ایلدیکی دفعه اتله
کورلمش ایدی . انجق عاصیلر قوانین و نظامات

جدیده بی محو ایتمکله برابر دولتک قوانین عتیقه سنه
دخی عودت ایتمیوب کنددی کندیلری هر نه بی ایسترلر
ایسه انی اجرایه باشلادیلر .

الحاصل خلع سلطان سلیمدن ایکی اوچ آی صکره
احوال دولت او یله بر صورت پیدا ایلدی که استانبو-
لده یکدیگری نه سوز پکیرر ایکی اوچ آدم یله متفق
اوله مدقلری کبی طشره والیلر ینک دخی هیچ رییسی
استانبولی طانییه رقی جمله سی برر مستقل حکمدار
کسلادیلر . واقعا بولردن بعضیلر ینک معیتنده یکر می
او توز ینک قدر عسکر بولندیغندن ا کردولت بر هیئت
متحدہ صورتنده بولنسه ایدی اعدای خارجیدینه بر
درجه یه قدر دوچار اندیشه ایدیله بیلور ایدی . فقط
والیلر اشبو قوتی محضاً یکدیگری علیهنه وباخصوص
استانبوله قارشو الده بولندیر دقلرندن بوقوتلر دولت
ایچون مفید اوله مدقدن فضله بالهکس مضر دخی ایدیلر .
بناء علیه دولت علیه عثمانیه علیهنده کرک علانی
و کرک کیرلی برچوق امللری بولنسان دولتلر او یله
برطور تهدیدالیدیلر که معاذ الله تعالی بش التی عصر ارق
دولت علیه نک کلیاً رفع و ازاله سنه قدر وارمق اساس
مقصدلری اولدی .

اورته لغك بويله بتون ار باب حيته قان اغلاته جق
برحالی بولسی اوزرینه رجال دولت علیه میانده
تحسین افندی ورامز افندی کبی ار باب حیت « یالاکز
اغلامق پاره ایتمز • دولتی بوتها که دن قوتار ملی •
جمله مز بودولنک نان و نعمتیه وجود بولدق » دیه بر
غیرت ایدرک والیر میانده روسجق والیسی بایراقدار
مصطفی پاشانک سلطان سلیم حضرتلری حقنیده کی
محبت و عبودیتی شایان امنیت برشی اولغله تحسین
ورامز افندیلر علمدار ایله کیر لیجه مخاربه باشلادیلر •
علمدار مصطفی پاشا ذاتاً کندیسنه تکلیف اولنه جق
اولان بومثالو خدمات صادقانه بی ایفایه مستعد اولد •
یغی کبی اواره لق روسیه نك بر قول چرخه جیسی
افلاق طرفلرنده علی پاشا قومانداسنده بولن ان بزم
چرخه جیلری بوزمش اولدیغی کبی کلیبولی بوغازینه
قدر کیش اولان یکر می قطعه سفاین جسمه دن عبارت
دوننامی اوزرینه کیدن اون سکر قطعه کیلر مز دخی
بوز یله رق استانبول فنا حالده دهشته دو شمش اولدیغندن
شوتها که دن قورتلقی ایچون استانبول اهالیسی دخی
رامز افندی کبی ار باب حیتك قوره جغی بر تدبیری
حسن تلقی به حاضر و مهیا ایدیلر •

تحسین ورامن افندیلر ایله رفقاسی اکر تشبثات
 واقعدهلرینی ارباب فسادده ذره قدر اشراب ایلمیش
 اولسهلر و یا خود استانبول اهالیسی بونلرک
 جور و ظلمدن شکایت یوزی کوسه ترمش بولنسهلر
 ایدی معاذاه تعالی استانبول ایچنده برقتل عام وقوعه
 کله چکنه هیچ شبهه یوق ایدی . زیرا ظالمیر ذاتاً هر
 کون ایستدکلری مأموریتلری ایستدکلری آدملره بالتو-
 جیه سلفلرینی نفی و حتی قتل ایتمک کبی شدتله ایله
 عالمی قاصوب قاوردقلرینه دخی قناعت ایده میهرک
 بتون ارباب ناموسک اوزرینه بردن هجومله قتل نفوس
 ونهب اموال وهتک عرضه ایستدکلری کبی قویوله-
 مدقلرینه تأسف ایدوب طور مقده ایدیلر .

شو قدر که حیت عثمانیه و محبت سلمیه اربابی کندی
 ایشلرینی غایت کیرلی طوطدقلری جهتهله تحسین
 ورامن افندیلر ایله مؤخرأ بونلره التحاق ایدرک آنلردن
 زیاده ابراز آثار حیت ایتمکده بولنسان غالب و رفیق
 افندیلردن مرکب قومیسونک علمدار ایله مخبره سنی
 مستبدان اشقیانک سزه بیلسی شویله طور سون
 مستبدین مر قومه بوزواتک کافه سندن امین اوله رق حتی

غالب افندی رئیس الکتاب و تحسین افندی چاوش
باشی اولوق کبی حقلرنده توجیهات جدیده دخی و قو-
عه کش ایدی .

بونلرلر شو یکی مأمور یتره یکملری علمدار واسطه
سیله ترتیب ایتیکده بولندقلری انقلاب کلی مقصدینک
حصولانی بر قاتدهما تسهیل ایلدی . ذوات مشار
الیهیم بر یاندن روسیه ایله شرائط مصالحه یی مذاکره به
قویله رق واقعا اشبو مذاکراتدن هیچ بر نتیجه
مادیه حصوله کله میه جکنی کندیلری دخی بیلورلر
ایلدیسه ده مستبدینی بو صورتله اشغال ایچون مکالمات
واقعه ده بر طور جدی کوسه تر لرودی . دیگر طرفدن
ایسه ادرنه جهت لرنده بولنان بعض یکچیری و صنوف
سائره اورته لرینک درس عاده عودتی قارغشه لغنه
قاریشه رق علمدارک دخی برالای روم ایلی عسکری
ایله استانبوله کلمسی قرارلش دیر دیلر بو حرکتی دخی
او قدر منتظم اجرا ایلدیله که علمدار مصطفی پاشا الی
التمش بیک روم ایلی افرادیله تاستانبوله صو قولد .
یغی حالده نه مقصد ایله کلمدیکنی خلا فکیر اندن هیچ
بر یسی استشمام بیه ایده مامش لر ایدی .

مشارالیه استانبوله کلدکدن صکره ایسه آرتق
 اشقیانک قلہ دانمغه بیله مجالی قالمق سزین الاول رئیس
 اشقیا اولان قباچقی ملعوننک باشی کسلش وانی متعا
 قب مصطفی پاشا واستانبولده کی طرفدارانی سرای
 همایونه قوشه رق محبوس بولان سلطان سلیمی تکرار
 اجلاس ایتمک اوزره ایکن اول پادشاه عالیجاه ظلم بر
 بالای ظلم اولق اوزره شهید ایدیلور بجه استانبولک
 حالی وهلة وبسبتون دکشمش ایدی .

سلطان سلیم جنتیکانه صداقت فوق العاده لری
 ودولتمزک تجدیدات نظامیه سی خصص و صنده غیرت
 خارق العاده لری آثار فعلیه سیله ثابت اولانلر اکر
 اغیار و اعدایه سر ویرمامک ایچون او قدر اهتمامی
 طاور انمش اولسه لر ایدی سلطان سلیم حضرتلرینه
 یدظم ایله قسلیق احتمالی دخی منع ایدیله یلور ایدی .
 زیرا بندگان سلطنت ترتیبات واقعیه سیله سزه جک
 اولور لسه سونجولرندن طولایی هر کس کندی سردا .
 شنه افشای راز ایده ایده بالاخره سر مکتومک بسبتون
 فاش اوله جخی خوفیه سلطان سلیم حضرتلرینه بیله
 هیچ برخبر کوندر مامش لر ایدی . ذات حضرت

سلیمی کبی حکیم ومدقق برپادشاه کندیسنی قور تارمق ایچون ایدیلان تدابیردن خبردار اولسیدی البته محبسلی دروننده دخی حین حاجتده کندی کندیلرینی برایکی ساعتجق اولسون مدافعه ایده بيله جك بر چاره تدارك ایدرلر ایدی . ذاتاً تکرار اجلاسلی احتمالی ايله وقوع شهادتلی ارمسندن دخی انجق ایکی ساعت قدر زمان کچمشدر .

هر نه ايسه تقدير ربانی بويله ایش ديمک مقتضای ادب و تسلیمیتدر . حتی خونه سلطان سلیم حضرتلر نندن صکره سلطان محمود ثانی حضرتلرینی دخی معاذالله مغدوراً شهید ایتک تدابیرینه شتاب ایلشدر ايسده مشارالیه حضرتلری حرجه کندیلرینی مدا فعه یه مقتدر اوله بیلشدر .

۱۲۲۳ سنه سنده وقوعه کلان بویوم تبدل استا نبولجه اوقدر بیوک برولوله ودغدغه یی موجب اولمشدر که امثالی هیچ بر تاریخده کوريله مز . بر طرفدن اشقیما طوتولد قجه کسیلور بر طرفدن بتون استانبول حضرت سلیم شهید ایچون قان اغلر دیگر طرفدن سلطان مصطفی رابع بر سنه مدت حکومت سورمش

ایکن حکومت و سلطنتیدن هیچ برشی اکلایه مامش
 بر طالفین پادشاه اولدیغی حالده محبسه قالدیر یلمور
 و بر جهتمدن دخی سلطان محمود ثانی حضرت تلی
 هنوز آداب ملوک و احوال در سعادت نه اولدیغی
 بیلیان علمدار مصطفی پاشا و معیتی چیتاقلرینک دهشت
 افزای قلوب اولان نمایشلری آراسنده تخت خلافت
 و سلطنته اجلاس اولنیور اییدی . نهایت یکرهی اوچ
 یکرهی درت یا شلرنده بولنان شهزاده جوانخت سلطان
 محمود ثانی حضرت تلی تخت شوکت بخت عثمانیده
 بتأییده تعالی قرار قیلدقدن چند ماه صکره سلطان
 مصطفی حضرت تلی دخی محبوس اولدقلری محمله
 و اصل رحمت رحان و انجه ارتق اورنه یرده وسیله
 قنده اوله جق هیچ برشی قالدیغندن دور اندیشانک
 قلوبنه اطمینان کیشدر .

سلطان محمود ثانی حضرت تلینک شهادت سلطان
 سلیمی انتقام ایدیشلری کر چکدن پک پارلاق بر انتقام
 اولمشدر . جلوس همایون ایله برابر عهده سنه مسند
 صدارتی توجیه ایش اولدیغی علمدار مصطفی پاشانک
 چیتاقلری ایله نظام جدید اوجاغنک بقیه سی سلطان

محمود حضرتلری ایچون پک بیوک بر قوت دیمک اولد .
 یغندن شهادت سلطان سلیم خصوصاً صنده آز چوق دخی
 اولان ملاعینی برر برر بولدوروب جزای سزالوینی
 ویرمشدر . اندن صکره الده بولنان اشبو قوتله سلطان
 محمود حضرتلری نظام جدیدی تکرار احیایه علمداری
 تشویق ایلش ایسه ده روم ایلی خلقی ذاتاً نظام جدیددن
 اورمکده بولنه رق استانبولده یتیم سسکسان بیگ
 چیتاق اجتماع ایلش بولندیغی زمانده بوتشیشک
 تهلکه لی اوله جغی علمدار طرفندن مقام ملاحظه ده
 درمیان ایلدکه اول باول افراد مذکورهنک وطنینه
 اماده وار جاعنه قرار ویرلمش ایدی .

فقط بو قرار دخی مناسب اولدی . زیرا روم ایلی
 افرادی عودت ایلدکن صکره یکچیری علمدار مصطفی
 پاشا علیه ده کی انتقاملرینی المق ایچون اولکنندن زیاده
 هیجانله ۱۲۲۴ سنه سنده بر عصیان چیقارتوب باب
 عالییه هجوم ایلدیلر . اشقیانک کثرتنه نسبتله علمدارک
 قیو خلقی مقاومتدن عاجز قالماغله یکچیریلر باب عالییه
 اتش ووروب قوجه علمداری بو آتش جور ایله کباب
 ایتدیلر .

یکچیرینک بو آزعغلغی اوزرینه سلطان محمود کی
جلادتلی بر پادشاه کندی عسکریله مصالحه یه قدر
تنزل ایلش اولوب ذات شاهانه نک کندی پایتختنده
بو یله هیچ بر نفوذی قالمدیغی حالدده ولایتک بالکلیسه
در سعادتدن قطع رشته مناسبت ایلد کیری کلفت ایضا -
حدن مستغنی قالمشدر .

نظام جدیدک اورته دن قالمسیله برابر یکچیرینک
دخی کوسکون بولندیغی شوزمان روسیه ایچون اک
بیوک بر میدان فرصت اولغله اول صربلیلری ایاقلا -
ندیر مرق بعده کندیسی دخی انلره معاون و مظاهر
چیقمغله معاذ الله تعالی دولت علیه ایچون بر عاقبت
مدهشه عادتاً تحقق ایلش ایدی .

حالبوکه سلطان سلیم فرانسه لویله اتفاقندن
طولایی دولت علیه ایله بیاغی کوسکون بولنان انکلتزه
دخی سیاسته روسیه یه میال و بلکه ده معین ایدی .
شو حالدده سلطان محموددن ماعداهانکی پادشاه اولسه
جنکه ممکن دکل مقتدر اوله میه حق ایکن ارسلان
یورکلی سلطان محمود مقابله دشمندن یوزچو یر میوب
اناطولی وروم ایلی امراسنه او یله امرار کوندردی که

عثمانلی قلبنه مالک اولوب ده بو امر لره اطاعت کوستر-

مامک الکجیتسز لر ایچون بیله قابل دکل ایدی .

بناء علیه ۱۲۲۵ سنه سنده جهان یرندن اوینا یوب

بتون اهل ایمان فوج فوج غزای اکبره رایت کشای

عزیمت اولدیلر . خلقت غلیان و هیجانی بر درجه ده

ایدی که کندیلرینی یالکز روسیه یه قارشو دکل بتون

عالم نصرانیته قارشو محارب و مجاهد عدایلر لر ایدی .

زیرا نیجه زمانلردن بروکاه انکیلر لرك کاه فرانسر لرك

وعلی الدوام روملرک و صربلیلرک خصوصتلی بونلر-

ده کی مقصد بر مقصد سیاسی اولیوب بر مقصد دینی

اولدیغنه هر کسی ایناندر مش ایدی ،

غلیان افکارک بودرجه سندن اکثر یا مضر تلر

کور یله جکی مجرب اینسه ده بود دفعه بالعکس بیوک

بر منفعت کور لمشدر . انکیلر ده دولتی اهل اسلامک

بودرجه غلیانندن نصاری ایچون بیوک بیوک تهلیکه لر

چیقه جغنی بالتقدیر ۱۲۲۶ سنه سنده شدیداً میدان

توسطه آتیه لر ق بکرش شهرنده عقد اولسان بر مجلس

مذا کرده روسیه ایله بر متار که حصولنه سبب اولمش

ایدی .

واقعا بومتار که ایجا بنجه طونه نهر ينك اوته
 طرفندن دولت عليه نك ايليشكى همان قطع اولمش
 و صر بيلر ده نفي تحصيلات و سائر امور قوميه لری
 كندى قوجه باشيلرى يديله رؤيت اولغى طرزنده
 بر امتياز مخصوص و يرلمش ايسه ده بوزمان استانبولجه
 كورلمكده بولسان اختلال و اغتشاش احواله نظراً
 متار كه مذ كوره بالنسبه ضايعات خفيفه دن عدا اولمش
 ايدى .

محمد على پاشا مصرده يالكر و ايلكنى دكل بلكه
 بر نوع ادارهء مستقلة سنى كند كجه تقويه و تحكيم ايليه -
 رك دولت عليه طرفندن اسه ييله جك تهلكه لى بورا -
 لردن على الحال امين ايسه ده هنوز وجود لرى قالماش
 اولان كوله منلر مصر حكمرانلغجه كنديسنه رقيب
 اولدق لردن بونلرك بالكله ازاله سنى امل ايدنمش و بر
 يوم مخصوصده كندى سراينه جلب و جمع ايلديكى
 مملوك لر رؤسا و معتبرا ننى كندى ادملرى واسطه سيله
 على الغفله باصديرتوب معيتلرى خدمه سيله برابر مقدار -
 لرى درت يوزى تجاوز ايليان بو خلقك عمومى اعدام
 انديرمش ايدى .

شو و قعۂ مدہشہ اوزرینہ مصر و حوالیہ سہندہ
بولنان بیک نفر قدر مملوکار سعید طرفلرینہ چکیلوب
اورادہ کندیلرینہ بردوزن و یرمکۂ چالشمشلرایسہدہ
محمد علی بونلرک ارقہ سنی براقیہ رق بر محامدہ صیقشدہ
یروب جملہ سنی برہ قدر قیرمش و اندن صکرہ مصر دہ
کندی دیشنہ طیانیہ جق فرد افریدہ قالماشدر .

محمد علی نیک اشبواحوال و حرکاتی سلطان محمودک
نظر دقت و دہشینی جلب ایش ایسہدہ بر طرفدن
روسیہ غائلہ سی و دیگر طرفدن استانبول و ایالاتک
احوال اختلالیہ سی دولت علیہ عثمانیہ بی تحملدن
خارج بر درجہدہ اتعاب ایشکدہ ایکن بوشغولیتلرہ
ضمیمہ اورتہ یلہ بردہ مصر مسئلہ سی چیقار مامق ایچون
صبر و سکوتہ مجبوریت کورمش ایدی .

بکرش متارکہ سی اگرچہ روسیہ نیک اچیقندن
اچیغہ حرکات حربیہ سنی منع ایش ایسہدہ صربلیلر
عصیان و مهاجہدن کیرو قالمیوب بکرش متارکہ سی
بونلری بر قاندہا شمارتدیغندن ۱۲۲۸ سنہ سندور یلسلری
بولنان قرہ یورکی باشنہ اولکنکندن زیادہ جمع ایلدیکی
حشرات ایلہ تکرار عصیان ایش ایدی .

واقعا روم ایلی بکارینه و یریلان او امر و یتشد.
 یریلان امداد اوزرینه صرب اشقیاسینه بودفعه پک
 شدتلی برسله تأدیب اورلمش و قره یورکی اوسستر یا
 طرفلرینه قدر قاجیرلمش ایسه ده اندن صکره اشقیانک
 خوشونتنی کسمک ایچون برازمه تدلانه حرکت لازم
 کور ایکن روم ایلی بکاری بالعکس راست کتور.
 دکاری صربلیلری آصوب کسمکه و برازده یغما کرلکه
 قویولش اولدقلرندن بونلر بو دفعه دخی میلوش
 او بره نوویج اسمنده بررئسه اتباعاً و صولک درجه.
 لره قدر مأیوساً بر عصیان چیقاردیلر که هرزه ده روم.
 ایلی بکارینی راست کتوردیلر ایسه جان فدا سنی
 کوزه آلدیره رق ییلدیرم کبی صالدیردقلرندن غلبه یی
 دخی کندیلری قازاندیلر.

سلطان محمود حضرتلری صربلیلر ایله محاربه ده
 دوام ایتک بالاخره روسیه لی به بتکرار میدان او قومق
 دیمک اولدیغنی ا کلایه رق اشقیای مرقومه نك امتیا.
 زاتنی توسیع و کندیلرینی ارضایه مجبور اولمشدر . مؤ.
 خراً صربلیلر استقلالرینه قوت و یردجکه قره یورکی
 ایله میلوش خاندانلری صربلیلرک ایکی خاندان حکمرانی
 صورتی ده آلدیلر .

۱۲۲۹ سنه سنده صربیہ عصیانلرینه بوصورتله نهایت و یریلوب حالبوکه اندن صکره روم ایلی احوالنجہ الہ زیاده نظر دقت و اہمیتی جلب ایدن بر ماده دخی تپہ دلنلی علی پاشا مسئلہ سی ایدی .

علی پاشا یانیہ و الیسی ایکن فرانسزلرک ادریاتیق سفرلری و انکلیزلرک دخی اورالہ اہمیتلری حسیدیلہ بر چوق فرانسز و انکلیز رجالی ایلہ مناسبت پیدا ایلش اولدیغندن بونلر طرفندن کوردیکی تشو یقلر اوزرینہ اودخی بر طور استقلال پیدا ایلش و بتون طوسقہ لغی کندی حکمی التہ آلدقندن ماعدایو اش یو اش مورہ بی و شمدیکی یونانستانہ تابع اولان ہر طرفی دہ تحت استیلا یہ صوقش ایدی . ۱۲۳۰ سنہ ہجریہ سنہ انکلیزہ نک جزایر سبعہ یونانیہ یہ اطالہ دست طمع ایتسی اوزرینہ در سعادتدن امرلر کوندلر یلہرک علی پاشا نک نظر دقتی آچملغہ غیرت اولمش ایسہ دہ علی پاشا دولت متبوعہ سنہ کوسترہ جکی صداقتی بالعکس دشمن دولتہ کوسترمک جہتنی ترجیح ایلہرک بوا مرلری انکلیز امیرالارینہ بالارائہ انلر ایلہ دادتا آچقندن آچیفہ ربط رابطہ اتفاق ایلش ایدی .

سلطان محمود حضرتلری علی پاشانک تر بیه سنی
و یرمک اوزره بعض تدابیر دوشونور ایکن صر بلیلر
طرف دولت علیه دن یالکز امتیاز ینک توسیعی ایله
اکتفایده میهن و اورو پاچه اوستر یاوروسیه وانکلتزه-
نک معاونت مخصوصه لوی انضمام ایدرک یالکز بعض
قلع و مواقع حربیه عساکر عثمانیه محافظه سنده قا-
لمق شرطیه عادتاً مستقل بر امارت صورتنی آلدقلر-
ندن سلط-ان محمود حضرتلری بو بلیه بی ده هضم
ایتمک مجبور یتیه علی پاشانک تر بیه سنی تأخیره مجبور
اولمشیدی زیرا تمه دلنلینک قوتی یالکز بر والیدلکدن-
ده عبارت اولیوب پارغه کبی قوجه بر قضای چفتاک
نامیه جزایر سبعه حکومتندن اتچه سیله مبايعه ایلد-
کدن ماعدایانیه و یونانستانی دخی عادتاً کندیسنه مالیکانه
اتخاذ ایلیرک عظیم خزینه لرجع ایتیش و بو خزینه لر
ایله غایت مکمل برده اردو وجوده کتورمش ایدی •
حالبوکه دولتک غائله سی یالکز کندیسندن ده عبارت
دکل ایدی • اوته طرفده مصرده محمد علی پاشا عادتاً
حکمدار لغی قوره رق مصرک قوه بریه و بحریه سنی
اتمام ایلدیکی کبی و هایلردخی حجاز طرفلرینی کلیاً

اس-قیلا ایلیه رك-سلطان محمود حضر تلی بونلردن
هانکیسنگ اوزرینه دست تأدی بی قالدیره حق اولسه
عاصیرك قوتی کندی قوتنه فائق چیقہ جغنه شہہ
ایتمورایدی .

ایشته بویله برزمانده سلطان سلیم حضر تلی ننگ
نظام جدیدار دوسی الده بولنسه ایدی عاصیرك كافه سنه
مرام اکلاتیله جغی شہہ سزایدیسه ده یکچیری اشقیاسی
بایراقدارلر حوفا تندن صکره ارتق بتون بتون جه-انه
تحکم ایلش اولدقلرندن نظام جدیدك اسمی دخی اونو-
تلیش ایدی .

نهایت سلطان محمود ثانی حضر تلی مصر و الیسی
محمد علی پاشا ابله اوغلی اولوب کندیسنه سر عسکرلک
ایتمکده بولن-ان ابراهیم پاشایی وهابیلرک تربیه سنه
مأمور ایلدی . بومأموریت او قدر اوسته لقلی برشی
ایدی که اگر محمد علی بونی قبول ایتمیه جک اولورسه
عادتاً عاصی اولدیغی تحقق ایده جک و دولت علیه یه
بویله آچیقدن آچیغه عصیان ایسه هنوز کندیسنی
حکمدار طانیغه الشماش بولن-ان مضر انظار عومیه-
سنده کندیسنی تنزیل ایلیه جک ایدی . بناء علی ذلک

محمد علی بو مأمور بتی قبول ایلدی . هم ده ینه کندی
منافع مخصوصه سنه خدمت ایده بیله جک بر صورت
افراغ ایله ایفای مأموریته باشلادی . کویا دولت
علیه نك عجزی ارتق حرمین شریفینی محافظه مصری
مأمور ایتکی ایجاب ایش کی کورینه رك عموم امت
محمد نظرنده کندیسنی منتدار ایتک اوزره عظیم براردو
ایله حرکت ایلدی .

هر نه حال ایسه محمد علینك بو حرکتی هم وهابی
بلیه سنی قالدیره حق وهم ده مصرک قوتنی تقیص
ایده جک برشی اولغله بالوجوه سلطان محمود حضر -
تترینك عقل و حکمتلرینه دلالت ایدر . انجق ۱۲۳۵
سنه هجریه سنده محمد علی پاشا وهابیلری برباد ایدر بده
بتون ملت اسلامیدنك آفرینی قازاندقن صکره ارتق
بو قدر بیوک بر خدمتی اوزرینه سلطان محمودك کندیسنی
تربیه دن احتراز ایده جکنی نظر دقت ، الهرق مصرده
اوروپا اصول منتظمه عسکریه سنه تطبیقاً براردو و بر
دونما وجوده کتور مکه و مصرک کافه شعبات اداره -
سنی بر اصول مستقله یه تطبیق ایدرک استانبولدن
مصره کیدن مأمور لری کلی احسانلر ایله کندیسنه ربط

ایلد کدن ماعدا استانبول داخلنده دخی بر چوق
 کباری احسانلر وهدیه لرایله کندی طرفنه جلب ایتکه
 باشلادی که شو حال تپه دالنلینک طور مستقلانه سندن
 زیاده سلطان محمود حضر تری نی صیقه مقده ایدی .
 لکن بر کره تپه دالنلی علیهنه فرمان همایون صادر
 اوله رق بهمه حال قفاسنی کسمک ایچون قوه لازمه
 کوندر لمش اولدیغندن انک وجودی اور ته دن قالدیر .
 یلنجه یه قدر مصر والیسنه مدارا ایتک مجبوری
 ایدی .

واقعا تپه دالنلی اوزرینه سوق اولنان قوت ایچه
 بر قوت ایدیه ده مر قومک باشنده کی اردودخی ایچه
 غلبه لک و یانیه قلعه سنک متانتی ایسه یک فوق العاده
 اولدیغندن علی پاشا قلعه یه قپ اندیغی زمان قلعه نک
 فتح و تسخیر ینیه امکان کور یله مامشدر . بو حرکت
 ۱۲۳۶ سنه سنده وقوعه کله رک تمام علی پاشایانیه
 قلعه سنده کی مقابله و مقاومتیله کندی قدرتی تجر به
 ایلد کدن صکره ۱۲۳۷ سنه سنده طوغریدن طوغری به
 اعلان عصیانندن دخی کیر و طورمدی .

علی پاشانک بو عصیانی واقعا مؤخرأ کند یسنک

اعدامیله بر طرف اولمشدر . انجق عصیان مذکورک
 سوء تأثیری مؤخرأ میدانہ بر یونان دولتی چیقارمغه
 قدر وارمشدر . زیرا اوزمانلر بر طاقم روم جمعیات
 خفیه سی جله سی تحت تابعیت عثمانیہ ده بولنان
 روملری استقلال هوسلرینه تشویق ایتمکده بولنه رقی علی
 پاشا ایسه کندیسسی طوسقه لغک دخی روم جنسنندن ویالک
 مذهجه مسلمان اولدیغی بیانیله اکر جله سی برلشورلر
 ایسه هپسی بردن دولتک حکمندن قورتیلهرقی باشلی
 باشلرینه بر حکومت تشکیل ایده جکلرینه روملری اینا -
 ندیرمش و بناء علیه دولته اولان مقاومتده بونلرک قو -
 وتلرندن دخی کلی استفاده ایلشدر .

علی پاشایی مؤخرأ بر تدبیر ایله اعدامه مأمور
 اولان خورشید پاشا ۱۲۳۸ سنه سنده کو یاتپه دلنلیک
 عفو واطلاقنه دائر ساخته بر فرمان همایون ایله
 یانیه کیدرک علی پاشایی بیاغی تأمین ایلد کدن صکره
 اصل اعدام فرمانی اراثة ایدنجه علی پاشا همان طبانجه -
 لره طور انمش ایسه ده خورشید پاشانک معیتنده بولنان
 تفنکجیلر دخی علی پاشا اوزرینه آتش ایدرک بر قاج
 یرندن مجروح ایتلر یله تپه دلنلی تپه اشاغی کلش ایدی .

بو حالدہ در حال قفاسی کسیلوب استانبولہ کوندرلدی
 و باب ہمایون او کنہ وضع اولنہ رق تشہیر قلندی .
 یونانیلر ہنوز جہلہ سی علی پاشانک معیتندہ
 اجتماع ایتامش بولندقلری حالدہ مر قومک بونجہ
 زمان دولتہ قارشو قو یمش بولنمسنندن و حالبوکہ
 صربیلیرک عصیانلری ثمرہ سی اولہ رق بر امارت قازا .
 نمش اولمسنندن پک بیوک عبرت الدقلری کبی بر طاقم
 دولتہ لیرک تشویقاتی دخی منضم اولنجہ بو کرہ
 کندی حسابلرینہ اولہ رق بر عصیان ترتیب ایلدیلر .
 یونانیلیرک بو عصیاننی استانبولدہ پاطلامش اولان
 بشقہ بر فساد خبرہ سیلہ بر قاتدہا میدان فرصت بولمش
 اولدی . شویلہ کہ :

و طنزک ہر طرفندہ علونمش اولان حریق فساد
 محضاً عسکرک عرض جبین ہمتی ایلہ اطفایدملک
 لازم کلور ایکن یکچیرینک بتون بتون قالدیرم قباسی
 کسلسی اوزرینہ اویلہ خدمت دولندہ بولنمسی
 مأمول اولقی شو یلہ طور شون بلکہ سلطان محمود
 حضرتلرینہ دخی کوسکون بولندقلرندن ارتق ہر
 اورطہ او طہ لری بردارالندوہ حالی المش ایلدیلر .

هله برزماندنبری صر بستان و تپه دئلی فسادلری
ایله عربستان و مصر احوالجه کوریلان فسادلر
رجال دولتدن فلانجه و فلانجه ذواتک باشی التندن
چیققدقلری طرزنده یی کفت و کولر دولتک اک صادق
بندکاننی لکله له مکله باش لایوب بالاخره یکچیرینک بر
عصیان علنی کوسترمسی اوزرینه سلطان محمود حضر -
تلی رجالدن بر قایچ کسه نک شهادته رضا کوسترمکه
قدرده مجبور اولمش ایدی .

پادشاهک بو مجبوریتی یکچیرلرک ادبسنلکنی
برقائدها آرترنجه استانبول اویله برحاله کلش ایدی که
فساد خارجییه باقق شویله طورسون نفس پای تحت
سوری ایچنده بیله هیچ برکسه کنندی باشنک سلامتندن
امین اوله مینجه ارتق موره روملری میدان فرصتی
بالکلیه خالی بوله رق اسلام قرا و قصباتنی باصمغه
وزرده بر اسلام کوررلر ایسه کسوب آصمغه قویولد -
یلر .

۱۲۳۹ سنه سنده روملرک جرأتی بر درجه یه وار -
دی که بتون جزایر بحر سفید بو فسادله اشتراک ایدرک
بر چوق خرسز کیلری هر طرفی قاصمغه قاوورمغه

باشلادیلر • اشقیا اوزرینه قوه عسکریه کوندرمکه
یکچیر یئرک کوس-کونلکی و آز غنلغی مانع اولد-
یغندن قره علی پاشا قومانداسیله بر مقدار دونما چیق-
رلدی و واقعا بودونما ساقز پیشگاهی اوکنده روم
کیلرینی طاغته رق العاصی اولان ساقز اهاالیسنی اط-
عه کتوردی ایسه ده استانبولدن امدادک ارقه سی
کسیلدیکی جهتله تندوس اطه سی پیشگاهنده روم
خرسز کیلری دونمای همایونی عادتاً مهماتسز بوله رق
قره علی پاشایی مغلوب ایلدیلر • ایشته بوندن صکره
یونان عصاتی اوزرینه کوندره جک الده هیچ بر قوت
قلمدی •

ماورو قوردر اتو و قولو قوترونی کبی الک مشهور
یونان سردارلری براره لق نصلمسه یکدیگر ینه مخالفت
ایلمه رک بونلرک همان یکدیگر یله محار به یه چیتشمیری
دولت علیه ایچون پک بیوک بر فرصت اولوب حتی
اوزمانلر اورو پاچه یونانیلره یاردم ایچون طرف طرف
تشکل ایتش اولان « فیل هلن » یعنی محب یونان
جمعیتلری دخی معاونت نقدیه و سائر هی کسمش اولملری
حسبیه اوزمانلر دولت نه یایمقی ایستمش اولسه مقتدر

اوله جغنی در کار ایدیه سه دهه یکچیر یلری شورادن
 شورایه س-وق ایتمه که امکان قالمیوب دولت علیه عادتا
 عسکر سنز بر دولت حاله ده قالمش و بلیکه ده یکچیری
 طائفه سی دولته دشمن اولمق حسیله قوجه بر دولت
 نوعما بر دشمن عسکر یئک تحت استیلا و اشغالنه کیرمش
 دیمک اولدیغندن بو قوجه فرصت دخی الدن قاجیر لمشدر .
 صکره لر ی ایسه یونان سردار لر ی اتحاد و اتفاق لر ی
 تجدید ایلد کدن ماعدا لورد بایرون و انیارد کبی انکلیز
 زادکانی مطلقا میدانه بر دولت یونانیه چیقار ق ایچون
 قوه قلییه و سیفیه لر یی فدایه باشلا یه رق اور و پاچه
 بونلره پیرو اولان بر چوق فیل هلنلر دخی کلی معاونه
 شتاب ایتلر یله ۱۲۴۰ سنه سنه بومعبر انک یاردیمیه
 یونان ملت جدید سی نامنه یکر می میلیون فرانقلق
 برده استقراض عقد ایدلمش و بو پاره کافه تجهرات
 عسکر یه یه صرف اولنه رق اشقیای یونان اولکیدن
 زیاده جنکه شدت و یرمشد

الده عسکر اولمقدن صکره یونان اشقیاسی
 بو یله تجدید قوت ایتسه لر یله مقاومت ممکن اوله میه .
 جغنی سلطان محمود حضرتلری کورمه کله و اوزمانلر

مصرده محمد علی پاشا ایسه کوندن کونه قوه نظامیه
 سنی آرتدیر مقده بولمغله تک یونانستان قورتلسونده
 فصل قورتیلور ایسه قورتیلسون دیه موره و کرید
 والیکارینی محمد علینک اوغلی ابراهیم پاشایه احاله
 ایدرک اودخی یکر می ایکی بیک منتظم مصر عسکرینی
 کایتلی دونمایه ارکاباً کیش محار بهیه باشلامش ایدی
 واقعا تجدید قوت ایلیان روملر برارهل ق مصر
 اردوسنده غلبه ایشلر و ابراهیم پاشای مورهیه
 چیقار تیبوب کریده عودته مجبور ایشلر ایسهده
 مؤخرأ ابراهیم پاشا زیاده شدتله بر هجوم ایدرک
 مودون موقعنی ضبط ایدنجیه اندن صکره ناوارینی
 دخی روملردن بالاسترداد ارتق مورهنک سائر بر چوق
 یرلرینی ده استرداددن کیر و قالماشدر

ابراهیم پاشانک شو موقعیتی ۱۲۴۱ سنه سنده
 میسر اولوب اوزمان استانبولده مصرک خصمی بولنان
 بر طاقم کیسه لروهابی مسئله سنی بر طرف ایدن مصریلر
 اکر یونان مسئله سنی ده بر طرف ایدرلر ایسه ارتق
 دولت علیه نک شمس شوکتی منحصف ایتک درجه سنده
 شان قازانمش اوله جققلرینی در پیش ایله سلطان محمود

حضرت لرینی لایق قطع محمد علی علیهنه تشو یقدن خالی
قالمزلر ایدی .

بو تشو یقاتک ایسه سلطان محمود حضرت لر کی
غیر تلی و شجاعتملی بر پادشاهه اولان تأثیراتی ایضا حدن
مستغنی اولوب حاله و که کندی دولتی بو قدر تنزیه
سبب یکچیر ینک عصیان و مصرک بو قدر شو کتنه
سبب دخی اوراده نظامیه عسکر ینک تشکیلی ماده سی
اولدیغنی کورنجه « بزم دولتک الیوک دشمنی محمد
علی دکل یکچیر یدر . اولانلرک حقندن کلهلم »
دیمش و تمام یکچیر ینک برده فساد چیقارمسی فرصت
عد ایلیرک اهل اسلامدن ار باب ناموس اولانلری
سجناخ شریف التنه دعوتله طادتا کندی عسکر ینه
کنندیس اعلان حرب ایلشدر .

سلطان محمود حضرت لر ینک اشبو اعلان حرب لر -
ینه مقابل یکچیری دخی « یکچیری اولان قزغان شریف
التنه ! » دیه بر غیرت جاهلانه ایله اعلان حرب ایتیش
ایسه ده بو ادبسنلر صوک زمانلرده مثلاً بر بنا یاندیره -
حق اولنلردن کو یا ارغاد باشیلغی یکچیری یه هاند
اوللق اوزره رسومات کثیره اخذ ینه قدر ادبسنلر کار

ایله بتون استانبول خلقنک ده نفر تلینی قازانمش
 اولدقلرندن هر کس فوج فوج سلطان محمود حضرتلر -
 نیک دعوتلرینه اجابت کوستر مکه یکچیری قشالاری
 طوپه طوتلش و درونلرینه تحصن ایدن اشقیانک بر
 چوغی آتش ایچنده هلاک اوله رق طیشارویه جان
 اتانلر ایله شوراده بوراده اله یکملر عموماً اعدام
 اوله رق در سعادت بونلرک لوث وجودندن تطهیر
 قلمشدر .

بووقعه خیریه یی بومظفریت عظیمه یی متعاقب
 سلطان محمود حضرتلر نیک دستار شریفی فسمه
 و خفتان شهر یاری یی ستری و شینله و الحاصل کسوه
 پادشاهانه یی نظام جدید قیافتنه تحویل ایلیه رک میدانه
 چیققلری کبی هر کس ایچون دخی اثر پادشاهی یه
 امتثال ایلک واجب اولمشیدی . بناء علیه سلطان
 سلیم نظام جدیدنک بقیه سی شورادن بورادن میدانه
 چیمغه باشلاقلری کبی سر یعاء دخی کایتلی نفرات
 جدیده تحریرینه شروع اوله رق سواری و پیاده
 الای و طابورلری تشکیل قلمشدر .

ذات شاهانه اشبونظام جدیدک ترقیات سر یعه .

سنی اول قدر التزام ایستلرایدی که بالذات داود پاشا
صحراسنه چیه رق سواری عسا کر شاهانه لرینه
قومانده ایله تعلیم ایتدیرلرایدی . صداری مهیب
ودیک اولدیغندن و یردکلی قومانداری حقیقه قلوب
عسا کره تأثیردن خالی قالمدیغی دخی مرویدر .

اصلاحات و نظامات جدیده در حال ولایات
شاهانه یه دخی تعمیم قلنهرق هرزده یکیچری بقیه سی
وارایسه رؤسای معنده سی ازاله و اعدام اولندقدن
صکره افرادی پریشان و او جاقلری بی نام و بی نشان
ایدیلرک یکیدن عسا کر نظامیه تحریرینه شروع
اولنشد .

در سعادتده سلطان محمود حضرتلی اشبو
اصلاحات جلیله ایله اشتغال بیوردقلری صره ده
یونانستانجه مصرلی ابراهیم پاشا مورهنک هر طرفی
استیلا درجه سنه واردیغندن روم سردارلری ارتق
هر طرفجه مایوس اولملری اوزرینه ا کر اوزو پا
طرفندن معاونت کورمیه جک اولسه لرایدی او مشغله
دخی بر طرف اولش بتمش صایله بیلورایدی . انجق
انکتره دن لورد قوشارانک امداده یتشمی اوزرینه

روملر یکیدن تجدید قوت ایدرک ینه ابراهیم پاشایه
طرف طرف عصیان و مقاومتہ باشلامشلدرد.

بووقوعات ۱۲۴۱ و ۱۲۴۲ سنہ لرینک وقوعانی
اولوب سلطان محمود حضرتلری ایکی سنہ مدت جہد
تام ایله نظام جدید الای و طابورلرینک مقدارلرینی ایچہ
چوخالندقدن صکرہ امورسیاسیہ ده کی جرأتلرینی دخی
آرتدیرمقلہ ۱۲۴۳ سنہ سندنہ عموم اوروپا دولنلرینہ
برنوطہ کوندرہرک یونان فسادیکنک بویله اوزایوب
کیتیمی محضاً اوروپاچہ فیلہلن یعنی یونان محملرینک
معاونت و مظاهرترلندن نشأت ایلدیکی بیانیله اورو -
پانک بعدما بوايشہ مداخلہ ایتماسنی پروتستو یوللو
بیان ایلش و بریادن دخی یونانستان اوزرینہ قوہ
بریہ و بحریہ کوندرمک تدارکاتنہ مسارعت بیورمش
ایدی.

انجق اوروپا دن یونانستانہ کلان یالکز لورد قوشارا
اولیوب ریشار شورشن وقونت قاپودیستریا دخی
انکلترة و فرانسه دن کلہرک بونلردن لورد قوشارا
ارباب عصیانہ امیرال وریشار سرعسکرو قاپودیستریا
یا دخی جہور یونانیہ رئیسے تعین اولنہرق بونلر

یونانستانه عادتاً بر حکومت مستقله سوسی و ردکاری کی
 سلطان محمود حضرتلرینک نوطه لری اوزرینه انکله تره
 و فرانسه و روسیه دولتلری دول سائر نک ده انضمام رأی
 و معلوماتلریله یونانستانی رسمائو علنائاً تصاحبه قیامله عظیم
 بردونمای ناوارینه سوق ایتشرایدی . بودونمایله استا
 نبول و مصر دونمالری دخی ناوارین لیاننده تلاق ایتیکله
 وهله وقوعه کلان محار به ده دونمای هم ایون آزغی
 حسیله اعدای متفقہ دونماسنه مقاومت ایده مدیکندن
 عادتاً کلیاً احراق ایدلشد .

بر باندن ناوارین ملحمه سی دوام ایدر ایکن دیگر
 طرفدن عموم روملر دخی ایاقلا نه رق خارجدن کنیدیله
 ینه التحاق ایدن برچوق اجنبی قوماندانلرک سوقیله
 عساکر شاهانه به قارشو بوغاز بوغاز محار به به
 ابتدار ایتشرایدی . نهایت اورو پانک معاونتی آرتدچه
 آرته رق وانلره مقابل بزم قوه مدافعه مز عاجز قاله رق
 یونانستانک هر طرفی الدن چیمغله مقدملری اورو پا
 یونانستان ایچسون یالکیز بر مختاریت اداره طلب ایدر
 ایکن بودفعه یکیدن استقلال تامنی اعلان ایلدی .
 دولت علیه نک مسئله یونانیده کی شو مغلو بیکی

روسیه دولتنک اوتهدنبری قورمقده اولدیغی دوالیب
 حیل و فسادنی فریل فریل چویرمکه میدان آچهرق
 یونان مسئلهسی عادتاً برطرف اولوب بتدکدن صکره
 حالا یونانستاننی تصاحب غیرتیه اورو پایی الداتهرق
 ۱۲۴۴ سنه سنده دولت علیهیه اعلاان حرب ایل
 حدودی تجاوز ایلش ایدی . دشمنک شو هجوچی اویله
 بر زمانه تصادف ایدی که سلطان محمود حضرتلری
 الله بولنان قوه جزویه سنی هیپ مسئله یونانیه ده
 استخدام ایلدیکندن روسیه اردولری بلامانع و لامزاجم
 بالقان طاغربی ده اشهرق تا ادرنه یه ایندیلر . بو حالده
 بزم ایچون طلب صلحدن بشقه رشیده امکان قالمدیغندن
 ۱۲۴۵ سنه سنده ادرنه شهرنده عقد اولنان معاهده
 موجبنجه یونانستانه قرال نامیله بر حکمدارک اقامه سنه
 دخی دولت علیه نک رضا کوسترمی ضرورت حکمنی
 . الدی

ایشته یونان مسئلهسی بو صورتله نتیجه پذیر اولد .
 قدن صکره سلطان محمود حضرتلری اولانجه همت
 و غیرتلی بی اصلاحات ملکیه و عسکریه یه حصر
 ایلیرک ۱۲۴۶ سنه سنده قوه بریه و بحریه نک

یکیدن اتمامندہ دامن درمیان ہمت اولدیلر . واقعا
 افکار عمومیہ عموماً محوایدیلان یکچیر یلرک تعلقاتندہ کی
 تأثر دن طـولای حالا سلطان محمود حضر تلی نیک
 تشبثات اصلاحات پرور یسنہ مخالف اولوب ازجملہ
 اشـقودرہ لی مصطفی پاشا استانبولندہ کی نفرت واقعہ دن
 استفادہ ایچون پای تختی ہیج طانیماق داعیہ سنہ صاپمش
 واولدخی تپہ دلنلی و یاخود محمد علی کبی ارناودلغہ
 بر صورت مستقلہ و یرمک ہوسلرینہ دوشمش ایسہدہ
 سلطان محمود حضر تلی اشبو مخالف تلیک ہیج بر یسنہ
 قولاق و یرمیوب ہمت جسورانہ وغیرانہ سنی
 یالکز اصلاحات عسکریہ یہ حصر دن کیرو طورما -
 مشدر . مع ہذا روم ایلی طرفلری ہنوز اسکی درہ
 بکیلر نیک براقش اولدقلری طورہ تابع اولہرق مقام
 خلانت و سلطنتک شوکت مادیہ ومعنویہ سنی اول
 قدر مہمسہ مامکدہ اولدقلرندن سلطان محمود حضر -
 تلی ادرنہ یہ قدر بر سیاحت اجراسیلہ اورالردہ
 عظمت پادشاہی بی جملہ یہ کوسترمک لزومنی حس
 ایلدیلر .

بو سیاحت شاہانہ ۱۲۴۶ سنہ سندہ وقوعہ

كلهرك واقعا روم ايلينك دهيا ايچرولرندن ادرنه يه
طوپلاناں برچوق اعيان و معتبران هيئت شاهانه يي
تماشا ايله تجديد صدق و عبوديته مجبور اولدقلى
جهتله سياحت همايونك پك بيوك فائده سي كورلمش
وهله اولجه اورالره قدر كلش اولان روسلر اراقديغي
تأثير اتدن دخي هيچ اثر قالمامشدر .

مكتب فنون طبية ايله سائر مكاتب عسكرية نك
مجدداً و تجديداً كشادلى و مطبعة عامره نك تأسيسيله
نصفى تركه و نصف ديكرى فرانسزجه برغزته احداثى
هپ بوزمانك اجراءات نافعہ سندن اولوب اصلاحاته دوام
اولندقجه افكار عموميه دخي اولكى هيچاننى تعديل
ايلديكندن و استانبول نفوذ پادشاهى التنده انتظامى
ارتدردقجه اشقودره و بغداد و اليرى كى استانبولى
طائىماق ايستيان و الير انجام كارى دوشونهرك امانه
دوشدكلرندن احوال عموميه دولت بياغى بر صورت
حسنه پيداسنه باشلامش ايدى . چنه فائده كه بوكره
دخي بر مصر مسئله سي دولت عليه عثمانيه يي بر قاچ
زمان ايچون اصلاحاتده دوام و ترقيدن منع ايليه جك
بر تأثير كوستر مشدر . شويلاه كه :

مصر والیسی محمد علی پاشا نك تنظيم ایلدیکی
 اداره ملکیه ثمراتندن اوله رق وجوده کتوردیکی
 منتظم اردولر کرک و هایلرک و کرک یونانیلرک تنکیللری
 امرنده پک بیوک ایشه یارامش اولدیغی کبی اکر والی
 مشار الیه لزومی وجهله حکیمانہ بر صورتده اداره
 ایللمش اولسه ایدی مؤخرأ مصرده وجوده کلان
 حکومت خدیویه یه احتیاج قالدقندن بشقه دولتجهدها
 پک بیوک منفعتلر استنتاج اولنه جغی شبهه سزایدیسه ده
 درسعادته خسرو پاشا کبی محمد علینک بر چوق
 رقبا و خصماسی بولنه رق بونلر سلطان محمود حضر-
 تلرینی لایققطع محمد علی علیهنه اغضاب ایلدکلری کبی
 دیگر طرفدن بر چوق و سائطایله محمد علینک ده استا-
 نبولدن امنیتی سلب ایلدیکلندن تابع ایله متبوع ارا-
 سنده کی مناسبت سنده دن سنده یه و بلکه کوندن کونه
 مدھش بر کر کینلک پیدا ایتکده ایدی .

ناوارینده وقوعبولان فلاکت ایسه محمد علی پاشا
 ایچون عادتاً بر میدان تجربه اولوب آنی متعاقب مصر
 دونماسنی اولککندندها اعلا بر صورتده تجدیدوتکثیر
 ایلدکدن ماعدا عسا کر بر یه سنی دخی بر قاتدها تنظیم

و توفير ایش اولدیغندن برکون اولوبده همه حال
استانبول طرفندن کله جک برسله تأدیه قارشو بو
قولله سپر المعنی ذهننه یرلشدیرمش ایدی . انجق
سوریه طرفلری مصر نفوذی التنده بولمقدن صکره
بر حرکت عثمانیه یه طوغریدن طوغری یه مصرله هدف
اولسی مدافعه و مقابله بالآخره عجزی موجب
اوله جغنی محمد علی دوشونمکله بوا حتماله مقابل دخی
اوغلی ابراهیم پاشانک سوریه والیسی نصب ایدلمسی
در سعادتدن استعما ایدنجه بواستعاده کی حکمت نزد
حکمت وفد محمود خانیده اکلاشیله رق استعما سی
اسعاف اولمقدن بشقه برده صغوق چهره کوسترلش
ایدی .

محمد علی بو چهره ناهشنودیدن قوشقولوب عکا
والیسیله برکوچک معارضه بی بهانه ایدینه رک ۱۲۴۷
سنه سنده اوغلی ابراهیم پاشای مکمل براردو ايله
بریه الشامه سوق و برسنه ظرفنده اجرا ایتدیردیکی
حرکات سریع عسکریه ايله هر طرفی ضبط ایلدیکندن
بو حرکت عاصیانه در سعادتده بولنان رقباسنه بستیون
میدان آچش و سلطان محمود حضر تیرینی بحق اغضاب
ایلشدر .

ایمدی محمد علینک قتلی حقنده طرف پادشاهیدن
برده فرمان صادر اولنج، ارتق محمد علی بو حکم ایله
محکوم اولان باشنی قورتارمق ایچون عصیان علییه
برقاندها قوت ویردی و اوغلی ابراهیم پاشایه کوندر
دیکی تعلیمات موجنبجه مصر عسکری قونییه
طوغری ایروملکه باشلادی.

مصرده ده فرانسزلردن قالمه برانضباط و انتظام
مک تأثیر یله اصول اداره ملکیه وانک ضمننده کی
ترقیات عسکریه بزه نسبتله پک بالاتر اولدیغندن دولت
علیه عثمانیه نک قوتی مصر اردولرینه مقابل حقیقه
ماجر قالمده ایدیلر. بونک اوزرینه روسیه دولتی
ظاهر حالده سلطان محمود حضرتلرینه معاونت ایتک
و حقیقتده «اشته دولت علیه یی بروالیسنه مقابل
دخی بن قورتاردم» دیه خرسیتان تبعه شاهانه یه
قارشو برشان وشوکت کوسترمک ایچون درحال
دوئمناسنی دولت علیه یه معاونته کوندرمش و بوضو
تله محمد علی دخی حرکاتی تعطیل ایتش ایسه ده
قونییه ده ۱۲۶۸ سنه سنده عقد اولنان معاهده محمد
علینک قتلی حقنده کی فرمان همایونی کیروالدیررد.

قدن ماعدا سوریه واطنه ولایتلرینک دخی ابراهیم
پاشایه مالکانه اوله رق ویرلمسنی انتاج ایش ایدی.

اشبو قونیه معاهده سنک عادتاً بر معاهده مغلوبانه

اولسی اصدقای دولتی پک زیاده دوشوندرمش ایدی.

زیرا کرید جزیره سی حالا مصرلی اداره سنده بولند.

ینندن مصر ونوزه وکرید وشام و حلب واطنه ولا.

یتلرینی حاوی بر الیکای عظیم ایله بورالرده ساکن

اون میلیوندن متجاوز نفوسک محمد علی یه تابع قالمسی

مصره بر دولت جدیدیه شکلی ویرمش ایدی.

۱۲۴۹ سنه سنده محمد علی اصلاحات ملکیه سنی

برقاندھا ایلرویه کوتوره رک انجق مصارف حربیه سنی

چیقارتمق ایچون اھالیدن کلیلی ویرکو تحصیلنه

باشلامغله قدس شریف اھالیسی محمد علینک بوشدتنه

قارشو عصیان ایدنجه ذاتاً قونیه معاهده سندن بالطبع

نمون اولیان سلطان محمود حضر تلی قدس شریف دن

لبنانه دخی سرایت ایلیمان بوقاریش قلمقدن استفاده ایچون

سکسان پیک کشیلک براردوی سوریه طرفلرینه سوقه

مسارعت کوستر دیلر.

بواردو ایلک حرکتیه محمد علی پاشا اردوسنه

چشم اولسیدی پریشان ایده جکنه شبهه یوق ایدی
 انجق هنوز ایکی عسکر تلاق ایتکسزین اوروپا دو-
 لتلی میدان توسطه ایله رق طرفینی محاربه دن منع
 ایلدیلر که بوتوسط دخی محمدعلینک اهمیتنی بر قاتدها
 آرتدیر مقله ضررینی دکل کارینی موجب اولدی .

۱۲۵۱ سنه سنده پوسته وقرانته اداره لرینک

تنظیمی و بعض طرق و معابرک اصلاحی کبی امور
 نافعده ایله اشتهغال ایدیلوب ۱۲۵۲ سنه سنده دول
 معظمده ایله عناسبت دوستانه و دیپلوماتیکه نك بر قاتدها
 تأییدی ایچون بعض دولترنزدنده مقیم سفارتخانه لر
 تشکیل اولندی که بوزمانه قدر دولت علیه نك اورو-
 پاده دائمی سفارتخانه لری اولیوب لزوم واقترضاسی
 کورلدیکه فوق العاده سفیرلر کوندیریلور ایدی .

چند سنه مقدم ادرنه یه قدر و قوعبولان برسیا-
 حت همايونك هیبت وشوکت پادشاهی بی اهالی یه
 کوستروب نظامات جدیده نك حسن تلقیسنجه اهاالینک
 استعدادلر بی یك زیاده ارتدیرمش اولدیغی مؤخرأ
 تأثیرات فعلیه سیله کورلدیکندن اشبو ۱۲۵۳ سنه -
 سنده دخی سلطان محمود حضر تلری روم ایلنه برسیا-

حت دهـا و یرمکه و باخـصو ص بودفعه اویله
 یالکز ادرنه یه قدر دکل ایچـه محـلری طولاشمغه
 قرار و یردیلر • اشبوسیا حت همایونده پادشاه مالپناه
 حضر تلی طونه طرفرینه قدر وارهرق افکار جدیده
 اصلاحاتی اهالی و لایاته بالذات نشر و تعمیمه همت
 بیورمشلردر •

ذات شاهانه روم ایلی طرفرنده ایکن سلطان
 محمود حضر تلی ینک شدت غضبلردن وحدت مزنا •
 جلرندن ممنون اوله میان بعض کسه لر شهید سز مصر
 طرفندن دخی ارقه سی ا کسلیان تشو یقاته قاپیلهرق
 کنج شهزاده عبدالمجید افندی حضر تلی نامه بر
 فساد ترتینه مباشرت ایلدکلری مسموع همایون اولنجه
 روم ایلی سیاحتندن عودت همایونلرینی اوقدر
 عاقلانه بر صورتده ترتیب بیورمشلر ایدی که در سعاده
 واصل اولدقلری حالده هنوز مفسدینک افکار شاهانه
 دن هیچ برکونه تلاش و احترازلری یوق ایدی •
 مع هذا هنوز تمامی اثارینی قوه دن فعله چیقارماش
 اولان بوفساددن طولایی اویله شدتده اسرافنی تجویز
 بیورمیهرق بر شدت معتدله ایله ار باب فسادک شرلرینی

منعه موفق اولشدردر *

شو استانبول اصلاحاتی ۱۲۵۴ سنه هجریه -
 سنده وقوعه کلدیکی کبی ذاتاً سلطان محمود حضره -
 تلرینک امل اساس-یلری ارتق افکار استیلاجویانه سی
 بتون بتون میدانه چیقمش و بعض دول اجنبیه ایله
 دخی مناسبت پیدا ایتسی اوزرینه جرأتی دها بر بشقه
 صورتله ارتمش بولنان محمد علی پاشایه حدینی یلدر -
 مکدن عبارت اولمغله روم ایلی عودتنی متعاقب مصر
 ایچون بر بیوک اردو تهیه سنه مباشرت ایشلر ایدی *
 بواردو حافظ پاشا قومانداسیله دیار بکر طرفلرینه
 سوق اولمغله تمام نزیب شام موقعنه کلدکده
 مصرلینک سوریه طرفلرنده دائماً موجود و متحشد
 اولان اردوسیه بالتلاقی شدتلی بر محاربه یه طوتشد -
 یلر * واقعا اردوی همایون دخی عسا کر نظامیه دن
 مرتب ایدیسه ده اوزمانلر عثمانلی عسکری هنوز وقت
 سلیمیده کی نظام جدید قدر منتظم اولماغه مقابل مصر
 عسکری بر چوق اجنبی ضابطانک تعلیم و قوماندلریله
 انتظامی آر تدرمش و ابراهیم پاشانک شیطانلری یله
 افساد و اغوا یه کافی اولان قوه منعه سی غالباً بر طاقم

ضابطان و امرای ده مصر طرفه حلب و جذب ایتش
اولدیغندن حافظ پاشا اردوسی مصر اردوسنه مغلوب
اولشدر .

انجق شو خبر مغلو بیت سلطان محمود حضرتلرینه
واصل اولمزدن مقدم یعنی ۱۲۵۵ سنه مننده اول پادشاه
مالیجاهك ارتحالاری خبری اردوی همایونه واصل
اوله رق بویله برمشکل زمان ایچنده بو خبر مصیبت بتون
ار باب غیرت و حیثیتی هونکور هونکور اغلاتمشدر .

والد ماجد حضرت عبدالمجید غازی جنت مکان
سلطان عبدالمجید خان حضرتلری پدر عالیپرینک و فاتیله
تحت سلطنته جلوس بیوردقلری زمان هنوز اون
سکزیاشنده بر جوان شوکت عنوان اولوب انجق بر
طرفدن مصر عساکرینک طور غالبیتلرینی آرتدیره رق
سوریه و حلب و اطنه طرفلرندن ماعدا کردستان
دخی تهدید ایتکده بولملرینه مقابل دیگر طرفدن ولایات
شاهانه نك کافه سننده آزچوق شورش و فترت حکم
سورمکده بولمق حسیله دولتک حالی او قدر مدھش
ایدی که پادشاه نوجاه حضرتلرینک بونجه مشکلاقی
مقابل بحق چاره ساز اوله ییله جککری احتمالی برچوق

اصدقاي ارکان دولتی دوشوندير مکده و بیوک بیوک
شبهه لره القا ایلمکده ایدی.

عقلای اصدقای الزیاده دوشونديرن شی ذاتاً مصر
اوزرینه سوق اولنان اردویی ترتیب ایتدیرن واوته.
دنبری محمد علی پاشا ایله رقابتی مشهور جهان اولان
خسرو پاشانک مقام صد ارتده بولنسی قضیه سی اولوب
حتی مصر لیلر پادشاه نوجاه حضر تلیزینه تبریک جلوس
ایله عرض مصالحه یه دخی بیوک برر غبت کوستر مشلر
ایسه ده خسرو پاشا بهمه حال محمد علی و ابراهیم پاشا لره
شدنی کوستر مک ایچون مصالحه جهته قطعاً ینا.
شمیه رق تدارکات حربیه به بر قاندها وسعت و یرمک
جهتینی ترجیحده بولنمش ایدی. اوزمان قیودان اجد
پاشا (که مؤخرأ فراری اجد پاشا دیه شهرت بولمشدر)
دخی هر نه قدر محمد علی طرفدن تمامیه مجلوب دکل
ایدیسه ده خسرو پاشانک اعداسندن معدود اوله رق
مصر حقنده بو درجه لره قدر شدت کوستر مامسینی
توصیه ده بولنمغه خسرو پاشا ظاهر حالده اجد پاشایی
توحیش ایتماش ایسه ده اجد پاشا دونما ایله اق دکره
مأمور اولنجه ارقه دن قتلی ایچون بر فرمان یتشدیر.

مش و جالبو که باشک قورقوسنندن دائمًا احتیاطلی بر
 حالده بولانان احمد پاشا بوفرمان هم-ایونی کندلی النہ
 کیمرہرک حالدن خبردار اولنجہ معیتندہ کی دونمائی
 الوب مصرہ قدر کیدرک محمد علی یہ عرض دخالت
 انیش اولغله بوفرار مسئلہ سی مصرایشنی بالکلیہ رنک
 آخرہ تحویل ایتکہ کافی ایکن فضلہ اولہرق پدران
 الدیغنی امر اوزرینہ ابراهیم پاشادخی استانبولہ قمر
 یورومک عزملہ کوتاہیہ اوزرینہ طوغری صاندیر -
 دیغندن معاذ اللہ تعالی استانبول بر تہلکہ دہ قالش
 ایدی .

ایمدی اصدقای دولت شو حالاری کورنجہ بعض
 دول متحابہ سفراسیله بالاستشارہ ذات شاهانہ بی احوال
 حاضرہ نک دہشتندن خبردار ایلدیلر . سلطان عبدالمجید
 خان حضرتلری مصر وقعہ سنک اشہو صورت
 اخیرہ بی کسب ایتسنہ خسرو پاشا سبب اولدیغنی بر
 کوزلجہ اکلادقذن فضلہ احوالک بوندن صکرہ کسب
 ایدہ جکی مشکلات مدہشہ یہ دہ سبب اولہ حق بر کیسہ
 وارایسہ اودہ خسرو پاشا اولہ جغنی بالحکم انی مسند
 صدارتدن عزل و بر محله نفی ایدرک دولتمزجہ یکی دیپلو-

ماترک کرچکدن پیری عداو لئغه لایق اولان رشید پاشا
مرحومی صدارته نصب ایله مشارالیهک فرانسه دن
ماعدادول منظمه بی یعنی انکلترة و اوستریا و روسیه
و پروسیا دولترینی اقناع ایدرک جله سنک توستنی قازا
نمسی ثمره سیله مصر مسئله سنه نهایت ویرایش و ولایت
مذکور و الیه کنک ارثاً محمد علی فامیلیا سنه انتقال
ایتمی شرطی و شرائط سائر ایله مصر قطعه سی
سلطنت سنیه نک بر ولایت ممتاز ه سی طامنشد.

اشبو قرار ۱۲۵۶ سنه سنده یعنی جلوس عبدالحمید
خانیدن بر سنه صکره و وقوع بولوب کرک محمد علی و کرک
ابراهیم پاشا الحق دولت علیه نک عبودیتنی اک بیوک
شرف یلوب در سعادت قیله نجات طامنشد در . بناء علیه
دولت علیه نک ارتق مصر طرفندن هیچ بر اندیشه سی
اولمد قدن ماعداد حین حاجتده مصرده کوزل بر اردو
و منتظم بر دو نمابوله بیله جکی قضیه سی پک مهم برده نقطه
منفعت تشکیل ایش ایدی . لیکن بویه یالکزمصر عسا کر
منتظمه سی و دو نماسی ایله اکتفایه امکان اوله مامغله
پادشاه نوجاه حضرتلری سلطان سلیم ایله پدرلری
سلطان محمود حضرتلرینک باشلامش اولد قری نظا .

مات جدیده یی بر قاندها توسیع و تحکیمه همت بیوره .
 رقی هله شو تنظیمات امرنده رشید پاشا حضرتلر -
 ینک افکار منوره سی پک بیوک ایشه یارامش و کلخا -
 نه ده قرائت بیوریلان مشهور خط همایونده شمیدی به
 قدر وقوعه کلان بر چوق قاریشقلقلر مناسبتیه شرع
 شریف وقانون قدیم منیف احکامی خلافتده بعض
 احوال کورلمش ایسه بو نلری زمانک الجاآته عطف
 ایتک ممکن اوله جغندن بعدازین هر کسک جانجه و مالجه
 طرف دولتدن امین اولسی واسلام اولسون خرسیتیان
 اولسون هر صنف تبعه شاهانه نظر نظامده مساوی
 طاننه جغی جهتله دین و مذهبندن طولایی هیچ بر کیسه -
 نک مظلوم و محقر ایدامسی و بعد ما بالجمله امور و مصالح
 مع شرع شریف وقانون منیف موجبجه تسویه اولنه -
 رقی فرد واحدک فرد واحد تغلب ایده مامسی اعلان
 بیورلمش ایدی .

سنین واعصارک کذرانجه ساحه وقوعه کلمش
 اولان وقوعاتی تدقیق ایدرک بوندن بر حکمت سیاسیه
 حیقارمش اولان مدققین بالاتفاق حکم ایدرلر که
 حیاتیات بشریه و مدنیته ده کوریلان فن الفلرک یالکز

بر طرفدن ایقاع ایدلمش اولمسی قابل اوله میوب دنیات
 هر طرفنده یا حکومتلر و یا خود ملتلر طرفندن کو سر-
 لکه باش-لانیلان سبیتلر بالاخره طرف متقابلده
 سرایت ایدرک مثلاً دولتر شدتی ارتدیردجه ملتدخی
 اطاعتسزلکده جرأتلرینی ارتدیردقلندن و ملتلر اطاع-
 عتسزلکه میدان و یردجه دولتر جور و ظلمری
 قوتلندیردکارندن ایشته بومثللو اسباب متقابله جهان
 الت اوست ایلر • شوکی احواله قارشو ال موافق
 تدبیر حکومتلرک بهمه حال اعتدال اوزره معامله
 عودت ایتملندن عبارت اولوب واقع ابر زماندنبری
 دولت علیه جه بر منافقک ایتدیکی یا کش جاسوسلر
 اوزرینه رچالدن بر آدمک و یا خود قوجه بروز یرک
 ققاسی کسیمی بوغولوب آتلمسی مالی مصداق
 اولمسی مثللو احوال میدان الدیغی کی بویله مالی
 وجانی تحت امنیتده کوره میانلرک دولته قارشو سوء
 نیات و حرکاتی دخی دهشتلی بر صورت المغه
 باش-لامغله کلخانه خط هم-ایونی حکمت حکومتک
 ایشته بونقطه نازکه سنه تمامیه موافق اولهرق
 واقعا اهالی بی دولتدن ودولتی اهالیدن امین ایلده جت
 براس اصلاحات مقامنه قائم اولمشدر •

باخصوص کہ بمثلہ قوانین اصلیدہ الہ بیوک
تأثیر انرک احکامی اجرادہ دوام صورتیہ حاصل
اولہ جنی دخی مثبت و مسلم اولوب سلطان عبدالمجید
خان حضرترلی ایسہ خط مذکورک واکامترعاً
وضع اولہ انسان قوانین جدیدہ نک حرف بحرف اجرای
احکامندہ ذرہ قدر تجویز قصور بیور مدقلری جہتہ
تنظیمات جدیدہ نک فی الحال تأثیرات عظیمہ سی کور -
لمش و مکاتب عسکریہ نک تاسیسی وقوہ بریہ و بحر -
یہ نک توفیری ایچون دخی صرف تقدینہ ہمت بیور -
یلیوب خدمت نظامیہ ایلہ خدمت ردیفہ آرلہ دقن
وایکی نوع اردونک نظاماتی ضابطانی دبو یلری مہماتی
ہب اکال اولندقن صکرہ دولتمزک قوت ردیفہ سی
اوچیوز الی بیک نفرہ وقوہ نظامیہ سی دخی یوز
یکرمی بیکہ بالغ اولمش ایدی .

باخصوص کہ بوزمان ایچون اجرا اولنہ حق
اصلاحات عسکریہ یالکز تعلیمی و نظامی عسکر تدا -
رکندن عبارت اولیوب اورو پانک ترقیات مخصوصہ -
سندن اولمق اوزرہ اوتہ دہبری قوللانقده اولان چقماقلی
تفہکر قاپسولای تفہکرہ تحویل ایدلمش ویاغیش

هو الرده چهماقلى تفنگرك آتش المامرينه مقابل قاپسوللى
 تفنگرك هر زمان آتش المامرى عظيم بر منفعتى موجب
 اوله جغى كې چونكه بر عسكردده او يله تفنگ و طبيا -
 نجه و پچاق و قلعج كې ادوات حر بيه نك چوقلغى حين
 تلاشده شاشتمندين بشقه بر شئي موجب اوليه رق
 بر تفنگده سونكى دخى بولنور ايسه او تفنگده هم آلت
 ناريه هم ده الت قاطعه حكيمى و بره جى دركار بو -
 لشمش او لديغندن سلطان عبدالمجيد خان حضرتلى
 اوتهدنبرى عسا كر شاهانه نك استعمال ايلكده اولدقلى
 الات حر بيه ي اصول جديده اوزره اعمال اولنان
 اسلحه يه تحويل ايلدكلى كې طوب قابر يقه لر نجه ده
 كلى اصلاحاته موفى اوله فرق يكميدن او يله كوزل پرنج
 طوپلر وجوده كمشدر كه او زمانه قدر امثاللى هيچ بر
 عصرده مشاهده اولنماشدر .

اورته دن يكيچرينك وجو دى قالمش و تنظيمات
 جديده و خيريه سايه سنده هر كسك جاني و مالي
 و حضور و راحتى دخى تا ميين ايدلمش بولنمغله
 سلطان عبدالمجيد خان حضرتلى نك اصلاحات كلييه
 و اساسيه لرندن عموم ملت ممنون و متشكر قالمش ايدى .

واقعا دولتک تدنی حالنده بولمسندن یامستفید اوله رق
ایچون خیانت و یا خود حسب الجها له تعصبا بر طاقم کیمسه لر
کویا اصلاحات جدیدیه هب کاور ایجادی نظریله
باقه رق ممنون اوله منقلری کبی کردستان وارمنستان
طرفرند و طونه ساحلنده بعضی علایم فساد و عصیان
دخی باش کوسترمش ایایسه ده دولت علیه بونلری
کاملا اصلاحه مقتدر اولدیغی کبی اوزمانه قدر تحدید
جزا ایچون بر قانون معین اولیوب حبس لک مدتی و اشکنجه
لرک انواعی و دکن کلرک عددی و حتی ققار کسیمیسی
ادم لر بو غلمی بیله هب حکومت ادم لر ینک کیفته تابع
برشی ایکن جزا قانون نامه هما یونی وضع و سایر بر چوق
نظامات و قوانین جدیده تأسیس بیوریله رق هر کسک معا
مله سنه کوره معامله اولمسی قاعده عادلانه سی ده وضع
ایدلرکندن ایشته بو حال دخی انتظامات و آسایش
مملکتی اکاله پک بیوک یاردم ایلشدر .

ایمدی دولت و ملتک بر زماندنبر و یکدیگرندن
عدم امنیتلری بر طرف اولوب جملهنک ال بر لکیله
مسارعت کوستردیکی مبدولی همت بر کاتندن اوله رق
ملت معظمه عثمانیه نک بردن بره شهره اهر ترقیده قطعنه

باشلادیغی مسافهلر حقیقی دوستلرمن اولان اوروپا
 افکار ترقی اربابنی یك زیاده ممنون ایتکه باشلامش
 ورشید پاشا مرحوم کی حقیقه دولترجه امثالاری
 نادر کلور دیل و ماترک ثمره همتیله اوزمانه قدر بزه
 برملت وحشیه نظریله باقان اوروپا ارتق ملت عثمانیه
 برملت متحدده نظر یله باققدن دخی تردد کوستر ماش
 ایسه ده روسیه دواتی بو زمانه قدر سلطنت سنیه
 عثمانیه علیه قازاندیغی مادی و معنوی غلبانک کافه سنی
 هب کندی تجددات و انتظاماتنه مقابل بزم قانونسر
 نظامسز بردوات اولمقلغمز یوزندن قازانمش اولدیغی
 جهته اکر دولت علیه شواتظاماتنه دوام ایلیه جک
 اولورسه بالاخره بز دن استفاده سی منع اولند جغنی
 بالتیقن غبطه کشانه وعادتا حسودانه بر نظرله احوال
 لمزی رضیده قالشمش ایدی .

بو حالده روسیه ایچون بروسیله نفاق و فسادانجق
 دولت علیه ایچون برمدار سعادت اولان کلخانه خط
 همایونی اولوب بو خط همایون موجب خرسیتیان
 تبعه شاهانه یه حق مساوات و یرلمش ایکن دولت
 علیه اوقاعده مساواته رعایت ایدلماکده اولدیغنی

درمیانہ باشلادی کہ بو صورتله اورو پا انظار عمومیه .
 سنده غیرت نصرانیہ کوسـتر مش اولمقدن فضله
 تنظیمات خیریه یی دخی جهانک نظر تقدیسـندن
 دوشوره جکئی حساب ایلش ایدی .

واقعا کلخانه خط هماونـنک کافه احکامی حرف
 بحرف اجرا اولنه مامش ایسه ده سنین اخیریه کـنجیه
 قدر یالـکـز خـرستیانلـرک دکل اهلـی عـسلـه نـک بـیلـه هـیج
 برحق امتیازی قالمیه رق بلااستنا جله سی ار باب
 خروج وعصاتک مغلوب ومظلوملری ایکن بوفتالغی
 دفعه المحایه امکان اولمـدیغی درکار اولمقله برابر شو
 برقـاچ سنه ایچنده دولت علیه نـک اقوام عثمانیه میانده
 حصوله کتـوردیکی ائتلاف افکار دخی بتون ار باب
 انصافک مظهر تحسینلری اولدیغندن روسیه دولتـنک
 برمنوال محررشکایاتی دولترجه اساساً سموع اولما مقده
 ایدی .

حالبوکه دولت علیه عثمانیه ایله رقابتی اوتـه دنبری
 کندیسنه برمسـلک دائمی سیاست اتخاذایلش اولان
 روسیه دولتی بریاندن دخی بعض صنوف اهلای یی
 خـرستیانلـق نامنه حایه یه قالقشـه رق و بوندن ده فضله

اولق اوزره حکومت متبوعه لری علیه نه عصیانده
تشویق ایلیه رک بناء علی ذلک ارتق حرکات فساد
جویانه سی قابل ستر اولیه جق بر درجه بی بولنجبه
۱۲۶۸ سنه سنده کندیسنی عادتاً بر مدعی اولق اوزره
میدان دیپلوماتسی به آتمش و دولت علیه دن کویا
خرستیان تبعه شاهانه نک تأمین سلامت ورفاهلری یولنده
برطایق اجراءات و اصلاحات ایستمدکن ظو تدیرب
عظیم بر مباحثه دیپلوماتیقیه کیر شمش ایدی .

رشید پاشا مرحوم ایله او مکتب سیاستده یتشمش
اولان کینج دیپلوماتلر مز اوروپا ایله جریان ایدن مخا
برات و مباحثات مزده روسیه نک فضولی ادا لارنده کی
واهیلیکی اثباتله برابر دولت علیه نک ترقی پرور لکنی
جمله به تأمین ایلد کلرندن روسیه طرفداری اولان
غزته لرک و موسقوف اقلام رسمیه سنک نشریاتی کاملاً
کافه ثمره سز قالمش ایدی . شو حالده روسیه ایچون
ارتق بشقه چاره قالمیه رق ۱۲۶۹ سنه سنده وهله
کلوب سینوب لیمانده لنگر انداز اولان دونمای همسا
یونی ظلماً احراق بالنا را یدنجبه ارتق اوروپا افکار
عمومیه سی روسیه نک اشبو حرکت ظالمانه سنی هیچ بر

وجهله تجویز ایتیه رک هنوز دور تجدد و ترقیسنه
کیرمش اولان دولت علیه نك شو هیکل شمالی یه قارشو
حایه ایدلسنی عموماً رایه باشلامشدر.

دولت علیه یه کلنجه : روسیه کی بر قدر تلی
قومشومزك شو یله فضولی بر حرکتندن طولانی
اوروپا حقانیتنه بالمراجعه پروتستولر کوندر دیکی کی
دیگر طرفدن دخی اناطولی وروم ایلی حدودلر می
تجاوزه باشلایان دشمنه قارشو دخی قارص و طونه
سواحلنه عسکر آقتمغه مسارعت کوسترمشدر . عهد -
المجیدخان حضرتلر نك اجرا بیوردقلری شو حرکت
عسکر یه او قدر عظیم ایکن او قدر ده سلسلر و صداسلر
وتلاشلسلر و کورلتیسلر اجرا اولنمشدر که اک اختیار
اولنلر دخی بو قدر منتظم بر حرکت کورمد کلرندن
نظامات و اصلاحات جدیده نك منافع عظیمه سنی در حال
تسلیم ایلشلر در .

یامیدان محاربه یه آتلدقلری زمان عسا کر شاهانه نك
کوسترد کلری یارارلغی تسلیم ایتیه جك فرد واحد
تصور اولنه یلور می ایدی؟ عسا کر نظامیه نك ایلک
بیوک محاربه سی بو محاربه اولوب بتون جهان حرکات

عسکریه اوزرینه کوزلرینی آچشلراییدی . حتی عساکر
 نظامیه دن ماعدا اصول عتیقه وجه له برچوق دخی
 باشی بوزوق عسکری جلب و جمع اولمش ایسه ده
 منتظم و تعلیمی عسکر میا ننده بونلر حقیقه قارغه
 دیرنکی کی قالدقلرندن اوزمانه قدر دولتک بو یولده
 درینتیلر ایله نصل اولوب ده محاربه ایله بیلدیکنه جهان
 شاشمش ایدی .

طونه سواحلنجه سلسله و اولتانیجه و قلعسات
 و چتانه و یرکوی محاربه لری هر بری افکار عسکریه
 ار بابنی حیران ایله جک بر محاربه اولوب ذاتاً دین
 و پادشاه یولنده جان فدا سنی دنیا و آخرتجه مدار
 محض نجات ییلن عثمانلی اولاد لری برده انتظامات
 عسکریه ایله صنایع جنگاوریده بهره کلیه پیدا اولمش
 اولملری اوزرینه هجوملرنده او قدر منتظم صالدرلر
 و مدافع لرنده او قدر ثباتکارانه حرکت ایدرلراییدی که
 اردوی همایونلرده بولنان بعض اجنبی ضابطانی دخی
 چارناچار آفرین خوان اولورلراییدی .

روم ایلنجه شوتعداد ایلدیکمز محاربانتک چله سنده
 غلبه بزم طرفزده قالدیغی کی اناطولیجه دخی حرکات

عسکر یه من فنا اولیوب یالکز قارص قلعه سی
 روسیه نك استیلا سنه دوچار اولش ایسه ده حقیقت
 شناسان عصره خفی اولدیغی وجهله بو استیلا روسیه
 نك بر مهارت جنكورانہ سی محصولی اولیوب بلکہ
 آجلق و قحط تأثیراتیلہ قارص مدافعہ لری صوڪ
 درجه یه قدر مدافعہ دن صكره ارتق سدر مقه حقیقه
 امکان قالمدیغی ایچون تسلیم سلاح ایتیشلرایدی .

روسیه دولتنك بو محاربہ یی حقیقه فضولی اوله
 رق آچش اولدیغی اورو پانك كرك افكار عمومیه
 سنجه و كرك دول معظمه سنجه تحقق ایلدیكندن دولت
 مشارالیهایی صلحه اجبار ایچون انكاستره و فرانسه
 قابینتولری طرفندن مخابرات شدیدیه باشلانمش ایدی .
 اكر روسیه نك شو ایلک مغلوبیتلری شان عسکر یسنه
 نقیصه ایراث ایتامش اولسه ایدی توسط دولیه یی
 بالقبول حرب دن فراغت ایده یلمسی امید اولنه یلور
 ایدی . انجق كرك اوروپایه و كرك كندی ملتنه قارشو
 يك مغرورانہ بر دعوی ایلہ اورتیه آتلمش بولنان ایمپرا
 طور نيقوله انكاستره و فرانسه نك تهدید آمیز و صایاسنه
 عادتا كبرور عونته له مقابله كوستردیكندن انكاستره

و فرانسه و ساردنیا دولتری کیتلو دو نمایه ینه کیتلو
 عسکر ارکاب ایدرک بو طرفه کوندر دیلر . سلطنت
 سنیه نك ترتیبات عسکریه سی میانده مصر و تونس
 قوه بریه و بحریه لری دخی داخل بولمغله او عصره
 قدر ایشالی پك نادر اولان کیتلو دونما و عساکر
 متفقہ روسیه لینگ اناطولی و روم ایلی جناح لری
 هرگزندن اورمق ایچون قریم شبه جزیره سی اوزرینه
 صالدر دیلر .

سیواستوپول و ملاقوف و المالی محاربه لرنده
 متفقلر یمنك کوستردکاری فداکارلقره حقیقه سوز
 بوله میر . هرملت عسکرلی شجاعت و فداکاریده یکنه
 یکرندن ایشاغی قاهره محجوب اولماق ایچون
 عزملرینه قوت ویررلر و دوشنه قالقانه باقیوب جنکه
 ارسلانجه سنه صالدررلر ایدی . قارصدن و دینه قدر
 بر قای یوز ساعتك بر خط حرب اوزرنده سنه لرحه مدت
 طوب و تفنك صمداسی کسلیه رك جنك ایدلشد .

بو محاربه ده روسیه نك کوستردیکی مقاومت دخی
 عقول بشره حیرت ویره جك درجه لرده اولوب
 عساکر عثمانیه اشبو دشمن عظیمی طونه نهرندن برو

طرفه پچور مامکه غیرت ایلدیک کی عسا کر متفقہ
 دخی سیواستو پول قلعه سی الہ ییش ایسه ده ایمرا -
 طور نیقوله جنکدن یوز چو یرمیه رک تدارکات کلیه دن
 ینہ کیرو طور مامشدر ۰ براره لقی انکتره و فرانسه
 طرفندن بحر بالطقده کائن قرونشتاد ترسانه سی اوزرینه
 دونما و عسکر سوقیله پترسبورغه طوغری روسیه پی
 تضییق ایتک پلانی دخی اورته یه چقیدینندن بو حال
 ایمرا طور نیقوله پی کرکی کی تلاشه دوشورمش ایسه -
 ده نصله فرانسه ایمرا طوری اوچنجی ناپولیون
 روسیه طرفندن روی استعداد کوستریلان صلحی
 قبولده لزومندن فضله مساعرت کوسترمکه و او
 اره لقی روسیه ایمرا طوری نیقوله نک دخی وفاتی
 وقوعبولغله ۱۲۷۳ سنه سنده پارسده عقد اولنان
 معاهده صلحیه روسیه نک غالبیتی صورتنده دکلسمده ده
 پکده مغلوبیت قطعیه سی صورتنده اولیه رق عقد
 اولندی ۱۰ کردولت مشارالیه تخمین و امید اولندیخی
 درجه لرده مغلوب اولسه ایدی لهستانک اعاده
 استقلال کی روسیه پی زیاده سیله کوچولته جک
 نتایج عظیمه دخی بومصالحه دن بکنیله بیلورایدی ۰

فقط دشمن اوزرینه او قدر پارلاق بر غلبه چالنه مدیغندن
 پارس معاهده سینه قارص قلعه سنی ینه دولت علیه
 اماده و قریم دخی روسیه ینه ترک اولنق و قره کزده
 روسیه نك دونما و ترسانه سی بولنماقی و دولت علیه
 عثمانیه نك تمامیت ملکیه سی و استقلال تامی اورو پانك
 ضمان و کفالتی الله و یرلمش اولسی حسینیه بعدما
 روسیه طرفندن دخی بول استقلال و تمامیه سی
 اولنق اساس شرائط صلحیه اتخاذ قلمشدر .

واقعا بومعاهده اوزرینه روسیه نك تعرضات فعلیه .
 سی بعدما بیوک مشکلات پیدا ایلش اولدی ایسه ده
 دولت مشارالیه سلطنت سنی عثمانیه علیه نه کی
 تصمیمات قدیمه سندن ینه واز کچمیه رک بعدما بلغار
 وروم وارمنی اقوامی و قره طاغ و صرب امارت لرینی
 دولت علیه علیه علیه تحریک اتمکی کندیسی ایچون بر
 خط حرکت اساسیه اتخاذ ایلدی . حتی محاربه نك
 عقبنده یونانستاندن تشکیل ایدن اشقیا چته لر ی یانیه
 و تر حاله سنجاق لرینی و قره طاغدن چیقانلر دخی هر سك
 طرف لرینی تعجیر نه باشلا دیلر . طوسقه سلاح شورلری
 عساکر شاهانه ایله بالاتفاق اشقیای یونانیه به حد لرینی

ییلدیرمکده قصور ایتمزلر ایلیسهده، بونلر بر طرفده
مقهور اولدقجه دیگر طرفدن بنه باش کوسترمک صو-
رتیه قاریشقلغی ادامه ایلرلر ایلی.

هرسک طرفلرینه کلنجه: قره طاغلیلرک بورالده کی
شقاوتی اشقیای یونانییه دخی قیاس قبول ایده من
ایلی. موقعک مناعت فوق العاده سی حمیلله عساکر
شاهانه مقابله اشقیاده پک چوق زجتلر چکرلر ایلی.
نونکله برابرینه صرف تقدینه فدا کار بن کیرو
طورلیه رق قره طاغ چته لری دخی طرف طرف مغلوب
ایلیکله امارتیری حدودینک داخلنه چکدیلر ایسهده
عساکر شاهانه حدودمذ کوره بی ده تجاوزله اشقیای
مذ کوره نک تربیه سی اکیاله موفق اوله ماشدر.

قریم محاربه سندن صکره دولت علیه عثمانیه
اصلاحات پلانلرینه بر قاندها وسعت و یردک
اوروپا طرفدن حقمزده کوسترلمش اولان توجهاته
بر قاندها لیاقتیزی اثبات ایلمش فرض ایلیسهده اشبو
یونان و قره طاغ فسادلری بزی اصلاحاتمزدن منع ایلد-
یکی کبی عبدالمجیدخان حضرتلرینک او اخر سلطنتلر-
نده سوریه جه ظهوره کلان بفساد دخی معنائک
بیوک زیانمزی موجب اولمش ایلی.

بر وقت دہرو سور یہ طرفلرینہ انتشار ایلیمان جز -
 ویتلر اورالرجہ اہالیٰ نصرانیہ بی ایستدکاری کبی
 زہرایہ رک بونلر کندیلرینی بیباغی فرانسزحمیسی
 عدایتکہ باشلامشرایدی . اہالیٰ مذکورہ نک بو -
 صورتلہ دکشدکجہ دکشمکده بولنان اطواری اہالیٰ
 اسلامیہ یہ دخی تاثیردن خالی قالمیہ رق بناءعلیہ اوتہ -
 دن برو قرن دناش کبی یشایہ کلش اولان خلق یکدیگرینہ
 نظر خصوصیتلہ باقدقلری صرودہ بعض چوجقلمیا -
 ندہ ظہورہ کلان برمنازعہ درحال برمسئلہ دینیہ
 رنگنی المش واسلام وخرستیان بوغاز بوغازہ برمقاتلہ یہ
 کیرشمش ایدی .

فرانسہ دولتی بومنازعہ یہ طوغریدن طوغری یہ
 مداخلہ ایدرک سور یہ یہ عسکر ارسالہ قدر وارمقلہ
 دولت علیہ دخی فؤاد پاشا وشروانی زادہ رشیدی
 افندی کبی نزاکت زمانہ واقف قومیسرلر کوندرہ -
 رک شام والیسی بولنان احمد پاشانک و مأمورواھا -
 لیدن برچوق کیسہ لرک شہیداً قربان ایدلملری بہاسنہ
 بومسئلہ یہ دخی ختام ویرلشدر .

دور عبدالمجید خانیدہ دولت علیہ نک موفق

اولدیغی اصلاحات و اجراآت حقیقه بزم ایچون بر
تجدد اساسنی وضع ایتمش اولغی تأمین ایتمکله برابر
قریم محاربه سی کبی برده عظیم محاربه وقوعه کلدیکی
حالده ذاتاً ضعیف اولان خزینه مالیه مزك بالنسبه
یک جزوی بر بورج التنیه کیرمش اولمسی هیچده
استکشار ایدیله جک بر کیفیت اولدیغی حالده کندیلر -
ینی حیت عثمانیه و غیرت اسلامیه اربابان عدایلیان
برطاقم کیمهلر اشبو تجدداتدن ممنون اوله مامشملر
و برجیت خفیه تشکیلیله کویا بعض اصلاحاتی جبراً
تکلیف و ترویجی کوزه الدیرمشلر ایسه ده جمعیتلری
کشف اولنهرق و عبدالمجید خان حضرتلرنک مرحت
و شفقتلری شدت قانو نیه ده دخی غلبه ایلیه رک ارباب
جمعیتک ایجاب ایدن محملره نفی و تبعیدی ایله بوفساده
دخی نهایت ویرلمشدر .

عبدالمجید خان حضرتلری ۱۲۳۷ سنه سنده

تولد بیوردقلرینه کوره هنوز قرقق یاشنده برپادشاه
کامل ایکن دار عقبایه رحلتلری ۱۲۷۷ سنه سنده
وقوعه کلش و بناء علیه حقایق بینان دولت و ملتی یک
زیاده اجندیرمش ایدی . انجق زینت بخش تخت

سلطنت و خلافت اولان سلطان عبدالعزیز خان
 حضرت تیرینک جلوس همایون تریله برابر اصلاحات
 ملکیه و عسکریه به مساعده صرف همت بیورملری
 قریم محاربه سی کبی بر مسئله عظیمه نک نتیجه مسعوده
 سی اولان صلحدن بحق استفاده بی هر کسه امیدایتدیر
 مکه سلطان عبدالمجید خان حضرت تیرینک وفاتلرندن
 متحصل تأثرات عمومیه به دخی اعتدال کشدر .

جنتیمکان سلطان عبدالعزیز خان حضرت تیرینک
 جلوس تریله برابر ایلک همت پادشاهانه لرینی مساعده
 صرف ایلدکاری شی هنوز بردوام اولان قره طاغ عصیا
 نیک محوی قضیه سی اولوب بونک ایچون قوماندانلره
 ارادات شدید و قطعیه ارسال اولمغله انلر دخی بذل
 ماحصل اقدام و غیرتدن کیر و طور میسهرق قره طاغ
 اشقیاسی طرف طرف ضرب و تنکیل ایدلمش و مسا کر
 شاهانه حدود امارتی چکوب مرکز امارت اولان چتینه
 قریه سنه کیر مکه رمق دخی قالماش ایکن روسیه و دول
 سارّه میدان توسطه آتیلهرق نهایت بوفساد کلیاً
 بر طرف اولمشدر .

بوعصر اوروپاچه اسلحه عتیقه نک بالکلیه تبدلی

عصری اولوب اسکی قاپسولای قوال تفتشکارک یرینه
 ششخانه لی تفتشکارک ایجادی نی متعاقب قو یرو قسن
 طولار تفتشکار و طو پیر وزر هلی کیلر دخی شیوع بولمعله
 اسلحه عثمانیه نك بونلره تحویلی و حال بو که هر دولت
 نزدنده تنسیقات عسکریه و فنون و صنایع حربیه
 مطلقا اسلحه موجوده نك قوه تخریبیه سیله متناسب
 اولمق لازم کلدیکندن تنسیقات عسکریه مزكده تعدیل
 و اصلاحی بدایت سلطنتلرنده سلطان عبد العزیز خان
 حضر تلی مثللو الشوقلی و غیر تلی بر حکمدارک الترام
 مخصوصنه وابسته برشی ایدی .

حالبو که قریم محاربه سنك وقوعی اوزرینه
 حصوله کلان مضایقه مالیهیه مقابل برچوق اوراق
 نقدیه اخراج اولنوب بوا یسه قوه مالیدی بسبتون
 بر باد ایلدیکندن اوراق نقدیه مذکور نك الغاسیله
 واردات و مصارف دولتک موازنه سنی بولدور مق
 دخی بشقه جنبه بر امر اهم ایدی .

ایدی سلطان عبد العزیز خان حضر تلی
 قوائم نقدیه یی الغا و ایلک دفعه اولمق اوزره
 مالیه مزك موازنه سنی نشر و قوانین دولت علیه یی

دستور نامیه بر جلد ده جمع و اعلان و ترقیات صناعیه بی
تشویق ایچون معمولات و محصولات عثمانیه بی سرکی
عثمانی نامیه بر سر کیده تشهیر ایتک مثالو اجرا آت
مهمه ملکیده مقابل دیگر طرفدن قو یروقدن طولار
تقنکار و طوپر و زر هلی کیلر مباحعه سیله تنسیقات
عسکریه نك دخی اکیانده دامن در میان همت اولمشدر .
حالبو که اسلحه جدیده نك یالکیز بر دفعه لقی مباحعه سی
کافی اولیوب اصل مقصد اساسی بونلری مملکت مزده
دخی اعمال ایتک ایچون لزومی اولان فابریقه لک تأسیس
و کشادی قضیه سی اولغله طوپخانه و ترسانه فابریقه
همایونلری اکاکوره تجدیداً توسیع و اصلاح اولمش
و یکی تقنکار و جسمیم طوپر و زر هلی کیلر کندی
مملکت مزده انشا ایدیه نیک اسبابی تمامیه اکیال
قلمشدر .

۱۲۸۰ سنه سنده قوزان طرفلرنده بر عصیان
ظهور ایلش ایسه ده در حانار بابی تشکیل و تریقه قلمش
ایدی . اوزمانه قدر ولایتلرجه ظهوره کلان بومثالو
قاریشقلقره سبب ولایات شاهانه نك محتاج اولدقلری
اصلاحات کلیه قضیه سی اولغله ۱۲۸۱ سنه سنده

ودین و سلمستره ونیش و صریفه ایالتلری طونه ولایتی
 نامیهله برولایت حالنه قونیلوب اوزمانه قدر والیرک
 کنددی دائرلری. خلقی دیمک اولان کتخدا و دیوان
 افندیسی و تفنکچی باشی کی غیر رسمی ادملرک ایادی
 سسواستعمالنده بولسان زمام اداره والی و مکتوبچی
 و ژاندارمه قوماندانی مثللو رسمی مأمورلره تودیع بیور-
 لش و مأمورین مالیه و شرعیه دخی کا کوره یککیدن
 تنسیق قلنه رق اجرا اولنان تجربه ده شوو ولایت اصو-
 لنک منفعت عظیمه سی نمایان اولمش ایدی. بناء علی ذلک
 سائر ایالات شاهانه دخی ۱۲۸۲ سنه سنده ولایت
 اصولی السنه ادخال اولندقلری کی اوزمانه قدر ولایاتده
 غزنه لر بولناممی اهاالینک مطبوعات یوزندن ایده جککری
 استفاده یی مانع اولمغله دولتک تنظیمات و تنسیقاتنه
 و عالمک احوال مدنیه سنه هر کسک و قوف پیدا ایتمی
 ایچور و لایترده مطبعه لر کشاد و غزنه لر نشری دخی
 جمله تنسیقات جدیده دن عد اولمشدر.

بوصر ده یونان دولتنک طوغریدن طوغری به
 و بعض دول مظمه نک دخی طولایید سندن اوله رق
 وقوع بولان تشویقاتی ثمره سیله کرید جزیره سنده

عظیم بر عصیان چیتش و هر نه قدر اسباب تشکیلیه سنه
 مسارعت قلندی ایسه ده بردن بره دفعی ممکن اوله ما -
 مشدر . بوکاضحیه ۱۲۸۳ سنه سنده صریحه جه
 دخی بر طاقم قاریشقلقلر ظهور ایدرک صریبلور امتیاز -
 لری حسیله کندیلرینه ترکی لازم کلان بلغراد قلعه -
 سنک ترک و تخلیه سی طلبنده بولمغله غائله یی بر قاندها
 آرتدیرماق ایچون ۱۲۸۳ سنه سنده قلعه نکره
 بالتخلیه محافظه سی صربستان امارتنه تودیع قلمشدر .
 کرید غائله سی کتدیکجه اهمیتنی آرتدیره رق بناء علی
 ذلک دولت علیه عثمانیه بوفسادی کو کندن قلع وقع
 ایچون یونان دولتیله قطع مناسبات سیاسییه قدر
 وارهرق بتون ممالک شاهانه ده بولنان یونانیلر ابله
 قونسلوسلرک طردینه و دونمای همايونک سواحل
 یونانییه ایصالنه مسارعت قلمنجه یونان دولتی
 لرزه ناک اولدیغی کبی کریده سوق اولنان قوه کلیه
 دخی اشقیایی طرف طرف پریشان ایدرک بولنره امداد
 یتشدیرمکه مأمور اولان واپورلردن ارقادی نام واپور
 سفاین عثمانیه دن عزالدین واپوری معرفتیه اله پکور -
 لدکدن صکره ارتق کرید فسادی دخی بالکلیه منطقی
 اولوب یتشدیر .

سلطان عبدالعزیز خان حضرت قری ابتدای
جلوس همایونلرنده دوات غلبه عثمانیه نك برنجی
پای تختی بولنا. روسه شهرینی بالتشریف اجداد
عظامی حضرتك مر اقد مبارکدلی ز یارت بیور-
دیغی واندن صکره سلطنت سنیه نك ایکنجی پای تختی
دیمك اولان مصری دخی تشریف ایلیه رك شان
جلیل خلافتی تبعه مصریه سنه ده کوستردیکی کبی
۱۲۸۴ سنه سنه اورو پای تختلرینی ده بالذات
تماشا ایدرك عصرک ترقیات عظیمه سنه بر فکر صحیح
پیدا ایلکی آرزو بیورمش اولدقلندن بو آرزو اوزرینه
پارس ولوندره وویانه کبی الک مشهور اورو پا بلا-
دینی تشریف و تماشا بیورمشلر و عودت همایونلرنده
در سعادتجه امثالی غیر مشهود بر شهر آیین ایله استقبال
اولمشلردر .

بوزمانه قدر مصرده حکومت سورن ذواته رسماً
یا لکز « والی » عنوانی ویریلور ایکن ولایه مشارالیه مک
عهدهلرنده رتبه صدارت بولنق حسینیه مصر والیسی
اسماعیل پاشا امتیازات مصریه نك تعدیل و ضعی یولنده
بعض استعدا لرده بولادیغی صره ده مصر والیرینه

بعداً « خدیو مصر » عنوانی ویرلسنی دخی استدعا
ایتمکه کیفیت نزد شاهانه ده تصویب بیور یله رق
اکا کوره مصره فرمانلر احسان بیورلش و مصرجه
والیملک محمد علی پاشا فاملیاسنک اکبر وارث اولادینه
ارثاً انتقال ایدر ایکن اسماعیل پاشا بواحوال وراثتی ده
بالتبديل يالكز خديو بولنان ذاتک اکبر اولادینه تحویل
وراثت ایشدر .

سلطان عبدالعزیز خان حضر تلرینک هم سنیه
ملوکانه لری ترقی معارف جهتنده دخی کور یله رک
هر طرفده مکاتب رشديه تکثیر اولندیغی کی درسها -
دنده برده مکاتب سلطانی وجوده کتورلش و بوندن
ماعدامکاتب عسکریه اصلاح اولنده رق هله مکاتب
طبیجه بوزمانه قدر فنون طبیه فرانسه زجه تدریس
اولنور ایکن عثمانلیجه یه تحویل قلمشدر که بونی
عصرک الک بیلک آثار تر قیسندن عدایلیک بجادر .

۱۲۸۸ سنه سنده عسیر طرفلر نده مشایخ عربان
اره سنده ظهوره کلان بعض اختلافات بالاخره اورالره
انکلیز لریک یدمداخله سی اوزاتلسنی موجب اوله جغی
کورلدیکندن و حالبو که یمن اقلیمی دولت علیه عثمانی .

نیه نك جـله اجزای صحیحه سندن ایکن بعد مسـافه
 حسیله نصله بر زماندیری اداره سی اهمال ایدلمش
 بولندیغـدن اورالره در حال عـسا کر شاهانه سوق
 اولـه رق ممالك مذ کوره عادتایکـدن فتح ایدلمش
 کبی بر صورتله حکومت سـنیة عثمانیه به ربط و احاق
 قلنشـدر .

الحاصل جنت مکان عبدالعزیز خان حضرتلر نك
 ترقیات مملکت ایچون یوقاریدیری بعض امشالی ذکر
 ایدلمش اولان اجرا ات نافعـلری هیچ برکسه نك انکار
 ایده بـیله جکی شـیلردن اولمـدیغی حالده بونلر ایچون
 ایدیلان مصارفك کثرتی و بناء علیه دیون عثمانیه نك
 ایکیوز ملیون لیرا درجه سـنه تقریبی بر طاقم دور
 اندیشانی دوچار اندیشه ایلـهرك دیگر جهـدن برفرقه
 مخصوصه دخی سلطنتجه برتبـدل ایقاعندن مستفید
 اوله جقتلرینی ا کلامغله اینجه دنز اینجه یه و کیرلـیدن
 کیزلی یه بر بیوک فساد تهیه ایدلمکه باشلانمش ایدی .
 بو فسادك مرتبـلری کندی ایشـلرینی اوقدر
 اوسته لقی بر صورتله ترتیب ایشـلر ایدی که ارتقی نام
 شاهانه یه اوله رق نصل اجرا ات میدانـه حقیقه

بونی بالترتیف عموم ملتک کوزندن دوشورمکه غیرت
ایدرك هله بورج چوغالدقجه فائضلرینی یتشدیره بیلک
اوزره وارداتک قسم اعظمی اوجمهته صرف ایدمکدن
طولایی ار باب معائشه بالطبع دارض اولان ضرورت
شدیده نشریات مهجه ار بانک القا آتنده کی تأثیری
برقائدها آرتدیرر ایدی .

نهایت مضایقه مالیه نك صولك درجه به وارمی
حسبیلله دولت علیه یا بورجلر نك فائضلرینی ویره مامک
ویا خود ملکینی اداره ایده مامک کی یکی تهلیکه اره .
سمنده قانجه برنجی تهلیکه بی اهنون کوروب دیون
عمومیه فائضلرینی ویره میه جگنی اعلان ایتسی اوزرینه
بوده اورویا جده عثمانلی اسهانه مالک اولانلری مایوس
ایاش و حال سوکه اورو پانک بو یاسی در حال استما .
نبولك ده اضطرابی آرتدیردقدن ماعدا استانبولجده
قونسولیده صاحبی برچوق ادملر بولنه رق بونلردخی
همان ثروتلرندن محروم قالمق درجه لرینی بولوب بو
ایسه اداره زماندن نمون اولمایانلرک شدت تأثرلرینه
بر یار دیمدها کونستر مشدر .

زمانده شو استعدادمده شه آرتمقله برابر برده بو عصر

اسلاولرك اليوك برفساد طولاني چور دكلى زمانه
مصادف اوله رق هر سىك و بوسنه طرفلنده ظهور
ايدن فسادك منعى چارهي بولنه مدقن فضله بوفسادك
بلغارستانه قدر سرباتي برچوق آثار مدهشه ميله ثابت
اولدېغنه و روسيه ليلرك انتر يغلر ايسه استانبوله
قدر تأثيراتي كوسترديكنه مبنى سلطنتجه برتبدلدن
استفاده ارايان فرقه بوقار غشمله ق ارمونده مرادلر ينه
نانل اولق اميدنه كاملاً قوت و ير مشلر و بناء عليه
بر طرفدن فلبه جهت لنجه بلغار فسادى دخی كنديسنى
اورته يه قويمش اولديغى بر زمانه بو طرفدن دخی
انلر بر كچه هيچ بر كسه نك خبرى اولمق سنى ين طولمه
بچه سراى همايونى صاروب سلطان عبدالعز يزخان
حضر تلىنى طوپ قيو سراينه نقل ايدرك مراد افندى
حضر تلىك سلطنتنى اعلان المشر ايدى .

بو ايشى او قدر مرتب بر صورتده يوروتمشلر در كه
حتى سراى همايونى صارمغه كيدن عسا كر شاهانه
اويله خلع كى مدهش بر نيتدن خبردار اوليه رق
بلكه بر تهلكه يه مقابل ذات شاهانه يى محافظه ايچون
كيتدكلى رنى اعتقاد ايتكمده بولمشلر ايدى . تبديل

سلطنت اوزرینه ایدیلان اعلان کرده بوايشك اتفاق
عمومی ايله اجرا اولنديغی درمیان ایدلیدیکی زمان ايسه
اوته دنبری اغفال ایدلمش اولان انظار و افکار عمومی
او قدر غفلت کو سترمش ایدی که جنت مکانک اکثر
یده اصدقاسی بيله اظهار آثار تأثر واضطرابه مقتدر
اوله مامش ایدی .

برقاچ کون صکره هیئت عسکریه وقوع حالک
حقایقنی تیغه باشلا نیجه بومسئله نك مرتبیری اولان طاب
بورلری در حال طشره یه مأمور ایدرک یرلرینه طشره دن
بی خبر عسکر جلب ایلک تدابیر یله برابر در حال سوء
قصد جیلر ترتیب یله سلطان عبدالعزیز خان حضر تلرینی
شهید دخی ایلدکری حالد خله خلقه قارشو کو یا ذات
شاهانه حسب المایوسیه کندی قول طمار لرینی کندی لری
آچه رق نفس همایون لرینه قصد ایلدکری طر زنده برروا -
یت چیقار هرق بو باده مصنع برده هیئت اطبار اپور طی
اعلان ایلدکری نندن بو کاده اغلب ناس عادت اینه انمش
ایدیلر .

دیگر جهتدن حقیقت بینان اصدقای دولت ار باب
انقلابک مقصود حقیقی لری نه اولدیغی ده بيله رک

بولردن چركس حسن بك اسمنده بر غيور مدحت پاشا
قوناغنده اجتماع ايليان مجلس و كلايه كيروب اصل
سبب حقيقى انقلاب اولان سر عسكر حسين عوفى
پاشاي قتل و بوسرده خارجه ناظرى راشد پاشاي ده
همان من غير تعمد كى بر صورتله اتلاف ايلد كدن ماعدا
قيودان دريا اولان قيصريه لى احمد پاشاي ده جرح
واوزرينه كلان بعض عسكرى ضابطان و افرادى ايله
برقاچ اوشاقدن كى قتل و كى جرح ايدرك بك قوتلى
بر انتقامه موفق اولمش ايسده بيجارنك بو حركتى
اوزمانه كوره جنایت فوق العاده عد اولنهرق همان
برقاچ كون استنطاقدن صكره صلباً شهيد ايدلمشدر .
افكار عموميه نك غفلتى درجه سنى اكلاملیدر كه
هيچ بر طرفه منسوب اولنهرق كلاً بيطرف بولنسان
افكار عموميه دخى بو احواله قارشو ارباب انقلابك
تشبثاتنى سكته دار بيله ايدجك بطور كوسترميه رك
بولرك كافه سى مقتضای حکم زمان اولمق اوزره تلقى
اولنور ایدی .

استانبولجه شولولوله بر كره دهشت افزای وقوع
اولنجه ارتق دولتك امور داخلیه سى ده امور خارجه .

سی ده قارمه قار بشق او له رق قره طاع و صر بستان
امارتلری بوسنه و هر سگ و بلغارستان عصیانلرینه علاناً
اشترک ایتکله روم ایلی طرفلری بردار الحرب مصورتی
المش ایدی .

حکمت خدا بر پادشاهک خون مظلوم شهادت نه
مقابل الله ایدلمک ایستنیلان اقبال دخی هیچ بر کیمسه یه
یاره میهرق سلطان مراد خامس حضرتلری جلو سولرندن
بش اون کون صکره جنسون مطبق دینلان و بردها
ابداً ای اویلسی فناً محال بولنان بر علت مد هشه یه
دوچار اولغله ارتق ار باب استبداد میدانی یالکز
کنندیلری ایچون آچیق بولش و صر بستان و قره طاع
و بلغارستان اشقیاسی ایچون عادنا بر دولت محاربه
سی صورتیله تدارکات کلیه یه قویولش ایدی .
صکرملری اجرا ایدیلان تدقیقات و تنقیدانده
حقیقت حال میدانه چیتدیغی زمان ا کلاش لیدیغی
اوزره بتون انظار عمومیه نك بر بلیه عظیمه اولوق
اوزره کوروب تلقی ایلدکری بومحاربه داخلیه مکر
اوزمانه کوره ارباب انقلابک ستر حقیقت حرکاتلری
ایچون یک موافق برشی ایمش . زیرا بر یاندن عساکر

نظامیه وردیفه بی و دیگر طرفدن بیر اقلر اچیلهرق
 و طاولر چالنه رق سلاح التنه دعوت ایلدکری
 باشی بوزوقلری استانبوله طولدیروب خلقک کوزنده
 ولوله بی بولندکری حالده ایچ یوزندن کندیلری همان
 سرای همایونی صویق درجه لرینه واروب اکاده
 قناعت ایتمه رک مصارف حربیه مدار اوله جق
 دیه او یچ میلیون لیرالق قائمه قطعنه ده وارمشلر و بو
 یوزدن احوال مالیه مزه صوک سکتیه بی ده ایراث
 ایلشزدرد.

اگر بونلر ده اچوق وقت موقع اقتدارده
 قالمش اولسه لر ایدی هیئت عمومیه دولت و ملتک
 عادتا تاریخ استقلال و موجودیتنه خاتمه چکامک
 درجه لرنده ده ا نیجه فناقلره جسامت ایده جکری
 درکار ایدی . زیرا اوتهدنبری بتون افکار عمومیه بی
 « بر تبدل سلطنت و قوعه کلور ایسه شو یله قانون اسا
 سیلر وضع ایده جکز . بو یله مجلسلر آچه جکز . حریت
 عمومیه بی شو یله تأسیس ایده جکز » کبی وعدلر ایله
 کرکی کبی قاندیروب انقلابات واقعه بی کاملاً لازم
 و لابد صورتنده کوسترمش اولملر یله برابر موقع

اقتداره کلدکاری زمان انلرک هیچ بر یسنی یامدقدن
 ماعدا معاذالله تعالی جنت مکان سلطان عبدالعزیز
 خان حضرتلرینه تردیفاً بتون خاندان سلطنته دخی
 قیمی خیانتنی ترتیب ایلشیر ایکن جناب ارحم الراحمین
 بتون امت محمدیه آجیه رق ذات ملهیت صفات
 حضرت عبدالحمید خانی به بر الهام ایله بوسوء قصد
 کلمی به میدان بولسه مدیخی کبی ارتق جنون مطبق
 علتیه معلول اولان حکمدار دخی مقام خلافتنه
 برقرار اوله میهرق جلوسنک اوچنچی آبی شرعاً
 منخلم اولمش وحالاً اریکه آرای خلافت وسلطنت
 اولان پادشاهمز پادشاه فاروق جاه وشهر یار حقایق
 اکتناه افندمر بالارث والاستحقاق تام مقتضای شرح
 شریف محمدی وموجب قانون منیف عثمانی اوزره
 جالس تخت خلافت اولغله فناقلرک تزایدی اوآندن
 اعتباراً کندی کندیسنه منع اولنهرق، اصلاح احوال
 ایچون دخی امید اصدقایه بر بیوک قوت کلکه باشلا-
 مشدر • ایشک بوجهتی ارتق « دور حاضر »
 قسمنه حائد اولوب اودخی تار یخمزده دردنجی باجمرک
 دردنجی فصلنی تشکیل ایده جکندن بروجه آتی فصل
 مذکورک کشادی لازم کلشدر •

(دردنجی فصل)

« دور حاضر »

عن ۱۸۷۶ الی ۰۰۰

تفصیل - تفصیل احوالده شروع ایلدیکمز دور
 حاضر حالا اریکه پیرای خلافت و سلطنت اولان
 شوکتلو قدرتلو پادشاهمز غازی عبدالحمیدخان افندمز
 حضرتلر نیک عصر سعادت حصر ملو کانه لر یدر .
 یودورک اهمیت فوق العاده سنی نظر موازنه و مقایسه .
 ده لایقی وجهله تقدیر ایده بیلک ایچون دور سابقده
 دولت علیه عثمانیه نیک نه مدهش برتهلکه ده قالمش
 اولدیغنی کوز اوکنده برکوزجه تجسم ایتدیرملیدر .
 واقعا احوال مذکوره هنوز دونکی شیلر دیمک
 اولدقلری و دهشتجه شمیدییه قدر امثالسز بولاندقلری
 چجهتله بونلری نظر موازنه و مقایسه ده تجسم ایتدیرمکه
 حاجت اولیدر ق کندی کندیلرینه پیشگاه انظاره
 کورلر ایسه ده هر حالده جلوس همایون عبدالحمید
 خانینک نصل مدهش بر زمانه مصادف اولدیغنی تعیین
 اولنور ایسه موققیات عظیمه حضرت پادشاهینک
 اهمیت و شانی دخی اکا کوره تقدیر اولنور .

اوزمان اویله بر زمان ایدی که ار باب انقلاک
 افکار عمومی ده پیدا ایش اولدقلى تأثیرات کلیه
 مدهشه اقتضا سنجه و کلا ووزرا ورجال دولتک اصد-
 قاسنی غیر اصدقاسندن فرقه کسه موفق اوله میهرق
 هر دائره اداره علیه عمومی بر امنیتسزلك حکم
 سور مکده اولدیغندن زمان حتی بر زمان امن و اسایش
 بیه اولسه بویه بر امنیتسزلكه مقابل اصلاحات
 لازمه تشبث ایده بیلک مشکلات اموردن عدا و لنور
 ایدی . حالبو که موجود اولان امنیتسزلك یا لکزشویه
 جه بسیط بر امنیتسزلك دخی اولیوب باغارستان
 فسادى و صرب و قره طاغ عصیانى مناسبتیه طلبه
 علومه و ارنجه یه قدر عموم اهل اسلام سلاح التمه
 دعوت ایدلش اولق حسیله هر کسک الی سلا حلی
 بولندیغی بر زمانک بوکبی بر امنیتسزلكسندن معاذ الله
 تعالی دها درلودرلو فنا قمر ظهوری دخی محتمل ایدی .
 افکار ناس جنت مکان سلطان عبدالعزیز خان حضر-
 قمرینه آجیق و یاغود آجیماق جهتلرنده بیه اختلاف
 اوزره اولوب بو اختلافدن ماعدا اصلاحات اسا-
 سیه لزوم کوروب کور مکده دخی عظیم بر افتراق

افکار حکم سـ ورمکده ایدی . بریاندن بر حکمدار
 مجنونی تحت خلافتده ابقادن مستفید اولمک القایده
 بشقه جه برتشـ ویش افکاره خدمت ایدرک الحاصل
 عموم اهل اسلام واقعا کنديلرینی یولک برتهلکده
 کورمکده ایدیسده تهلکده نک اصلی و حقیقیسی هانکی
 طرفنده اولدیغنی بيله میهرک و علی العمیا هر جهته باش
 اوردیغنی حالدده هر باش اوردیغنی جهتهک دخی برجهت
 سلامت اولدیغنی اکلایه رق کلیـاً مأیوس اولور
 ایدی .

بو حال افکار اهل اسلامدن عبارت اولوب تبعه
 غیر مسلمیه کأنجه : بلغارلرک دولت علیه عصیانلری
 میدنده برشی اولدیغندن انی تکرار ایضاحه حاجت
 اولیوب روم وارمنی مثالو دیگر تبعه غیر مسلمیه میاننده
 دولت علیه صداقت قدیمه سنی محافظه ایلان پک
 چوق ار باب حیت و صداقتک صدق و استقامتده
 ثبات و متانتلرینه دیه جک یوق ایسه ده یکی توره مه
 برچوق آدملرک فکر خیانت و امل خصوصتلی دخی
 ستر اولنده میهرق بونلر معاذ الله تعالی دولت علیه
 عثمانیه نک انقراض کلیسیایله کنديلرینک یا برر حکمو

مت اجنبیه به التحاقی و یا خود کو یا باشلی باشلرینه
 بر ملت مستقله تشکیلاترینی خلیا ایدرلر ایدی .
 بونلرک شو خلیالری اهل اسلام نزدنده معلوم اولنجہ
 التی یوز سنہ دنبری خلدن بری وعاری اولان اتحاد
 عمومی عثمانی قضیه سی دخی مشوش اوله رق بالطبع
 اهل اسلامک ده تبعه غیر مسلمہ حقلمنده نظر شبهه
 و خصوصتلی آچلدیغندن اره برده نادر اولیان مفسدنر
 « برکون مسلمانلر عموماً ایاقلانوب خرس تیانلری قتل
 عام ایده جکر » طرزنده کی اراجینی کل یوم بر بشقه
 صورتده تکرار ایلیرک ملل غیر مسلمہ نک ذهنلرینه
 یواراجیف ایلہ بر قاتدها پریشانلق و یرلر ایدی .

جنت مکان عبدالعزیز خان حضرتلرینک موفق
 اولدقلری اصلاحات عسکریه سایه سنده اگرچه
 عسکرمن چوق و دونما واسلحه من درجه کافیه ده
 ایدیسده بو عسکری جمع و اودونما و اسلحه بی
 استعمال ایچون مصارف عظیمه احتیاج درکار اولوب
 حالبوکه خزینہ دولته براقچه بولندیغندن مایه جه
 بو عجز مدھش دخی نه تدبیرہ تشبث اولنسه ایشی
 انسانک النده براقه حق قدر و وفقیتمزلکه سبب اولور

ایدی • بوکا بر چاره اولق اوزره اورو پادن استقرا -
 ضد تشبث اولندیسه ده اورو پایه بورجز ذاتاً ایکیوز
 میلیون لیرا درجه سینه وارهرق عموم وار داتمز بونک
 فائضلرینه انجق کفایت ایده جک درجه یی بولدیغی
 کبی بر زماندنبری فائضلرک انقطاعی ایله اورو پاچه
 هیچ بر اعتبار مز قالدیغندن استقراض ایچون ایدیلان
 تشبثلرک ده هیچ بر یاره ایتمدیکی کورلدی • داخلاً
 بر اعانه عمومیه یه مراجعت اولندقد ملّت صداده
 عثمانیه اگرچه صولقد کارلغی ده کوزه الیرمش
 ایسه ده بر خیل زماندنبری دوام ایدن سو احوال
 سیئه سیله ثروت عمومیه کلیاً محتمل اولمش بولندیغندن
 اعانه عمومیه صورتده کی غیرتلدخی موجود اولان
 یاره یه مرهم اوله مز ایدی • بناء علی ذلک جهان یرندن
 او یارجه سنه ایدیلان حرکات عسکریه یه متابل الده
 بش یاره بولمیه رقی حتی در سعادتده مأمورین معاشلری ده
 ویر یله مدیکندن ضرورت عمومیه بر درجه یه وار مقدمه
 ایدی که بوده احوالک رنگنی بشقه جه قارار تمقده ایدی •
 احوال داخلیه نک بویله توکاری اور پرته جک
 قدر مددش اولسنه مقابل احوال خارجیّه سیاسیه

باری برازحق یوزلری کولدی ره چک صورتده اولسه
ایدی جانہ منت اولور ایدی . افکاردن بر قسمی روسیه نك
حقسنز اوله رق ایتدی کی افسادلره و آچدیغی دعوالره
اورو پا حقانیت مدنیہ سنك روی مساعده کومستر .
میہ چکنی و قریم مسئله سنده اولدیغی کبی بود فعدہ دخی
دولت علیه نك معاونتنه مسارعت کومستره چکنی قویاً
و قطعاً امید ایلر ایکن اورو پا قریم محاربه سندنبری
یکرمی سنه دن متجاوز زمان مرور ایلدی کی وهله اون
بش سنه دنبری ملکی معمور ایتك وسیله سیله ایکیوز
میلیون ایرالق بورجه کیرلدی کی حالده دولت علیه نك
کوزه کورینور بر کونه اصلاحاته موفق اوله دیغی
درمیانله اک صکره دیون عثمانیه فائضلر سنك ده
انقطاعندن ناشی هیچ بر دوستلق کومستر مدکدن
ماعدابال عکس بلغارستانجه وقوعه کلان قتالده بلغارلری
مظلو و ترک لری ظالم کوره رک ظالمه قارشو مظلومی
جایه طورینی طاقمش و بناء علیه مدعی حقیقه
اورته یه حیقان روسیه نك ترویج آمالی ایچون مدعی
علیه صفقنده بولن ان دولت علیه بی تضییقه باشلاش
ایدی :

امان یارب ! اوزمان نه زمان ایدی که نه داخلده
 نه ده خار جده بر معاون بر مددکار بولمق شویله طور -
 سون حالمزه آجیسانلر بیله اولمیبوب بتون عالم التیوز
 سنه لك بردولت عظیمه نك معاذالله تعالی پالدير كولدور
 منقرض اولدیغنی کورمك حاضر لغنده ایدیلر .

ایشته قیامتدن نشان و یرن بویله بر زمانده ایدی که
 ذات ملکسمات حضرت عبدالحمید خانی هیئت
 ارکان دولت و غنوم ملت طرفندن ایدیلان دعوت
 و انتظار اوزرینه طوپ قیوسرای همایونده متوکلا
 بتوفیقہ تعالی تحت همایون ملوکانه یه جالس اولوب
 استانبولده جلوس همایون طوپلری انداخت اولنور
 ایکن صر بستانده دخی عسا کر شاهانه بلغار صرب
 خروات و روس افراد منتظمه و غیر منتظمه سسندن
 مرکب اوله رق چرنایف اسمنده بر روس جنرالنك
 قومانداسی اتنده بولنان عظیم بر دشمنه قارشو بوغاز
 بوغازه محاربه اوزره ایدی . ایلک فال خیر اولمق اوزره
 بوجاهده ده عسا کر شاهانه نك غالبیتی ایله علیکسناج
 قصبه سنك تسخیر اولندیغنی خبری استانبوله کلنجه
 اصدقای دولتک براز یوزلری کولدی .

اشبو بلیه حربه یی بر آن اول اورته دن قالد بر مق
ایچون پادشاه نوجاه حضرتلر ینک کوستر دکری غیرت
او قدر فوق العاده ایدی که یکدیگر ینی تعقیب ایدن
خطوط همایون واردات سنیه یی نظر غیرت و حس حیت
ایله او قویوبده هونکور هونکور اغلاماق قابل
دکل ایدی . جناب فیاض مطلق حضرتلری نیت
خالصه حضرت پادشاهی یه مکافه کرک یکی بازار
و کرک نیش وودین طرفلرندن صرستان اوزرینه
یورویان عسا کر شاهانه یه طرف طرف نصرت
و یردک علیکسنجک فتحندن صکره عسا کر شاهانه
طوغریجه بلغراد اوزرینه دخی یوروک تدارکنده
ایکن روسیه ارتق آچیقدن آچیغه میدان توسطه آتیلوب
همان جبری کبی بر صورتله بر متار که تکلیف ایلش
و صر بلبلر هر نه قدر متار که ده عسا کر شاهانه یی
خافل اولامق ایچون نقض قول ایله ینه هجو ملر کو -
ستر مشلر ایسه ده هیچ رشیه موفق اوله میجه ینه
روسیه نک اجباری ودول سار نک دخی انی تأیدی
ایله بومتار که بر مصالحه صورتنه قولشدر .
ذاتاً محار به ده دوام ایدیلوب ده بلغراد دخی فتح ایدلسه

ایدی بیلنه نه فائده سی اوله جق ایدی که بلغار و صرب
و قره طاغ و سائر نهک روسیه ایچون برر بیشدار اولد .
قلری ارتق تحقق ایتکله غالبیتز نه قدر چوغالسه
روسیه نهک شدتی او نسبتده آرتهرق بناء علیه محار .
به نهک دوا می بزم ایچون هر حالده مضرتدن بشقه
برشی کوستره میه جک ایدی .

قره طاغ اوزرینه کوندر یلان عسا کر شاهانه هر
نه قدر صر بستانده کی عسا کر مز درجه سنده مظهر
غالبیت اوله مدیسه ده قره طاغ لیلر دخی بلای باشلی
بر ایش کورمه دکلرندن متار که ومصالحه یه انکله ده
ابتدار او لشمش ایسه ده قره طاغ بکی صرب بکی قدر
قوی لای صلحه کلک ایستیمه رک بالنسبه مغلوبیت خفیفه .
سنی بر غالبیت صور تنده یورو تمکه چالشور ایدی .
مع هذا بتون اوروپا غزته لرینک و یردکاری معلوماته
و روسیه جهتنده کور یلان تدارکاته نظراً اشبو
صر بستان و قره طاغ متار که لری محضار روسیه نهک او نیاه .
جغی اصل یسوک او یون باشلا بنجه یه قدر بر مدت
متار که دیمک اولدیغی ا کلاشیلهرق دولت علیه کویا
روم ایلی محار بلریله هیچ مصالحه ایتماش ده حرب

دوام ایدیورمش کبی بر یاندن ینه اکمال تدار کده
قصور اتمامکه چالیشور ایدی .

روسیه دولتک ترتیب ایدیکی پولتیقه او یونی
دولت علیه عثمانیه بی اوروپا معاهده دولیه سیله
مصدق اولان تمامیت ملکیه واستقلال تمامدن نوعا
تجر بدیمک اوله جق بعض خصوصاتی اصلاحات
نامیله ینه اوروپا طرفندن باب عالی به قبول ایتدیر مکن
عبارت اولوب بونلر میاننده بعض ولایات شاهانه نک
بر نوع مختاریت اداره ینه نائل اوله بیلرلی دخی داخل
ایدی . بوسره ده حکومت سنیه عثمانیه دخی بر قانون
اساسی وضعیله اصلاحات کلیه واساسیه اجراسی
مذا کراتنده بولندیغندن ذات حکمتسمات حضرت
پادشاهی اوروپانک بزدن ایستدیکی اصلاحات ایله
بزم یایمق ایستدیکمز اصلاحات ارسنده کی فرق بر
کوزلجه تعیین اولنده رق . اوفر ق اوزرنده حصوله
کله جک مخالفت افکاری بر ائتلاف صورتنه تحویل
ایچون مذا کرات حکیمانده بولمق و بناء علیه دولتک
وقت و حال حاضر ینه کوره اقندار ینک فوقنده عد
اولنه جق بر محاریبه ینه هیچ ده لزوم کوسترمامک جهت

صلح پورانه سنده بولندیلر و بونک ایچون غایت حکیمانه
 برده خط همایون اصدار یله هیئت ارکان دولتی
 بو حکمته دعوت ایلدیلر ایسه ده دول معظمه طرفندن
 تعیین اولنان سفیرلردن مرکب اوله رق بحریه نظارت
 جلیله سی دأره سنده کشاد اولنان قونقراننده عثمانلی
 مرخصلر من هر حالده هیئت ارکان دولتک نتیجه
 مذاکراتی اولوق اوزره وقوعبولان تبلیغاتنده اورو -
 پانک تکلیف ایلدیکی اصلاحاتدن دائماً تبعاعده فکرینی
 اوره یه سوره رک بو صورتله اورو پانک دخی بزجه
 متصور اولان وحقی باشلانیش بولنان اصلاحات
 حقنده کی امنیت واعتمادینی بیوک برضعضا وشبهه التنده
 براتقشمر ایدی . بونکله برابر قونقرانسک درمیان
 ایلدیکی اوتوز قدر نقاط اساسیه اصلاحیه نک قسم
 کلی واغلبینده اتلاف افکار حصوله کله رک یا الکز بر
 قانچنده حصوله کله مامش اولدیغندن افکار حکمت
 آثار پادشاهی موجبجه او بر قاج ماده اوزرنده دخی
 افکار طرفینی یکدیگرینه تقریب ایلک بولی بولنسه
 ایدی اومدهش محاربه یه هیچ ده حاجت قالمقسنزین ذاتاً
 اصلاحات اساسیه تشبثاتنده بولنان دولتمز اولانجه

همت و قوتنی بوايشه حصر ايدہ بيلک ايچون مؤسس
 و محکم بر صلح زمانہ کيرمش اوله جق ایدی . انجق
 موقع اقتدار هنوز انقلاب اخیری وقوعه کتورمش
 اولان فرقه نك النده بولنه رق بعض دقيقه انديشانک
 مطالعده لرينه کوره بونلر ابقاع ايلدکاری انقلايدن
 طولايی عهده لرينه بالطبع ترتب ايليان مسئوليت
 عظيمه يی تأخيرله برابر کوياتون اورو پايه قارشو
 مخالفتله بر پارلاق غلبه يه نائل اولورلر ايسه مقام
 اقبالده کنديلرینی تأييد ايتک کبی بر مطالعه يه حی مبنيدر
 نه در الحاصل استانبول قونفرانسيله بر درلو اوزلا
 شه ميهرق دائماً بر روسيه محاربه سنی کوزله مک پو .
 لتيقه سنی ترجیح ايلديلر .

بروقت نشر ايدلمش بولمان کلخانه خط همايوني
 اورو پاچه اوقدر بيوک بر اهميت ايله تلقی اولنمش
 ایدی که بواهميت مؤخرأ خط همايون مذکور عليهنده
 انتر يغه لره قيام ايدن روسيه دولتنه قارشو اوچ درت
 اوروپا دولتلرينک قوه بريه و بحريه لر ينک قريم شبه
 جزيره سنه دو کولسی کبی نتایج فعلیه دخی کوسترمش
 ایدی . حالبوکه بودفعه حکومت سنیه عثمانیه اورو .

پاجه دخی اودرجه احرارانه سی نادر اولان قوجه
 بر قانون اساسی نشر ایلدیکی و بوقانون اساسی استانبول
 قونفراسیله برابر اعلان اولندیغی حالده دول معظمه نك
 حرکات سیاسیه لرینی منعه هیچ بر یاردیمی اوله مدیغی
 اصلا انکار ایدیه من . بولك سببی ایسه بر قانون
 اساسی تأسیس ایدیه نك قدر اصلاحات پرور اولق
 داعیه سنده بولنان حکومت سنیه نك اورویا طرفندن
 تکلیف اولنان اصلاحات قارشو پك زیاده تصعیبات
 کو ستر مسیله برابر برده قانون مذکورک صورت
 وضعنده کوریلان بعضی احوال فوق العاده قضیه سی
 اولشد . شویله که:

فرقه انقلابیه اوتهدنبری کندیلرینی خلقه قانون
 طرفداری و اصلاحات و حریت عمومیه غیر تکشلمری
 اولق اوزره کو ستر دکلی حالده اوچ آی مدت دوام
 ایلان وعادتا بدور فترت تعبیر اولنق لازم کلان مدت
 استقلال لرنده او غیر تکرینك هیچ بر ثمره سنی کو ستر
 مدکارندن بشقه بوکا دائر بر کله یازان غزته لری دخی
 منع ایللرینه مقابل مملکت و ملتک اصل مسعودیت
 و معموریت ورفاهنی ذات حکمت سمات حضرت

عبدالحمید خانینک هم ده هیچ بر صاحب حیت و غیرته
 مقیس اوله میسه جق بر صورت فوق العاده ده آرزو
 بیوردقلرینی کورنجه چونکه مؤخرأ میدانه چیقان
 حقایق اوزرینه هرکس نزدنده اکلشلدیغنی وجهله
 انلرجه مقصد اصلی حقوق عمومی و اصلاحات اسا
 سیه اولمقدن زیاده کندی ذاتلرنجه بر استبداده قانون
 صورتی و یرمک اولدیغندن انلرک بو مقصدی ذات
 شاهانه نك نیات سالمه و آمال خالصه وطن پرور یلر یله
 توافقی ایدهمیه ركب و حالده دخی کو یا اصلاحات جهتمنی
 هیچ تجویز ایتیمان انجق ذات شاهانه اولدیغنی
 و کندیلر نك ايسه بو باده غیرتدن اصلا کیر و طور
 مدقلرینی یالکیز داخلاً سمع عمومی به القا ایله قالمیوب
 کوش اجانبه قدر ایصال ایشلرایدی . حالبوکه افکار
 عمومی بونلرک مقصد قانونیلری خصوصندده دخی
 انقسام ایدرک بر طاقلری قانون اساسینک وضعنجه بشقه
 بر فکرده بولندقلری ایچون درس عادتدن تبعیده قدر
 وارلمش اولدیغندن اورو یا اصلاحات عثمانیه نك اسا
 سنده حکم دار ذیشان ایله و کلای دولت و افکار
 عمومی اهالی میاننده بر اتحاد تام کوزه ماش و بو حالده

عالم عثمانیه ده اصلاحات دکل معاذالله تعالی بر بیوک
اختلال داخلی حصه و له کله جکندن بیه قورقغه
یاشلامش ایدی .

حقیقت ! ار باب انقلاب طرفندن قانون اساسی
اولوق اوزره قلمه انسان لایحه مؤخرأ طرف اشرف
حضرت پادشاهیدن درمیان اولنان لایحه ایله مقایسه
ایمیه جک اولسه انلرک لایحه سنده حقوق شاهانه
و حقوق عمومییه بدل یالکیز کندی قدرت اجراییه لری
تقویه ایدلمش اولمقدن بشقه برشی کور یله مدیکی
وهله دول سائره نزدنده موجود اولان قوانیندن هیچ
بر یسنه بکزه مدیکی حالده ایکنجی لایحه نکلک سر -
بست والک منتظم دولت لرک قوانیننه مماثل اولدیغی
کور یله رلک خالصیت نیت و سلامت آمال خصوصنده
پادشاهمز شوکتلو افندمز حضرتلر نکلک جلایه فائق
و غالب اولدق لری ده شو مقایسه دن میدان چیقوب
تحقق ایلر .

ایمدی طرف اشرف حضرت پادشاهیدن اصلا -
حات اساسیه خصوصنده بو قدر صافیانه حسن نیت
و بودرجه عالیمه ابانه همت و غیرت کوسه تر یله رلک

قونفرانس ايله دخی اتلاف افکار حصولی ایچون
 هیئت و کلايه تبلیغ اولنان بر لایحه مفصله ده نهایت
 درجه لرده اتلافجو یانه حسسیات سنیه سرد واتیان
 بیورلدیغی حالدیه بحکمته تعالی ینه محاربه احتمالی منع
 اولنه بیوب بعض طرفلرک تشویقیله طلبه و ائره دن
 برجه غفیر حرب آرزولرینی عادتاً برنمایش عانی صور
 تنده اعلان ایلمکاری کی دول معظمه نك تکالیفی اوزر
 ینه رأی عمومی بی صور مق ایچون بتون علما و امرادن
 و برچوق دخی معتبران اهلیدن مرکب اوله رق باب
 عالیده اجتماع ایلمیان بر مجلس عمومی مدحت پاشا
 طرفندن قرأت اولنان بر لایحه بی استماع دمنصکره
 اورو پانك تکالیفی قبول ایلمکدن ایسه همان مغلوبیتی
 دخی کوزه الديره رق بهمه حال محاربه بی ترجیح
 رأینده بولنش و بوشدت افکار ده بر درجه ده
 واراشیدی که اورو پانك تکالیفی بزی محودیمک اوله
 جغی جهته اول صورته محو اولمقدن ایسه قورشونی
 طوغر بدن طوغریه کو کسمزدن یهرک محو اولق
 مرجع اوله جغی درمیان قلنش ایدی
 مجلس عمومینک اشبو قراری ارتق روسیه طر

فندن بر اعلان حرب انتظارنده بولمغی ایجاب ایلش
ایکن روسیه دولتی کو یا صلح پرور لیکد، صولک درجه یه
واردیغنی کوستر مک ایچون برده لوندرده بر مذاکره
خصوصیه یه لزوم کوستره رک مطالب واقعہ سی
اوراده دخی تصدیق ایتدیر دکن صکره پروتوقول
صورتنده باب عالی یه بر صولک تکلیف دهاعرض
اولمش وفی الحقیقه بو صولک تکلیف اوزرینه باب عالی
ایله دول معظمه ارسنده بر ائتلاف امکانی دهها زیاده
قوت بولوب افکار همایون شاهانه دخی حربدن
زیاده صلحی ترجیح ده ذاتاً میال کورلمش ایسه ده
مغلوبیت و محوه قدر هر شیئی کوزه الدیران بر زمان
ایچون ارتق پروتوقولری ده قبول امکانی قالمیه رق
بناء علی ذلک روسیه نك اعلان حربی وقوعه کلش
ایلی .

محر به نك اعلانه قدر دائماً صلحی جنکه ترجیح
ایله افکار صلح پرور یلرینه جهانی حیران ایلش او -
لان ذات ملکسمات حضرت پادشاهی هیئت ارکان
دولتک او آرزو اولنان صلحی الله ایده ماملری او -
زرینه بر کره حرب وقوعه کلدکن صکره ارتق

تقدیر یزدانی آثار ینه جل ایدمک لازم کلان بوجا -
 ر به ده غیرت وفدا کارلق خصوصه - نده دخی جله به
 تقوی بیور مشلر ایدی .

یاز یلان خطوط همایون شمعی تکرار او قونه جق
 اولسه طمار لرده خون حیثک غلیانیله کوزلردن دخی
 اشک غیرت سیلان ایتمک قابل دکلدر . بو یولده
 خواب و راحت فدا ایتک فدا کارلغک الک کوچکی
 عد اولنوب اگر بر زمانه نبری سلاطین عثمانیه نک
 موقع محار به به عزیمتلی حکمة منع ایدلماش اولسه
 ایدی پادشاه غیور حضرتلر نیک بالذات دخی غزایه
 توجهرلی محقق ایدی .

غریبدر که حرب جهتنی او قدر التزام ایله ترتیبات
 حربیه لر ینه او قدر اعتمادلی اولان بعض ذوات تمام
 ایش باشنه کلدکاری زمان اردولرک موجود صحیحی
 بیله قطعاً کوسه ترمه میهرک بر صورتی اعلان اولنان
 جدولده طابور والایلرک علی النخمین مقیدار لر یله بو -
 لندقلری مواقع بزم ایچون بر حرب پلانی اتخاذ اولمش
 ایدی . برنجی خط مدافعه من طونه نهری اولدیغی
 حالده دشمن نهری مرور ایده جک اولورسه مواقع

عسکر یه نك نصل مختاره ایده جکری طرف اشرف
ملو کانه دن سؤال ایدلد کده تلغراف مأمور ولو از منک
هنوز کلدکاری طرزنده اجوبه عجیبه آلمش ایدی.
ایمدی تفصیل و تطویل ایضا حاشی آثار مطوله یه
حواله اولنق لازم کلدیکی اوزره بو مختار بده ده
کور یلان نواقص و نقایص ذات حینت سمات
حضرت عبدالحمید خانیدن ماعدا هانکی پادشاهی
اولسه عادتاً مایوس ایده جک درجه لرده اولدیغی
حالده غیرت و حیت عثمانیه لری اوکنده طاغیرک بیله
عاجز قالد جقه لری اول پادشاه فاروقچاه حضرت لری
بر یاندن عسکر و مهمات تدارتی و دیگر یاندن مصارف
حر بیهیه مقابله چاره لری ایچون اقشام لری صباح
و صباح لری اقشام ایلدیکی حالده هممان اغزلر بنه
لقمه قویماق مرتبه سنده فداکارانه تشویق اتده
بولند قلیینه هیچ بر کیمسه نك آفریندن بشقه دیه جکی
قالماش ایکن روسیه اردوسنک زشتویدن عادتاً علنی
کبی بر صورتده مرورینی فرق ایده میان و دشمن
مروره باشلا دیغی زمان جدیدجه بر همت ایدلسه تلفات
کلیه ویرمسنه سبب اوله جق حرکات سر یعه ده

همت ایتمامک سیئه سیله دشمنی یالکر طـونه دن دکل
ایکنجی خط مدافعه اولان بالقـانلردن بیلک پکیرتن بر
طاق قوماندانلر کندی سیئات مخصوصه لرینی معاذالله
تعالی استانبوله چل ایتمک قدر واروب « استانبیل
ایشه قارشـدیغی ایچون احوال حربیه بوصـورتی
بولدی » سوزلرینی درسه عادتده بیلک اشـاعه به قدر
واردیلر .

مع هذا بو ترهات دخی پادشاه غیر تشعار افندمن
حضر تلی نه ایراث فتور ایتموب ذغرملره قدر اینمش
اولان دشمنی کیرویه بوسـکورتمک ایچون قره طـاغ
طرفلرند: بولنان عساکر شاهانه یی ییلدیرم کبی بر
سرعتله ادرنه یه جلب وجع ایدرک دشمنی بالقـان
بوغازلرینه طیقـدقـلری کبی غاز یلک عنوانیله سرفراز
اولان عثمان پاشـا حضرتلی دخی ودیندن پلونه یه
کلوب رفقتنده بولنان ازجمله توفیق پاشا حضرتلی
کبی مقتدر ارکان حربیه نک انضمام رأی ومعاونه یه
موقع مذکور ایتحامه غیر قابل برسد حالنه افراغ
ایشل واوراده کندی موجود معیتی اولان اوتوزبش
بیک قدر عسکرک اوچ درت مثلی موسقوفه مقاومت

قطعیہ کوستروب روسلک معاندانہ هجوم ملزمت همان
یاری قوتلرینی قیریش ایدی .

کذلک ذات حکمت سمات حضرت پادشاهینک
غازیلک عنوانیله سرفراز بیورملرینه ابراز استحقاق ایلش
اولان غازی مختار پاشا اناطولی اردوی همایونی بر
ارالق پریشان برحالده بولنش ایکن بریاندن اردوی
مذکور تنظیم و اصلاح و دیگر طرفدن روسلک حر -
کات تجاوز کاریلری اوکنده قاچه ماقلی مانورالر اجرا -
سیله دشمنی اشغال ایله نهایت ترتیبات سفریه سنی اکمال
ایلد کدن ایشی قوامنسه کتورد کدن صکره حرکات
تجاوز کارانه به کنیدیسی ابتدار ایلینجه روسلری حدود
عثمانیه نك خارجنه قدر طرد ایلش ریحیلر مثللو بعض
میدان محاربه لرنده اول قدر اهلیت کوستر مشدر که
بتون اوروپا کرک مختار پاشانک و کرک عثمان پاشانک
بومهارت عسکریه لرینه حیران قاله رق شان عثمانی بی
القشلامغه مجبور اولمشدر .

اگر ذات حضرت پادشاهی ایله اول پادشاه
قیمت شناسک بتشدیر دکاری برقاچ قوماندانده کوریلان
اقدام وغیرت عموم قوماندانلر طرفندن کوسترلش

اولسه ایدی محاربه دن اول روسیه نك بر حمله ده استا -
نبوله قدر کیره جکینه هیچ شبهه ایتیان اوروپا غلبات
کلیه نك بزم طرفه قالدیغنی کورده رك شاشیره حق
ایدی .

زیرا مظفریات ابتدایه مز ذاتاً بو حکمی ویردیر مکه
باشلامش ایدی . فقط چه فائده که بعض قوماندانلر
شان غالبیتی یکدیگرندن قصقاصمق صـورتیه بر نفاقه
دوچار اوله رق از جمله طونه اردوسی نه پلونه و نه ده
شبهه بوغازنده تضییق اولنان فروق همایونه معاونت
ایده جک هیچ بر حرکت سریعه کوسـتره دیکنندن
واولجه استانبوله حربی التزام ایلیانلرک دخی او
یاطر دیلریله مناسب بر کونه غیر تلی کوریلک دیکنندن
مظفریات ابتدایه مز دن نتایج مثره استنتاج اولنه -
مامشدر .

استانبول قونفراسندن محاربه نك ایلک صفحه
غالبانه سنه قدر در سعادتیجه اصلاحات اساسیه غیر -
تلینه دخی خلل کلیه رك قانون اساسینک وضع
واعلاندن صکره حال و طورینی بر قاده اغریلشدیر -
مش اولان مدحت پاشاینه قانون مذکور حکمنجه

ممالك شاهانه دن خارجه چيقارلمش ايديسه ده بعض
كسه لر ك و هملى وجهله قانونك حاميسى پاشاي مشار
اليه اوليوب بالذات حضرت پادشاه اولديغندن شو
مباعدت او ايشي كيروده بر اقامش و مجلس اعيان
و مبعوثان ايلك دفعه اوله رق كشاد اولنوب كنىدى
نظامنامه داخليلر يله سائر بعض قوانين و نظاماتى يك
كوزل مذا كره و تدقيق ايلش ايدى .

بومذا كره و تدقيقه « يك كوزل » صفتنى يالئكز
بزد كل بتون جهان لايق كورمشيدى . بو يله مبعوثان
ناسدن بوزلرجه اعضانك بر صالونده اجتماعى ايله
اجراى مذا كره ايدى بيللى يك كوچ برشى اولوب
بزدن ماعدا يرلرده مذا كره مذ كوره يه بر اصول مخصوص
صه تحتنده مجرا آچه بيلك ايچون نيجه مشكلاته تصادف
ايدلمش اولديغى حالده هيئت مبعوثان عثمانيه نك هنوز
عجمى اولمسيله برابر بو يولده كوسترديكى استعداد
حقيقه شايان تحسين ايدى . انجق محاربه نك ميدان
الهرق روسيه نك اناطوليدن بعض مواقعى اله پكير مى
وروم ايلي جهتندن دخی ايلروله مى هيئت مبعوثانك
ايكنجى اجتماعى زمانه مصادف اوله رق هله محاربه نك

ایکینچی قسم مغلو بانه سنده قوماندانلرک محاسده ورقا -
 بتلری سیئنه سیله آچی آچی مغلو بیتلر وقوعی جمله یی
 متأثر ایلدیکی کبی هیئت مبعوثانی دخی متأثر ایلیرلرک
 بوفاجعه لره سببیت کوسترنلر علیهنده برطاقم نمایشلره
 قیام اولمش ایدی که برطرفده آتش جنک وجدال هر
 طرفی یاقوب قاوورهرق حتی استانبولی یله تهدید ایلکده
 ایکن دیکر جهتدن هیئت مبعوثانک نابموسم اولهرق
 مغلو بیتلر مزه سبب اولنلر علیهنده کی مؤخذاتی
 کرچکدن لزومسنر ایدی .

دولت ومملکتک نفعنی کندی منافع ذاتیه سندن
 دهسا مهم کورن حیث صحیحه ار بابندن برطاقم ذوات
 هر بری ممالک شاهانه نک برطرفندن گمش اولمق حسیله
 استانبول احوالنه وقوفلری اولیان مبعوثانی بومثللو
 مؤخذاتک وقتی شمدی اولدیغنی وایلاک اجتماعده
 اولدیغنی کبی بودفعه دخی هیئتک یالکز قوانین ونظامات
 مرتبه نک تدقیق ومذا کره سنه حصر همت ایلسی
 لازم کلدیکنی نصیحت واطرار ایله ایقاظه چالشمش
 ايسه ده دیکر جهتدن برطاقم بیوک قوناقلر دخی مبعوثانک
 صفت مبعوثیه لایق اولیه جق وجهله مراجعتکا .

هاری اوله رق مواقع حربیه ده کی محاسداتک در سعادته
عکس ایدن حکمی اقتضاسنجیه اورالردن الدقلری
تشویقات نصایح مسرودیه موافق دوشمه یکنیدن
دشمن ایلروله یوب تهله که آرتد قچه بونلرک دخی مؤاخذه -
لری شدت بولهرق معاذالله تعالی بویله تهله که لی
برزمانده استانبولجه دخی برطاقم دهشتلر وقوعندن
بحق خوف اولنش ایدی .

ذاتاً استانبولجه وقوعندن قورقیلان دهشتلرک
مقدماتی برقاج کره لر کشف اولندیغی دخی نظر دقت
واهمیتدن اوزاق طوتیه له حق بر ماده دکلدیر . خاقان
سابقک طرفدارلی اولنلر هر نه اولورسه اولسون موقع
اقبالده کندیلری بولنق طمعندن بردرلو وازچکه میه -
رک برقاج دفعه فساد ایچون قوردقلری جمعیات خفیه
ظاهر دچیقار یلوب اعضاوار باندن بر طاقلری قانوناً
مستحق اعدام بیله کورلشلر ایکن هر شیئه غالب
اولان مرجع سنیه ملوکانه بونلر حقنده دخی شامل
اولهرق اوتیه برویه اعزام وتغر یبلیله اکتفا قلنش
ایدی .

الحاصل عساکر شاهانه نک قدرت مدافعه سی اوکنده

مجرد همت سنیۀ ملوکانه ایلہ عادتاً عاجز قلمغہ باشلا۔
 مش اولان روسیہ دولتی رومانی ایلہ صربستان و قره
 طاغ و حتی بلغارلردن بیله استمداده مجبور اوله رق
 قوتنی و شدتنی آرتدیردیغی حالده بزم رجالز یالکز محما۔
 سدهیه قوت و یرمک کرک مواقع حر بیسه ده و کرک
 استانبولده کوریلان عظیم براطراد سزاق احوالک
 دهشتنی صولک درجهیه قدر آرتدیرمش ایدی ۔ هر
 طرفدن احاطه اولنان پلونه موقعنه بهمه حال برامداد
 واعانه یتشدیرمک ایچون طونه و صوفیه و فلبه اردوی
 همایونلرینه و در سعاد تجه هر طرفه اجرا ایدیلان تشو
 یقات سنیہ ار باب حیاتی اغلاته جق قدر مؤثر اولد۔
 یغنی حالده بوامدادک بردرلو چاره سی بولنه میهرق
 نهایت پلونه ده عثمان پاشامغلو بآ دکل عادتاً غالباً روسلره
 عرض تسلیمیه مجبور او لنجه دشمنک او کنه کچیله جک
 بشقه بر موقع طوتمغده بردها امکان بولنه مامش و بناء
 علیه روسیہ عساکری ادرنهیه قدر ایلروله یوب
 کلشدر ۔

بومغلو بیتک روم ایلی اهالی مسلمہ سی ایچون
 فصل بردور فلاکت آچش اولدیغنی قلمر توصیفدن

ماجر قالورلر • قازاقلرده ذاتاً انسانیت و مرحمت
 دینلان شی پک از اولوب هله بلغارلر بوشینلرک اسملرینی
 اوکر نمامش اولدقلرندن مستوایلر بتون اهایئ اسلا -
 میه یی سلاح تهدید و جور ایله یرلرندن فشقرتارق بناء
 علیه روسیه ایلروله دجکه بونلر دخی اوکی صره استا -
 نبوله جان اتغنه باشلامشلر و شوممهاجر تده روس و بلغار -
 لرک اسلاح ظلمندن قورتیله بیلنلرک بر چوغی اثنای راهده
 قیشک و آجلغک شدتندن هلاک اولوب استا نبوله جان
 آته بیلنلرندن بر طاقی دخی بوسیاحت مجبور و فاجعه -
 دن الدقلری خسته لیکلر ایله تلفات کلیه یه اوغرامشلردر •
 مغلو بیت بودرجه لری بولدیغی حالده دخی ذات
 حضرت پادشاهی ارسلانلرده بیله اودرجه سی کو -
 ر یله میان شجاعت مخصوصه ایله نفس پای تختک
 مدافعه سنی التزام بیوره رق اوزمانه قدر بر احتیاط
 مخصوص اولق اوزره عموم استانبول ذکورندن
 ترتیب ایلمش و تقدار عموم سی بکرمی بش بیکه وارمش
 اولان عسا کر ملکیده لر یله در سعادتده بولنان عسا کر
 نظامیه یی بالاستحباب ادرنه یه طوع و غری مقابله و مدا -
 فعه اعدایه یورو مکه قیام ایلمشلر ایسه ده هیئت ارکان

دولت بو عزيمت هما يونى بروجله تصويب ايتما.
مشردر .

بر ياندن استانبوله طولان مهاجرينك و یردکاری
ولوله وديکر طرفدن تقرب ايليان روسلرک ايصال
ايلدکاری دهشت استانبول حقیقه برهرج و مرج
حالنده بولندیرمغه کافی اولوب انضباط پک مشکل
اوله رق محافظه ایلدیکده ایکن هیئت مبعوثانینه
مؤاخذات واقعه سنده دوام ایلدیکندن ارتق قانونک
احکام منیفه سی داخلنده اولق اوزره هیئت مذکوره .
نک تأخیر اجتماعنه لزوم کورلشدر .

بر ربع عصر مقدم دولت علیه یی روسیه نک بویه
بر استیلای فضولیسندن قور تارمق ایچون یوزلرجه
دونما و یوز بیکلرجه عسکر کوندرمش اولان دول
معظمه ده تاروسیه ادرنه یه کلنجه یه قدر هیچ بر اثر
غیرت کورلیوب اندن صکره انکلتزه دولتی بر قایچ
قطعه کی یی کلبولی بوغازینه کوندرمش ایسه ده بونلر
بزه معاونت ایچون اولیوب بلکه روسلر استانبوله
کیره جک اولورلر ایسه انکلتزه نک منافع شرقیه سنی
بالاخره کرچکدن قور تارمق اسبابنک ایلاک مقدمه سی

اولق اوزره کوندرلشرایدی . ذاتا اجنبی دونماسنک
 بوغازلردن مهوری عهداً ممنوع اولدیغی جهتله دولت
 علیه دخی انکلیز کیکلرینک بوغازدن کیرملرینه بحق
 ممانعت ایلش ایسه ده بر طرفدن روسیه ایله ارتق
 شرائط صلحیه یی مذاکره ایچون کوندریلان مبعوثلر
 کویا غراندوق نيقولانک خسته لکی مناسبیله
 ایاستافانوس قریه سنک هواسی موافق اولدیغی
 بیانیه یالکزمعیتی الهرق اورایه کلمسنه روی موافقت
 کوسترملریله غراندوق معیتی خلقی دیر ایکن اوتوز
 قرق ییک روسیه عسکری دخی ایاستافانوسه کیرمسنه
 مقابل دیگر طرفدن انکلیز دونماسی دخی ممنوعیتی
 دیکله میهرک بوغازلردن کوروب اطه لر پیشگاهنه تیمور
 براقش ایدی .

روسیه عساکرینک بلا لزوم ایاستافانوسه قدر
 کیرمسی ذات همایون ملوکانه یی بحق متأثر
 ایلدیکندن بو حالده در سعادتک بهمه حال اسباب
 مدافعه سی اکمال ایدلمسینه چاره عاجل تدارکی خصوص
 صنده کی غیرت همایون عقلره حیرت ویره جک مرتبه
 لرده ایکن استغراب اولنده حق احوال دندر که در سعادت

تک دخی روسیه قارشو مدافعه سی محال اولدیغی
بیانیه اکر غراندوق در سعادته کیرمک ایستر ایسه
چاره سنر بر طور دوستانه ایله قبول رأینی و برنلر دخی
بولندیغی اوزمان صحتی تحقیق ایتش بر روایتله معلومدر .
انجق پادشاه غیور و شهر یار جسور افندمن حضرتلری
فتحندبری دشمن ایاغی باصمماش اولان مقر خلافتی
بهمه حال مدافعه ماده سنده اولانجه ثباتلر یله متانت
کوسترد کلرندن بروقتلر « مکملدر » دیه عرض ارنش
بولن ان در سعادت خط مدافعه سی کیجه لی کوندوزلی
بر غیرتله یکیدن اکال ایلد کدن فضله نره دن ونه صورتله
جلب ایلد کلرینی دشمن دکل دوست ییله خبر اله مامش
بولن ان او توز بیکدن متجـاوز عساکر ایله پای تختک
محافظه سی تأمین بیور مشلدر که هر بری بر صورتله
محیر عقول بولن ان اقدامات سنیه پادشاهی میاننده
بالخاصه بوموقیت الماس ایله یازلمغه شایاندر . حتی
نه دن صکره روسلرک عقلاری باشلرینه کلهرک خط
مدافعه نک برو طرفنده نه تدارکات کورلدیکنی ترصد
ایچون قوله کبی بوکسک برشی یایمغه قالدقشدن قلرنده
اوزمانه قدر روسلری کوچندیر یرزخوفیله اغزلرینی

آچقدن قورقان بعض و هاملك خلاف مأمولی اوله .
 رق دولت علیه روسله « یا او قوله بی یقار سکز و یا -
 خود بز طوپ ایله ییقمغه مقـتدرز » جوابی و یره -
 بیلشدر .

ایاستافانوس معاهده سی عقد و امضا و تعطای او -
 لندقدن صکره اورو پا دولتری بر نوع فکر حقانیتله
 بو معاهده نك شرائطی پك اغر و فاحش کوره رك
 بر لینده بر قونغرہ عقدیله تعدیلی مجبور یتنی حس ایشلر
 ایدی . حاله و که ایاستافانوس معاهده سـنك عقدی
 خصوصنده اقدامات و ثبات پادشاهی امداده یتشما -
 مش اولسه ایدی دهانه قدر اغر و فاحش شرطلر در -
 میان اولنه جق ایدی که جهان دخی شاشه جق ایدی .
 از جمله روس مرخصلری دونمای همایونك روسیه یه
 و یراسنی طلبده اصرار ایلینجه کندیلرینی کوجندره -
 مکدن خوف و احتراز ایلیانلر بالطبع سسلرینی چیقا -
 ره مامش اولدقلری حالده ذات بسالت سمات حضرت
 پادشاهی بویله بیوک بر حرص و طمعی جلب ایده جلد
 قدر قیمت مالیه سی اولمیان بردونمای المقده تی اصرار
 محضاً غالبانه بر مفخرت پرستلکدن نشأت ایلیمه جکتی

در میانله بویله روسیه ایچون دخی ار باب حزم و فکر
نزدنده موجب ضحك و استهزا اوله جق موادی
زنهار قبوله مساعده کوستر مامشله و او کوزل دونما -
مزی او صورتله محافظه یه موفق اولمشدردر .

كرك ایستافانوس معاهده سی و كرك برلین معاهده -
سی مؤخرأ نشر و اعلان قلمش اولدقلى كبی اره لر -
نده کی فرق دخی برچوق غزتله طرفندن موقع بحث
و تدقیقه چكلمش اولمسیله کیفیتك اوجهتی بوراده
ایضا حه لزوم كوره میر . یالکز شوقدر جق برشی
در میانله اکتفا ایلر زكه :

ایستافانوس معاهده سی بلغارستان نامیله تشکیل
ایلدیکی امارت جدیدیه اسکی طونه وادرنه و لایتلرینی
وسلانیك و لایتنك دخی بریوك قسمی كاملاترك ایتمش
ایکن اورو پانك بو امارتی استكشار ایلیان فیکر حقانیتی
بلقانلرك اوتله طرفنی امارت و برو طرفنی مختار برو لایت
اولق درجه سنده بالتعديل بعض اراضینك دخی تنقیحی
صورتنده بر همت کوستره بیلش ایسه ده بوسنده وهر -
سك قطعه لرینی او ستر یا نك اشغال عسکر یسنه ترك
و یونانستانه دخی کویا هنكام حربده صلحی بوزما -

مسئله مکافات اولی اوزره بر مقدار مناسب اراضی اعطا ائیلک کبی سماحت ایله تأثیرجه همان ایستاقا -
 نوس معاهده سنه مقابل احکام برلین معاهده سندن
 دخی دور اندیشانک ممنون قالد مامسنه سبب اولمشلردر .
 کرک ایستاقانوس معاهده سنک برلین قونغرهنده
 دخی تصویب اولنان احکامجه و کرک برلین معاهده -
 سی اقتضاسنجه قره طاغ و یونانستانه ترکی لازم کلان
 یرلر همان همان تجدید محاربه بی انتاج ایلیه جک برر
 سبب قنده اولدیغی کبی بو سنه وهرسکک اشغال
 مسئله سی اوقنده بی فعلادخی میدانه چیقارمش وانا -
 طولیجه قارص وارد همان مثالو مواقعدن طولانی
 انکلتزه دولتیله عقد اولنان بر مقاوله بالاخره قبریسک
 ده انکلتزه اشغالنه ترکی ایجاب ایتشد که خصوصات
 مذکورهدن هر بری باشلی باشلرینه برر فقره تاریخیه
 اولمسيله بروجه آتی صره سيله ایضاح قلنور :

بوسنه وهرسک قطعه لرنده بروقت اسلاورک
 تشویقاتیله براختلال ظهوره کلوب هر نه قدر ایچیه
 بر زمان اوزانمش کتمش ایدیه ده بو اوزانش اشقیانک
 بر طرفه تنکیلی اوزرینه دیگر طرفه فرار و دیگر طرفه

ایقاع شقاوته ابتدار واجتسار ایلری صورتیه دوام
ایتمش اولوب یوقسه بونلرک بلای باشلی برکونه غلبه -
لری کوریه مامش ایدی . ایاالتین مذکور تینده بوضو -
رتله وقوع اختلال هم جوارلق حسبیله اوستریا دولتک
منافعنه موافق کوریه میهرک اورالده دفع وتسکین
عصیان ایچون اوستریانک اشغال عسکریسی لازم
کلدیکی وهله برلین قونفره سنده میدانه قونیلجه
اکثریت آرای دولیه بونی تصویب ایلیرک اوستریا
دخی همان سوق عسکر تدارکنه قیام ایلدی .

بوسنه وهرسک اهاالیسی بویله براحتمالی خاطر -
لرینه بیله کتیر مز لرایکن دولت علیه نک اورالده کی
قوه عسکریه و مأمورین ملکیه سنی کیرویه المسی
اهالینک هیجانی موجب اوله رق حاجی لویا نامنده
بر رئیسه اتباعاً اوستریا قارشو مقاومتیه قیام ایلدیلر .
اگر بوشناق لر بوا حتماله اولجه وجود ویرمش اولوب ده
تدارکات لازمه لرینی اکیال ایتمش بولنسه لر ایدی اوستریا -
یالورک بوندن مقدم دخی بوسنه حقنده وقوعه کلان
قصدلری عقیم چیقدیغی کی بودفعه کی حرکتلری دخی
هیچ بر نتیجه بی منتج اوله مز ایدی . زیرا برکونه تدا -

رکده یولمقدقلری حالدده دخی شوراده بوراده اجتماع
ایدن درمه چاتمه فرقه لر اوسه تر یایه کلی مقاومتلر
کوستروب دولت مشارالیهها پیدرپی سوق عسکرله
بوسنه یه بتمش، بیکدن متجاوز آدم صوقدیفی حالدده بر قاج
یرده بیوک بیوک مغلوبیتلره دوچار اولمش ایدی. نهایت
چوققلغه ازلق ونظامیه عسکرینک تدارکات مکمله سنه
تدارکسنر و مهماتسنر لقا ایله مقاومت و غلبه ممکن
اوله میهرق بوسنه لیلر تسلیم سلاحه مجبور اولمشلر در.

بوسنه ده کوریلان بوقیام ارناودلق خلقنی در حال
ایقاظ ایایه رک کیغهلر و طومعه لقدن قره طاغ و یونا -
نستانه اراضی ترکی مسئله سنه اساساً مقاومت کوستر.
میه جککرایسه ده بالاخره ارناودلق قطعه سنک بونره
قارشو مدافعه سننده ایشه یرایه جق اولان مواقعک
الدن چیقارلسننه اصلا راضی اولماق داعیه سیله بر
هیئت اتحادیه تشکیل ایلدیلر.

بو هیئت اتحادیه بواش بواش بر حکومت موقت
ملیه صورتنی آله طور سون اناطولی جهتندن روسیه -
لینک اشغال ایلش اولدیغی نقاطی ینه دولت علیه یه
اماده ایتدیرمک مقصد اساسیسی اوزرینه انکلتزه ایله

قبریس مقاوله سی مذاکره اولنوب بومقاوله احکامینجه
جزیره مذکوره انکلیز اشغالنه ترک ایدلمش ایسه ده
انکلیزه دولتی بوترکه مقابل وقوعبولان تعهداتی ایفا
ایده مینجه مقاوله نامه مذکور بالطبع فائده سز قالمش
ایندی .

هله حدود یونانیه مسئله سی اوروپا طرفندن بزم
حقمزده او قدر بیوک برحق سزلق اولمشدرکه بوکارباب
اذعان وانصافدن اولق شرطیله شاشمدق برتأسف
ایتمک کیسه قالمشدر . یونانلور کویا هنکام محاربه ده
اعلان حرب ایتسه لر ایش بتون دنیایی فتح ایده جکر
ایکن مجرد اوروپا دولتری طرفندن وقوعبولان التماس
اوزرینه اعلان حرب ایتماش لر ایش کی بطور متکبرانیه
ومغرورانیه طور انوب الکی موجودلرینک برمثلی
قدردها یرالمغه قیام ایلدکلرندن ودولت علیه بودعوایه
بحق ردایله مقابله کوسه تردیکلندن مذاکرات واقعه
سنه لرحه اوزانمش وانجام کار بونک ایچون دخی براینده
برقونفرانس تشکیل اولمشدر . مذکور قونفرانس
دولت علیه کیسه سندن سماحت کوسترمک اوزره یونا
نستانک مطالبینی همان کاملاً کی برصورتله تصویب

ایندجه سلطنت سنیة عثمانیه ارتق بوحق سزلخی هضم
ایده میوب قونفرانس قرارینی ده قبول ایتمامشدر .

ارناودلر ایسه پودغور یچه طرفندن قره طاغه
و یر یله جک یرلر ده غوسینه و پلاوا دینلان ناحیه لری
ترک ایتماک ایچون غوسینه لی علی پاشا نامنده بررئیسه
اتباع ایله قره طاغه قارشو عاداتا محاربه یه باشلادقدن
ماعدایحراً اولکون لیماننی ده ترک ایتماک عنایانده
اصرار کوسترمشلر ایدی .

حقیقی ارانور ایسه قره طاغ پرنسنگ دخی ارنا .
ودلری کوجندرمامک خصوص صنده کی معامله سی شایان
تحسین کور بلور . پودغور یچه و غوسینه پلاوا
دعوالرنجه بونلرک افاداتی مسموع طوتلدیغی حالده
اولکون لیمانک ترکی مسئله سنده ایتدکلری پروتستو .
لره اورو پاچه دخی حواله سمع اعتبار ایدلیه رک
ارناودلر اوزرینه قوه جبریه سوقنه قدر کوزه الدیر .
لدی . ذات حکمت سمات حضرت پادشاهی مقتضیات
عهده نک ایفاسی خصوص صنده ذاتاً متوحش بولسان
برخلقک بوقدرده اوزرینه وارمق لازم کلیه جکفی
یک حکیمانه بر صورتده درمیان بیوردقلری حالده اوروپا

رجال دولتی عادتاً ظهور فتنه بی امل ای دینور لر مشجده .
 منه غریب بر عناد ایله مشـترک بر دو نتما ایله اجرای
 نمایشه باشلادیلر ایسه ده بو حرکتلری ارناودلری قور-
 قوده مادقدن ماعدا اورو پاچه بیله بتون ار باب سیا-
 متی کولدور مش ایدی .

حالبو که دولت علیه عثمانیه نك ارناودلری
 تضییق ایتمک خصوصاً کوردیکی حقیقت پك
 مهم ایدی . زیرا ارناودلق هیئت اتحادیه سی نامیله
 تشکل ایلیان جمعیت عظیمه کندی وطنلری دولت
 علیه نك محافظه یه مقتدر اوله بیلسی امکانی انکارله
 کندی باشمک چاره سی کندهز کورمه یه کلیتی
 افرادی سلاح التمه الوت حتی براره لق بولری اصلا-
 حه کوندرلش اولان مشیر محمد علی پاشایی « برلین
 قونفره سنده دولت علیه یی بو قدر متضرر ایدن
 سن سک » دیه اعدامه قدر وار مشلر وعادتاً درسعا-
 دتله رابطه لرینی کسمشلر ایدی . ایمدی شو حالده
 دو نتما نمایشنک ده هیچ بر اقیچه ایتمدیکی تحقق ایلد کدن
 صکره ذات حضرت پادشاهی پیدر پی قومیسر لر
 کوندره رک اوله کون جوارنده متحشد بولنان ارناودلری

طاغندیروب سائر جهتلرجه دخی تسکین واصلاح
احواللری ایچون کاه نصیحت وکاه تکدیر یوزلریله
بو باده دخی حسن موقیته مظهر اولدیله . موقیت
مذ کوره درویش پاشا حضرتلری یدیه حصوله
کلدیکندن نزد شاهانه ده قدر و منزلتی ارتدی .

اورو پا دولتلری اولکون نمایشی کبی برنمایشه
یونان مسئله سی ایچون دخی لزوم کور مشلرایسه ده
اوزمانه قدر اورو پا افکار عمومیه سی دولت عثمانیه
علیهنده التزام اولنان حقسنزلقلردن طولانی زیاده .
سیله متأثر کورینوب هله فرانسه افکار عمومیه سی
بوایکنجی نمایشی هیچ تجویز ایتمینجه حرکت
مذ کوره اجرا اولسه مدی و یونانیلر دخی اورو پا
طرفندن قطع امید ایدنجه اوزمانه قدر یک چوق صعو.
بات ایله بریکدیره بیلش اولدقلری یکر می اوتوز بیک
عسکرک مقداری اکر کندی خلیالری وجهله حقیقه
سکسان یوز بیک اولسه بیلهینه دولت عثمانیه ایله اوغرا.
شمعه کفایت ایده میه جکنی کوره رک طرف دولت
علیه دن ترکنه رضا کوسه تریلان اراضی بی قبول
ایتملریله بومسئله دخی اوصورتده تسویه پذیر اولوب
بتدی .

برلین معاهده سنک، یومثلو مقتضیاتِ هر بری باشلی
 باشلرینه برر مشکلات صورتنده ایقاع صـعوبات
 ایله برابر حل اولنوب بتدیکی مدت کرک در سعادت
 و کرک ولایات شاهانه ده بر طاقم فسادلر دخی نادر
 اولماشدر .

دور سابق غیرتکارانی طرفندن عقد اولندقلری
 بوندن اول بیان او لنان بعض جمعیات خفیه نك ظاهره
 چیقارلمسیله اربانك تأدیندن ماعدا اهمیت وده شتجه
 هیچ بریسنه مقیس اوله میه جق بر فساد دخی سـعاوی
 یوزندن کندی کندیسنی میدانه قو یمش ایدی .

شهرت واقعه سنه مبنی ایضاح احوالی تفصیلات
 مطوله یه محتاج اولیان بوسـعاوی ده عن اصل مکتب
 رشديه خواهجه لرندن برارالق پولتیقه وادیسنه آباق
 آتهرق یکی عثمانلیلر نامنه اورو پاده سیاسی غزته لر
 چیقاران بر طاقم ذوات میانه التحاق ایتش ایسه ده
 اخلاق دینه سی اقتضاسنجه ذوات مومی الیهـمك
 توجهنی فی الحال غائب ایلیهـرك بر مدت دخی بعض
 اجانبه عرض خدمتله بالطبع دولت علیه وملت
 عثمانیه نك منافی خلافته بولنش وخرده فروشانه

بر صورتده بلادیکی شیلرله کندیسنی بیاغی ار باب علم
و معرفتدن کوسترمکه موفق اوله رق هله دور سلطان
عزیز خاندن صکره تمام اورتلق برهرج و مرج
صورتنی آلدیغی زمان قورد دومانلی هوایی سور
فحوا سندن استفاده یه باشلامش ایدی .

دور فیوضات الیف حضرت عبدالحمید خانیده
شاید برهنری وارسه میدان استفاده یه قویمسی ایچون
مکتب سلطاننی مدیر یتنه نصب و تعیین یورلمش
ایسه ده او جهتجه مرتبه هنری مکتبک بونجه سنه لک
پروغراملرینی آلت و اوست ایتمکدن بشقه بر صورتده
کورولموب اکثر اوقاتنی ایسه امور سیاسیه یه پارمق
صوققی صورتیله پکیرمش ونهایت روسلرک استانبول
قیولرینه قدر کیش اولسی کبی بر زمانده اک بیوک
مفسدتنی میدانه قویمشدر . شویله که :

ترتیب ایلدیکی فسادده اصل مشترکری بر ایکی
مغفلدن عبارت اولمق اوزره بر طاقم مهاجرلرک کیمیسنه
احسان و یر یله جکی و بعضیسنه سلاح آلوب برای
مجاهده مواقع حربیه یه کیدیله جکی طرزنده کلمات
اغفالیه ایله باشنه بر خیلی ادم جمع ایدرک چراغان

سرای همایونده مقیم خاقان سابق دائره سنه عز یمتله
 عقلنجه مشارالیهک تکرار سلطنتی اعلانه جسارت
 المش ایسه ده شو حرکت مجنونانه بی قوه دن فله
 چیقار مغه قالدیشور قالدیشمز سرای همایونک محافظه .
 سنه مأمور امر او عسا کر یتشه رک بو کور و لیده
 کندیمی تپه لند کدن ماعدا معیتی افرادندن دخی
 برازی مقتول و برازی مجروح دوشمشدر .

ایشته در سعادتده بو مثللو احوال مؤله وقوعنه
 مقابل ارناودلق هیچانندن دخی فضله اوله رق کردستان
 وقوزان طرفلرنده عدم انضباط اماره لری و اناطولی
 ارمنیلری میانده بر چوق افسادات سیاسیه اثرلری
 کورلمکدن خالی قالماش ایسه ده ذات حکمت سمات
 حضرت پادشاهینک علو قدرت اصلاحیه لری بو
 مثللو فنالقلری پیدر پی اصلاحه کفایت ایشلدر .

ذات موقعیت سمات حضرت پادشاهینک موفق
 بیورلدقلری اصلاحات یالکز کرک پایتختده و کرک
 ولایات شاهانه ده مقدمات استعدادی کوریلان بو مثللو
 فساداتی برطرف ایتمکدن دخی عبارت اولیوب بویه جهانک
 لرزه ناک اولدیغی بر زمانده اصلاحات اجرا سی امید .

لوك انتظار لوك بيله خارچنده ايكن ينه برچوق اصلا -
 حات ملكيه و ماليه و عليه يه موفق اولمش لر در كه دور
 جليل خلافتنا هيلر نك شعشه سنى پارلا تمغه بو اصلا -
 حات متنوعه دخی يارديم ايدر لر .

از جمله دور همايوندن مقدجه و ابتدای جلوس
 هممايونده موقع تداوله چيقارلمش اولان قوائم نقديه
 خزينه ماليه نك تنزل اعتبارى نسبتنده اوله رق اولقدر
 قيمتدن دوشمش ايدى كه اون اون بش يوزلك كاغد بر
 ليرا قيمتنى دخی بوله مامق درجه لر ينه واروب ار باب
 معاشدن ماعدا داد و ستد اربابنك دخی امورى بالكله
 مختل اولمش ايدى .

بونك ايچون درت يوزلك كاغد خزان جليله ده
 بر ليرا مقابله قبول اولمق و تكاليف مير يه دن بر
 قسمي ينه قائمه اوله رق النوب كرك بونلر و كرك سائر
 صورته يعنى اعانات عموميه طر يقيله ميدان تداولدن
 قالديريلانلر علمناً احراق بالنسار ايداك كبي بر تدبير
 صائب الله اوزاق نقديه اورته دن قالديرلمش و اندن
 صكره برقاي سنده ظرفنده پيدر پي احراق ايديلان
 قوائمك مقدارى همان مقدار اصليسنه ياقلا شوب

کرک دولت و کرک اهالی بوغائله دن قور تولشدر .
 قوائم نقديه نك الغاسنى متعاقب بو اعتبار سزلق
 مسكوكات نحاسيه يه و اندن صكره بشلک و التيلغه
 انتقال ايدرك بوايشك ايچنده غلطه صرافلر نك مخاد .
 مات منفعت پرستانه سى دخی فناغك ميداننى توسع
 ايلش اولديغندن قوائم نقديه مثالي مسكوكات نحاسيه
 دخی تداولدن قالديرلق واسكى بشلكر ايله اجزاسنك
 قيمتلىرى قيمت معديه لر يه يعنى يوزده اللى يه والتيلقرك
 فيئاتي دخی بش غروشه اينديرلك صورتيله شو او .
 يغونسزلق بر طرف ايدلديكى كى النهايت سيم مسكو .
 كات ايله ليرا اره سنده كى فرقك تقریبی ايچون دخی
 بر ليرا تام يوز غروش اعتبار اولسوب بر يكر ميلك
 مجيده اون طقوزه اينديريلهرك مسكوكات متنوعه
 فرقلى على قدر الامكان يكديكريه ياقلاشديرلشدر .
 ذاتاً اقچه سز بر زمانده مسكوكات متنوعه نك
 بويله براغتشناسى اداره دولتى نه درجه لره قدر
 مشكلاته دوشيره جكى نظرتامله كتير يلوبده برده
 حسب المحاربه سلاح التنه النان عسا كرک مملكتلرينه
 اماده سى مصارفى وروم ايلينك هرفندن دو كيلوب

کلان یوز بیکرجه مهاجرینک ایوا واسکانی ایله
باشلی باشلرینه کسب معیشته مقتدر اولنجیه قدر
بسنملری قضیه سی دخی علاوه دوشونیه جک اولور
ایسه شو بر ایکی سنده ظرفنده قوجه دولتی اداره
ایده بیلک محضاً خالصیت قلب شاهانه ک بر مکافات
مخصوصه الهیه سی صورتده میسر اولدیغنه شبهه
قالز . باخصوص که کویا آفات حر بیه دن مصون
قالمش اولان اناطولی بر قایچ یوز بیک اولاد وطنی جنکه
سوق ایلیه رک بونلرک زراعتیه ایده جکاری خدمتدن
محروم قالندیغی کبی بعض ولایتلرده قحط و دیگر
بعضلنده چکر که ظهوری مثللو آفات سماویه دخی
ثروت عمومی ملیه مزی رخنه دار ایش ایدی .

جمله اصلاحات حیدیه دن اولمق اوزره تاریخک
صحایف تقدیر و تحسیننه درج ایدیله جک برشی دخی
مکاتب علیه نیک اصلاحی و مکتب ملکیه و مکتب
حقوق مثللو بعض مکاتب عالییه نیک یکیدن تأسیسی
ماده لر یدر . معلوم اولدیغی اوزره شمده قدر دولت
علیه جدی و اساسی اوله رق یالکز اصلاحات و ترقیات
عسکریه یه حصر همت ایلیوب طریق سیفیه یه

سلوک ایده جنگ اولان ذوات ایچون بری و بحری
 درلو درلو مکاتب عالییه تأسیس بیورمش اولدیغی
 حالده مأمورین ملکیه ایچون برخرج مخصوص
 وجوده کتیر یله مامش ایدی . حالیه وکه بردولتمده
 اصلاحات ملکیه وعسکر یه دن هانکیسی هانکیسنه
 ترجیحاً لابد واهم اولدیغنی حکم ایده بیلک کوج
 برشی اولوب فقط مکاتب عسکر یه من بو قدر مکمل
 اولدیغنی حالده الیه هیچ بر مکتب ملکیه بولنامسی
 هیچ تجویز اولنه میسه جغنی حکمت باهره سی طرف
 ذیشرف جناب عبدالحمید خاندن کور یلوب اکا
 کوره تأسیس اولنان مکتب ملکیه بر قایچ سنه ظرفنده
 او قدر مستعد شا کردان یتشیر مشدر که بونلرک موفق
 اولدقلری خدمات مهمه مکتب مذکورک اهمیتینی
 جله یه بحق تقدیر ایتدیر مشدر .

مکتب حقوقه لزوم کوسترین شی ایسه عدلیه جه
 موفق بیوریلان اصلاحات اساسیه در . دور حاضره
 گنجیه قدر محاکم دایما مأمورین ملکیه نک نفوذینه
 تابع اولوب هله ویریلان حکملرک اجرایی قضیه سی
 منحصراً مأمورین ملکیه بدنده ایکن دنیانک هر

طرفنده اولدیغی مثللو بزده دخی اصول محاکمه
نظاملری یا پیله رق و محاکمه عدلیه یکیدن تنسیق ایدیلوب
حکم و اجرا سنده مستقل برحاله قونیه رق مدعی
عمومی و دعوی و کیلاری و مقاولات محررلری صنف
صنف تعیین قلمش و بحالده امور عدلیه بر مسلك
مخصوص اولوب انک ایچون دخی مکتب حقوق
انک منتظم بر مخرج اتخاذ ایدلشد.

اشای محاربه ده اذ کیای امر از هر حرکات
عسکریه دن اقتباس ایدلکلی تجارب اوزرینه صنوف
عساکر کرک کرک تفسیم اتجه و کرک مانوره لرجه پک
کلی اصلاحاته لزوم کوریه رک تشبث دخی ایدلش
وهیئت عسکریه نک بر قسمی دیمک اولان هیئت
ضابطیه شمدییه قدر پولیس و جاندارمه صنفرینه
ماند اولان وظائفدن ماعدا برده محاکمه عدلیه نک قوه
اجرائیه سی مقابله قائم ایکن بوهیئتک دخی سائر دول
معظمه هیئت انضباطیه سی یولنده اصلاحنه لزوم
کورینه رک محاکمه عدلیه اجرا مأموریتی صنفی هیئت
انضباطیه دن قالدیریلوب ینه محاکمه مذکوریه ویرلد.
یکی مثللو انضباط مملکت ایچون پولیس هیئت منتظمه.

سی و برده او پولیس هیئت نه تابع اوله رق جاندارمه
 هیئت عسکریه سی وجوده کتورلش و بوده الحق
 باشلیجه اصلاحات اساسیه دن عد اولمشدر .
 داخلاً بومثللو اصلاحات بر زماندنبری یأسه
 قریب براندیش شده بولنان ارباب غیرتی یکیدن رو -
 حلاندرمغه پک چوق یاردیم ایتدیکی مثللو بعدالمحاربه
 دولتزک امور خارجیه جه دخی التزام بیوردیغی
 مسلك اوروپا جه نفوذ و اقتدارمزی یکیدن تأسیسه
 خدمت ایشدر .

ازجمله بروقتدنبری دیون عمومیه من فائضلری
 و یريله مدیکندن طولای داینلرمن دیمک اولان اوروپا
 سرمایه دارانی بزه انفعال ایدرک بوده اوروپا افکار
 عمومیه سنه تأثیرات کلیه مضره دن خالی قالمش
 ایکن دولترم ناموس مالینسی اکمال ایچون داینلری طر -
 فندن جلب ایلدیکی وکیللرله بالذا کره هر ایکی طرف
 هم یکدیگر ینک منافعی کوزه تهرک و هرده هیچ بریسی
 دیگرینی الداتمق جهتنی التزام ایتیه رک احوال اخیره
 مالیه مزله متناسب بر صورت حسنده و یریلان قرار
 بتون اوروپایی مننون و مطمئن ایتدیکی کبی داخلا

افکار عمومی عثمانیه بی دخی بحق و زیاده سیله محظوظ
ایلمشدر .

الحاصل جلوس هما یون پادشاهی نه قدر مهم
بر زمانه مصادف اولدیغی دوشو نیلورسه بر قاج سینه
ظرفنده مصائب حربیه نك صدمات دهشت افزایی
کلیاً بر طرف ایدلدکن ماعددا هربری برر صورتله
مهم و معتنا اولان بر چوق اصلا حاته دخی حصول
موقیعت جلوه بی مجبور منت ایلان نعم جلیله سبحا .
نیه دندر . هله روی ارضه باغ ارم مشالی معموریه
مستعد اولان و طنزک الک بیوک احتیاجی امور نافعیه
منحصر اولوب حالبوکه بر زماندن بری امور نافع
ایچون اوروپادن ظهور ایدن طالب و راغب لک اصل
امملری خدمتدن زیاده بزی الداتوب کندی منفعتلرینی
تأمیندن عبارت اولدیغی از جلوه بروقت مقاوله سی
هقد ایدیلان روم ایلی شمندوفر لر نجه حصه و له کش
اولان: تحاربیدن اکلا سیله ذات حکمتسمات حضرت
عبد الحمید خانی بومثالو امور نافعیه دائر مساندله
حقوق و منافع عثمانیه مزک بحق محافظه سنی دوشو .
نمکه مأمور برده امور نافع قومیسئون عالیسی تأسیس

بیور مشلدر که مؤخرأ بغداده قدر شمدوفرلر انشاسی
ایچون آچیلان میدان مذا کره هب قومیسون مذ کوره
هائذ خصوصات نافعه نك نصل برنظر دقت واهمیتده
طو تولدیغنك دلائل علمیه سی اوله رق بناء علیه پك
بقین بر زمانده بو یولده ثمرات فعلیه ایله دخی مسعود
و بختیار اوله جفمزی الطاف سبحانیه دن امید ایلک
زمانه کیرلش دیمکدر .

دور اخیره دائر بواشرده یازیلان شیلر مکمل
بر محبت تاریخ اولیوب یالکز احواله عمومیت اوزره
برنظر دیمکدر . یوقسه پکیردیکمز وقوعات اخیره
دولتمزك ابتدای تأسیسندن بری کوریلان وقوعاتك
هیچ بر یسنه مقیس اولیوب بودور کر چکدن بردور
تجدد اولق مناسبتیه پکیردیکمز کونلرک هر بری تاریخچه
بر فصل اتخاذه واکا کوره تفصیل وایضاحه شایان
ایام مهمه دن اولدیغنه شبهه یوقدر .

✽ تاریخ عثمانی و حکمت تاریخیه ✽

کره ارض اوزرنده بولان دولتمزك هر برندن
بر تاریخ خصوصی وجوده کتورمک صورتیه
« کائنات » سز لوحه سی التنده تشکیل اللمکده اولد .

یغیز اشبو کتبخانهء تاریخده هر جلد ختام بولدقچه
 اوجلدك عائدا ولدیغی ملت حقنده بر « افادهء عمومیه »
 ترتیب ایلیه رك ملت مذ کوره بی حکمت تاریخیه
 نظرنده محاکمه ایلك دخی التزام کرده من اولان
 اصول اقتضاسندندر . ایمدی اصول مذ کوره یه
 اورو پا تاریخلر ينك صومی وآسیا تاریخلر ينك ابتدا-
 سی دیمك اولان اشبو عثمانلی تاریخننده دخی رعایت
 واتباع ایده جه کز . حتی هیئت عثمانیه بی حکمت
 تاریخیه نظرنده محاکمه من براز ده-ا اوزون سوره .
 جه کدر . زیرا اورو پانك منقسم اولدیغی باشلیجه
 اون الی ملت حکمت تاریخیه قانونی اوزرینه اعطای
 حکم ایدن محکمه نك اعضاسی مقابلنده حقانیتیه از
 چوق موافق اوله رق موقع محاکمه یه چکمه شرایسه .
 ده بو عدالت عظمادان عثمانلیلر شمدی یه قدر محروم
 قالمشردز .

عثمانلیلر بویله بر محاکمه ده نصل مظهر نعمت
 عدالت اوله بیلسونلر که اولامحاکمه مذ کوره ده نه مدعی
 ونه ده مدعی علیه صفتنده بولنمق فرضیله کنیدی
 حققرینی ترویج ایتکه مدار اوله جق مکمل بر اجمال

عمومیء تاریخی یہ مالک اولیٰ شویله طورسون
 شئونات تاریخیہ لرینی بیله هرزمان یولنده و مکمل
 اوله رق یورتمکده موفق اوله میوب بو همت عالیہ یی
 اخفادلری بولنان محاصرینه ترک ایتیشلر ایسه ده انلر
 میانده دخی هنوز تاریخی عثمانی یی من اوله الی آخره
 صره سیله ابواب و فصول لازمه یه بالتقسیم قید ایده .
 جک هیچ بر صاحب همت ظهوره کلامشدر . مورخ
 هامر درجه سنده اولسون بر غیرت هنوز عثمانلی ار باب
 قلنده کورلماشدر . بوندن طولایی ارواح اجداد بزه
 برخیلی کوسکون اولسه لریری واردر .

ثانیاً عثمانلیلر تاریخیجه تعلقلری اولان ملل واقوامدن
 دخی بویله بر محاکمه ده حسن شهادت بکلیه بیلک
 امیدینده نائل دکلدرلر . شرق پای تختنی کنندی
 اللرنندن المش اولدیغمز روملردنمی بو حسن شهادتی
 بکلیه بیلورز ؟ یوقسه دونه قدر حر جکذارمز اولوب
 هر نه زمانر بقه مزدن بیوننی قور تار مق ایستمش ایسه
 باشنی قردیغمز وندیکیلردنمی ؟ اسکی اسلاوردن ذاتاً
 بر قید تاریخی قالمش اولمیوب قالسه بیله « صرب
 صندیغی » محاربه سنده صندیرمش وقوصوده

تارو مار ایتش اولدیغمز اسلاوردن بزم ایچون حسن
 شهادتی اومولور ؟ وارنه ملحه سی اوزرینه اسکی
 محار مورخلری بزه آفرینی دیرلر • نیکبولی و محار-
 ستان و بوهیمیا محار به لرندن و آقینلرندن صکره المانی-
 و فرانسه کی اسکی شوالیه لر ممالکی بزم حقمزده نه
 فکرده بولنه یلور ؟ الک صکره اندر یادور یاه اق
 دکزی طار ایده جک حرکات بحریه مز اوزرینه
 ایتالیا و فرانسه و اسپانیا کی اق دکزی ملتدن روی
 تبسم کوره یلور می بز ؟ حاصلی دنیاده کندی غالبری
 حقنده حسن شهادت ایده جک قدر اخلاق عالییه صاحبی
 اولق باخاصله یشادقلری عصرلره کوره تعصبات
 دینییه و اغراض قومیه لرینه مغلوب اولان انسانلر
 ایچون قولای بر شمیمدر ؟

ایشته شوقیصه جق ایضا حاتدن معلوم اولیور که
 عثمانلیلر هنوز کندی کندیلرینی حکمت تاریخیه نك
 نظر محاکمه سنده مدافعه ایتماش اولدقلری کی
 کندیلرندن بشقه ملتلك ایتدکلی محاکماتی دخی استینا-
 فه بوملتلك بیطرفلقلرنده اولان شهرات عظیمه یه مبنی
 حقلیدرلر •

واقعا اخيراً بر دوره كير مشردر كه اورو پائمالك
 غر بيه و متمدنه سـنك هر برنده اثر تعصبـدن و لوـث
 اغرا ضدن خالى افكار مستقـله و عادله ار بابى نادر
 اوليوب بونلر نوع بشرى حقايق تار يخيه و فنيه ايله
 تنويره حصر دقت و وقف وجود ايتـمـلـردر . ليكن
 انلردنخى بزه لايق اولديغـمـز اهميتى و بر ميهـرك بزدن
 بحث ايده جـك اولدقـلـرى زمانلردنخى معلومات تار يخيه .
 لـر بـنى هـب درجه بى طرفيلرى يوقار وده كى فقره جـمـمـزدن
 اكلاشيلان ملتـلر كـتـبـخـانه تـارـيـخـلـرـدنـلـمـق صـورـتـيـله عـظـيـم
 خطيئات غير اختياريه ده بولـنـمـلـردر . اكر ميدان مباحـثـه
 لزومى قدر واسع اولسه ايدى بونلرك خطيئات عظيمه .
 سنى درميان ايليـهـرك او يوزدن دنخى قارئـر مـزك مـظـهـر
 تصويـبـلـرى اوله جـمـمـزى قوياً و قطعياً اميد ايليـهـر بـلـور
 ايدك .

هله بز تاريخ ميداننى تيارو ساحة تماشاسى برينه
 قويوبده ملتـمـزه مخصوص اولان پارلافلغى افكار
 عموميه ارباب مدنيتى تنوير ايچون دكل محضاً انظار
 عموميه ارباب تماشاى زينتـلـنـدـر مـك ايچون بر قوه
 ماهره قليمه ايله برقاندها پارلاتمـه چالشـان بعض

اورو پالی محرر لڑھ ہیج ده تشکر لڑ ایتیر . زیرا نزد
 ارباب مدنیتده هر حالی پالاق بر بار بار اولمقدن مادی
 ومعنوی هیج بر منفعت حاصل اوله میوب بوکا مقابل
 بحق جریان ایده جک بر محاکده محکوم علیه اولسه ق
 بیله بالاخره تصحیح و اصلاح احواله کلی مداری اوله
 جغنی ایچون بزجه هم مادی هم معنوی موجب منفعت
 اولوردیه اعتقاد ایلرز .

ایمدی ملیت سیاسیة مزك ابتدای تشکندبری
 همان ایلک دفعه اولمق اوزره تاریخ عثمانی بی حکمت
 تاریخیه ایله رو برو کتور مکه بز متجاسر اولیورز .
 ذاتاً یازدیغمز تاریخ اصل تاریخ عثمانی اولمق اوزره
 یازلمسی ار باب قلمزك یونلرینه بورج اولان تاریخه
 نسبتله مکملجه بر فهرست بیله اوله مدیغی کورلمش
 اولدیغی حالده شو فذلکه نكده اونسبتده ناقص
 اوله جغنی و اولدیغنی حکم ایتک حاکم لری ایچون بر
 یوک شرف قازاندره مز . بداهتی اشارت جهانیانی
 کوریرینه قویمق دیمک اوله رق بوایسه عفو اولنمز
 بر تر بیه سزلک مقامنه قائم اولور . اصل مقصد عثمانیلر
 حقنده موجود اولان یوز بیکرجه سوء اعتقادات

تاریخچه دن نه قدری ممکن اولورسه اوقدرینی تصحیح
ایچون مروت انسانیه ار بابتک انصافلرینه بر یول
آچقدن عبارت اولمغله بومقصدک بالنسبه قایچ میلیون
قسمنده قایچ دانه جکی حصوله کلور ایسه بزخی
کندیمزی اونسبتده موفق عد ایده یلورز .

*

* *

عثمانلیلغک تشککنده اولان عال العال بر اهییتی
کوزلجه تقدیر ایده بیلک ایچون اوزمانلر شرق و غربک
بولندیغی احوال عمومیه بی نظر محاکمه ده اجمال
ایتملیدر . زیر اکائناتدن اشبو جلد اورو پاملل غربیه .
سنک اون التجیسی ایچون ترتیب اولنش بر جلد اولمقله
برابر اسیا ملل شرقیه سنک دخی برنجیسی ایچون ترتیب
ایدلش مقامه قائم اولدیغی کبی تاریخ عثمانی دخی
ذاتاً شرق و غربک احوال عمومیه مدیه سنه « مجمع
المشرقین » نامنه بحق سزا اولان استانبولده بر صورت
جدیده ویرمک مثللو عظیم بر حکمت اسالاسی
اوزرینه تأسس ایلشدر .

بوراده بز شرق و غربک احوال عمومیه سنی نظر
محاکمه ده بک قولای بک مختصر اوله رق اجمال ایده .

یلورز • بواجال ذاتاً کندی طبیعتیله دخی حصوله
 کیشدر • حین ظهور عثمانیانه هنوز قانلری قوروما -
 مش اولان محاربات صلیبییه یه احوال عمومیۀ شرقیه
 و غربیه نك محصول اجمالیسی دیمکدن بشقه برنام
 صحیح بولنه یلورمی ؟

بوکسون بر مکتب طلبه سنه « قرون وسطی »
 دنیه جک اولورمه نه اکلایه یلور ؟ طلبه نك ذهنلر
 ینه ایلک توارد ایدن معنی دهشتلرندن توکلرینی اور -
 پرتزمی ؟ هر بررلری کندیلرینی قرالردن بیوک عد
 ایدن سنورلر ! هر بررلری کندیلرینی اللهدن بیوک
 بولان قرالر ! و یقتور هوغونك هیچ مبالغۀ شاعرا -
 نه یه جل اولنده میه جق او لدیغی حالده اك پارلاق اولان
 بوتشبییه نه دائماً عرض تعظیما تائقه دن خالی دکاز •
 کندیلرینی قرالردن بیوک بولان سنورلرک کبر
 وعظمت جاهلانه لری و شدت حرص و هوس جلادانه -
 لری اورو پا تواریخ خصوصیه سنی قزل قان ایله یازدیر -
 مغه کفایت ایده میهرک کندیلرینی اللهدن بیوک بولان
 قرالر دخی بتون اورو پایی یرندن او یناته رق سوریه
 و مصره نیچون سوق ایلدیلر ؟ ینه و یقتور هوغو یه

لايق اوله جق بر تعبیر و جمله عزرائيلك بيله اوقدر
 از بر زمانده جانلر يني نصل اله بيله جكي عقلنه حيرت
 و يره جك اولان يوز بيكرجه انساني قروب و قيردير.
 وب تقدير آلهي به دخی عصيان ايلدكلر يني كوستر.
 مك ايچون دكلى؟ بوندن بشقه محاربات صليبيه به بر
 نام موافق بولان اولورسه كو كسنه بر نشانه آفرين
 طاقارز . ذاتاً جهللى ايله تكبرلى يكدىكر ينه رقابه
 درجه لر يني يو كسلتمكده بولنان معهود قرون وسطى
 سنيورلر ينك الك زورلىلرى ديمكدن بشقه بر تعبیره
 لايق اوليان قرالردن ظهور ايليان اول حركت مجنوه.
 نانه به بوندن بشقه بر اسم بولمق لازم كلور ايسه اوده
 « جنون » دن بشقه بر شى اوله ميوب ينه دقيقه بينان
 ار باب قلم ايچنده بو حقيقتى كوروب حكيم ايدنلر دخی
 نادر دكل ايسه لوده بزجنونك بو قدر تعمم ايتمى بى
 بشرك عموميت اوزره نام عاقلانه و حكيمانه سنه موافق
 بوله مير .

ايمدى عثمانلىلر ك ظهورى قرون وسطى انك اول
 اعصار اخيره سنه مصادف ايدى كه محاربات صليبيه دن
 صكره او محار به لرو سيله سيله تشكلى ايتش اولان شو ايله

جمعیتلری عمومیتله حکم سورمکده بولسان جهل
 و تعصب و تکبرک محصولی اولان شدتلرینی صرف
 ایلیه جـک مسلمانلری یانلرنده کوره مینجه آجیقشمش
 قورتلر کی زویه صالدره جقلرینی بیله میهرک شا -
 شیروب قالمش وینه کندی ایچنندن هانکیسینی
 براز ضعیفه زخمدار کوررلرایمه انک باشنه او شوب
 پارده مکده بولتمش ایدنی . لکن بونلرک یکدیگر یله
 چار پشوب تینلری بالاخره « احاد ناس » دینلان
 وانلر حـد معنا و مفهومی جانلری و عر ضلری و مالاری
 سنیورلرک کیقلرینه تابع بر سوری حیوان اولمقدن
 عبارت بولسان عبـاد اللهک اغلیت و حتی عمومیت
 اوزره مظلومیتلرینی و مقهوریتلرینی موجب اولمقده
 ایدنی . بر درجه یه قدر که مؤخرأ اورو پانک هر طرفجه
 فکرلر او یانه رق اوزمانه قدر استاوروس چیقار مینجه
 عنوانلری قاله انه میان حکمدارلره « مستبد » نامی
 تعمیم ایتکه باشلامش و سنه لر یکجوب ده خلقلک عصیت
 قانلری دکشـرک تسخیح اولند قجه حکمرانی ناس سو -
 دالری دماغلری بورومکه باشلا یه رق نهایت ژان ژاق
 روسمولر وولترلر میدان چیقجه سنیورلرک قرالارک

استبداد لری علیه نه بر حرکت عمومیه قدر بول
آچلشدر .

اوروپا انقلابات عمومیه سنی میدانه کتورن شی
ایشته بوازمه متوسطه تکبر جاهلانه سندن عبارت
اولوب هله قرون مذ کور دنك شرق طرفنده کوریلان
احوال و احکامی اوروپا یه دخی مقیس اوله مز ایدی .
شرق ایمپراطور لنگه مرکزی اولان استانبوله حکمی
سورک خارجه حقیقه میه حق در که لره اینش اولان
برایمپراطور لقی صندالیننه هوس ایله برده اسیر شهوت
اولقی بلاسی بتون استانبولی بر فحش خانه جلادانه
حاله قومش و اطرافنده بولنان حکومت صغیره دخی
بومرکزک احوالی تقلیددن کیر و قالما مقده بولنش
ایدی . اوزمانلر عفت دینلان شی اکر بر حق عد
اولنه میه حق اولور سه بر جنایت عد اولنور و دین
و ایمان دینلان شی دخی اکر بر صافدرونلغه جل ایدلز
ایسه مطلقا بر جنه جل اولنور ایدی . مقام اقتدارده
بولنان مستبدلر ارباب ناموس و دیاته علناً اظهار بغض
و عداوت ایدرک حتی شرق کلیساسنک رئیس بولنان
بطریق بیله بولمیه دن کندیلرینی قورناره مز لرایدی .

ایندی اوروپاچه وقوعه کلان تیقط شرقده دخی
 بالضیع ودها تیر وقوعه گلش ایسه ده مظلومین شر-
 قیه یی قورناروب حریت شخصیه و قومیه لرینی و امتیا-
 زات دینییه و سیاسیه لرینی کندی الارینه ویرمک ایچون
 اوروپا ده اولدیغی کبی برقیسام عمومییه مجبوریت
 و ضرورت الویریبوب بلکله بفرقه ناجیه نك ظهوریله
 جهانك قورناروبی مشیت ربانیه اقتضاسندن اولمشدر .
 بفرقه ناجیه نك دخی عثمانی لر دن عبارت اولدیغی
 اختصاره محتاج دکلدر .

غربك احوال عمومییه سی حوالی شرقیه نك قسم
 غربیسی دیمک اولان رومستانجه شویله بر اصلاح
 عمومییه احتیاج کوسترمکده اولدیغی کبی عجب اشراق
 احوال عمومییه سی دخی بواعدهادی مع زیاده کوستره
 میورمی اییدی؟

اوزمانلر ظهور عثمانیانه لزوم کوسترمک خصوص-
 صنده شرق غربه دخی فائق اییدی . دوشونمایدركه
 شریعت غرانك اهل اسلام ایچون امر ایلدیکی اتحاد
 عمومیدن متحصل اوله جق انضباط و اندن تولد ایده .
 جك قوت و شوکت اکر موجود او لسه اییدی

صلیبیون قارشو سنده یالکز بر صلاح الدین کورو نیوب
 یکر می اوتوز صلاح الدین بردن پالاره طیانه رق آسیایی
 شو الیه لک پامال خیولی ایتکدن دفعة و قطعاً قورتار -
 دقدن ماعدا بر خطوه مظفرانه دها آتهرق بتون
 اورو پایی دخی کنسیدیلرینی قرالردن بیوک کورن
 سنپورلرک واللهدن بیوک کورک قرالارک ایدای تسلط
 و تجبرلرندن ایدای قورتارملی ایدیلر .

خیاله قایلپور زغن اولنسون ! اوزمانلر اورو پا
 دینلان قطعه وسعت و مهوریتجه عموم ممالک اسلامییه -
 نك نصفه انجق مساوی اوله بیلور ایدی . اوزمانلر
 بحر بالطیق حذارى شمديكى بحر منجمد شمالی حذا -
 لرینك حکمنده اولوب اصل « اوروپا » دینلديكى
 زمان شمديكى انكلتره وفرانسه والمانيا واستر يا وایتا -
 لیادن عبارت کبی برشی اولوب اسپانیا و پور -
 تکیر هنوز ممالک اسلامییه دن اولق رنگنی غائب ایما -
 مش ودانیمارقه و روسیه واسوج کبی ممالک شمالیه
 ایسه حالاممالک وحشییه دن معدود بولنش ایدی .
 یوکامقابل ممالک اسلامییه عموم بلاد بر بریه
 و مصر و عربستان و یمن و اناتولی و کردستان و کر -

جستان و روسیه نك ثلاثی دیمك اولان تاتارستان و بتون
 ایران و تركستان و افغان و بلوچستان و هندستان ایله
 خطه چینك برچوق یرلرینه ششامل اولوب اورو پا
 نفوس و قوت و ثروتی بونلر یاننده برقدان منزله سنه
 ایتر ایدی .

اما دینله جك كه بو قدر ممالك نهصل اتفاق ایده جك
 ایدی ؟

ایشته اصل نقطه بحث دخی بوهر یا ؟ بو ممالك
 همان ثلاثی اوزمانه نسبتله دهها دون دینله جك قدر
 یقین برزمانده یالکز بر دولت اموییه تابع اولماشیمی
 ایدی ؟ ثلاثان دینلان اقسام ثلاث دیکری دخی کنه یسنه
 جلب ایده مزمی ایدی ؟ ذاتاً اورو پانك اهل اسلام
 علیه اتفاق دخی او یله حاضر و مهیا بر شیمی ایدی ؟
 غیابندن متأسف اولدیغمز وحدت کلمه هر زمانکی
 حکمنی محافظه ایتش او لسه ایدی بویله بر اتفاق
 عمومی دخی عجبا ایشدنمی ایدی ؟ حتی اورو پا قطع
 می مسلمان فنون و صنایع عسکریه سی نظرنده ممالك
 مجهولدن دخی او لمیسوب اندلس و جنوبی فرانسه
 فتوحاتی واق دکز حرکات بحریه سی بویله بر حرکت

عمومیه ایچون بر پیشدار فرقه سنک حرکات کشف
تعرضیسی مقامنه قائم اوله یلور ایدی .

خیاله شیخ جل اولنه میدرق حقیقت اولیق اوزره
قبول ایتلیدر که اگر احکام شرع شریفک تأمین
ایلدیکی قوت متحدانه الدده اولسه ایدی اهل صلیبت
ارقه سندن اجرا اولنه جق بر حرکت تعقیبیه ده غزات
اسلام صولوغی بحر بالطیق و بحر شمال سواحلنده
آلورلر ایدی . لیکن ایشته بو اتحاد و اتفاقک بو
انتظام و انضباطک نزد اسلامده موجود اولمامسی
او حرکت عمومیه نک اجرا اولنه مامسنی مستلزم اولد
یعنی کبی ینه بو حالدر که مؤخرأ بر حکمت مخصوصه
اولیق اوزره عثمانلیلک ظهور و تأیدی موجب
اولشد .

اوت ! ینه بو حالدر که عثمانلیلک ظهور و تأیدی
موجب اولشد . زیرا محار به صلیبیه دن صکره
اورو پاچه ار باب استبداد و ظلم شدتلی بر قاندها
آرتوب سودای شهوت پرستی جهانی چلد بر تدیغی کبی
شرقجد دخی صلیبیونه قارشو صلاح الدینی یا لک
براقه دن فضله بلکه دیگر جهندن بر مشغولیت زانده

دخی حاصل این افتراق وانقسام بر قاتدها آرتوب
 اوزمانه کوره اسلامک الک جسیم پارچه سی قونیه
 دولت سلجوقیه سندن عبارت قالدیغی حالده بر یاندن
 مصر لیلرلو بر یاندن تاتار لرلک ایقاع ایلد کیری صدمات
 دولت سلجوقیه بی ده حکمدن دوشور و بارتق شر شهر
 هر قصبه و بلکه هر کوی دخی برر مستبدک ید استیلا
 دنده قالمش و احکام شرع شریف بونلرک شرنندن کندی
 کندی سنی تحافظ ایچون جلدلر ایچنده استتار ایلیرلک
 انظر دخی کتبخانه لرک کار کیر دیوار لری ارمه سنده
 و تیمور کلیدلری التنده کندیلرینی کویج حال ایلر
 حفظ ایلد کده بولمش ایدی .

بر اتحاد عمومی دینی و سیاسی یعنی بر حکم جهان
 شمول شرعی التنده معمور اولمق ایچون یاراتلمش اولان
 قوجه بر جهان شرقینک شو حالده قالمسی جائز اوله
 بیلور می؟ بناء علیه ممالک اسلامیة نک قوتی دیر له نوب طو
 یار لایوب ممالک نصرانیة بی ده اصلاح ایتسی قضیه سی
 طبیعت زماندن متولد بر حکم صورتی المش اولدیغی
 ایچون بو استعداد زمانه مصادف اولان ظهور عثمانیان
 اولیه خبر تفرمای عقول اوله حق نایبکی کوستر مشدر .

*

* *

عثمان لیله ایلرک ابتدای ظهوری برتصادفدن عبارت
عدا اولنده بیلور . زیر اسکود ناحیه سنده مسکن طوتان
بجاعت صغیره نلک قوماندانی امیری باباسی بولنان ذات
ستوده سمسات کتاب اللهه ایدیلله جک حرمت ورعایتی
ایلک دفعه اولمق اوزره بو طرفلرده برکوی امامندن
او کرنوب او حرمت ورعایتی ایسه انجق صباحه قدر
کتاب سماوی یه مقابل ایاقدن دیوان طور مق صور تیله
تخیل ایدیه بیلدیکی نظردقته النور ایسه بویله بر جاعتده
فکر جهل انکیمرانه آرامق و اوفکری قوه دن فعله
چیتارمغه کفایت ایدیه جک وقوف و دانش ایستک
یک بعید اولور . حتی بر یرده سلچوقیه عسکر یله
تاتار عسکرینی یکدیگر یله محاربه ایدر کوردکاری
زمان دخی سلچوقیه عسکرینه معاونتی بالاخره
بومعاونتک مکافاتنی کورمک کبی عاقلانه برحساب
اوزرینه قرارلشدیرمیوبده مجرد ضعف و مغلوبیتی
اوطرفده کوردکاری ایچون عاجزه معاونت فضیلت
قهرمانانه سی اوزرینه سلچوقیلرک معاونتله قوشمش
بولملری دخی بو خالصیت و صفوت مخصوصه لرینه
دلالت ایلر . انجق ظهورلرینی متعاقب احوال

عمومیة عالمه ایلک عطف ایلد کیری نظر دقت اوزرینه
عثمانلیلر عزیمت جهانگیرانه یه اوییه بر صورت
ویرمشلردر که اندن صکره کی حرکات و قمو حاتلرینی
اویله تصادفه فلانه جل ایتک اصلا جائز اوله من .
اورو پالی مورخلر ایشته ال بیوک خطایه بویله
عثمانلیلری جنکیریلر و یاخود شمال بار بارلری کی
تصادفه بالتبعیه هرج و مرج عالمه حقیقه مش بر جماعت
ظن ایلد کیری ایچون دوچار اولمشلردر .

عثمانلیلرک عزیمت جهانگیرانه لرینه ایلک ترتیب
و صورتی ویرن اوچ ذوات حکمت سماتدر که برنجیسی
عثمان غازی ایکنجیسی اورخان غازی و اوچنجیسی
علاءالدین پاشای حکیمدر . حالبوکه بونلرک اوچنجیسی
برنجی عد ایدرک صایمق دخی ممکن اولور .

عثمان غازی نیک « عثمانیت » دینلان شیئک اساسنی
صورت وضعی اوزمانه قدر هیچ بر پر نسلک هیچ بر
حکیمک عقلنه بیله کلامش اولان برشیدر . معلومدر که
اوزمانه قدر انسانلری یکدیگرینه ربسط ایلیدرک
جمعیات سیاسییه بی وجوده کنورن شی یارابطه دیانت
و یاخود رابطه قومیتدن عبارت اولوب حکومتلر

دن بعضی تری مسلمان و یا خرسه تیابان حکومتی اولق
 و بعضی تری ایسه فرانق حرمن و یا ترک و عجم حکومتی
 عد اولنق اوزره تیر اندرلر ایدی . حتی بر دینه تابع
 اولان ملت لرده مذهب فرقلی و بر قومیته تابع اولان
 یولرده خاندان مایلینلری دهانه قدر تقسیمات ثانیه یه
 یول اچش اولدیغی دخی توار یخده کورلشدر . عثمان
 غازی حضرتلی ایسه «عثمانلیق» دینلان شیهنک
 یعنی بر دین اولدیغی کبی یکی بر قوم دخی اولدیغی
 و بلکه دیانت و قومیت فرقی اولق سزین عموم عباد
 الهی نائل نعمت راحت ایمک ایچون مظلومی ظالمه
 قارشو محافظه دن عبارت بر مقصد عمومی انسانیت
 پروری و مدنیت کستریده اجتماع ایدنلرک هیئت عمومی
 میه سی ایشته «عثمانلیق» دینلان وجودی تشکیل
 ایلیمه جکنی فعلاً و ماده کوسه تروب جمعیت سیاسییه .
 مزک ایلک تخمین بو صورتله اکدیله .

بو حکمت اوزمانلر هر کسک نظر تقدیرینه مطهر
 اولدیغی ایچونلرکه بر زمانه قدر روم سرداری صفتیه
 هیئت عثمانیه یه نظر خصوصتله باقش اولان غازی میخال
 بکک صفت عثمانیه سی طوغه قویمه عثمانلی اولان اجه

قوجه دن هیچ فرقلی کورلدی . بر یسنک فتح ایلدیکی
 بلاد « قوجه ایللی » دینلیدیکی کبی دیگرینک فتح ایلدیکی
 بلاد دخی « میخال ایچی » نامی و برلدی . اخلاف
 بر یسنی فصل غزاة اولیا مرتبه مننده تلقی ایدرک روح
 شریفنه فاتحه خوان اولدیسه دیگرینک روح شریفنه
 دخی اوله جده فاتحه خوان اولدی . بوصفت یالکیز
 غازی میخال بکه منحصر قالدی . اکا تبعاً حاجی ایل
 بکی غازی اورونوس بکی دخی برر عثمانلی خاندان
 غزاتلک بابامی اولمش کوردک . ایشته بو احوال
 غازی عثمانک یکیدن ایجاد و اجتهاد یولو قویمش اولدیغی
 اس اساس عثمانیده کی حکمتی بتون عثمانلیلرک تقدیر
 انمش اولدقلرینه دال اولدیغی کبی اندن صکره یکیمچی
 اورته لرینه خرسیتیان اطفالنک النسی بونلری جبراً
 وقهراً مسلمان ایتک املنه مبتنی اولدیغی خرسیتیان
 مورخلرینک حالا بو کونه قدر حکم ایده کدکلرینه
 باقدقه انلرک دخی حالا بو کونه قدر او حکمت اس .
 سیه بی اکلایه مامش اولدقلرینی بز حکم ایدرز .
 حالبوکه شمیدیکی اورو بانک الک بیطرف اولان
 یکی ار باب قلنی اولسون بو حقیقت اوزرنده ایقاظ

ایلیه جک احوال تاریخیه دخی تاخر ایتماش اییدی .
 قوصووه محاربه سنده کوستندیل اسلاو پر نسی اولان
 قسطنطینک سائر پر نسلرله بالاتفاق مراد اول اوزرینه
 هجوم ایتمسی (عثمانلیلر خرس-تیانلرک دشمنی کورلش
 اولسه) پک طبیعی برشی اوله جق ایکن بالعکس خدمت
 عثمانیه ده ثبات و متانت کوسترمسی ایشته پر نس
 قسطنطینک قومیتی اسلاو مذهبی خرستیان اولدیغی
 حالده صفقی عثمانلی اولدیغنی اثبات ایچون الپارلاق
 برهان اوله مزمی " یا بایزید اولک تیوره قارشو واردیغی
 زمان مسلمان و ترک اولان عسکرک دشمنه فراری
 اوزرینه میدان ثبات و متانتده بلغار و صرب افراسینک
 ثابت قدم قالمیری اندن از پارلاق رهائی عداولنور ؟

بونلر کی دهسایک احوال واردر که مورخین
 نصار انک روی محجوبیتلرینه حیرت تارکتورده جک
 درجه لرده بر حسن شهادتله عثمانلیغک مبناسی نه مسلمان
 نلق نه خرستیانلق کبی برفرق دیانت ونه ده روملق
 بلغارلق ترکلق عربلق کبی برفرق قومیت اوزرینه
 مؤسس اولیوب بلکه مفهوم و معنای حفظ عمومی
 اولق اوزره ینه کندی شانندن عبارت بولنان « عثمان

نمیللق» اوزرینه مؤسس اولدیغنی اثبات ایلر .
 بواثباته بوکون کوردیکمز لزوم محضاً بر حقیقت
 تاریخیه بی میدان چیقارمق ایچوندر . یوقسه حقیقت
 مذکورەنک میدان تحققدە ثبوتی ایچون ینە تاریخن
 بیوک دلیل اوله بیلورمی که اگر عثمانلیلق قومیت
 و یاخود دیانت اوزرینه مبتنی بر هیئت اولسه ایدی
 دولت سلجوقیه نك سقوط وزوالی اوزرینه امارت
 عثمانیه نك دولت مذکورە یرینه قائم اوله بیللمی شویله
 طورسون دها امارت عثمانیه حالندە ایکن منقرض
 اولوب اسمی بیلە قالماسی لازم کلور ایدی . زیرا
 میر عثمانک جماعتی طوغریدن طوغری یه دولت سلجوق
 قیه طرفدن کندیسنه مالکانه ایدیلان ناحیه لرده بیلە
 داتایانجی ومسافر نظر بیلە کور یلروب اطراف
 وجوارده بولنان کرک روم و کرک ترک وتاتار سردار
 لری بونلره اظهار روی خصوصتدن خالی قالمز لرایدی .
 عثمانلیلری هر وارد قلمری یرلرده مظهر غلبه ایدن شی
 بلکه قوه قاهره قهرمانانه لری وشجاعت مخصوصه
 عثمانیه لری اوله بیلور . لیکن یالکز قلیچ قوتیلە حاصل
 اولان بر غلبه نك قلیچلرک قنلره کیرمسی متعاقب حکمدن

دوشه جکی میلیونلرجه مثال ایله ثابت اولمش بر
 حقیقتدیر . عثمانلیلر ایسه قلیجلرینک قوتنی یالکز
 عبادالله مسلط اولان غلله اوزرنده صرف ایلیه رک
 کندی جایه لورینی قبول ایدن اهالی بی ایسه ینه کند .
 یلر نندن بشقه آدمیر کبی تلقی ایتیمسوب چله سی برلکده
 کندیلرینی یکو وجود کورد کلرندن اهالی تابعه او یله
 رعایای مظلومه دن اولمق شویله طورسون بلکه انلر
 دخی صفت عثمانیه بی حارز اولدقدن صکره کندیلر .
 ینی محافظه بی ممکن کوره رک سائر اهالی بی ده بوصفت
 عثمانیه نعمت جلیله سندن منتعم ایتمکده کندی فاتحلر ینه
 معاون او اولرلر ایدی .

*

* *

ایشته عثمان غازی حضرتلرینک وضع و تأسیس
 یورمش اولدقلری شواخوت عثمانیه مسئله سی هیئت
 جدیده عثمانیه سر یعاً او یله بر شمشعه و یرمش
 ایدی که کرک روم اینجه خرستیان و کرک اناطولیجه
 اسلام ممالکی اهالیسی تابعیت عثمانیه ایچون جان
 آتهرق یالکز او مملکتلرده حکمراندن اولان پرنسپلر
 کندی شان و شرف و منافع حکمرانلرینی غائب ایتماک

ایچون عثمانلیله خصوصت ایدرلر ایدی . حالبوکه
 بونلر میاننده دخی هیئت عثمانیه خصم اوله رق
 مستقل بالاداره قالمقدن ایسه عثمانلی سردارلخی صفتی
 الهرق شان قازانمغی ترجیح ایدنلر نادر دکل ایدیلر .
 مع هذا مؤخرأ اورخان غازی ایله علاءالدین پاشانک
 قویمش اولدقلری نظامات ملکیه وعسکریه اشبو
 اخوت عثمانیه اساسنی بر قاندها تحکیم ایتماش اولسه
 ایدی هیئت عثمانیه جهانگیرانه بر دولت اولغه بدل
 بر نوع طریقت سیاسیة حکمنی الوب از جمله شمیدی
 حالده امر یقاده کوریلان مورمونلر کی بر مسکنت
 مخصوصه بیه مغلوب اولور قالور ایدی .

درون تار یخده قره خلیل وقره رستم کی هم عالم
 هم عسکر هم سیاستکار اولان اعظم ایله بالذا کره قوانین
 عثمانیه نك نصل مکملأ وضع ایدلدیکنی حکایه ایلمش
 اولدیغیمزدن بوراده او وقوعاتی تکرار ایتکه حاجت
 کوره میر . . بوراده قوانین مذ کوره بیه درجه انقیاد
 ورعایتی اخطار ایتکلکمز لازم کلور . از جمله بر
 مملکته کیرن عسکر لک او مملکت اهالیسندن جبراً بر حبه
 بیله الماملری مقتضای قانون اولوب قونیه طرفلرنده

بعض نفرلرک بر باغدن میوه قویارملری تا اعداملرینه
قدر جزای شدیدی موجب اولمشدر . اما پوشدنتک
حسن تأثیری قونیه طرفلرینه ایکنجی حرکت عسکر-
یه ده اهلینک عسا کر عثمانیه بی استقبال ایتلری صو-
رتنده تجلی ایش اولدیغنده دقت لازمدر .

لیکن بودقت یالکز شونقطه اوزرنده لازم دکلدیر .
اندن دهها زیاده اهمیت ایله موظف عسا کرک اک
اول نزد عثمانیانه ایجاد ایداش اولسنده دقت
لازمدر . قوانین جدید عثمانیه اقتضاسنجه بر جمعیت
مدنیه نك امور اساسیه سی صنف صنف آیراش اولوب
مثلا ملل غیر مسلمه نك عبادتخانه لری اموری کندیلرینه
تقویض اولندیغی و ملت مسلمه نك امور و قعیه و علمیه سی
دخی کذلک ید علمایه تودیع قلندیغی کبی احقاق حقوق
مسئله سی بر موجب فتوی حرکت ایده جک اولان
قضایه حواله اولنوب مأمورین ملکیده نك محاکم
اوزرینه هیچ مداخله لری نه میدان بر اقلامش و هر
سجاعتک امور انضباطیه سی صو باشی نامیله بر
بیوک ضابطه تقویض قلنوب سجاعتک امور ملکیده سی
دخی سجاعتک بکی عنوانن الان بر متصرفه تودیع

اولمیش بولاندیغی صرهدده هیئت عسکریه دینلان
شی بو صنفلرک هیسمنک خارچنده بر صنف ممتاز اولوب
بونلرک طو یومقلری ایسه یغما کراکه حصر ایملک
بالاخره نظام وانتظاملرینه خلل ویره جکی دوشو-
نلش وایشته بولزوم اوزینه هر بر نفره وقیایه پیاغی
حالری وقلری او یغون اولنلرک معیشتلرندن اعلی برر
معیشت تأمین ایده بیله جک قدر معاش لرتخصیص
قلنشدیر .

دیمک اولیورکه عثمانلیلری اویله جنکیریلرکی
تخریب و یغمای عالمه چیقمش بر سوری تورودی عد
ایمکه بوجهته امکان یوقدر . حتی قمع اولنان
محالرده اوال واملک میریه نلک حکومت نامنه ضبطی
ایچون دخی قانونلر وضع اولنهرق اموال منقوله نلک
خسی بر موجب حکم شرعی جیب همایون ایچون
تفریق ایلدلکدن صدکره درت خسی دخی غزاته
تقسیم اولنلق وارضی میریه یه کلنجده بونلر اوقافه
بالحویل موقوف لهلرینه ربط اولنلق مقتضای حکم
نظام ایدی .

اخلاق اخوتکارانه عثمانیه اشبو قوانین اساسیه

ایله بر لشجه عثمانلیلر حقوق عمومیه به رعایتیه هم
 اخلاقلری هم نظاملری اقتضاسیجه مجبور اوله رق
 ایشته بو گونه قدر اورو پالیلرک ملت محکومه عد
 ایلدکاری ملل غیر مسلمه نك دینی ابتدای انش-ارده
 مادتا ملت حاکمه اولملرینی بو حال تأمین انش و حقوق
 و حریت عمومیه به بو صورتله ایدیلان رعایت سایه -
 سنده در که دولت علیه عثمانیه تبعه غیر مسلمه سنده تبعه
 مسلمه سی قدر امنیت ایدرک حتی تاریخک دها صکره
 لری ایچون قید ایش اولدیغی وقوعاتدن اکلاش-ملد
 یغنه کوره اناطولی اهالیسی روم ایلی اهالی غیر
 مسلمه سندن زیاده عصیانلر ایله دولتی بیرار ایلدکاری
 حالده تبعه غیر مسلمه ده بالنسبه الک فنا زمانلرده بيله
 او قدر فکر عصیانک میدان الدیغی کورلما مشدر .

عثمانلی هیئت جدیده سنی جراد مصیبت آسا
 بلاد اوزرینه موقه منتشر و مسلط ظن ایدنلرک بطلان
 افکاری او قدر میدانده ایدی که یالکزی یوقارودنه پرو
 تفصیل اولنان اخوت و نظامات و تسیقات دکل عثما
 نلیلرک دها هانکی آثارینه باقش اولسه لر یونلرک بر
 مدنیت جدیده اربابی تمکن و مؤسس بر هیئت اولد

قلربی حکم ایتک ایچون آثار مذکورہ نک هر برینی بر
 برهان مادی و فعلی اولق اوزره حکم ایدرلر ایدی .
 بر ملاکتہ عثمانلی ایاغی باصسونده اوراده مکمل
 قالدیرملر یوللر کوریلر کروانسرایلر جاملر جامعلر
 مدرسه لر مکتبلر عمارتلر وجوده کلسون! بوقابلی ایدی؟
 هرج و مرج عالمدن یغما کرلکله استفادیه چیقانلر
 یقارلر یایمزلر . عثمانلیلر ایسه یایغنه چیقوب ییقمقدن
 توقی ایدرلر ایدی . بونک برهانی دخی شوملکترلرده
 انبیئ عتیقه نک هیچ بریسی ایادی عثمانیان ایله هدم
 ایدلماش بولمسنه مقابل عثمانلیلرک ایادی همتلرله
 یایلان بنارکده انبیئ قدیمه یه غبطه بخش اوله جوق
 صورتده حالاً بقا و دوامیدر .

تخریب عالمه چیقان ملتلر اول باول معارفله
 دشمنی اولدقلری و اهل معارف دخی بونلردن ابا
 واجتناب ایلدکلری حالده عثمانلیلر اعلائی رتب بشریه
 معارف اولدیغنه قناعت ایدرک ارباب معارفه اکاکو
 ره حرمت و رعایت کوسترمش اولدقلری کبی بشقه
 یرلرده لایق اولدقلری حرمتی کورده میان ارباب معارفه
 دخی بهرہ عسکریه اربابی مثللو عثمانلیلرک دائره

سلامتی داخل نموده گندی اقبال لرینی بولمشر و بناء عليه
عثمانليغلك ايلك دور ظهورنده عاشق بشه و مخدومي علوان
چلبی و بایزید اولك دامادی اولمسه نندن طولایی امیر
سلطان دیو بنام اولان شیخ شمس الدین بخاری و مولا
ناشیخی و قره داود و خواجه علی و تاج الدین کردی
کبی مشاهیر ارباب معارف بودور جلیلی صحایف ائمه
عليه وادیه فصلنده پارل پارل پارلا تمشدر .

*
* *

ایندی بو قدر منتظم بر حرکت حکیمانه ایله جهها -
نکیرلکه چیقان عثمانلیلو ایلک یوز سنه طرفنده کی
فتوحات بی نهایت و اجراءات و تنسیقات ترقی پرورانه -
لریله شرق ایمپراطورلغلك شعشعه شوکت و اقبالنی
بالکلیه منخسف ایدرله حتی خواجه دخی کیمش اولدیغی
کبی بلغار و صرب و اولاح و بوسنه و مجار حکومتلرینی ده
ترتر تترتمش ایدی . بو حالده اگر تیمور بلیه سی
وقوعه کلمش اولمسه ایدی بایزید اول حاضر تلو
استانبول فتحی ایچون اکال ایتکده بولندیغی تدارک
ایله فاتح قسطنطنیه عنوانی محمد ثانی حاضر تلو نندن
الهی الشمس سنه اول قازانه جتمل ایدی . انجق تیمور

وقعه سنك وقوعی بومظفر يتك ياریم عصر قدر
تأخرینی موجب اولشد.

عثمانلیلردن بشقه هانکی ملت اولسه ایدی
تیمور وقعه سی اویله یاریم عصر لوق بر تأخر
ایقاهیله قالمیوب عادتاً بر پریشانی کالی بی مستلزم
اوله جغنه هیچ شبهه یوق ایدی . زیرا درون
تاریخده کورلش اولدیغی اوزره تیمور مقهور انقاض
سلجوقیه دن اولان طقوز امارتی تکرار احیا ایدرک
یوز سنه لك امکی حکمدن دوشوریش اولدقدن فضله
شهراده لك یکدیگرینه قارشو وقوعبولان رقابتلری
قوه عثمانیه بی یارده لیه رك واز جله اوزمانه قدر عثمانلیلرک
خرچکذاری اولان استانبول امپراطورلغی دخی
برونی بیولته رك کندیسندن استحما ایلیم شهراده .
لری زیر جناح جایه سنه مقاله اعلان اقتخاره باشلا .
مشیدی .

حال بوصورتی بولمش ایکن چلبی سلطان محمد
حضر تریك یکیدن احبای دولته موقتیلرینی بحق
الغضایه بیلک ایچون هانکی شاعرک طبیعت شاعرانه .
می کفایت ایده بیلور؟ یا او قوجه صوفی بایزید

پاشانك آصفلىرى رسواى ايدن تدابير ماقلا نه سنى كيم
 بحق مدح ايدمه يلور؟ حال انقراضه كلان بردولتى
 احيا ايلك يكيدين بردولت تشكىلندن بيك قات كوج
 اولديغى حالده اون برسنه ظرفنده دولت عثمانيه يى
 بوذا تلىر انقاضى مياننده تكرار بنا ايلد كدن ماعدا چلبى
 سلطان محمد حضرتلى سكرسنه دهادوام ايليان مدت
 استقلالنده عثمانىلىغى ايلك حالنه نسبتله برقاچ قات
 ده تقويه و تأييده موفق اولمشدر .

فقط چه چاره كه تيمور يوزندن كور يلان مادى
 ضررلى چلبى سلطان محمد حضرتلى له اندن صكره
 مراد ثانى و محمد ثانى و بايزيد ثانى حضرتانك سايه
 هم تونده معز يادة جبر و اتمام ايدلديكى حالده معنوى
 ضررلى بردرلو جبر اولنه ميوب وجود دولته ارتقى
 ابدى تشنج و تجدد ايدم جا ياردر اولقى اوزره باقى
 قالدى .

اشبو معنوى ضررلى دن بريسى صنوف عساكر
 عثمانيه نك يكديكريله رقابته چيقان شهزاده لر جانبدن
 جلبلى، ايچون وقوعه كلان تشويقات انتظامات
 و انضباطات قديمه عسكريله لرينه خلل و ير مش

اولملری قضیه سی اولوب بوفنالق مرور زمانه بیو یه
بیو یه نهایت بر شهزاده نك تشویقیله بر پادشاهك
خلعنه قدر وارمش و هر جلوسده جلوس بخششی
مارسزقلری یکچری ایچون بروسيله اختلال وعصیان
اولق مادی بومضرتدن تولد ایلشدر .

معنوی ضررلرک ایکنجیسی دوزمه مصطفی
وجنید صو باشی کبی صاحب خروجلرک اخلاق
عمومیة عثمانیه برفساد صو قلی قضیه سی اولوب
اوزمانه قدر خروج علی السلطان کریمه سی یالکز
اولحق قره مانزاده لرده کور یلور ایکن بوایقی عاصی
اقوام عثمانیه کنندی کبی صاحب خروجلره اتباع
درسنی و برمشلردر که بوده بالاخره جلالی بلاسی
مثالو داهیه لره قدر آچیلان یوللرک مقدمه سی اولشدر .

اوچنجیسی ایسه سماو اوغلی بدرالدینک خلق
مذهب اصلی خارجنده بر طاقم اعتقادات باطله یه دعوت
وجلب ایتسی قضیه سی اولوب اوزمانه قدر اتباع
ایدیلان احکام یالکز حکم جلیل شرع شریفدن
عبارت اولدیغی و موجود اولان برقاج طریقت علیه
دخی خلعت تربیه باطنه سندن بشقه برشیته خدمت

ایتمدیکى حالدہ سماو او غنمندن النان نمونہ اوزرینہ
مؤخرأ نیجه مهديلر ميدانه چيقدیغی کبی بعض طریقتملر
دخی مادتا برنوع پولتیقه جمعیتلری صورتی المشملر
ایندی .

لیکن نه قدر اولسه براخوت سیاسیه اسمی
اوزریند مبتنی بولنان اتحاد عمومی عثمانی بو اختلال
اخلاقی چوق وقت آثار مضره سنی میدانه قویتمقدن
منع ایلدیکی کبی نظامات اسمیه ده اولان قوت و متانت
دخی سائر نظامسنزلقلره بیاغی مقاومت ایده بیله جک
درجه لرده اولدیغندن ادوار آتیه ده دولت علیه نك
شان وشوکتیینه آرتمقدن کیروقلاماشدر .

چلبی سلطان محمدن بایزید ثانی حضرتملرینک
ختم سلطنتلرینه قدر صنایع و معارف خصوصاً صنده کی
ترقیات عظیمه من مدینت عثمانیه یی برقاندها تأیید
و تأییده خدمت ایده جک بر نعمت اولمشدر . ملافکاری
و کورانی و خسرو و قسطلانی و وفاق شمس الدین
ویازیحی زاده و خطیب زاده فحول علمادن اوله رق
تدریسات و تألیفات علیه لریله جهانی مستغرق نور
معرفت ایلدکاری کبی سعدی و قره یعقوب و حکیمشاه

وسنان بشه و اوغلاری یعقوب بشه و احمد بشه و علی
قوشچی و میرم دخی هر بری علوم ریاضیه و طبیه
و فلکیه دده یکنه روزگار اولان عالمردن ایدیلر .
سیوطی و عمر بشاه و انشیری و ادریسی بوزمانک
ابوالنار بخاری اولوب یالکز تاریخ عثمانی بی تأسیس
ایتمکله قلمیه رق مورخین عرب و عجمدن اخذ ایلد .
کاری معلومات ایله دور آمدن دور عثمانیانه قدر
اولان شئوناتی نقل و قید صورتیه تاریخ عمومی به
دخی خدمت ایتمشدر . قاسم پاشا نشانچی محمد پاشا
و شاهدی و عماده جمالی و جدی الهی و نجاتی دخی
ادبیات عثمانیه بی یکمیدن کبی بر صورتله وجوده
کتورن مهره شعر ادنر لر . معارفک یالکز رجاله
مخصوص اولیبوب نسوانه دخی شمولی ایچون شاه
عره مشهوره مهری وزینب خانم لر بر دلیل
جمهدر لر .

ترقیات صنایعیه کلنجه : بوزمانلر اورویاجه
باروتک شیوع استعمالی هنوز باش کوستر مکده اولوب
عثمانیلر ایسه کرک بواسطه ناریه صنایعندن و کرک
صنایع بحریه دن همان بخیر ایکن و ندیکلر دن بو

صنعتی اخذ و اقتباس ایتلرینی متعاقب او قدر
ایلوویه کو تور مشلدر که بعض محاربانه الیرینه کچن
عثمانلی طویلرینی استادلر من بولنان و ندیکیلر عادتاً
مودل اتخاذا ایدرلر و عثمانلی لیمانلرنده انشا اولنان
کیلره نظر حیرتله باقارلر ایدی . زیرا بوسنایلیجه
سریعاً حصوله کلان ترقیات سایه سنده اق دکرده
عثمانلی قورصان کیلری بیلر و ندیکک منتظم دونماسنه
غلبه چالغه باشلامشلا ایدی .

بودورده دولت علیه نك یکیدن موفق اولدیغی
تنظیمات ملکیه و تنسیقات عسکریه یی کوزلجه تقدیر
ایده بیلک ایچون بونلرک محصولی اولان قوه عسکریه یه
بر نظر اجمال عطف ایلک کافیدر . حاصلات عشریه
اوتهدنبری اولدیغی کبی ارباب تیمار و زعامته معاش
اوله رق ترک ایدلش اولوب یکیکیری معاشرلی ایسه
کرک درس عادتده خزینه دولته مائدا اولان واردات
منوعه دن و کرک ولایتلرده دفتر دارلرک زیر اداره لرنده
بولنان الویه خزینه لرندن و یریلور ایدی .
بویله دائمی صورتله موظف بولنان عساکرک مقدارینه
کلیجه : زعما و تیمارلی و سپاهی اوله رق سوارینک

موجودی بهری بشر یوز نفر دن مرتب اون التی
 الای اولوب یکچیری دخی بهری بیکر نفر دن مرتب
 قرق اورته پیاده تشکیل ایدرلر ایدی . بونلر هب
 عساکر نظامیه دن معدود اولوب محارب به حالته
 یاز یلان اقتحیم لر دخی داخل حساب ایدیلور ایسه
 اردوی همایونک مجموع قوتی یوز الی بیک درجه سنی
 بولور ایدی . حاله وکه بونلر دن ماعدا کرک سرای
 همایونک قیو قولاری و کرک ایالت لرده بکار بکیلر یله
 سنجاق لرده سنجاق بکیلرینک سکبان و صار یجه کبی
 ناملر ایله مستخدم اولان قیو خلقلری دخی بشقه جه
 یوز الی بیک کشیک بر قوت وجوده کتور لرلر ایدی .
 شوا آثار ترقی تاریخ عثمانیه دن بودورک اهمیتینی
 موازنه یه کافی اولور سده فتح قسطنطنیه قضیه سنک
 اهمیتینی موازنه یه عادتاً هیچ برشی کافی اوله مز . زیرا
 استانبولک قحیمله عثمانیلر یالکز شرق ایمپراطور لغنک
 تاریخ وجودینه دکل تاریخ عمومینک اومدهش
 ازمنه متوسطه سنه نهایت و یرمش اولدقلری کبی اندن
 صکره ارتق رومای شرقی پایالق مقامی دیمک اولان
 استانبول بطریق یقینکنک و بناء علیه شرقده عمومیت

اوزره خرسیتیانلغک وجودی ده قالدیرلق لازم کله .
 جکنه بتون اورو پا ار باب تعصبی منتظر اولمشر ایکن
 فاتح سلطان محمد حضرتلری شرق کلیساسته طوقمند
 قدن فضله اوزمانه قدر باز آمپرک شمان مسخره سی
 اولمش بولنان یطر یقلق مقامی کمال تعظیم و توقیر ایلله
 حایه دخی ایش و بومقامک امتیازات قدیمه سنه یکیدن
 امتیازلر ضمیمه قدرینی دو بالا ایتشدرد . ارتق عثمانلی
 وطنک عمومی بر وطن مشترک اولدیغنی وامت معظمه
 عثمانیه یی تشکیل ایدن مللنک عمومی دیانه وسیاسته بر
 حریت متساویه ایلله حر و بر امتیاز متساوی ایلله ممتاز
 یکووجود بر امت اولدیغنی جهانیه بوندن اعلا اعلان
 ایده جک بر قضیه تصوری قابلمیدر ؟

*

* *

یاوز سلطان سلیم وقانونی سلطان سلیمان و سلیم
 ثانی و مراد ثالث زمانلرندن عبارت بولنان دور صحیح
 استیلایه کلنجه : بودورده عثمانلی دولتک پیدایش
 اولدیغنی وسعت صوک حدود جهانگیرانه من اوالد .
 یغندن بونی بر خر بطه اوزرنده تعیین ایلیدرلک شویله .
 جه بر باقیله جق اولورسه ار باب فکر و مطالعه ایچون

ضایت و ستم حقنه در حال حصوله کله جک اولان
نظر و معلومات عادتاً موجب حیرت اولماقی قابل
دکدر .

حزز دگری طرفندن تعیین حدوده بدأ اولنور
ایسه تهره ک نهری اوزرنده واقع قزلیار شهری مبدأ
حدود اولوب اونقطه دن آزاق قلعه سنه چکیلان
خطک جنوب طرفی ممالک شاهانه دن عد اولنور
و شمال طرفی ایسه یرلی اهالی مستقله سنک زیر ضبطنده
بولنوب بونلر دخی اکثریتله کندیرینی عثمانلی حاکم
یه سی التنده کورر ایدی . از اقدن قامه نیچه یه قدر
چکیلان بر خط موهوم دخی روسیه ایله حدود ممالک دگری
تقریبی ایدرک بو خطک جنوب طرفنده بولنوب شمعی
روسیه یه ملحق اولان قوزاعه و قاترینوسلاو و کره .
سون و پوده لیا و قریم و سایر ممالک هب عثمانلی ملکی
ایدیلر . قامه نیچه دن برز بورغه و اورادن غراج
واندن اونا نهرینه و بعده ونیدک دگری ساحلنده واقع
قاتارو لیماننه ایندیر یله جک اولان بر خط منکمر دخی
لهستان و مجارستان و اوستریا و خرواستان حدودلر .
مزی فاصل اوله رق ممالک مذکور دن نه قدر لر ی

بزم اولدیغنی کوسترر • واقعا خط منکسر مذ کو -
 رک برو طرفنده بعض مملکتلرک عثمانلی تصرفنه کیر-
 مامش اولدقلری درکار ایسه ده اوتیه طرفنده برطاقم
 مملکتلرک دخی تصرف عثمانی التیه کیرمش اولسی
 مناسبته خطک ز یقزاقلمندن تولد ایدن بو نقیصه
 اول قدر اهمیت کوتورمز • حدود بحر یه کانه :
 اق دکرده کرید جزیره سی بزم حدود ایچنده قالمق
 اوزره وندیك کور فزی مقابلمندن سبته بوغازینه طوغری
 امتداد ایلیه جک بر خط بحر سفیدک قسم غرب شمالیسی
 ایتالیا و فرانسه و اسپانیاه ترک ایدرک قسم جنوب
 شرقیسی کاملاً بزه ویرر ایدی • افریقاچه فاسه
 و آنجه قدر مغرب زمین هب حدود عثمانی داخلنده
 اولوب بو قطعه نك جنوب جهتی صحرای کبیر تحدید
 ایدر و اوحد دخی حبشستانک اورتیه سندن کچوب
 قطعه مذ کوره نك شمال طرفنی بزده براقور ایدی •
 بحر احرو بحر عمان و بصره کور فزینک احاطه
 ایلدیگی برالعرب تمامیه بزم مملکمز اولوب شطالعرب
 منصبتندن غزوینه و اورادن دخی مبدأ حدود اولان
 قزلیار چکیلان خطوط ایران ایله تفریق حدودمز
 خدمت ایدر لر ایدی •

ایشته بوحود داخلنده یوز یکر میلیون
 نفوس موجود اولوب بونلرکجه سی طوغریدن
 طوغرییه اداره دولت علیه تابع بولندیغی جهته
 شو وسعت روما دولته دخی میسر اوله ماش وچین
 دولتمدن ماعدا بوقدر نفوسه حکم ایده چک بر دولت
 دها قورلماش اولدیغی دعوا ایدسه نابجا دکلر .
 بوقدر نفوس میانده عن اصل درتیوز چادر خلقتدن
 عبارت بولنان عثمانلیرک دکل آ مقدارلری بش میلیونه
 تقرب ایدن ترک جنسنک بیه عادتاً غائب اولوب کیده
 چکاری نظر حکمته النور ایه کور یلور که بوجها
 تکیرانه موقیات محضاً مدیت عثمانیه نک هر مدیت
 فائق اولسی سایه سنده حصوله کلمشدر . اوروپا
 مورخلری بوحقیقتی قبول وتسلیم ایده مدکاری ایچون
 عثمانلی قورصانلریله دونماسنک بتون اوروپا قوای
 متفقہ بحریه سیله اوغراشدیغی و بزدن استمداد ایدن
 بر حکومتیه معاونت ایچون سویشده مجدداً تکمیل انشا
 اوانه رق هندستانه قدر بر فیلو سوق اولنوب پورتکیرلر
 مغلوب ایدلیدی بر زمانده مثلاً مجارستانده دخی جنک
 ایدیلور ایکن یمن و ایران مثلودنیانک اوتهی او جلری

هد اولنان مالککه قدرده اردولر سوق ایديله بیلسنه
 بردرلو معناو یرمه یه رک کندیلرینی بر حیرته قایدیرلر .
 اکر مدنیت عثمانیه نك بونجه اقوامك افکار عمومی -
 سنی بر نقطه اوزرنده جمع ایلش اولسنه نظر حکمتله
 باقه حق اولسه لر ایدی شو کبی حرکات عظیمه بی
 هیچده محیر العقول بولزلر ایدی .

جهانگیر ملت لردن ال تمذنی رومالیر اولدیغی
 وقوانین مدینه لری حالا اورو پا دولتری ایچون مأخذ
 قوانین اولقده دوام ایدلدیکی حالده انلر اصل رومالی
 اولق ایله روما محکومی بولنق ارمسنده پک بیوک بر
 فرق بولندیرلر ایدی . بزده ایسه بر کره عثمانلی صفت
 جلیله سنی انلر ارتق عثمانلیلغک ابتدای تأسیسندنبیری
 عثمانلی ایملر کبی کافه حقوق و شان و شرف عثمانی یه
 مالک اولورلر ایدی . وایسه رک رجال عسکر یه
 و کرک ملک یه و علمیه و سائر مزدن اولان مشاهیرک هر
 بری ملکیزک بر طرفنه منسوب بولنمسیله ثابت اولور .
 ال بیوک سر عسکر و سردار اولق واک شانلی وزیر
 بولنق و حتی مقام صدارتی ودها پارلاغی اولق اوزره
 شرف شهریت سنییه بی احراز ایلک ایچون نه بوشناق

اولوق مانع اولور ایدی نه کرجی بولمق ؟ بر عرب بر
 ترک بر لاز بر کرد هر نه اولور سه اولسون الیوک مقا-
 ملره کله اییلد کیری کبی بوسنه و خرو اتستان و سائر
 اهالیسی نصرانی اولان مالکدن دخی بر چوق اعظم
 شرف اسلامیتی قبول صورتیه بومقاملره کیشلردر که
 بعضی نصارا مورخلری بونلره « مرتد » دیه لغت
 خوان اولور لر ایسه ده بونقطه اوزرنده کی حقسنر -
 لقلری هر زمان ایچون کنیدی کندیلرینی محجوب
 ایتمک کفایت ایلر .

ایشته بویه ملل ملحقه دن هیچ ریسنک اصل
 عثمانلی به نسبتله دور اولماسی ودهامهمی میدانده اصل
 عثمانلی دینله جک بر عنصر بولمیب عثمانلی دیمک ملل
 واقوام موجوده نك هیئت متحده عمومیه سندن عبارت
 بولمسی کرچکدن رومالیلرده دخی کورلماشدر .
 حتی انلرده امر اصفنک حیوانات عادیه دن هیچ فرق
 بولمیدینی حالده بزده بر چوق اسرانی بیه سردارلق
 ووزارت مقاملرینی احراز ایلد کیری کورلماشدر .
 دولت علیه عثمانیه نك شوالک و امع زماننده عموم
 قوه حربیه سی دخی تار یخلو مزدن استخبار اولنه .

بیلکده در . صنوف متنوعه یه منقسم اولان منتظم
 سوار یمزك مقداری قرق بیک ایدی که بومقدار دائمی
 صورتله حیوانی باشنده بولنور ایدی . حین حاجتمده
 یوز بیکدن زیاده سواری چیقاره بیلور ایدک . زیرا
 برنفر سپاهی دیمک سایس و اوشاقلری برابر اولدیخی
 حالده بش التی و بعض زعم و سپاهیلر اون نفر دیمک
 ایدیلر . منتظم پیاده من یوز بیک او اوب حین سفرده
 بر اول قدر دخی آقجی ظهور ایدر ایدی . یالکز طوپچی
 صنفنده اون بیک نفر معلم و اوسته طوپچیلر من وار
 ایدی که محارستان طرفلرنده وفات ایدن برطوپچینک
 مخلفاتی میاننده یالکز او محار بده سبق ایدن تجر به لری
 اوزرینه افواه نار یه نك بعده بر قاتدها اکانی کوستره .
 جک نمونه لر ظهور ایتسی نظر دقته النور ایسه بونلرک
 یالکز طوپ انداز اولمبوب بلکه بر طوپ مهندسی
 اولدقلری ده اکلاشیلور . بحریه مزده کرک طایفه
 و کرک محار بلرک مقداری یوز یکرمی بیک درجه سنه
 واروب بونلرک بر بیک قسمی دخی روملردن ایدیلر . قلعه
 لر مزده کی طوپلر حسابیه قاتلیدیغی حالده یالکز میدان
 محار به لریله محاصره لره سوق ایچون دائما سیار

حالتده بولسان طو پلرك مقداری بشیوزدن متجاوز
ایدیر که بولرك انک او فاقلری شمیدی طو پلرك بیوجکری
قدر اولوب الله منتظم بولر بولندیغی حالتده فصل
سوق اولنه یلدر کیری شمدی دوشونک بیله انسانیه
حریت و یرر . دوشمنلرک ایریلی او فاقلی درجوز
کیری به قدر واردیغی چوق کرملر کورلمشدر .

* *

بودور یا لکزه . سمعت ملکه و ترقیات عسکریه من
جه انک کالده بولند . شهمز دور و لقله قلیوب صنایع
و فنون عسکریه و علوم و معارف شتاجه دخی دور
کالمزدر . ذاتاً و سمعت ملکیه و ترقیات عسکریه بی تأمین
ایدن شی دخی معارف و صنایع دگیدرلر . بوسره ده عثمانلی
مهندسلری فاس و قریم و ایران طرفلرینه کیدرلر اراز آثار
هنر ایدرلر ایدی . شمدی طرده بزم تدنیاتمزه نسبتله
اورو پانه قدر مترقی کورلمکده ایسه اوزمان بتون
ملل مسئله و حتی برچوق جهتلرجه اورو پایه دخی
نسبتله بز او یله مترقی کور یلور ایدک .

زنبلی علی افندی و ابن کمال و ابوالسعود بودورده
فتوایه متعلق علومک ائمه سی مقامنه قائم اولوب طاش

کو پر بی زاده و ابراهیم چلبی و برکوی محمد افندی
 دخی علوم شرعی و فقهیه ک متبحر شدن و تألیفات
 کثیره از بابندند در . فوزی و فردی و سلاخی
 و ابوالفضل و سنان چاوش و عصرک الک بنام مؤرخان
 ندن اولوب باقی فضولی خیالی سروری لامعی فغانی
 یحیی لطیفی عطایی غزالی نوعی زاده و سائر او حیور دن
 متجاوز مهره شعر او بلغای ادبا بود در ک نشان ادیبی
 کو گلره چقار مشردر . هندستان اندن بلوچستان
 و افغانستان و ایران طریقله در سعادت عودت این
 ریاضی مشهور رسیدی رئیس ایله پیری رئیس فنون
 بحریده، تألیفات نافعه صاحبی ادملر او لوب کمال
 رئیس طور غود پاشا خیرالدین پاشا مراد رئیس
 سلیمان رئیس قورت او غلی و صالح پاشا پالیه پاشا
 قلیج علی پاشا دخی هر بری صنایع بحریه جه ایجاد
 اختراعه مقصد و اعظمین ایدیلر . از باب سیاست
 میانده دخی مصروفولی محمد پاشا سنان پاشا جلال
 زاده و فریدون بک و عثمان پاشا دیپلمات عنوانده
 کر چکلدن مستحق مشاهیر دن ایدیلر .
 عثمانلی مدینه ک توحید اقوام خصم و صند .

کوستردیکی تأثیرات بی نهایت به برده بویله هر جهت به اسباب
 رفیقین مکملیتی ضم اولنه رقی و حال کوزا و کنه اندیغی
 زمان بود دولتک دهها زیاده توسع ایتدیکنه و باخود
 هیچ اولمز ایسه شو غایت و سعی محافظه ایسه مدیکنه
 تأسیس اولمزلرک یردن کوکه قدر حقاری وارد رزیرا
 ینه بودورک جمله موقیقاتدن اولمق اوزره ذات رسال
 تشنه حضرت پیغمبرینک برپوزنده خلافت عظمای
 عمومی می دخی خاندان شوکت نشان عثمانی به انتقال
 ایله کدن صکره عثمانی پادشاهلری ارتق بتون عثمان
 نایزلرک حکمران دیشانی اولقله قالیوب دنیا یوزنده
 موجود اولان ایکسوز میلیون مسلمانک دخی خلیفه
 قدس عنوانی اولمشلر ایدی . نالک اسلامیه ایسه
 یکدیگرینه متصل بولندقلرندن و ارتق هند پادشاهلری
 یله باشلری صیقلدقجه عتبه کردون مرتبه خلافت
 مراجعتله استعدای جایه به باشلادقلرندن بو حالد
 حدود چین قدر نشر عدالت عثمانیه امکانی الده
 ایدی .

الحق بودورده از جمله مراد ثالث حضرت نرینک
 مناجله به طرغ اولان سودا و بانک سرای همایونجه

کلی اغتشاش شد سبب اولدیعی کبی طائفه عسکریه
 دخی سرکشلکارینی آرتدیرمش اولدیقدن دولت علیه
 عثمانیه الک اوزاق اولان تبعه ملحقه نك اطاعتلندن
 زیاده الک بقین اولان اصدقای بند کانتک بیه اطاعتلندن
 امین اوله میه جیق بر حاله دوچار اولمش و بناء علیه
 نظر دقت و اهمیت بالاده تعین اولنان حدودک خار
 جلمینه قدر چیقده نیک شویله طورسون بعض کره لر
 استانبول سورینک خارجنه بیه اهمیت ویره میه جک
 حالر تکثره باشلامش ایلدی . ایشته بو سببه مبنیدر که
 دولت عثمانیه ایچون بوقاروی فقره ده بیان ایلدیکنز
 حدوددن زیاده اتساع ممکن اوله مدقن بشقه اوحدو
 دی اوزونجه بر مدت محافظه یه بیه امکان کور یله ما
 مشدر .

*

* *

سلطان محمد ثالث و احمد اول و عثمان ثانی
 و مصطفای اول و مراد رابع و ابراهیم و محمد رابع
 و سلیمان ثانی حضراتنک عصرلندن عبارت بولنان
 دوره بر نور و قوف نامی ویریلور ایسه ده بو قوف
 قضیه منی ملکجه اول قدر کو چولما مکن عبارت بر

شی اولوب یوقسه انتظام وانضباط جهتجه بوکا
اصل بر دور اختلال و اغتشاش نامی ویرمک سزا
کور بلور . زیرا کرک مالجه و کرک عسکر
جه اولان قوتیزک انجق اوندی بریسنه مالک اولدیغمز
زمانلر کندیمزک اون مثلی دشمنلره غالب کلدیکمز حالده
بودورده اوندی بریمز نسبتنده قالان دشمنلره کوچ حال
ایله غلبه ایدیه بلور ایسه کندیمیزی مظفر عدایمک
منزله سنه اینمش ایدک . بوندن مقدم وسعت و حیاتمز
وقوت وشو کتمز بالنسبه دهها آز ایکن دول معظمه
اغر هدایالی ایلچیلر کوندیره رک صلح ایچون یالوار لر
ایدی . بو دورده ایسه بزم دول اجنبیه یه سفیر لر
کوندیره رک صلح التماس ایلدیکمز حالده نائل اوله مد
یغمز زمانلر دخی کورلدی . لهستان و مجارستان کبی
دولتس لر قرالارینی عزل ایدرک یرلرینه یکی قرال لر
نصب درجه سنده کی شانلر مزه مقابیل اولاح بغداد
قریم کبی کندی ولایات منازره مز دیمک اولان
یرلرک والیلری یله دشمنه طیهانه یق کندی مأمور
یتلرینی زور ایله بزه تصدیق ایتدیرمک درجه لرینه
وار مشر ایدی . اناطولیده طغیان ایدن بر حیدوده

غلبه ممکن اوله مدیغی ایچون حریفی مقام صدارته
 نصب درجه لنده غرابتر من دخی کورلدی . وقتیه
 هر بری برر قرالاق و امیر اطسورلی اولان یکریمی بش
 قدر حکوماتک الکالینه حالا بزماله ایکن دور
 و قوقز ایچنده بو قدر مسکنته دوچار اولیشمیزک اسبابی
 ارامق حکمت تار یخیه جه لایه دکلیدر ؟

واقعا بودورده حالا دولتک وارداتی اسکی وار .
 دات ایدیهده مصارفی اسکی مصارف دکلی ایدی .
 حالا عسکری اسکی مقدارده ایدیهده انتظامی اسکی
 صورتده اولدیغی کی بو عسکرک استخدام اولندقلری
 برلر دخی اسکی برلر دکلی ایدی . شمده قدر واردات
 دولت انجق تزید و محافظه انتظام و شان ایچون
 صرف اولور ایکن بودورده یالکیز اسباب سفاهته
 صرف اولمغه باشلا یوب حالوکه سفاهت دینلان هر
 شیئک آچه جغی مصارفک ارقه سنی اله یملک ده ممکن
 اوله میه جغی درکاردر . عسکر من محافظه حدوده
 بدل کندی تبعه می تریه ایشنده قوللانمغه باشلا یوب
 انتظامک اختلالی ایسه بو تریه ایشنده دخی عدم
 موقعیتی انتاج ایلدیکی ایچون بر رئیس اشیا صدارت
 منصوبه قدر اکلشدر .

بودورده پاره من عسکر من دو نمانی ادوار سارده به
 نسبتله دهاز یاده ایکن بوقدر عاجز و در مانده قالمقمن
 صبیحی یالکز استانبولک احوال داخلیه سی اولمشدر
 شمیدی به قدر پادشاهلر من هر کسک هنری نه دن عبارت
 اولدیغنی بیملکه دخی قالمیوب هر کسک اخلاق و اطوار
 دینی ده یه کاکا کوره تقصیر یضی امور ایلمدکارن
 وایش اربانه درکار اولان انعام و احسانلر یه چله سی
 قشویقده بولندقلری حالده صکره سلاطین عظام
 حضمر آتده بوقیمت شناسلق قالمیوب برار انجندکارن
 آدمملری در حال قهر و تدمیره باشلادیلر . حالسوکده
 اوزی سوزی طوغری اولان و حجت عثمانیه سی
 غالب بولسان ایش آدمملری پادشاهلری مقابله سده
 اولیک ریاهمداهنه کی یالانجیلقلردن حیا ایدرک هر
 شیئی طوس طوغری سویلیه جکلرندن و پادشاهلرک
 من اجارینی ارایوب کیفلینه کوره اقردی سولیک ایسه
 انجیق مرایی و مداهن صفتنده بولنان یالانجیلر
 مخصوص اولدیغندن بو حالده پادشاهلرک انجنوب
 قهر و تنکیل ایلمدکاری آدمملر بالطبع الک زیاده ایشه
 یارایانلر اولوب میدان اقبال ایسه یالکز ریاهمداهنه

اربابانه اچیق قالور . بویه یا ! ارباب عقل و کیاست
 نتیجه خدمتک کویت کی بو غلطه و یا خود قضای
 کسلکه و یا یاشی دیسه . بلکه منجر اوله جفنی کو .
 رنجه کنیدیلرینی میدانه قویه یلورلری حاله و که
 شارلمان و ماعنه بی اولنر بو کی بلایادن مصو .
 یترینی کورهرک صوقولدقجه صوقولورلر . بوموا .
 زنه ایچون صندر اعظم قره مصطفی پاشانک حالی اورته
 یرده در که شو یله بر حال اغتشاشنده دولتی یکیدن
 تنظیمه مقتدر ذوات نادره دن اولدینی حالده بشیوز
 چکی او طون مبايعه سنده کوریلان بر اهلانن طولانی
 جینجی خواهجه کی برلینک اغواسیله بو غیلوب
 آتلی ویرمشدر . ارباب اقبال ایسه اقشامه نهانکی
 نفیس اطعمه بی بیوب هانکی جاریه بی استغراش
 ایدم جکفی دوشونمکدن فضله اکر احوال زمانه بی
 دخی دوشونمک ایسترایسه بودوشونجه می دخی ایسه
 یارمه بیله جک اولان تک توك بعض ذواتی نعمل
 اولوبده اعدام ایتدیره یلمکدن عبارت قالور
 ایلی .

بودورده مراد رابع کی سلیماناه شهنشاهلغه

مقتدر پادشاه و کوریللی کی آصفانه اداره حکومته
 مقتدر وزیر دخی کلمشدر . تاریخ بونلرک همم موفقانه لرینی
 نه یولده الفشلا ییله جگنی تعینده دخی متخیر قالور .
 لکن غدا اداک تعمم اتمش اولدوغی بر زمانده بوشللو
 ارباب اقتدارک موقیتلری انحق کندی ذاتلریله قائم
 اولور . کاشکی دولت و ملتک عمومیت اوزره احوالی
 اسکی انتظام اوزرنده بولسه ایدی ده واروب بر پادشاه
 ایله بر قاج وزیر غیر مقتدر چیقسه ایدی ! ز بر بونلرک
 عدم اقتدار لری عادتاً هیچ بر سوء تأثیر کو ستره میوب
 انتظام عمومی و فالغی ستره مدار اولور ایدی . فصل که
 بوقیلدن پادشاهلر و وزیرلر بوندن اول دخی کورلش
 اولدقلری حائده وجودلرندن او قدر مضرت حظه بوله
 کلامشدر .

ذاتاً بودورک سوء احوالندن متولد تأثیرات
 عظیمه دخی همان ینه بودور ایچینده کورلماشدر .
 بلکه شو دور وقوفک اصل سوء تأثیراتی او کده کی
 دوردن کنندیسنی میدانه قویمشدر . لغیر الیه اخلاقی
 قابل اوله میه جغی حکم اولنان اسکی انتظامک بقیه می
 استانبولک شودر جهلر ده اختلال احوالیه برابر ینه

کرید اسفاری کی بزه بیاغی شانلر فزانلیریش ایدی .
 شو قدر که تبعه مسلمنه نك بيله فکر عصیانده وسعت
 و یردیکي ورجل مسلمنه نك بيله ماللری یغما اولمقی
 ایچون جانلری اندیغی برز مانده افکار عمومیه فصارا .
 نك فصل بر تحول پیدا ایلش اوله جغنی ده حساسین
 خارج طوتمز ایسه ك امسکی اخوت عمومیه عثمانیه
 بدل شمدی میدانه بر مسلمان و کاور دعسوالری حیثیتده
 باشلامسینی الك زیاده مدهش احوالین عد ایلرز .

اسلام ایله خرسیتیان ارمسندگی بوفکر شقاق
 شو طرفه قالسون یا ملت اسلامیه ارمسندگی اهل شر-
 یعت ایله اهل طریقتک شقاقنه نه دیملی " بونلر
 یکدیگرینی تجهیل و یا تکفیر ایله ایشک دها یلرومی
 ایچون بیوک بیوک نفاقله استعداد کوسر دکلی
 حالده ارتق خرسیتیانلرک اخوت عثمانیه دخلسندگی
 بولمقلر بنی کیم دوشونه جکدر " حالبو که نزد دولت
 علیه ده بولانان بر چوق سفیرلرک معتبرنه اسلام
 و خرسیتیان ارمسندگی نفاق آر تدریق ایچون بر چوق
 مأمورلر دخی بولمقلر بونلر علمایه و ارنجهیه قدر
 حلول ایتشلر و نفاق آر تدریق اسبابی تأیید و تقویه

ایچون هر فدا کار لغی کوزه آلدیر مقده بولمیشلر ایدی .
 زیر ا دوات علیه عثمانیه به خارجاً ایدیلان هجوملرک
 بالاخره حدود عثمانیه یی توسیعدن بشقه برشی انتاج
 ایتدکلرینی کوره رک بودولنه بر چاره ظفر وار ایسه
 اودخی هرج و مرج داخلی ایله قوتنی ضعفه تحویل
 ایتدکلدن عبارت کورلمش ایدی .

*

* *

شکر ایدیه جک برشی وار ایسه اودخی بو عصر
 دد ترقیات علیه و صنایعیه مزه وقوف گلش اولماسی
 قضیه مندن عبارتدر . پچوی و عالی و عبدی و نشانجی
 زاده کی ذوات تاریخ نویسلک جهتنی اسلافک بر اقمش
 اولدقلری در جاتدن دها عالی بر درجهیه ایصال ایلش
 اولدقلری کی نفعی و نوعی و نادری و بهائی و نابی
 کی بلغا و ادبا دخی ادبیاتمزی یک زیاده ترقی ایتدیره
 رک ظرافت عثمانیه یی آرتدیر دجه آرتدیرمش ایدیلر .
 کاتب چلبی نامیله اشتهار ایدن حاجی خلیفه
 علوم شتاده کی بهره کلیه و تألیفات نافعه سیله یالکز
 بو عصری دکل بلکه بداندن منتهاسنه قدر عثمانیله
 حق افتخاره نائل ایشدر . انک زمانه کلنجیه قدر

ار باب معارف میاننده اورو پا کتب و فنوننی تتبع
ایدرک امرتالیفه بر طرز جدید و یرن کسه کورلماش
اولدیغی حالده بوترقی مشار الیهده کورلش و علوم
شرقیه دن فقه و حکمتدن ماعدا غریبه دن ریاضیه
و تاریخ و جغرافیا علملرینی اورو پا ترقیات اخیر مسنه
نسبتله یکیدن احیایه موفق اولمشدر .

صنایع جهتنه کنجه : اناطولی و بالخاصه استا -
نبول قابریقه لر ینک وجوده کتوردکلی کلیملر
چانه لر قطیفه لر وروم ایلینک ارناودلق چوقه لری
وسائر برچوق معمولات یالکز حوایج ضروریه -
مزی تسویه به کفایتله قالمیوب بونلر کلیت اوزره
اورو پایه و باخصوص وندیکه کوندر یلرلر فروخت
اولنور ایدی . معمارلق و اویمه جیللق جهتلرندن دخی
صنایع مز هیچ تدنی کوره میهرلر بو دور ایچنده بنسا
ایلمش اولان ابنیه جسمیه بونلرک ترقیات دائم مسنه
شهادت اینمکده بولمشلدر .

فقط تاریخچه اصل مقصد اولان اتحاد عمومی
عثمانی فکرینه ضعف کلدکن صکره صنایع و حتی
معارفک دخی ترقیاتندن نه فائده بکانه ییلور ؟ بونندن

مضرت بیله بکلمسه همان بجا اوله یلور . زیرا
معارف برده نه قدر ترقی به باشلامش ایسمه ملل غیر
مسلمه ده و بالخاصه روملرده ده از یاده ترقی به باشلا-
یوب بونلر اورو پانک آثار متعصبانه سی کوردیکه
اخوت عثمانیه دن تبعادلری ارمغه و اوفکری سائر
افراد قوملری میاننده دخی نشره باشلامش
ایدی .

ذاتاً یالکیز بونلر دکل هب سفرای اجنبیه نك
جایه لر یله مملکت مزه طولش بولان بر چوق جزو یئر
دخی ارمی چااعتندن بر یوک فرقه یی قاتولیک ایدرک
او یولدن دخی عثمانیه دن افتراق و افکار اجنبیه یه
انهماک هوالر تبه غیر مسلمه مزک ضمیر لرنده جایگیر
اولغه یوز طوتمش ایدی . بناء علی ذلک کاشکی اورو-
پانک علوم جدیده سی کاتب چلبی و مؤخرأ مشار الیه
خلف اولنلر طرفند ن مملکت مزه ادخال اولنه جغه ینه
علوم عتیقه مز ایله قالسه ایدکده اسکی تربیه ملیه مز
بتون اقوام عثمانیه ده باقی اولسه ایدی .

حقیقت! معارفک بنی بشر ایچون هیچ بر شیئه قیاس
قبول ایدمه جک برزینت عظمی اولسی اصلاً انکار

قبول ایدہ مامکہ برابر بر ملت اگر انتظامات سیاسیہ سنی
مرتبہ کالہ ایصال ایتماش اولور سہ اولت ایچون
نور معارف بالاخرہ انظار عومید سی اچلدیغی زمان
اختلاف مذہب و تنوع قومیتدن طولانی عظیم بر
افتراقہ دوچار اولق محققدر کہ بو حقیقت جلالہ دن زیادہ
شمدیلورده بزجه حکمنی کوستر مکده در *

*

* *

سلطان احد ثانی و مصطفی ثانی و احمد ثالث
و محمود اول و عثمان ثالث و مصطفی ثالث و عبد الحمید
لول عصر لری بزم ایچون کر چکدن بر عصر تدنی
اعتبار اولنور . بو یادش اهلک اغلبی سن کالہ
واصل اولدق لری و احوال دیوات و ملت حقندہ بیوک
بیوک تجربہ لره مالک بولندق لری حالده مقام سلطنتہ
ککش اولدق لرن دن و اصلاح احوال ملک و ملت خصوصاً
ہندہ کی میل و رغبت لری دخی طبیعی بولندیغیندن
بشقه و قتلر ده اولسه ایدی بولرک بیوک بیوک موقیاتہ
مظہر اولہ جق لری شہہ سزایدی سہ ده اخلاق عومیدہ
عثمانیہ کیون فساد و هر شعبہ اداره دیوانہ عارض
اولان اختلال ارتق او قدر کو کلشمش و قوتلشمش

ایندی که بوبادشاهلر زمانلرند، محال کیمزک بر چوغی
الین کیندیگی کی تریه ملیه مزدخی همان اصلاچی
محال درجه سنده مشکل اولق مرتبه لرینی بوله جق
قصر بوزلش ایندی.

بعض محاربه لرده، مظهر موفقیت اولش ایسه ک
هیچده مهارت عسکریه مزه و ترتیبات تحریره مزه
حل اولنه بیسوب مجرد بر تصادفه حل اولمق لازم
کلور ایندی. زیرا اسکی قابلیت عسکریه و سیاسییه -
مزدن اثر قالمیه رق اکثر محار بائمز بیهوده و بلا لزوم
اولدیغی کی نائل اولدیغمز غلباتدن دخی بر نتیجه مفیده
حاصل آیدله بیسهرک معاهدات منعقد، دائمایزم
ضرب مزه اوله رق تنظیم و امضا قلمق طادت یرینی
بولشدر.

بویه بر زمانده اقوام عثمانیه میاننده فکر اتحاد
ارامغه فصل امکان تصور اولنه یلور ایندی که یکچیری
وساار صنوف عسکریه او جاقلری طادتا برر اشقیا
جمعیتی حالی الهرق ناموسکاران اهالی اسلام اولسونلر
خرسقیان اولسونلر نه مال لرینی نه جانلرینی نه عرضلرینی
بولولک ایادی تسلطندن قورقمره مزه لر ایندی. حالبوکه

لا یقطع مثل غیر مسلمہ بی بزدن صوغوتیہ چالشان اجنبی
 ہو مظلومیت ک اسلام ایچون دخی شمولی اولسنی هیچ بندہ
 قائمہ رقی بالکر داخلہ کل خارجاً اور ویاہ قارشو
 دخی مسلمانلق و بالخاصہ عثمانلیق دیمک بتون عیسا
 دالہک مالی جانی دخی کندیری ایچون مباح اولدیغنی
 اعتقاددن عبارت دیمکدر دیہ ملت اسلامیہ وامت
 عثمانیہ بی انظار عمومیہ دہ ترزیدن عالی قانزلر ایدی
 بدرجہہ قدرکہ اورو پانک بعض مصب نصرانی
 اربابی «آہ رامکانی اولسہ دہ عمومی بر اهل صلیب
 اردوسی دھا تشکیل اولنہ رقی شو ترکارک وجودی
 اورتہ دن قالدیرلسہ» تمنیاتی آچیقدن آچیفہ درمیان
 ایدرک دولترک پولتیقہ سی دخی دائماً قبایلدن قبالی یہ
 ہو مقصد اوزرینہ ابتنا ایلر ایدی

داماد ابراهیم پاشا وراہی پاشا وراغب پاشا
 وعلی انخصوص اجدرتیمی افندی و عبدالرزاق افندی
 کبی مسائل دیپلوماتیقیہ ایلہ اشتغال ایلان بعض اذکیا
 اورو یا دول معظمہ سنک مقصداری بوندن عیسارت
 اولدیغنی ا کلاہرق ہرنہ قدر دخولن اولورلر ایدیسہ
 دہ ہو مقاصدی ناسہ تفہیم ایدوبدہ افکار عمومیہ بی

بر نقطه سلامت عمومیّه مقصود جمع و توحید قطعاً
احتمال یوق ایدی . زیرا بودور اویله علماً و یاقماً و یا .
خود مزیات سائر دین بر یسی ایله تمیز و ترقی دوری
اولیوب یالکز زور بالق و انتر یغسه ایله زنکینلشهرک
رتب حالیه وصول دوری اولدیغندن اسملری یوقارو .
ده تعداد اولنان ذوات مثللو اذ کیا عادتاً زمانک نوا .
درندن معدود اولهرق سائر رجال و مأمورین دولت
ایسه بر جهل کلی ایچنده برده بورکر یاقار تعصب حالیه
ترقی دینلان شیئک . لک حرفی یئنه مدت عمر لر نده ذهنلر
یئنه کتور مز لر ایدی .

ایشته جهانک بویله سیم سیاه بر ظلمت جهل
و تعصب ایچنده قانسیله معاذ الله تعالی بونجه عصرلق
بر دولت معظمه نک یالکز کول دور وادی انقراضه
طوغری یو یان اولمقد و نندیخی بر زمانده اعقل ناس
اولنلرک یالکز بر امید اولوب اودخی هنوز شهزاده .
لک حالنده بولنان سلطان سلیم ثالث حضرتلرینک بر
فکر تجدد و انتظامه کندیلکر نجه کیتدکجه قوت
و یرملندن عبارت ایدی .

استغراب اولنسه عادتاً سزاو بحادرکه اورته اقی

بو قدر مخمل اولدیغی بر زمانده دخی ترقیات علیه من
 بر مدهش تدنی به دوچار اولماشدر . غیرتکاران
 معارف اخلاقلرندن ارثاً کندیلرینه انتقال ایمن علومی
 محافظه ده پک کوزل همت ایدرک هله عن اصل مجاری
 اولدیغی حالده اهتدا ایلمیان ابراهیم متفرقه نامنده
 بر ذات ایله انک یکنی اولوب قاضی ابراهیم دیه شهرت
 الان دیکر صاحب غیرت بر آدمک شمتری ثمره سیله
 مطبعه جلیق صنعتی بودورده بزه دخی ادخال اولمشدر که
 معارف خدمتکار لغجه جهانده هیچ بر شیئت بو صنعت
 طبعه قیاس یله قبول ایدهمیه جکی آشکاردر . اوزمانک
 بصمه لری اولوق . ه انافع کتابلردن اوتوز قرق
 نوع کتب جسمیه و معبر حالا کتبخانه لر مره زینت
 بخش اولقده درلر .

وقعه نویس چلبی زاده وراشد و پیری زاده
 واسعد افندی ووصاف و نیلی و کنبوی و صبحی و شعبان
 افندی و نوح افندی و خواجه اسحق کبی علما نصلسه
 دهرک امواج مدهشده سی ارسنده کندیلرینه بر
 سمت سلامت بوله رق یتشمشدر که بونلر میاننده از جمله
 کنبوی حضرتلری کبی بعضیلر ینک یالکز علوم

عربہ دہ دکل علوم ریاضیہ و طبیعیہ دخی مہار ۔
 تلمی واریدی ۔ حلمی و اسعد پاشا و عاصم و ثابت
 و نورس و حشمت و ندیم و ضیائی و صفائی و حیاتی
 و سایر برچوق ار باب ادب و قلم دخی بودوری تاریخک
 صحایف ادبیہ سندہ تشہیرہ کفایت ایدرلر ۔

*

* *

سلطان سلیم ثالث حضرت تلیلیہ بدأ ایلش اولان
 دور تجددمز ادوار سالقہ نک جہہ سندن دہاز یادہ
 بردقت و اہمیتہ شایندر ۔ زیرا بودور بزم ایچون
 امید نام ایلہ یأس کلی بی معاً ایجاب ایدہ جک بر دور
 اولمشدر ۔

تفصیلاتی من تاریخدہ ایراد ایلش اولدیغی
 اوزرہ سلطان سلیم حضرت تلینک دہا شہزادہ لک زما
 نلرندہ اجرا ایلد کیری تدقیقات حکیمانہ ایلہ بدأ بیور ۔
 دقلری اصلاحات اساسیہ عثمانیہ لیلک کبی اس الاساسی
 براتظام قطعہ قانونی اوزرینہ ابتدا ایلش بولنان
 برملت ایچون او قدر لایق و موافق ایدی کہ مشار
 الہک تشکیل ایلش اولدقلری نظامیہ طاہور والایلی
 ہمان تشکیلاریلہ برابر اوروپانک برچوق زمانردنبری

تنظیم و اتمامه چالشیغی عیسا کر منتظمه یه کلی رجحا.
 نلری ناپولیون یونایارط کی فن حرب جدیدک مو-
 جدلرندن عد اولنان بر عسکری ده مغلوب ایتلویله
 تحقق ایلش ایدی. بو حالی تشبیه ایچون خار جده
 هیچ بر مثال بولنه من. زیرا کر چکدن مثالسز بر شیدر
 یالکز شو صورتله ایضاح ایده بیلورز که نظام وانتظام
 دنیلان شی انجق عثمانلیلق جسم معنویسنه کوره
 بچلمش بر خلعت فاخره اولوب بونی ینه اول اندام
 شوکت اتسا ایدن بشقه هر کیم کیش اولسه هیچ
 یاقیشق المیه جغی درکار ایکن بر زماندبری اول وجود
 پر جوده اختلال و شورش کی بسبتون یباجی
 بر ثوب الباس ایلش اولدیغی حالده همت سلیم ثالث
 ایله شو یاقیشقسز ثوب لوت آلود بر طرف ایدیلرله
 اولکی خلعت فاخره سی تکرار الباس ایدیلنجه قاشیق
 کی یاقیشق المش ایدی.

چه فائده که زمانک اختلال و شورش کنیدی
 وجود خباثت الودلرندن عبارت اولان برجم غفیر
 دخی قیافت لایقه عثمانیه نکه مطلقا کسوه فساددن
 عبارت اولدیغنه اول قدر قانع اولمشلر ایدی که بوندن

شیخ بر قطعه نك تقيصنه واکا هیچ بر پارچه نك ضمنه
اصلا رضا کو ستره مند کارندن معاذه تعالی قوجه دولت
عثمانیه نك کندى کندیسنى رهین انقراض ایده جکی
مرتبه تحققه وارمیشیدی .

ایده جکی دکل حتی ایندیکی بیله مرتبه تحققه
وارمش ایدی؛ زیرا بر دولت نفوس مجه نفوس کثیره .
نك و مملکتجه ممالک متعدده نك بر نقطه یه تبعیتده اتقا .
قندن عبارت ایکن ممالک شاهانه نك هر بری پای تختندن
رابطه لرینی قطع ایتمکده اوله رق نفس پای تخت بیله
مردمک چشم دولت و ملت اولان حضرت پادشاهه
عاصی اولدقندن صکره ارتق بوندن دهامدهش بر
انقراض تصور می ایذیه بیلور ؟

یابویه برهنکامده مسلم و غیر مسلم بلا استثنا اقوام
عثمانیه میاننده فکر اتحاد ارامغه امکان تصور اولنه .
بیلور می ؟ شمذیلر ده اوروپا محرر لرینک حالا ادما سندن
غارغ اولمامش بولندقلری اوزره غیر مسلم اولنلرک حیوا .
نات عادیه قدرده قیمتلری تصور اولنه میان زمان ایشه
بوزمان فتنه نشان ایدی .

زیرا مسلملرک بیله عاصیلر و زور بار نزدنده هیچ بر

دکرلری اولیوب عمومک مالی جانی عرضی ناموسی
 بوناموسنسوز عرضمنزلرا یچون عادتاً مباح اولمشیدی .
 حکم شرع شریفه بدل عقاید باطله بکشتاشیه قائم
 اولوب قبله انامه بدل دخی قزغان شریفه عرض پر-
 ستش ایدیلور ایدی . اورته ده اتحاد اسلام فکری
 بیله بولمندیخی برزمانده اتحاد عثمانی اره مق نه قدر بعید در
 امان یارب ا خلع سلطان سلیمدن صکره یعنی
 سلطان مصطفی زماننده دولت علیه نک حاله باقوبده
 کمال دهشتله استکراه ایتمک قابل اولورمی ؟ اجداد
 عظاممزلک ارواحی بیله بو حاله نظر آتدش اولمق مستبعد
 دکدر . افریقا و امریکا و حشیرنده بیله مدنیت
 علیه نه بو قدر نفرتله عداوت کور یله می . اوزمان
 استانبولجه قاعده عمومی سیاستیه یالکز مدینتک دکل
 اسلامیتک دخی تملنی بالظه لامقدن عبارت اولمق اوزره
 حکم ایدمش ایدی . یاپیلان ایشره اللهمک رضای اسی اولمق
 شو یله طورسون شیطان بیله ملعتک بودرجه فاحشه .
 سندن حیا ایلدیکی حاله ملاعین عصاة کمال افتخار
 ایله سلطان سلیم حضرتلرینک موفق اولدقلری
 تنظیماتی کان لم یکن حکمنه قویدقدن بشقه اسکی

انتظاماتمزدن بقیه اوله رق میداند و مادی و معنوی

هر نه قالمش ایسه جمله سنی محو و یور و مشردر .

حقیقت عثمانلیق دینلان شئیك بونلر یوزندن

کوریلان صورتی او قدر مستکرها در که اورویانك

هر طرفی نور معارف و یرتو تنظیمات جدیده ایله پارل

پارل پارلامقده بولنان بر عصرده اورویا قطعده سنك

الك كوزل بر یرنده بویله مدنیت دشمنی و كندی نفسلر

ینك بیله خائنی عد اولمق لازم كلان بر بلوك اشقیانك

بقای وجودلری مدنیت عمومی بشریه ناهنه برذل بر

عار عد اولنورایدی . بونی انكار ایتك یالكر حقیقتی

انكار ایتك درجه سنده بر انصافمزلق عد اولنده من

بلكه دوات عثمانیهك انتظامات متجددانه سنی ایستما

مك درجه سنده بر خیانت عد اولنور .

ایشته دولت علیه عثمانیهك اورویا قطعده سندن

وجودینی قالدیره رق اكر بالکلیه ازاله وجودی

قابل اوله من ایسه باری آسمیاده بر كوچك دولت اولمق

اوزره ابقاسندن عبارت اوله رق بر زماندنبری اورو .

پاچه اهمیتنی آرتدیر مقده بولنان مسئله شرقیه بی الك

زیاده قوتلندیرمش اولان حال بو حالدر . بو حاله

قارشو خصومت و عداوت ایتمک مدنیت انسانیه
عالمی اهالیسنجه عادتاً بر فرض عین اولوب کندی
پادشاهلرینه کندی دینه اشترینه بیله مرحمتلری اولمیان
اول خونۀ اشتیاقا الدن باری نصارایی خلاص ایده
بیلک اورویا عالم نصرانیتی ایچون حیت دینییه
اوزرینه متحصّل بر بورج اولمش ایدی.

حالا بو کونکی کونده بیله یو حقیقه تلی کوره -
بیانلرمز کوره میانلره نسبتله اقل قلیل اولدقلرندن
تاریخ عثمانی بی محاکمه مزده بودورک احوالی شو
صورتله تصویر ایدیشمزه تعجب ایدنلر بولنور ایسه
انلرک تعجبلرینه برهیچ تعجب ایتیر.

دوشونمایدرکه مبادی ظهور عزمده ملل محکومه
غیر مسلمه بیله حتی قوصوه محاربه سی و تیمور بلیه سی
کبی الک مدهش و تهلکله لی زمانلرمزده بزه ابراز آثار
صداقت ایتمش اولدقلری حالده بو زمانده دولتک
رتبه وزارتنی حاز اولان الک بیوک عثمانیلر بیله شو -
بنای معظمک برر انقراضی اوزرنده فرمان فرما اولق
کبی برامل ابلهانه ایله ملکی تقسیمه قویولمشلرودینک
وقانونک امرینه عصیانله اتحاد اسلامی و عثمانینک

خلافه اوله رق پادشاه روی زمینه و خلیفه مسالینه
 عصیان ایشلردر . همده اوبله بر خلیفه اوبله بر
 پادشاه که ذات همایونلری کافه فکر انتظام و تجدیدک
 بر مثال مشخص و مجسمی اولوب کوستر دکاری یول
 ایسه شرع شریف اسلامک و قانون منیف عثمانیا نیک
 مقتضای محضی اولان تجدید و انتظام یولی ایدی .
 بناء علیه اوزمان تنظیمات سلیمیه به مخالف اولنلری
 شمدی ارباب فکر و انصاف نه نظرله کور مکده ایسه لر
 شمدی فکر انتظامک خلافده و رضای سلطنت سنیه نیک
 مغایر نه بولنلری بر زمان صکره اخلافک عینی
 اولنظرله کوره جملک رینه هیچ شبهه ایتیه رک تاریخ
 عثمانیدن ال بیوک بر حکمت تاریخیه اقتباسی امر نه
 دخی یالکیز بو حقیقی اقتباس ایتکله اکنفا ایتلیدر .

*

* *

سلطان محمدود ثانی حضرتلری عیصر ینک
 چلبی سلطان محمدی عد ایتک بالوجه و سزادر .
 ذات همایون ملوکانه لری خاندان خلافت عنوان
 سلطنتک بر دانه جک شهزاده سی اولملریله واقعا
 چلبی زمانده اولدیغی کبی سلطنتده کندیله

رقابت ایده جک کیمسه یوق ایدی . حتی او بردانه جک
شهرزاده بی دخی سلطان سلیم جنت مکان ایله برابر قیق
ایستدکاری ار باب عصیان ایچون هیچ عفو اولمیه .
جق بر ملعتدر یا ؟

انجق رقابت ایده جک شهرزاد کان بولمندیغی خالد
انلرک وجودی حالنده کی دهشتی هیچ منزله سنه ایند
بره جک سائر رقبا موجود ایدی . استانبولده کی
یکچیری بی واسطه تهدید ایدینان هیئت مستبده فساد
اشبور قیملرک اک تهلیکه لیبی اولوب ولایاتک هر
بریسنده دخی بر تورودی علناً رقابت دکل مخالفت
ومقاومت دخی کونسترلر ایدی .

حالبوکه سلطان محمود حضر تکرند کرب و مدهش
رقیلمه و کرک روسیه کی خارجی دشمنله قارشمقابه
ایچون نه عسکر نه خزینه نه نفوذ هیچ برشی یوق
ایدی . ایشته بو قدر مدهش بر زمانده محضاً تدابیر
حکیمانه سایه سنده اول رقیلمی بررر قره رقی وجود
دولتک اجزاسنی اولدقجه جمع وتوحیده موفوق اوللمی
ذات شاهانه لرینی چلبی سلطان محمد حضر تکرینه
تشبیه لزوم کونستر مشدر .

سلطان محمود حضرت تندرده کی جلالت قهرمانانه
 سلطان سلیم حضرت تندرده بولنوبده انده کی حلم مفر-
 طک پر مقداری دخی سلطان محمود حضرت تندرده اولسه
 ایدی یکچیر بنک ازاله سیله تنظیمات و تنسیقات جدیده -
 نك تأسيسی هیچ اوقدر قائلر بهاسنه اولیه رق دهاتیر
 ودها قوتلی بر صورتده دیسر اوله بیلور ایدی . لکن
 دفتر قدرده بر قاج محاربه دها وقوعیه اجزای حما -
 لکیزدن دها بر طاقی ایادی آخره یکمک حکمی مقید
 ایمش دیه لم ده هر زمان مدار تسلیمز اولان سمت تسلیمیه نه
 باش اوره لم .

جنت مکان سلطان محمود خان حضرت تدرینک تهیه
 ایش اولدقلری زمین استعداده تخم تنظیماتی زرع ایدن
 دخی جنت مکان سلطان عبدالمجید خان حضرت تدری
 اولمشدرکه بو خصوصده ذات شاهانه لرینی سلطان
 اورخان حضرت تدرینه تشبیه ممکندر . سلطنت سنیه نك
 شرف تابعیتنی حائز اولان ملل اقوامک بلا استثنا
 حقوق عثمانیه مالکیتی و شعبات امور دولتن هر
 برینک اولیه رأس امورده بولنلنلرک کیفرینه تابع او -
 لیهرق برر قانون لایتغیر احکامنه مر بو طیتی حقیقه

تسمیقات اور خانہ بی آکدیر بر اثر مساو اتجویانہ درہ
 فقط نہ فائدہ کہ سلطان اور خان حضرت تلی ہر
 اجزائی مجدداً تہیہ ایلدکری بر بنایہ تسمیقات عالیہ
 لویہ زینت اور مقدمہ ایکن سلطان عبد المجید خان
 حضرت تلی ہر طرفی رخسہ دار اولان بر کھنہ بنایہ
 بوزینی اور مغہ چالشد قنندن بالطبع دوچار اولہ جقری
 مشکلات پک بیوک اولمشدر ۰ اکر عبد المجید خان
 حضرت تلی نیک تنظیمات جدیدہ لرنده اولان اہمیتک
 یوزدہ بردر جہ سی افکار عمومی عثمانیہ جانندن حسن
 تقدیر ایلدش اولمشہ ایدی دہ کوچک بیوک تجدد
 تمزہ او صورتہ خدمت ایلش بولنمشہ ایدی مسئلہ
 شرقیہ دینلان مدہش شیئک بقا و موجودیت سیا
 سہ مزہ قطعاً تأمین صورتیہ حل و تسویہ سی سر
 یعاً مشاہدہ اولنور ایدی ۰

حتی اور و پاجہ افکار عمومیہ عادتاً محومز حکمی
 چوقدن و یرمش اولدیغی حالہ قریم محاربہ سندنہ
 پزی روسیہ نیک پنچہ غدرندن محافظہ اوج درت
 دولتک شتاب ایتسی خصوصندہ الیوک تأثیر محض
 او تنظیمات خیر بہ طرفندن حصولہ کنورلش ایدی ۰ لکن

تنظیماتک اهمیت حارق العاده سی انی وضع ایدنلر نزدنده
تقدیر اولمقله قالب اولردن صکره افکارک بر قسمی
دخی بو اتباع لزومی حکم ایلدی ایسده بولزومی کندی
کندیلرینه کور میوب بلکه مقلد لک ایمانی بعض رجال
سامیه اتباعاً بو حکمی و یر دیلر . افکارک قسم
کلیسنه کلنجه مسلم و غیر مسلم بتون تبعه شاهانهک
بلاستنا حقوق ملکیده و مدنییه نائل اولسی دیک
کوره اسلام قدر امتیاز و یر مک تعبیر یله تلمی اولانه ری
بونیده قیامت علامتلرندن بر یسی دیه حکم ایتدیلر .
اصل و منشأ لری نظام و حریت و حقوق متساویه
اولان شوقوجه ملتک افکار عمومییه سنده حاصل
اولان بوتغیر انسانه قان اغلاتمزهی ؟

بونکله برابر کرک سلطان عبدالحمید و کرک
سلطان عبدالعزیز خان حضراتی تنظیمات خیریه نلک
اشارت ایلدیکی تنظیمات ملکیده و عسکر یه بی پیدر پی
میدان اجرا یه قویمقده همتدن کیر و طور مدیلر .
سلطان سلیم و سلطان محمود خان حضراتی زمانلرنده
باشلانمش اولان انتظامات عسکر یه و ملکیده دن ماعدا
بر طاقم مکاتب عالییه عسکر یه بی دخی یکیدن تنظیم

و یا خود تجدیداً اصلاح ایلیه رک احیامزه حقیقه
بیوک بر یار دیمده بولندیلر .

ناسدن بر بجم غفیر دخی بو اثره اتباعده قصور
ایتمیه رک دولتی تعقیباً ملتک دخی اتباع ایتمسی لازم
کسلان اثر ترقی جو یاننده حقیقه اثبات اهلیت
ایلدیلر .

از جمله تجدید زمانه تبعیه لسان عثمانیزک کلی
بر اصلاحه نائلیتی بر چوق تألیفات و تراجم جدیدیه
بول اچهرق اورو یانک علوم و فنون جدیده سنه بز
دخی واقف اولدق . واقعا تعقیب هنوز درجه کافیه
ده صایله من ایسه ده ایلاک و قوغز بز ی او درجه یه
دخی ایصال ایده چکنه شبهه یوقدر .

هله الحاله هده زینت بخش تخت خلافت و سلطنت
اولان شو کتلو قدر تلو پادشاهمن پادشاه حکمتا کتناه
افندمن حضر تلی ذاتاً تنظیمات و تنسیقات و بونلرک
ضمننده داخل بولنان ترقیات و تجدیداتک حامی اعظمی
اوله رق عصر سعادت حصر ملوکانه لرنده کور یلان
وقوعات ایسه بودولت و ملتک تأمین سلامت ابدیه سی
ایچون هانکی طریق تدبیره کیدلک لازم کاه چکی حقنده

نظر حکمت بین ملوکانه لری نی واضحاً آچش وهر بو
 اوامرو نواهی ملوکانه لری ایشته بو نقطه حکمتی
 ارئه ایلمکده بو لشمش او لدیغندن ذات حکمتسمات
 حضرت عبدالحمید خانینک بزه کوسترمکده اولدقوری
 یوله سلوکده دوام ایده جان اولور سهق لطف جلیل
 ربانی ایله واصل سر منزل مقصود سعادت اوله جغمهزه
 هیچ بر عاقل شبهه ایتمامکده در .

جمله مزك اوزر مزه فرض عین اولان تمادی عمر
 و عافیت و تمنی مظفریت و موفقیت جناب پادشاهی دعای
 خیر بنی بوراده دخی ایراد ایله سوز مزه ختام و برهلم !


انتها













3 1761 06981384 8